



1<sup>a</sup> = 12224

1012  
77101

~~67. 7.~~

~~53-6 71. 14501~~





LIBERTI · FROMONDI

*De la librairie del collegio Imperial de la Comp<sup>a</sup> de Stus. de M<sup>de</sup>*  
S. T. H. L.

22.101

Collegij Falconis in Academia Louaniensi  
Philosophiæ Professoris Primarij

# METEOROLOGICORVM

LIBRI SEX.



ANTVERPIÆ,  
EX OFFICINA PLANTINIANA,  
Apud Balthasarem Moretum, & Viduam  
Ioannis Moreti, & Io. Meursium.  
M. DC. XXVII.

*Libreria del coll<sup>o</sup> imp<sup>o</sup> de M<sup>de</sup>*



ILLVSTR. ET REV<sup>MO</sup>

DOMINO

D. MAXIMILIANO

VILLANO A GANDAVO

DE RASSENGHEM

E COMITIBVS ISSENGHEMIIS

NOBIL<sup>MA</sup> ECCLESIAE TORNACENSIVM

EPISCOPO.

ILLVSTR. ET REV<sup>ME</sup> DOMINE,



VENIO, quò me meum munus ducit, quod de Meteoris siue sublimibus est; & talibus oculis adspici suo iure flagitauit. Plebeia enim hæc & pro fæce vulgari sunt: τὰ αἰώματα τὰ ἐν τοῖς ὑψαῖς, *qua supra nos, nihil ad nos*: & fastigiis mortalium propriè Natura ista in alto suspendit, vt suspiccretis Creatoris in mirabilibus suis sapientiam & maiestatem. Is studij etiam huius & scriptio-

nis princeps fuit finis: vt, inquam, animus scientiâ Naturæ succollatus, altiùs scandat, penetretque se longiùs in Omnipotentis admirationem & laudes. Nam etsi in rerum omnium etiam superficie, Numinis quamdam imaginem depictam, aut impressè satis insculptam habemus; veriùs tamen pleniusque in arcanis ipsis Naturæ, velut in recessu, habitat, ibique se eruditis mentibus adorandum

*Lib. V<sup>ta</sup>  
perfect.  
cap. 19.  
& Lib.  
Castel.  
c. 2 Ha-  
bu. 5.*

præbet. vt non de nihilo nuper non semel sexum suum Sancta illa virgo Theresia querelis incesse- rit, per quem Philosophorum Auditoriis interesse non licuisset, & philosophari. Plurima enim, aiebat, in cælo, in elementis, & totâ Naturâ rerum delitescunt, quæ utilissimè in solatia & bonum piarum mentium protrahantur, & infinitam gloriam Creatoris. Quò etiam eodem oculum intendisse adfirmat Reuerendissimus & sanctissimus Vir, Thomas Cantipratanus, Cameracensis olim Suffraganeus, dum *Libros de Naturis rerum*, quinde- cim totos annos, conquisitis vndique ex Angliâ, Galliâ, Germaniâ, eius rei Scriptoribus, confarcinavit.

Eâdem fini & mente vetustissimi illi hu- mani generis conditores & Patriarchæ, de Na-

Na-

Naturâ inter oues & agriculturam commentabantur: & cùm Gen. c. 24. narratur Isaac *egressus ad meditandum in agro*, *inclinatâ iam die*, id est, ad sidera & pendentia in sublimi contemplandum, & hinc gradu facto, erigendum animum in horum Auctorem; vt Hebræorum, Lyrani, Abulensis, & plurimorum est interpretamentum. Apud pleramque etiam olim Nobilitatem in magno amore & studio hæc scientia fuit. Pericles, Dux ille Atheniensium tam multis laudatus, in similitudinem aliorum & exemplum sufficiet. cuius animi magnitudinem & notam illam celsitatem, grandiloquentiam deinde & genus dicendi sublime, fulgurans & tonans, à Meteorologiâ & scientiâ naturali fuisse, consensu ceterorum Plutarchus adfirmat.

Quidni igitur etiam apud Te, ILLVSTR. ET REV<sup>ME</sup> DOMINE, Meteorologica nostra sperent gratiam? & eò insigniorem, quòd Nobilitas Tua inter Belgij Illustrissimas, & per sexcentorum amplius annorum circuitus, augustissimas Comitum Louaniensium, Alostanorum, Flandrorum, sanguine aut affinitate Familias complexa, sublimis & incolumi claritudine decurrere pergat in posteritatem.

Si retrò etiam supra hæc in Belgio initia  
memoriam mittimus, veterum statim Saxo-  
niæ Regum stemmata impingemus; è quibus  
propinquâ origine fluxit Wycmannus ille  
ab Ottone Cæsare primus Arci Gandauensi  
impositus Comes: à quo Villanorum & Gan-  
dauorum per Belgium sparsum genus.

Seneca  
lib. 3.  
cap. 28.  
de Benef.

Sed claritudinem, Maiorum virtutibus  
partam, non supra ipsas virtutes æstimas; &  
maculosam vitiis Nobilitatem, *notam magis,*  
*quàm nobilem*, Romano Zenoni adsentis. Vt  
in purpurâ pannus, ita in Nobilitate deformatas  
vitiorum insignior: veluti contrà, lætiùs  
latiusque se diffundit Virtus, vbi circumfusam  
habet Nobilitatis lucem.

Sociata ergo Illustrissimo generi Virtus, no-  
bilissimæ Ecclesiæ Principatum Tibi fecit.  
nam genus solum apud illum Principem (AL-  
BERTVM, inquam, PIVM) valere parùm po-  
tuit, cui in amore tam flagranti Virtus, vt ce-  
tera omnia viderentur in frigore; qui in mu-  
nerum collatione, sic illam & paritatem adspi-  
ciebat, vt nullius prætereà videretur sensum  
habere.

Aliæ præterpropter etiam causæ fuerunt,  
quæ me propriè circumstant, & nuperi be-  
nefi-

neficij magnitudo præsertim impulit, vt chartæ hac tabellâ nomina saltem mea afferrem, si nihil dare possim in solutum. Tametsi enim alieno, & Nominationum Academiæ nostræ Iure, in cœtum Canonorum Illustris Ecclesiæ Tuæ Tornacensis intrauerim; Te propitio tamen & volente factum, imò vtrò eunte Iuri nostro obuiam. Vtinam ceteri Prælatorum in Belgio, ad istam mentem, & sequantur exemplum! Musæ nostræ in tranquilliori forent: neque lites tot & tam pertinaces bonam sæpè vitæ virorum eruditorum partem, vtilius inter silentia studiorum ducendam, ad strepitus fori euocarent.

Sed fauore isto, & prono, imò effuso in Academiam Louaniensem affectu, qui Dignitate etiam illâ Episcopali, Tibi præiuit olim, ILLVSTRISSIMVS D. FERRICVS, S. R. E. tit. S. Vitalis Presbyter Cardinalis, & Episcopus Tornacensis: cuius, & MAXIMILIANI I. Belgarum tunc Principis sollicitudine, SIXTVS PAPA IV. primum Nominationum priuilegium (id est munificentia sequentium Pontificum vnicum exemplar) anno M. CCCC. LXX XIII. Vniuersitati donauit.

Ille æuo quidem longè anterior, Tu beneficio

\* *Castor*  
\* *Pol-*  
*lux,*

cio tamen suppar, quo adfirmasti quod Sanctif-  
simus Pontifex suafore ipso & parario nobis  
contulit. Salue par nobile Præsulum. nobis  
posthac \* *Δίσκορος*, & benefica duo sidera eritis:  
quorum alter cælo iam & æternitati fixus, cõ-  
dem Tu ILLVSTR. ET REVERENDISSI-  
ME DOMINE, virtutibus subuectus abis: si  
antè ambitum ætatis impleueris (ò mollissi-  
mè tamen, & in rem publicam diu decurrat!)  
quem Tibi lex æterna circumscripsit. Sic vi-  
ue, salue, vale ab

ILLVSTR. ET REV<sup>MAE</sup> D. T.

humillimo & deuotissimo cliente

LIBERTO FROMONDO.

*Louanij Kal. Januariis*  
*anni* CIO. IDC. XXVII.

A D



# AD LECTOREM.



VSTVLVM Philosophia Loua-  
niensis & promulsidem hilari hoc  
& Saculari Jubileo, quo Aca-  
demia nostra ducentefimum vite  
annum exambit, tibi propinare,  
Lector, animus fuit; sequenturq;  
reliqua, aut supprimentur, perinde

ut hæc acceperis. A blandioribus autem auspiciis cepi,  
ut paullatim ad seueriora te, aspernaturum fortasse sta-  
tim initio, deducere: qua etiam litterarum condimen-  
tis mitesceci, & Bacchum istum castrani mollioribus  
Nymphis. Publicum enim palatum iam ferè sic est: ni-  
si litteraturæ blandimenta saluam moueant, fame po-  
tiùs emoriatur, quàm aliquid gustet. Naturam et-  
iam imitatus sum, qua prata camposq; floribus spargit,  
& delicias ubique permiscet humanis auxiliis. Ari-  
stoteles quoque noster, qui alibi ferè tetricus, in historio-  
las hic & omnem amœnitatem sic lasciuit, ut quidam  
isto argumento nomen eius arceant ab istis *Meteo-  
rorum Libris*. Sed vnâ operâ *Ethica*, *Politica*, *Histo-  
rias Animalium* ei excutient; quia laxior etiam belliorq;  
hic est, & insolenti claritate digestus. Aliubi ergo sepiâ,  
dato studio, suo se atramento infuscat, aut materia  
hanc dissimilitudinem facit. non omnis enim Philoso-  
phia pars æqualem cultum recipit.

*Stilum* autem sumpsi, non breuem illum, subpin-  
guem,



guem, & veterascentem, quò me Genius & amor ducit, sed neglectiorem paulisper, excusis tamen sortibus scholastici pulveris. Nec enim alio partu Clarissimâ toto Orbe Plantinianâ & Moretorum Officinâ exire Liber potuit, unde dehonestum nihil & facutinum solet. Ne tamen à Philosopho planè abirem, & eloquentiæ vulgaris fastum nostri accusarent, verba quadam artis deculpata, nec boni aut belli commatis in usu, sed rarissimo, retinui: cum nulla Philosophia, quàm Meteorologica, minus barbaricis auxiliis indigeat.

Moles voluminis non oppidò ampla; sed quantam tamen, quem sciam, nemo hætenus in istâ materiâ effecit. Fortune id est, non mea laudis. Alij enim omnes in compendia & pagellas aliquot contracti, aut unius Aristotelis sensum totidem panè verbis, aut paullo liberaliùs (quod Vico mercatus fecit) enarrant, nillongè ultrà solliciti. ut meritò magnus Tycho nuper Meteorologiam imperfectissimam questus sit, & minimam eius partem hætenus constare.

Libro  
de novâ  
Cassiope.

Nec tamen ita mihi placeo, ut credam rem hanc iam à me confectam aut profligatam esse: & Mathematicos nostros provideo familiares sibi figuras requirere; quibus abstinere tamen malui, ne Libri pretium accenderem; & quia pleraque omnia more philosopho, qui linguâ ferè tantum, manu rarò in Scholis loquimur, putavi posse expediri. Non tenui etiam pudorem, cum vidi nuper Senecam, Gentilem Philosophum,

phum, in mediis Natura rebus subinde respirantem,  
 & breui utiq; diuerticulo ad mores se eijcere; nec  
 Christianum adhuc, quod audierim, fuisse, qui seque-  
 retur exemplum. Facio. sparsim tamen & rarer, fri-  
 goris & fastidij quorundam metuens, & quia ipse non  
 ita pietatis abundus, ut prolixè aliis, & plenè ornīs  
 admetiar. In cetera fortasse Philosophiā, si à me perfici  
 contingat in istam partem futurus effusior. Cur enim  
 Philosophiam ad Deum nostrum euntem non comita-  
 mur, & à nebulonibus quibusdam defendimus, qui in-  
 fami raptus ad impietatem trahunt, & intestabili pro-  
 stituunt Atheismo? Nisi facimus, metuo ne in re inuti-  
 li studium posuerimus: similes illi Endymioni, qui, ut est  
 in fabulis, ab amasiā Lunā in Latmio monte consopitus,  
 etiamnum hodie obdormit, id est, atatem in contempla-  
 tione motus istius sideris malè consumpsit. Diuus et-  
 iam Augustinus Fratres suos olim, & me nuper percu-  
 lit. Cum enim illi quæsiissent, An sidera circumduce-  
 rentur, an terra potius in orbem gyraret immobili celo:  
 Multum subtilibus & laboriosis rationibus ista Lib. 21.  
cap. 10.  
in Gen.  
 perquiri ait, ut verè percipiatur, utrū ita, an non  
 ita sit: quibus ineundis atque tractandis nec mihi  
 iam tempus est, nec illis esse debet, quos ad salu-  
 tem suam, & S. Ecclesiæ necessariam utilitatem,  
 cupimus informari.

Ne nimis magnam tamen studij huius pœnitentiam  
 agamus, Augustinus ipse, de Trinitate, de Civitate, &  
 in istis ipsis super Genesim Libris, in Philosophiā natu-  
 rali

rali multus, & ad curiositatem penè, varius fuit. Quid S. Clementem Alexandrinum, quid S. Aquinatem, quid alios sine fine commemorem, quorum sanctitatem Philosophia adfedit, & etiamsi alia desererent, nos tegunt satis?

Scriptura etiam Sacra plurifariam mentionem, & dogmata eius spargit, laudatq; Dei sapientiam, & adstupescit in istis mirabilibus. quod dicent Philosophia Sacra consarcinatores.

Qui ducem deinde belli formant, Meteorologiâ imbui præcipiunt: & Hannibalis, Sertorij, aliorumq; exemplo ostendi potest, quantum momenti ad inclinandas acies, aut stragem aduersarum partium attulerit. & ecce fulmen illud belli Cæsar Iulius, à cænâ Cleopatra, cum Achoreo Philosopho Aegypcio in multam noctem Meteorologistes factus, gloriatur se

Lucan.  
lib. 10.

— media inter prælia semper

Stellarum, cælique plagis, superisque vacasse.

Agricolationi denique, mercatui, & pleroque hominum generi, utilitate propè necessaria, amœnitate iucundissima vniuersis.

Tibi igitur etiam spero, Lector, erit. aut si mustacea ista, & mellitorum delicias morosè & fastidienter edis, sustine paulisper dentem, solidius aliud & in quo exerceas, ego ceteriq; Professionis huius consecranci (qui in Academiâ istâ grex totus & sedecim sumus, omnes iuxta aut supra me validi) breuè dabimus. Vale.

LIBER-

LIBERTI FROMONDI  
METEOROLOGICORVM  
LIBER PRIMVS:  
De Meteoris in genere.

CAPVT I.

*Quid, & quotuplex Meteorum.*



**M**ETEORVM Latine significat sublime, aut  
suspensum. Hinc *μετέωρος πλεῖν* dicitur, qui  
non litus legit, sed nauigat in alto. Equus *με-  
τέωρος* & qui pedes primores suspendit. *μετέω-  
ρος δὲν, λίς pendens*. & inde *μετεωρία*, supi-  
na obluio & animi stupor: qualem in Clau-  
diano illo stolone notat Suetonius. *In eo, in-* In Claud.  
cap. 19.  
*quit, (Claudio Cesare) mirati sunt homines & obliuionem, & in-  
considerantiam: vel, ut Græcè dicam, μετεωρίας, & ἀεὶ λήθην.*

Philosophi verò Meteorum suum deſiniunt, Corpus imperfe-  
ctè mixtum, ex vapore vel exhalatione ortum in ſublîmi. Hoc ſta-  
tuitur obiectum Meteorologiæ, quam Ariſtoteles abſoluit qua-  
tuor libris.

Corpus imperfectè mixtum, nihil aliud eſt, quàm Elementum  
infectum qualitatibus peregrinis. Talis aqua calefacta, glacies,  
nix, grando, &c. Nec eſt neceſſe, vt Elementi nomen amittat.  
Licet enim in pluribus id eueniat (nec enim nix, aut grando, am-  
pliùs aqua vocatur, etiamſi formam aquæ ſubſtantialem retineat)  
aqua tamen calida, nomen aquæ, ignis fatuus, nomen ignis, non-  
dum perdidit.

Mixtio igitur imperfecta hæc, eſt coniunctio qualitatum pere-  
grinarum cum naturalibus in eorum elemento. Sic enim mixtura  
quatuor graduum caloris cum totidem frigoris, aquam tepidam,  
A imper-

imperfectè mixtam facit. Hæc mixtio vocatur imperfecta, quia nondum attingit perfectionem temperiei, quæ formam substantialem elementi expellat, & absolutè mixti introducat.

Itaque lapides, ranæ, & si quæ alia in sublimi perfectè mixta, ex vapore aut exhalatione coagulantur, meteora non sunt, quia imperfectè mixta non sunt, cum abiecerint formam elementi.

Iris etiam, halo, parelij, & quæcumque *ἁμασιον*, non *ὑπερσκιον* habere dicuntur, quæ accidentia tantum, non corpora sunt, meteorum rationem recipere nequeunt.

Vapor est spiritus è corpore graui humido, exhalatio, è corpore sicco, resolutus. de quibus infra dicendum pluribus.

Sublime, spatium totum à terræ & aquæ globo ad vltimam mundi superficiem, vocamus. Hoc ergo cælis partim, partim elementis leuibus est plenum. Non tamen in toto eo spatio oriri meteora possunt: sed quatenus solùm vapores & exhalationes ascendere valent, id est, ad 52. miliaria Italica, vt postea ex Vitellone, & communi ferè Opticorum sententiâ, docemus.

Meteorum quidam in hypostaticum siue verum, & emphaticum siue apparens, diuidunt. Sed emphaticum, quo tamen totum Librum nostrum sextum consumplimus, reuerà meteorum non est.

Meliùs ergo ex materiæ diuersitate, in id quod vapore, quod exhalatione, & quod vtroque mixtim constat, diuidemus. Quæ vapore constant, vt pluuia, nix, grando, &c. aquea vocari solent. quia vapores plerique elemento aquæ exhalantur, & formam aquæ, in compositione istorum meteororum retinent. Quæ exhalationem pro materiâ habent, partim ignea sunt; vt sidera cadentia, fulmen: quia reuerà formam ignis inflammatione adepta sunt. partim non sunt, vt venti, & turbines. In quibus scilicet exhalatio nondum corrupta est in ignem. Vapore & exhalatione simul, nubes & nebulæ contextæ sunt.

Ex iam enarratis patet, quædam inter ea quæ exhalatione constant, eam pro materiâ transeunte (vt ignea) quædam pro permanente (vt ventos) possidere. Inter aquea etiam, nubes vaporem, materiam permanentem, pluuia, nix, grando, transeuntem habent. Nec enim in pluuia, aut niue, ampliùs superstes manet vapor, etiam si feruent aquæ formam.

## CAPVT II.

*De loco generationis meteororum.*

ARISTOTELIS nostri ordinem secuti, prius de loco vbi generantur meteora, deinde de caussis eorum dicemus.

Locus ille, est tota elementi aëris profunditas, quæ in tres regiones, infimam, mediam, & supremam, solet distingui. Infima, est spatium aëris à terrâ ad nubes media, ipsas nubes capit: suprema, à conuexo nubium ad elementum ignis, aut, si ignis ibi nullus est, ad ipsum cælum expanditur.

## ARTICVLVS I.

*De suprema regionis aëris quantitate.*

Dico Primò: Probabile est, supremam aëris regionem ad sidera fixa, & ipsum Firmamenti fornicem excurrere. Cometarum enim per vias Planetarum traiectiones & motus, satis significant, cælos infra Firmamentum esse fluentes, nec è duro concretuisse. Quod aliis etiam argumentis egregiè ostendit Clariss. Medicus Thomas Fienus, in Cometâ anni 1618. Veri ergo simile est, vniuersum hinc vsque ad fixas interuallum, aëre (siue partem superiorem æthera vocare mauis) repletum esse. Tycho tamen id quod Planetas interfuit, auram quamdam naturæ cælestis, & diuersæ ab his inferioribus, credit: sed nondum mihi persuasit. neque ex refractionibus siderum ampliùs colligere potuit, quàm partem illam ætheriam, rariorem esse nostrate aëre. quod verum erit, etiam si eiusdem speciei constituas. Halitus etiam terreni, effusissimè rarefacti, supra Lunam scandent quandoque, & partem cælestis illius & Tychonici ætheris in mundum sublunarem deprimunt, miscebunturque mortalia diuinis & incorruptibilibus: quod non decet.

Dico Secundò: Totus tamen aër inter Planetas, quem æthera appellamus, item pars eius magna infra Lunam, spiritu calido scaturit & inferuescit. vt meritò Aristoteles eum, ignem (quia, inquit, simplici alio nomine caret) vel *ὑπεράνωμα*, *somitem incensionis*, vocauerit. Scio tamen à multis id accipi de aëre illo, qui statim



supra nubes est: ultra quem statuunt aliquod aliud elementum puri ignis. Sed Aristoteles satis, nisi fallor, cap. 7. lib. 1. Meteor. disertè eos refellit. Ait enim: Τὸ χόσμηται ἑλὶ καὶ γλῶσσον ὑπὸ τῷ κλύον ὄρει φορὰν, ἢ τὸ πρῶτον μέρους, ἀναδυμένης ἔνεσθαι καὶ διερχομένης. Αὐτὴ δὲ καὶ συνιγχεῖ ὑπὲρ αὐτῶν αἰῆτες ὅτι πολλὴ συμπεριβάλλεται ἑλὶ καὶ γλῶ, ὁποῦ τῆς φορᾶς, ὅς τ' κινῆσθαι τῆς κύματος. Mundi, qui circa terram, quantum sub circulari latione est, primam partem, esse exhalationem siccam & calidam. Ipsa verò cum magnâ parte cōtinui infra aëris, circa terram unâ circumducitur à latione & motu circulari.

En, ut primam partem sub caelesti latione, exhalationem vocet. Ac ne putares intelligi de aëre proximè supra nubes, addit, exhalationem istam rapere secum aërem sibi continuum: id est, illum quem hactenus supremam aëris regionem appellare solemus. Hic ergo est, quem Aristoteles propriè aërem; alterum verò qui superest, & ad Lunam vsque, aut veriùs ad ipsum Firmamenti fornicem, pertingit, propter exhalationum feruentium copiam & mixturam, ignem vocauit. Pluribus rationibus alibi ignem hunc quorundam Peripateticorum sublunarem confutabimus.

Dico Tertio: Meteora quæ exhalationem terrestrem, aut vaporem pro materiâ habent, plerumque non altiùs à terrâ, quàm 52. miliaribus Italicis, id est miliaribus Germanicis 12. Belgicis 17. eleuantur. Ratio est, quia materia eorum sublimiùs non scandit. Summi etenim halitus, & crepusculorum lampades, qui primi manè radium Solis rapiunt, & vltimi vesperi retinent, ac proinde altissimi sunt omnium qui videri à nobis possunt, totidem solùm miliaribus à terrâ distant, ut post Alhazenum & Vitellonem Tycho approbat multis experimentis. Scio tamen aliquos augere, & alios minuere hanc distantiam. sed media, & iam olim recepta mensura magis hîc placet: & varietas ista prouenit, quia in demonstrationem suam vnus terræ ambitum maiorem, alius minorem accipit.

Dixi antea, *plerumque*; quia, ut Libro 3. patebit, halitus in tantum aliquando rarefcere possunt, ut ad Lunam & inter Planetas perueniant, viderique fortassis à nobis possint; quia cum raritate aliquam adhuc opacitatem seruant, quæ lumine Solis valeat colorari.

Dico Quarto: Suprema illa meteororum regio, à secundo & quinquagesimo milliari à terrâ, deorsum infra altissimorum montium cacumina descendit. Id inde intelligitur, quòd montes quidam



dam reperti, qui supra totam nubium stationem surrigunt vertices, penetrantque in regionem supremam.

— *Nubes excedit Olympus:*

Lucan. l. 1.

*Pacem summa tenent,* —

magnificè clamat apud Poëtam Pompeianum Brutus. & dudum ante ipsum, de eodem Homerus:

— Οὐτ' ἀίμῳσι πνέουσι, ἄτ' ἰσὶ ποτ' ὕμῳ  
Δαίῳ. —

*Neque ventis concutitur, neque imbre rigatur.*

Hinc apud eum aliosque Olympus passim pro cælo: quasi omnium montium excelsissimus, & cælo ipsi attiguus esset. Sed sua, aut vicina, nimis mirantur, & in maius extollunt Græci. Xenagoras enim, ut Plutarchus in Paullo narrat, ex Geometriâ & vero dimensus, reperit tantum 1270. passus in perpendiculo Olympi. Philadelphus etiam olim veri curiosus ascendit, & verticem eius intra nubes inuenit. Nec Atlas quoque, (quamquam Dion al-

Lib. 75.

quippe

— *cinctum assidue cui nubibus atris*

Aenid. 4.

*Piniferum caput, & ventis pulsatur, & imbri.*

Et Dion ipse fatetur, iuga perpetuâ niue canescere. Intra igitur, aut infra mediam regionem sunt: nam in supremâ, niues nullæ. Æmus deinde, mons Thraciæ eminentissimus, verticem in nubibus habet: ascendit enim olim Philippus Macedonum Rex, vulgatæ opinioni credulus, inde mare Ponticum, Adriaticum, & Alpes Italiæ posse conspici. *Vbi autem iugis appropinquabant*, ait Li-

Dec. 4.

Lib. 10.

*uius, adeò omnia cuncta nebulâ, ut haud secus quàm nocturno itinere impedirentur.*

Dicæarchus, Plinio teste, curâ Regum montes permensus, altissimum Pelion prodidit, passuum 1250. ratione perpendiculi. Quæ altitudo tamen minor, quàm Xenagorica illa Olympi, statque etiam sine dubio intra nubium regionem. Plinius tamen ibidem asserit, scire se, quosdam Alpium vertices tractu non breviori 50. passuum millibus assurgere. Quod si ita est, iam isti ad culmen supremæ regionis adspirabunt. Sed credo Plinium accipiendum de tractu & ascensu Alpium obliquo. nam nimis, puto, manifestè falsum est, vllum esse, qui tantum habeat perpendiculi.

Lib. 1.

c. 65.

Si ergo montium vllus est, qui vltra mediam regionem se attol-

Lib. 3.  
c. 11.

lit, Caucasus in Asia est, Tenariffa in Canariis, Pariacaca in Americâ. De Caucaſo Ariſtoteles lib. 1. cap. 13. Meteor. affirmat, videri à nauigantibus in Mæotidem (id eſt, ex diſtantiâ 560. milliarium, vt quidam arbitrantur) & tertiâ parte noctis retinere Solis crepuſculum. Similis excellitas Caſij montis apud Plinium (niſi tamẽ pro Caucaſo, Caſius eum affinitate nominis ſeſellit) cuius vertex *quartâ vigiliâ orientem per tenebras Solem aſpicit, breui temporis circumaſtu, diem noctemq; pariter oſtendens*. Huius tamen per directum altitudinem aſſerit ſolùm eſſe 4. milliarium. Tenariſſam referunt Hiſpani eſſe altitudinis 60. milliarium. In mari enim maximè conſpicuus eſt ex interuallo 4. graduum. vnde Snellius in Eratoſthene ſuo colligit, perpendicularum eius eſſe 9. mill.  $\frac{1}{2}$ . Ex quibus ramen aliquid deducendum ob reſractionem. Nam res in ſuperficie maris reſractè viſa, altior iuſto apparet, & ex diſtantiâ longiori. Statuamus igitur audaçter in perpendicularo, octo millaria. quantam altiffimorum ſub toto cælo montium excellitatem, veterum Sapientum iudicio, aſſerit Alhazenſis lib. de Crepuſculis. Errare ergo videntur, qui nullum omnino montium credunt excedere 4. millaria perpendiculari. De longiffimâ illâ catenâ montium Peruuiz, quæ 500. facilè leucis à Septentrione in Auſtrum decurrit, narrat lib. 3. cap. 9. Hiſtor. Indic. Iosephus Acoſta, tantæ altitudinis eſſe, vt ſi in comparationem ducantur Italiz Alpes, eaſe humiles, Peruuiani palatia excelsa videri poſſint. Vnum horum, nomine Pariacacam, cùm pertranſiret, aërem in vertice ita ſubtilem & tenuatum, ac humanæ reſpirationi ſic inidoneum inuenit, vt naueſâ & vomitu ſerè animam ruſtauerit.

Hi ergo, & ſi qui alij paris ſublinitatis montes, in ſupremâ regione habere vertices videntur; vbi aër viciniâ cæli, & exhalationibus ſeruentibus plurimùm calet & extenuatur. Fruſtrâ igitur Bened. Pererius cap. 6. Gen. diſp. 9. conatur aſtruere, nullos in vniuerſo montes eſſe, qui cacumine mediam aëris regionem excedant. imò diſp. 10. dubitat, an aquæ diluuij, quæ 15. cubitis, omnibus ſub cælo montibus fuerunt altiores, ad mediz regionis nubes pertigerint: quia è nubibus, in fine etiam quadraginta dierum, cùm altiffimæ fuerunt diluuij aquæ, depluit, tamquam ex altiori loco, in montes & diluuium. Verùm Libro 5. rationes eius diſſoluemus, vbi de diluuiis agimus.

Dico Quintò: Suprema regio deorſum videtur terminari circa quartum à terrâ milliarc. Ratio eſt, quia ibi media incipit, vt arti-

articulo sequenti patebit. Habet igitur suprema regio 48. milliaria Italica profunditatis. Ex altitudine enim 52. milliarium, quousque scandunt, ut plurimum, summi halitus, detrahenda solum 4. sunt pro mediâ & infimâ regione, ut iam iam ostendemus.

## ARTICVLVS II.

*De quantitate mediæ, & infimæ regionis.*

Cardanus lib. 17. Subtil. negat nubes etiam excelsissimas duobus millibus passuum à terrâ umquam eleuari: cum verò pluit, & demississimæ sunt, vix putat 500. passibus abesse. Hinc sequetur, infimam regionem, quæ à terrâ ad proximâs nubes extenditur, solos 500. passus altitudinis habere; mediam verò, 1500. tanta enim erit intercapedo inter imam & summam nubem. Verum hæc mensura Cardani nimis brevis est, uti Posidonij nimis ampla: nam existimauit *non minus 40. stadiorum* (id est, Plin. lib. 2. cap. 23. *à terrâ altitudinem esse, in quâ nubila ac venti nubesque proneniunt.*

Dico ergo Primò: Conuexa, siue suprema pars mediæ regionis, quatuor circiter milliariibus Italicis abesse videtur à superficie terræ. Argumentum meum est, quoddam montes quidam, altitudinis perpendicularis milliarium quatuor, quandoque cano vertice visantur. Igitur nubes, materia earum niuium, eousque perueniunt. Antecedens probari fortasse exemplo Atlantis in Africâ potest, quem Dion altissimum montium (falsò tamen) appellat. Nihilominus excelsissima eius iuga perenni niue albertia, non multò breuius, quàm quatuor milliariibus à plano terræ fortassis attoluntur. Nam Suetonius Paullinus, quem Consulem se vidisse Plinius scribit, decimis solum castris in verticem eius peruenit. Lib. 5. c. 1. nec tamen per ardua illa & inhospita iuga, quæ à mortali nullo, ut testis est Dion, adiri possunt, extraxit exercitum.

Ætne etiam cacumen niuale, nec supra mediam regionem est. cum tamen Francisc. Maurolycus Abbas Messanenensis in Siciliâ, & Ætne accola, affirmet, ex eo subiectum mare Mediterraneum ad 200. milliaria adspici. vnde Snellius in Eratosthene colligit 40. circiter stadia perpendiculi, siue milliaria quinque. Detrahimus ergo vnum milliare propter refractionem (nam oculus è vertice montis, per aërem vaporosum mari incubantem, & speciem refractam, longius, & partes aliquas superficiem maris infra horizontem visibili-

lem conspexit) & remanebunt millaria quatuor. Ac profectò non multo humiliorem Ætne verticem, inde etiam intelligitur, quòd Snellius ab oculatis testibus se cognouisse dicat, fumum & fauillam Crateris eius è portu Meliteni palàm videri. vnde conficit, altitudinem  $31\frac{1}{2}$  stadiorum esse, id est, iterùm milliarium paulominus quatuor.

Dico Secundò: Infima superficies medix regionis, 500. circiter passibus, siue dimidio Italico milliari, à terrà distat. Nubes enim proximæ, quales sunt atræ illæ & pluentes, vix longiori intervallo diuiduntur à nobis. Liquet experimento subeuntium Italix Alpes. Deinde notauì aliquando in nube pluuiosâ & supra verticem meum tonante, intervallum temporis, inter tonitru & coruscationem fulminis, par fermè esse cum spatio, quod inter flammam tormenti maioris & crepitum intercedit, explosi ex distantia dimidij milliariis. Vide plura Libro 2. vbi tormenta nostra cum fulminibus comparamus.

Exinde autem apertè colliges, medix regionis profunditatem esse milliarium  $3\frac{1}{2}$ .

Dico Tertiò: Profunditas infimæ regionis dimidij solùm est milliariis. Tantulam enim iam ostendimus intercapedinem terræ & propinquissimæ nubis.

Solet autem altitudo huius regionis definiri resultu radiorum Solis à terrà. putantur enim vulgò radij non altiùs quàm ad imam & concauam nubium superficiem resilire. Itaque plerique sic fiunt: Infima regio est pars aëris, quæ à terrà versùs cælum porrigitur, quatenus radiorum Solis reflexio pertingit.

Multi tamen hodie censent, eam longè altiùs, & ad ipsam etiam Lunam peruenire. Si enim Luna, & Venus, ceterique Planetæ, qui corpore opaco & terræ simillimo sunt, lucem Solis ad nos vsque tam vbertim reflectant, cur terra vicissim vsque ad ipsos reicere non possit? Credo equidem, quòd si oculus quispiam in orbe lunari foret, globum terræ & aquæ, instar ingentis sideris (nam terra ferè quadragies est Lunâ maior) à Sole illustrem conspiceret. Species igitur visibiles splendoris exciperet: quæ aliud non sunt quàm radij luminis, vt in Libris de Animâ demonstrabimus.

Itaque propius verum erit, si affirmes, infimam regionem sursum finiri, vbi radij Solis à tellure reflexi, ita deficiunt & languent, vt nihil aut parum radij directi calefactionem adiuuare queant. Ibi autem nubes condescere, & vapores redire ad naturale frigus inci-

incipiunt. Siue potius ( vt ex intimo meo sensu dicam ) ibi primæ nubes stant, & ascensum vapores finiunt, vbi aërem infimā regione & se leuiorem, aut vnus ponderis, inueniunt. Alibi enim vbi-que natura hanc seruat legem, vt leuiora tam altè scandant, do- que medij in quo mouentur partem minoris ponderis, aut æquilibrium reperiant.

## ARTICVLVS III.

*De figurâ regionum aëris.*

**D**ico Primò: Concaua superficies infimæ regionis est pænè rotunda: & qualis conuexa globi terræ & aquæ, quem proximè amplectitur & tangit.

Dico Secundò: Conuexa verò eius superficies, est figuræ pro- pmodum oualis. Nam talis est concaua superficies mediæ regionis, cui conuexa infimæ se conformat, quia vndique contingit. Idcirco autem concauitas mediæ est oualis; quia exhalationes & vapores in Zonâ torridâ magis rarefcunt, & altiùs scandunt, quàm in frigidis & temperatis. & hinc in istis vtrimque Mundi verticibus, id est, sub polis propius terræ incubant nubes, nec ad dimidium totum milliare distant à superficie eius. paullatim verò, & molli quodam cliuo per temperatas in torridam ascendunt: vbi concauitas altissima est, & veluti gibbus ac media crassities figuræ oualis. Vnde sequitur, nubem è Zonâ torridâ per temperatam, sub polum, ventorum flatu expulsam, perpetuò crassescere, & descendere versus terræ superficiem. Quæ omnia primore aspectu, magnâ verisimilitudine blandiuntur, abeuntque non proditâ difficultate, quam tamen benè inspecta, celant.

Nam licet vapores sub polis, vtpote calore languidiore resoluti, densiores sint; aër tamen per quem scandunt crassior etiam & pinguior, quàm sub Zonâ torridâ est: igitur æquè altè ascendent, atque vapor Torridæ tenuior, per aërem rariorem. Vbi enim est æqualis præportio corporis leuioris ad medium grauius, æqualis etiam erit ascensus. Vt si statuas totum spatium inter Lunam & terram aquâ plenum, eodem modo in summam aquæ superficiem suber enitetur, atque tenuissima exhalatio per aërem tanto aquâ rariorem. Igitur ratio aliqua necessariò reperienda, quæ ostendat vaporem torridæ, raritate longiùs superare aërem infimæ regionis, eiusdem Zone, per quem in mediam regionem ascendit, quàm

Zonæ frigidæ vapor ærem suum excellat. Causa est in maiori æstu torridæ. Quia enim ibi angulis rectis, aut propè, radij terram incidunt, & in seipos reflectuntur, multiplicatâ in angusto luce, acerrimè vrunt, & exhalationem ac vaporem, antequam adscendant, celerrimè in maximam raritatem dissoluunt. Sic ignis magnus & valens, iniectum pabulum in flammam tenuissimam sine fumo statim absumit; parvus verò aut lentusumat tantum, & sine flammâ, aut certè malignâ, pigram suscitât exhalationem. Sed quare pariter non tenuatur ab eadem causâ infimus Zonæ torridæ aër; vt eadè sit proportio vaporis huius Zonæ ad suum ærem, quæ vaporis Zonæ frigidæ ad suum? Quia, credo, corpora densa, vt terra, & aqua, calorem densiorem & magis inculcatum, quàm aër Zonæ torridæ, recipiunt. & hinc vbi calor sic multiplicatus vincere potest subiecti sui densitatem, magno & subito impetu dispergit in amplissimam raritatem. In subiecto autem fluxo & raro, qualis est aër, minus virium habet; & molliter solum fundit, non dissipat nihil obnitentem materiam. Hæc res tota inclarescere potest, per profusissimam, & pænè momētaneam rarefactionem pyrij pulueris, iniecto igne. Longè enim laxius rarefcit & discingitur illa materia, quàm vicinus, & flammæ contiguus aër. Terra verò & aqua frigidarum Zonarum languidè tepescunt radio solari, nec ferè ampliùs tenuantur, quàm terræ circumflus aër, qui & à naturâ suâ & à Sole etiam aliquantam habet raritatem.

Ex quibus quoque satis intelligitur, infimam regionem, eodem etiam loco, qualitatibus vertentis anni variari. æstate enim altissima est, hieme summissior. Possunt tamen etiam ardentissimo Sole humillimæ esse nubes. guales atræ illæ nimborum æstiuorum, aut fulminum parentes, quæ humore multo gratidæ, & antiperistasi caloris constipatæ, in infimum ærem feruore anni tenuatum, altè succumbunt.

Dico Tertiò: Conuexa superficies mediæ regionis videtur etiam oualis. Si enim in torridâ vapores scandant altiùs, quàm in frigidis & temperatis: ergo dorsum mediæ regionis gibbo quodam ibi in supremam regionem assurgit. Talis etiam est concauitas huius supremæ regionis, quæ dorsum illud gibbosum cingit. conuexitas verò eius rotunda est, siue fornicem cæli, siue concauum alicuius sublunaris ignis proximè contingat. Concauitas enim ignis etiam existimatur sphærica; quia omnes vndique partes æquis viribus nituntur sursum.

## ARTICVLVS IV.

*Qualitates regionum aëris.*

**Q**ualitates primæ aëri naturales adhuc in incerto sunt. Aristoteles facit naturâ calidum, Stoici & Cardanus frigidum, Turnebus neutrum, sed omnium ex æquo capacem. alibi arbitramur, spero, hanc litem. Nunc de qualitatibus regionum eius, siue ex à naturâ, siue foris veniant, dicam.

Dico Primò: Suprema regio, ab exhalationibus feruidis, eò sepe medias nubes transcribantibus, vel liberè cælo sereno & innubi scandentibus, calida est, & sicca. vicinia deinde cæli & siderum, sine vlllo supemè nubium obtentu, calorem eius auget. Eleganter Iouianus:

*Vltima torrenti semper sitis vsta calore,  
Flammarum consuea vagos innoluere tortus.*

Hinc refert Solinus, eos qui in Olympi cacumen ascendeabant, solitos sumere spongas plenas aquâ, ad suctum, & temperandam aëris feruentis respirationem. Negavi tamen antè verticem Olympi penetrare in supremam regionem. Certius ergo exemplum in altissimis Peruuix montibus habemus, vbi Iosephus Acoſta, cum tenuissimo ibi aëre ferè vnà expirauit animam. Ex hac supremi aëris qualitate rectè coniectat Scotus in 2. d. 17. q. 2. planitiem Paradisi non fuisse excelsiorem mediâ regione; quod quidam contendunt. In Paradiso enim ver perpetuum, & summa aëris temperies fuit. Vnde nec cacumen eius nubes attingit.

Dicto Secundò: Media regio humida est & frigida, à vaporibus ibi pendulis. Patet experienciâ peregrinorum transeuntium per Alpes, & mediam regionem, in Italiam. Conimbricenses tamen frigus illud à Deo olim productum, & iam conseruari credunt. Sed Deus in talibus effectibus vti consuevit ministerio causarum secundarum. Itaque potius à vaporibus solùm, eò scandentibus, aër ille frigeratur. Sed quid si cælum sine nubilo sit, inquires, aberitne ab eâ regione frigus? Planissimè. redibitq; tantùm postea, cum vaporibus, aut è terrâ subeuntibus, aut adductis ventorum flabris. Existimo enim hîc & ibi sparsim mediæ regionis frigus radio solari infringi, eamq; dissipatis nubibus quandoque interceptare; donec alix argentes succedaneæ in locum pulsarum aduenerint. Non assentior tamen Ludouico Coronello (is Philo-  
Lib. 7.  
Physic.



sophus Nominalis est, & Hispanus, quod mireris; qui raro addicti Occamistis) qui sentit sub torridâ nullum esse frigus mediæ regionis, neque ob intolerantiam caloris vllas ibi nubes coagulari. Sed fallitur. quia à centum paullò amplius annis hæc scribebat, quando nondum omnibus satis erant notæ pluuiæ & diluuiæ, quæ sub ipso etiam Æquatore inundant, quando Sol est in Æquinoctiis & capitibus eorum perpendicularis.

Nullibi autem, quàm circa montes, frigus mediæ regionis & nubes sunt pertinaciores. Terræ enim montanæ & caurium rigor, vaporis ibi coagulum adiuuat, & ita continet, vt circa totum annum nubila verticibus incubare, aut ipsos coronare cernantur.

Dico Tertiò: Infima regio, omnes qualitates primas vicissim recipit. Iouianus rem versu dicat:

*Prima aquè patiens est frigoris, atque caloris,  
Alternâsque vices alternâ vice rependit,  
Vere tepens, æstate calens, eadem horrida brumâ.*

Causa huius vicissitudinis penes reflexionis varietatem est, quæ radij Solis obliquiori angulo, bieme, quàm æstate incidunt in terram, & resiliunt in altum. Angulus enim incidentiæ par est angulo reflexionis, vt in speculis experiri licet. Hinc æstate Sol verticem nostro magis ad motus, angulo rectiori terram irradiat, & reflexus ab eâ radius in directum præne recurrit; eaque vtriusque radij propinquitare & cœtu calor vberior prouenit. Vel si alia imago dicendi magis allubescit: Sol hiemæ, etsi in Apogæo & vicinior nobis, obliquo tamen radio terram impingit. & quia montes, ædificia, plantæ, & infimira alia sunt, quibus terræ superficies exasperatur, umbras innumeras reiciunt in latus vnum illustrata à Sole. umbræ verò omnes lumen frangunt aut debilitant, ne tantum valeat in calorem. & hinc etiam partim est, vt vesperti ac manè, quando umbræ adultiores, æstus mollescat & relaxetur. Per æstatem autem, quia Sol nostro Zenitæ propinquior, montes, & quæcumq; in superficie terræ eminent, magis à vertice despicit, & vndique in orbem ferè illustrat, detersâ circumcircuità omni umbrâ. Vnde etiam loca quæ hibernum Solem sine umbrâ excipiunt, vt montium latera, & cliui, & parietes ædificiorum, satis incalescunt, niuesque fortè adhærentes, statim exerente se Sole contrahescunt. Ita Cardanus lib. 4. Subril. rationem concinnandi hortum ostendit, qui totâ etiam hieme olera & fructus educat. pariete scilicet mobili, & ad eleuationem & depressionem Solis sic composito & modu-



modulato, vt angulis semper rectis incidentes radios excipiat, & in subiectum horti fundum regerat & disseminet. Nescio an non simili olim artificio Entellus ille apud Martialem, vuas suas hibernis mensibus alebat. crystallo etiam vites inclusisse videtur, vt iniuriam cæli defenderet, & ad multiplicandum deinde refractione lumen, & incrementa caloris.

*Qui Corcyra vidit pomaria Regis,  
Rus, Entelle, sua præferat ille domûs.  
Inuida purpureos vrat ne brumæ racemos,  
Et gelidum Bacchi munera frigus edat;  
Condita perspicuâ viuît vindemia gemmâ,  
Et tegitur felix, nec tamen vna latet.  
Femineum lucet sic per bombycina corpus:  
Calculus in nitidâ sic numeratur aquâ.  
Quid non ingenio voluit natura licere?  
Autumnum sterilis ferre iubetur hiems.*

Martial.  
lib. 8.

Breuius igitur, calor æstate, quàm ceteto anno, flagrantior, quia à causâ calorificâ maiori & lumine magis conferto venit. Lumen verò maximè multiplicat reflexiones, quæ æstate plures ad idem aëris punctum, quàm alio tempore, fiunt. Hinc enim etiam, vbi Sol vallem aliquam, inter nudas præsertim cautes, illucet, in immensum quodammodo augetur calor; quia vndique ad eadem puncta aëris, à cautiûm & saxorum superficie, radij reflectuntur, focosque vbique constituunt.

## ARTICVLVS V.

*Quomodo radius Solis directus non impediât nubium in mediâ regione concretionem.*

**S**COTUS in 2. d. 17. q. 2. duas causas priuatiuas affert frigoris mediæ regionis: carentiam caloris producti à radio Solis reflexo, qui tam altè non resilit, & carentiam producti à directo. Sed cur radius iste à cælo directè in nubium tergum deiectus, non eas tepescat saltem, aut etiam dissoluit? Quia veluti, lumen gemmarum, putrium fungorum, piscium lucernarum, non calefacit, imò Lunæ frigefacit, inquit doctissimus Fortunius Licetus l. 2. de No- uis astris cap. 65. ita radius Solis directus vi calorificâ caret: calefacitque solâ reflexione, atterendo aërem, humoremque exprimendo, vt ignescat. Verùm, boni stomachi cum esse oportet, qui

tam facilè hæc concoquat. Ego certè fateor me infirmiore[m]. Nam radius directus eiusdem cum reflexo speciei est; cur non ergo cale etiam faciat? Nec attritionem illam, & expressionem humoris ex aëre intelligo. radij enim corpora non sunt, nec tam dura, quàm silex & chalybs, vt mutuo affricu aër medius & deprehensus ignescat. deinde quis eos sic collidit?

Thomistæ quidam se omnibus molestiis defunctos putant; si credant lumen Solis, non secundum gradum vltimum specificum, quo caloricum est, sed secundum gradum tantum generalem qualitatis in nubes recipi. Sed gradus genericus & specificus in eodem indiuiduo, in vnam omnino essentiam coalescunt, nec diuelli queunt. Non potest igitur radius lucis abiicere gradum specificum in nubibus, & eum deinde in aëre infimæ regionis resumere. Locutio tamen sic tolerari potest: & ita D. Thomam explico: Lumen non exercet omnem effectum in nubibus, quem alibi potest; non enim calorem ibi fundit. atque ita gradus luminis specificus & caloricus ibi ex parte saltem otiosus est, & veluti non esset. sed ori huius causam inuestigamus.

Alij passim huc confugiunt: Vnico tantum radio, eoquē directo, mediam regionem penetrari; infimam, duplici, directo ac reflexo. Creduntne se extra litem? non sunt. Sic enim in rixam possunt retrahi: Radius à cælo ad terram vniiformiter difformiter, vt loquimur, remittitur & languescit: igitur in mediâ regione, quàm infimâ, plenior & intensior erit. Sed rem ad calculum deducamus. Sit in supremâ regione, quæ propinquior cælo, intensus vt 6. in mediâ, vt 5. in infimâ, vt 4. in superficie terræ (vnde fit reflexio) vt 3. Quia autem reflexio debilitat lucem, vt demonstrant

Vitell. l. 3.  
th. 3.

Optici, non redibit eadem intensione sursum, quàm in longum, sublato terræ obstaculo, propagatus fuisset. decreuisset autem directe protractus, à tertio vsque ad secundum gradum. vt ergo debiliior sursum reuerberetur, oportet solum reflecti vt vnum. Ita enim etiam pila lusoria impacta in murum, minore impetu resiliere solet, quàm transuolasset muri profunditatem per foramen, si quod ibi forte incidisset. Compone igitur iam radium directum quatuor graduum infimæ regionis, cum radio à terrâ reflexo vnus gradus, ex vtroque simul lumen quinque solum graduum concinnabis; quot sunt scilicet in radio directo mediæ regionis. Ergo lumen in infimâ regione non est, quàm in mediâ, ad calefaciendū potentius. Sed in infimâ dissoluit vapores, ergo in mediâ tantumdem valebit.

Hoc

Hoc tamen experientia longè refellit. quia media regio manifestè frigidior, quàm infima est, & in eâ sic coagulantur nubes, ut copcretio radio solari discingi non possit. Dico tamen Primò: Sicuri tota catena & circulus mediæ regionis non vbique est in pari frigore: ita potest hic & ibi sparsim, breui aut longiori tempore, totum illud insigne frigus, quo sic vaporem ed scandentem adstringit, perdere. Id sæpè viridi, & defæcatissimo ab omni nubilo cælo reor accidere. Cur enim necesse semper vaporem ibi adhærere, qui aërem illum frigeret? certè arenosis illis & arentibus Africæ desertis nullæ incubant nubes, nisi aliunde adductæ ventorum flatibus. Si verò ibi catena nubium fracta est, cur densitas aëris remollescere & fundi non potest icta & terebrata radio directo Solis? cur etiam exhalationū siccarum & pænè ardentium, quæ illac in superiora traiciunt, feruorem non sentiat? cur vndique completentis & dorso imminenti supremæ regionis æstum? Imò si rem ad viuum, & Mathematicam præcisionem, rescies: radius directus per mediam, sed serenatam & innubem regionem, traiectus, ibi, ut antè iam diximus, quia vicinior suo fonti, vberior; & magis calorificus, quàm per infimam regionem erit. quamquam fortasse discrimen sensui manifestum esse non possit. Nam sat credo, etiam multorum milliarium distantia, radium aliquâ parte intensionis defecisse; intelligi sensu non valet. Pulchrè Seneca: *Qui Lib. 4. c. 11. Na*  
*dicat altioremontem, quia Solem propius excipiat, magis calere debere; idem dicere potest, longiorem hominem citius quàm pusillum debere calefieri, & citius caput eius quàm pedes. At quisquis Mundum mensurâ suâ æstimauerit, & terram cogitauerit tenere puncti locum, intelliget nihil in illâ posse ita eminere, ut caelestia magis sentiat, velut in propinquum illis accesserit.* Nimis Stoicè & rigidè tamen hoc. Quid si enim Solem in Emphyreo (cuius comparatione Orbis Lunæ cum incluso Mundo elementari, instar etiam est puncti) constituas; nōne Luna magis actionem Solis, quàm terra sentiat?

Dico Secundò: Nubes mediæ regionis opacitate suâ radium Solis sic debilitant, ut in calorem inualidus sit. Non enim quodlibet lumen calefacere potest, sed certa intensionis mensura necessaria est: aut saltem, licet naturâ suâ calorificum sit, in tali subiecto tamen nihil omnino, aut quod sentiri & æstimari debeat, efficere valet, ob repugnantiam insignem frigoris. In infimâ verò regione nubes non consistunt, quæ opacitate radium stranguent, & veluti extinguant: sed aër ibi totus, si extra nebulam est, pellucet; vapore

crassiori quidem quàm sint fumi nubium, vt Lib. 5. ostendam, intertextus, sed diaphano tamen, quique radium frangat quidem, sed non reiciat. Præcipuus tamen infimæ regionis æstus, non à radio directo, sed innumerâ à diuersis terræ superficiebus, & radiorum sese in omnibus æris punctis interfecantium, reflexione, vt artic. proximo dixi, profluit. multiplicatis enim per reflexiones varias, & in vnum foculum concurrentibus radiis, certum ex speculis incendiariis est, calorem & ignem accendi. Et hinc liquet, non rectè à nobis antè positum esse calculum, dum tantumdem luminis in mediâ regione, quantum in infimâ colligebamus. Nam reflexiones ab infinitis terræ asperitatibus radios in eundem locum coniciuntibus, veluti totidem paruis speculis, in immensum infimi æris lumen auctum eunt. Ideo enim à sapientissimo Opifice terræ superficies sic exasperata. vt, inquam, lumen variis repercussionibus vbique in nodos se colligeret, foculosque innumeros accenderet, qui plantis alimenta in terrâ coquerent, & vitali eas calore animarent.

Si rot in ære infimo foculi sunt, inquires, cur eum calore suo non soluunt, & rariorem ære mediæ regionis faciunt? Faciunt, si- ne dubio, & veluti in lagenâ humore plenâ parres quasdam & atomos perpetuò scandentes, alias descendentes aspicias: ita in ære qui infra nubes est, pars circa terram, vbi calore laxata fuerit, sursum in nubes, aut quousque aliam eiusdem leuitatis inuenerit, perpetuò subit, desidente alterâ quæ plus proni habuerit. Nam subita illa frigora, quæ alij in cælestibus influentis ferunt, à me æri mediæ regionis algido, & in terram subito decumbenti (nullo etiam manifesto flatu) dantur. vt Lib. 4. licebit cernere.

## ARTICVLVS VI.

*An superior æris regio raptu cali circumducatur.*

**N**ihil vulgatus in Scholis nostris, & omnium ferè libris, quàm elementum ignis, & supremam æris, motu primi mobilis cæli Lunæ impresso, ab Ortus ad Occasum quoridie circumagi. Verum, quid alij faciant, nescio; ego certè olim & semper tricas, & quidem intricatissimas reperi in hoc motu. Estne enim tractio, an pulsio, an vectio iste raptus? Non tractus, quia quæ se trahunt, per asperas superficies, vel vinculo aliquo nexa esse debent. cælorum verò superficies, vt omnes fatentur, glaberrima est. Non etiam pulsio;

pulsio, quia impellens, locum alterius intrare nititur: ideo enim loco compellit cedere. at superficies cæli in eodem semper circumcisè spatio se gyrat, nec aëris aut ignis locum affectat, vt cogat inde cedere. Quæ vehuntur etiam, aut vinculo quopiam, aut pondere suo affigi vehiculo debent. Sic equus currum alligatus vehit, & hominem grauitate suâ in curru defixum. Deinde, vt experiri cum Galilæo licet, vase rotundo in eodem spatio circumactò, inserta candelæ flammula non extinguitur, imò ne vibratur quidem: ergo signum est, aërem inclusum, in quo candelæ flagrat, non rapì in orbem, motu superficiei concauæ vasis. Quibusdàm sufficit respondiisse, ignem, aut aëra cælo subiectum, raptari, vt cælum inferius à superiori proximè ambiente. Sed in isto etiam par est, aut etiam maior difficultas, quam in Libris de cælo, Deo fauente, extricabimus.

Itaque quispiam neget aërem illum motu cæli sollicitari. quod ab iis longissimè est recedere, qui Oceanum etiam eodem raptu ab Ortu in Occasum volunt abire, vt Libro 5. referemus. Sed præter auctoritatem Aristotelis, etiam Cometarum infra Lunam notus me trahit, imò ferè euincit, vt aëri sublunari motum illum relinquamus. nimis enim pertinaces simus, si nullum Cometarum, qui cottidianâ periodo ab Ortu ad Occasum circumeunt, esse Lunari orbe inferiorem, asserere perseueremus. Videntur autem isti Cometæ, ab aëre in quo natant, circumuectari.

Quis ergo motum illum aëri facit, si cælum non imprimit? Intelligentiam hic alligare, nimis fortasse frigidum; nec pro philosopho, qui in vltimâ solùm desperatione, in hæc latibula confugere debet. An vim magneticam inferere magis placet? sic enim ferum, etiam sine contactu, magnes trahit. Sed hoc etiam asylum est solis desperabundis. Deinde vim istam per totum cæli forniciem diffusum esse oportebit: ergo maximè efficax erit, aëremque etiam hunc inferiorem, & quæ in eo pendent nubes, in orbem cottidianum circa terram aget.

Alius ergo modus est; si aërem supremum fornici cæli, tamquam, vt sic dicam, centro inniti leuitate suâ statuas. Veluti enim lapis grauitate superficiem terræ premens, in quâ solùm (non aliter defixus) iacet, vnâ circumferretur, si ipsa centrum suum circuiret; ita fortè ad raptum superficiei cæli, incubans & leuitate eam premens inferior aër, ab ipsâ in orbem portabitur.

Verùm nec hoc valdè allubescit. quia sic premi ab elementis

C leui,

leuibus cælum non existimo; nisi fortè maximâ & insolenti aëris aut ignis raritate intumesceret, sine alterius partis condensatione, Mundus elementaris. Sed id non solet. nam ideo tam obediens & facilis in densitatem est aër; vt statim in vicino se colligat & astringat, vbi in parte aliâ rarefcere, & plus spatij accipere contigerit. Deinde non semper sic aër cælum sequeretur; sed solùm cum raritate dissolui contingeret. Elementa autem leuia non incumbunt naturaliter cælo, ipsumque obnituntur in altum leuare, quia iis debitus non est cælorum locus. lapis verò nisi terræ sustentaculum subiectum haberet, præcipitaret se lubenter ad centrum.

Quò ergo vertimus sententiam? Huc: vel difficultate oppressus, pedem non moueo. Dic, Planetas ocyssimo illo raptu, quo se cotidie per ætheris liquidi curricula torquent, medium quod secant & propellunt, raptare etiam in orbem secum. quod non tam rigidè miraberis, si gruum, columbarum, aut sturnorum, gregatim volantium turmas, aërem quoque ante se agere cogites: si deinde, præter septem notissimos ingentis molis Planetas, astra etiam Medicea, Borbonia, & innumera fortassis (imò vix dubito) minora alia, in eodem æthere turmatim volare & circumcurrere. Asperitas quoque quorundam Planetarum ad hunc ætheris impulsum valere aliquid potest. rotunditati enim, quæ globos in orbem terit, minùs aër resistit. repugnat verò contumaciùs angulosus, magisque vicissim frangitur & propulsatur ab ipsis. Nec necesse est, ætheris raptum ad orbitam Lunæ statim finiri: quia iure & vinculo continuitatis, aër, siue ignis, qui infra est, aliquousque sequi valet. Fortasse etiam Lunæ tot montes & verrucæ ab Opifice dati, vt aërem inferiorem, his veluti vncis & retinaculis iniectis, secum abriperet. quod Fortunius Licetus nuper credidit. Si aliter autem raptus aëris sublunaris expediri nequit: ecce mihi noua machina ad diffringendam orbium Planetarum soliditatem. cuius antea numquam in mentem venit.

## CAPVT III.

*De caussa materiali meteororum.*

**A**RISTOTELES, & vniuersi omnes post eum, excepto vno Paracelso, materiam omnium meteororum in duobus halitibus constituit, in vapore, calido & humido, qui Græcè ἀτμός, & exhalatione, calidâ & siccâ, quæ ἀραδυσίασις. calidi sunt, à calore externo eos resolvente, & contra naturam. vapor à naturâ humectus, quia aquâ præfertim, & corporibus mixtis humidis, aut succulentis; exhalatio sicca, quia terrâ præcipuè, & mixtis arentibus, extrahitur. Vnde halitus vtrique communis nil est aliud, quàm substantia leuis quæ à corporibus grauibus virtute caloris rarefacientis resoluitur. Talem autem terrâ & aquâ exhalari manifesto experimento deprehenditur. aquam enim lacuum, & fluminum, item terram imbre madefactam fumare, agros etiam sitientes & hiulcos, Sole ictos, tenuem quemdam & velut igneum halitum exspirare, oculis cernimus. Nebula etiam, vbi radio solari, victo rigore intepuit, manifestè in altum resurgit. id quæ imbrium & humoris est signum. Certum igitur, pluuiam, vapore quem nebula fert & succollat, condescere.

Paracelsus tamen pluuias, ventos, & omnia meteora vult siderum fructus esse ( sic enim loquitur ) vt arborum, poma, & stas temporibus effundi. Hinc etiam stellas, phialas & cucurbitas appellat, in quibus sulphur, sal, & Mercurius, quæ vniuersorum meteororum ei materia sunt, continentur. Sed hæc plusquam Chymica sunt, & ægroti veteris mera somnia. Centum enim etiam annis, talis materia in terram nondum è stellâ aliquâ fixâ defluxisset. Nec reddi ratio solida potest, cur non eadem meteora promiscua sint omnibus anni temporibus. Verùm dubitationem habet, è quibus corporibus vaporetur hæc meteororum materia.

## ARTICVLVS I.

*An ex terra substantiâ etiam resolui possint exhalationes.*

**D**E aquâ, & ceteris liquoribus, res omnibus confessa: quia olas subiectis ignibus fumare, imò vacuari, lacus æstiuus Solibus



bus cibi cernimus. Terræ tamen vllos halitus extrahi negat Plato, Bodinus, & hodie quidam alij.

Et res his rationibus regi potest. Primò, quia terram decreſcere non videmus diutiſſimè expoſitam Soli; ſed ſolùm aſceſcere, extracto humore qui continebatur poris. vnde diſſoluitur tantùm in puluerem, qui omni humore exſucto, ſemper eadem quantitate perſeuerat. Sicuti ergo in animali venæ meſenterij ſuccum dumtaxat vtilem ad hepar rapiunt, partibus terreſtribus & ſæcutinis demiſſis in ſentinam & aluum: ita Sol è terrâ humorem tantùm imbrium ſecundum, aut ſuccum aliquem oleoſum ad ignearum impreſſionum generationem, nihil de ſubſtantiâ detrectando, videtur exſugere. Sic etiam plantæ terræ humorem, non terram vellicant. vnde ſiccitatibus videmus exareſcere.

Secundò: Ignis cineres conſumere, quia humore carent, numquam poteſt; ergo nec terram, quæ naturâ ſuâ eſt ſicciſſima.

Sed hæc numquam me cogent Ariſtotelem deſerere. Igitur de ſubſtantiâ ipſâ etiam terræ Sol aliquid in materiam meteororum decerpit.

Probo Primò: Quia mixta inſigni etiam ſiccitate prædita, vt thus, pulvis pyrius, ſulphur,

Perſ.

*-Rugoſum piper, & paſſentis grana cumini,*

& vniuerſa atomata ſuas exſpirationes habent: cur non & terra?

Probo Secundò: Quia aqua cæleſtis, & nix liquata, multum ſedimenti & terreſtris limi habent; eo enim fundum vaſis altè ſatis oblimant. igitur terrena materia cum vapore exhalatur in nubes.

Tertiò: Ventorum aridorum, qui à mediterraneis & ſitientibus ſpirant, materia ſicca & terreſtris eſt.

Quartò: Lignorum ſumus magnâ parte ſiccus & terrenus eſt; vt patet ex fuligine quâ caminos illinit. ergo etiam è ſubſtantiâ terræ ſimilis exhalatio reſolui poteſt. Quiſpiam etiam fortaiſſe idem è materiâ meteororum ignitorum conſicere putabit. hæc enim ex humore aqueo & ctudo nequeunt flammati. Verùm, neque etiam ex ſiccâ & meriſſimâ terræ ſubſtantiâ; ſed humore aliquo potiùs oleario & pingui: quem Sol tamen è terrâ in aquam poris conceptam diſſolutâ & fatiſcente, calore permifcet, & ad pinguedinem iſtam perducit. vnde aliqua ſaltem terræ pars in ſucum illum corrupta, in altum exſpirat.

Sed obiecta reiicienda ſunt. De primo, fateor humorem intra poros terræ conceptum, obedientiùs longè, quàm ſiccas terræ partes,



tes, dissolui & rarefcere. nam experimur omnes liquores modico etiam calore statim fumare, & in auras diffundi. Ita humor liniei, viso statim igne, expirat in vaporem, linteo, quod sentire possis, ne hilum diminuto. Causa videtur esse in mollitie, aut infirmitate etiam vnionis integralis talium corporum, aut denique in quadam rarefcendi proprietate, nondum adhuc satis hominibus notâ. Nam idem humor, qui cum mollis & fluxus esset, igni vaporanti illico respondebat, postquam in metallum, lapidem, aut crystallum dirigit, contumax est, & difficillimè obedit. Sicigitur etiam terra non facîle se exhalari sinit, nili humore aliquo mollita & subacta fuerit. tunc enim, vt lib. 2. Meteor. cap. 4. & alibi sæpè Aristoteles, liberaliùs in suas etiam exhalationes, non in solos humoris vapores se resoluit. Nego itaque terram decrefcere. sed pluuiâ, spiritu è visceribus ascendente, & summis deinde partibus alligato, & post addensationem continuato, stercoratione etiam & lxtaminibus, reparatur. Puluis etiam diu insolatus & excoctus, sine dubio minor est. vbi verò singulæ arenulæ ac atomi, ad minima, vt loquimur, naturalia peruenerunt, difficilius aliquid carpi videtur: aut quia particulæ metu præsentis corruptionis, dissolutioni pertinaciùs resistunt; aut quia vnio integralis, vt in lapidibus & crystallis vsu venit, longâ percoctione facta firmior. in rarefactione autè fortasse intercedere oportet aliquam dissolutionem integram partium. Exemplum etiâ suctûs mefaraici retorqueri in cõtrarium potest. Nana venæ illæ etiam aliquas siccorum alimentorum humore potulento maceratas partes alliciunt: aliàs enim nihil de cibis solidis facefferet in substantiam animalis, totumque in excrementa abiret. Similiter plantæ non purum putuinq̃e aquarum humorem, sed terrestri sicco fermētatum & incoctum attrcunt.

De cineribus, Bodinus incorruptibiles, & omnium corporum naturalium materiam primam esse credit. nam omnia igne tandem destrui, solis exceptis cineribus, apparet. Sed tamen etiam ipsos ignibus diuturnis carpi, & magnitudinem pondusque decrefcere, experientia affirmat. Reliquæ verò partes, quæ in tenuissimam scobem & farinam dissolutæ pertinacissimè flammis repugnant, atomis & veluti minimis quibusdam naturalibus constant, in quibus humorem particulas alligantem ignis sic decoxit, vt vix calore diduci valeant. Cineres enim corpus aliquod mixtum ignibus generatum esse videntur: vt ad eò mirum non sit, ab eodem, & iisdem qualitatibus non facîle dissolui, à quibus esse acceperunt.

## ARTICVLVS II.

*An Vapor & exhalatio specie differant ab elementis grauius, quibus extrahuntur.*

**T**Himon lib. 1. Meteor. q. 9. Tartaretus, aliiq̃ue affirmant. Probatur: quia incredibile est, formas terræ & aquæ remanere sub tantâ materiæ raritate & leuitate, cū naturaliter densitatem & grauitatem appetant. Deinde, spiritus ex animalibus, plantis & ceteris mixtis resoluti, ab ipsis specie dissentiunt. igitur nec vapor cum aquâ & exhalatio cum terrâ consentient.

Dico tamen Primò: Si elementa sint corpora physicè simplicia (id est, nullo materiæ & formæ substantialis cœtu coalita) vt multi Græcorum existimant; probabilius est, vaporem adhuc esse nudam aquæ, & exhalationem terræ, substantiam. In hac enim sententiâ, elementa naturaliter incorruptibilia sunt. & licet suscipere aliquam corporis mixti formam valeant; videtur tamen sæpius nondum superinducta fuisse, quandoquidem in naturam & proprietates elementorum tantâ pronitate relabantur. Id ergo quod vaporem & exhalationem vocamus, mixtum aliquod ex elemento antea graui, & nouitiâ formâ substantiali mixti non est, sed ipsa nuda substantia elementaris, vitiata accidentibus peregrinis.

Dico Secundò: Etiam si cum Aristotele nostro, & sensu ferè communi, elementa ex materiâ priori & formâ substantiali compingamus, verius est, vaporem aqueum, formam aquæ, & exhalationem terrenam, formam terræ, adhuc retinere. De vapore, res certior: quia fumus vapidus ex ollâ scandens & operculo adhærens, in aëre etiam feruido aut tepenti, in aquam reuertitur, nullâ ibi manifestâ causâ secundâ præsentē, quæ tam citò ex vapore valeat regenerare aquæ substantiam. Idem etiam ex omnibus distillationibus & sublimationibus Chymicorum potest ostendi, ac facillimo reditu æstiuī vaporis in rorem. De exhalatione fluctuo magis. quia raritas illa tam discincta & dissolutissima longissimè abiuit à naturali terræ densitate. Sed nihil tamen refert. quia eadem forma maximam aliquando qualitatum repugnantium diuersitatem perperitur in suâ materiâ. Nōne enim aqua naturâ suâ frigidissima, ingenti quandoq; calore, incolumi tamen formâ substantiali, effervesceat? nōne eadem naturaliter fluida & liquens, in glaciem alligatur & rigescit? nōne contrà, metallum, durum

à na-

à naturâ & consistens, igne soluitur & liquefcit? Minus igitur iam mirare, terram saluâ formâ substantiali sic in fumos diffuere; quidquid te rideat, Bodinus. Sed constatne, terrestres exhalationes aliquando ad terræ densitatem & naturam redire? Fateor, experientia nebulosior est, quàm in vapore. Tamen in aquâ pluuiâ, & niuali, limus qui subsidit, terræ lutum videtur, in quod se rederunt refrigeratæ cum vapore exhalationes. Fallitur enim Thimon, qui partes terræ densas etiamnum & graues, in nubes à succollante spiritu rariore subuehi credit. Fallitur Plinius, qui vaporibus in altum, piscium etiam examina, imò lapides baiulari. Tam dispersus enim, & languidè scandens spiritus, tantum virium non habet.

Lib. 12.  
cap. 1.

Ad Primum, ostendimus iam aliorum exemplo, formam terræ à raritate illâ exhalationis non necessariò statim interfici.

Ad Alterum, existimo plurimorum etiam mixtorum vapores & exhalationes, formâ non differre ab ipsis. Sic vapor Mercurij, Mercurius adhuc est; cum à sublimatione se redenset, & ad ingenium reuertatur. thuris, sulphuris, & infinitorum mineralium exhalationes, veterem speciem seruant. Difficultas grandior est, si viuentibus fumi illi extrahantur. vapores enim & humores florum & plantarum viuere non videntur post distillationem; cum tamen antea partes plantarum essent, & vitam haberent. Itaque opus aliquo discrimine. Sunt multi plantarum succi, quibus vt sanguine nutriuntur. hi exanimis sunt, & venis earum expressi, speciem non mutant: magno argumento, quodd in medicamentis per multos annos eandem vim purgandi & alterandi corpora retinent, quam in ipsis plantis habuerant. sic spiritus etiam, & sudores tertiz concoctionis in animalibus residui, speciem suam per auras secum differunt. Si verò vapor aut exhalatio, partium viuentium resolutione generatur, in homine & animalibus perfectis illico, & in ipsâ dissolutione integrali partis, vitâ extinguitur: quia anima talis in materiâ abscissâ à toto, & præsertim tam rarâ, non potest durare.

In plantis verò, & animalibus imperfectis, potest, saltem breui tempore. pauld post tamen funeratur in cadauer.

Ex inanimatorum partibus etiam quandoque ignis halitus differentes specie gignit.

Ita vinum in aquam vitæ sublimatum, ampliùs vinum non est. quod ex vi illâ admirabili calorificâ, quam deinde pertinacissimè retinet,

retinet, ex leuitate etiam quâ ceteris omnibus liquoribus superesse nititur, satis intelligi potest.

De causâ formali meteororum, dicemus speciatim in pertratione singulorum. nunc vno verbo, & vniuersè dico, esse aut figuram, aut localem motum, aut aliud accidens quod cum materia coit, illud accidentarium compositum, quod appellamus meteorum.

## CAPVT IV.

### *De causâ efficiente meteororum.*

**C**AUSAS efficientes proximas, quæ formam illam accidentariam inducunt, vnde essentia complementum & nomen habet meteorum, postea dabimus. Nunc remotam inuestigemus, quæ res soluit vaporem & exhalationem, omnium communem materiam.

## ARTICVLVS I.

*Georgius Agricola & Lydiatus nituntur ignem subterraneum facere principem auctorem vaporum & exhalationum.*

**D**uplici ratione, terrâ & aquâ exhalari aliquid potest: vel à supposito igne calefaciente, vel à Sole & cælo supernè impendente. Vtroque modo fieri constat. quia & multi ignes subterranei sunt; & nihil euidentiùs, quàm terram madefactam fumum exspirare irradiante Sole. Sed controuersia est, ab utrâ causâ plus materiae in meteora resoluatur.

Georg. Agricola lib. de Causis subterraneorum, maximam & præcipuam halituum copiam à subterraneo igne vaporari credit; nihil verò, quod vllâ ratione tot meteoris sufficere possit, à Sole. Hunc etiam acriter contra Peripateticos defendit Thomas Lydiatus Anglus, in libello de Origine fontium. Munimenta inspiciamus, quibus hæc opinio fidet.

Inprimis suppono, plurimos & maximos sub terrâ ignes ardere: quos obscuriùs calidi plurifariam fontes, Ætna, Vesuuus, Heccla, & tot alibi montium crateres & Vulcani flammæ in cælum vomentes, euidentiùs produnt. De quibus Aristotelem, siue alius est

est auctor, in lib. de Mirabil. auscult. & Vitruuium lib. 2. c. 6. alioſque potes conſulere. Tales etiam plurimi in Americâ nuper inueni, vt lib. 3. cap. 24. Hiſt. Indic. vidiffe ſcribit Ioſephus Acoſta. Montes ſunt altiſſimi, inquit, in plano vertice, camino ad radices vſque per immenſam profunditatem pertuſi. Aliqui fumum tantum, alij ſlammam, alij per interualla vtrumque, quidam etiam cineres, & id ab annis centum, & tempore immemorabili eructant. Alibi etiam in fundo camini, ſine ſlammâ aut fumo ſic ardet ignis, vt avarus quidam, inquit Acoſta, ſuſpicatus autum eſſe, lebetem per ferream catenam demiferit, quam momento pænè temporis conſlauit & abſumpſit ignis. Si tot ergo locis ignium emicantium perpetua tot ſæculis ſunt incendia, credibile eſt alios ſerè vbique eſſe ſubterraneos ignes, qui ſi non in apertas ſlammâs, ſubtiles ſaltem exhalationum fumos per venas & rimulas in apertum exſpirent & materiam meteororum. Videtur enim terra inſtar animalis eſſe, quod focum & fontem caloris habet in corde: à quo ſpiritus per arterias hac illac per totum corpus, in extimam vſque cutem, & denique foras per poros effunduntur. Ac veluti in animali, calor naturalis viſcerum, tepidos vapores ac exhalationes non tantum per os & nares, manifeſta ſpiracula; ſed per infinitos alios cæcos meatus, quibus tota cutis ctibro crebrius perforata eſt, ſuſpirat: ita terra, præter igniuomos montium crateres, tenuibus vbiſque ſpiraculis pertuſa eſt, quibus ſe etiam in auras exhalat.

Secundò: Vis calorifica Solis, non altiùs in terram, quàm pluuialis aqua, & arborum altiſſimarum radices, penetrat, id eſt ad duos circiter paſſus, ſiue decem pedes, vt Lib. 5. c. 6. art. 2. oſtendemus. Ex tantulâ autem profunditate Sol pro tot diu noctuque ſine ceſſatione ſpirantibus ventorum ſlabris, naſcentibuſque infinitis aliis meteoris, materiam, niſi nimis parcam, elicere non poteſt.

Tertiò: Magna pars ſuperficiæ terræ ſiluis, plantis, ædificiis, æpidibus tegitur: ex quâ proinde nihil, aut vix hilum Solis calor decerpere valet. conſtat enim etiam minimâ vmbrâ Solem frangi, & terram refrigeſcere. Ex reliquâ autem parte nudatâ ſumi non eliciuntur ſuffecturi vniuerſis meteoris.

Quartò: Aqua ſtagnans, & Soli multis diebus expoſita, vix tandem tepeſcit. ergo Sol eleuare non poteſt tot vapores, vt ſatis ſint maximis illis & torrentiſſimis pluuiis, quæ menſes ſæpè toros, & aliquando annos edurant.

Quintò: Non reſoluitur ex ſuperficie & ſummâ cute Belgicæ

D tellu-

celluris , exhalatio sulphurea & nitrosa, quæ fulminibus , & pluribus ignitis meteoris necessaria est. Cum igitur Belgium etiam fulminet, materia è visceribus, non superficie terræ, petenda erit.

Sextò : Nocte & hieme non pauciora, quàm die & æstate, meteo-  
ra videmus. igitur materia non attrahitur à Sole, qui nocte nul-  
las, hieme imbecillas vires habet. Imò qui sub polis habitant , me-  
dio anno, quo Sole carent, non carent meteoris.

Vltimò : Idem experienciâ quadam Clarissimi Viri, Medici ac  
Philosophi excellentissimi, Thomæ Fieni, huius Academiæ Ar-  
chiatri, firmare possumus. Qui è littore Batauico, sereno & amœ-  
nissimo cælo, quondam Oceanum prospectans, vidit è mediâ ma-  
ris superficie subitò emicantem vaporem, capite humano vix am-  
plio-rem: qui perpetuo tamen effluxu , breui temporis spatio, fere-  
nitate pulsâ, densissimâ nebulâ totum impleuit cælum . Igitur sub  
terrâ, & fundo maris ignes aliqui latent, qui sæpè aliàs tales fumos  
in cælum expirant.

## ARTICVLVS II.

*Defenditur Aristoteles. Agricola & Lydiatus reijciuntur.*

**A**ristotelis tamen nostri sententia est , Solem esse principem  
causam, & maxime vniuersalem, vaporum & exhalationum.  
Vbiq; enim eius meminit; ignis subterranei, parcissimè. Libro  
tamen Meteor. 2. c. 3. ab igne isto saponibus infici fontes, & cap. 4.  
exhalationem ventorum, in parte gigni affirmat.

Et est in primis satis certum , multorum ventorum materiam  
excitari à Sole. Anniuersarij enim omnes status, qui statis ferè  
diebus aut mensibus adspirare solent, à Sole manifestè reguntur.  
Sic namque Prodrömi, Etesiz, Ornithiz quotannis ferè velut  
ad conditum redeunt. sic vere & æstate status antelucani, omni  
pæne die sub auroram ad nos reuolant; primi videlicet tepore  
crepusculi, surgente, & molliter deinde relabente, & refundente  
se halitu.

Secundò : Sæpè post imbrem, vt notat Aristoteles , sequi solet  
ventus. nec aliâ re, nisi quia terra humecta & mollita , modico te-  
pore superueniente, reddit obedientius & facilius mixtos exha-  
lationibus vapores.

Tertiò : Matetiz nimborum, & fulminum , euidenti experi-  
mento, leuantur à Sole. Nam ideo, vere præsertim & æstate, post  
magnos

magnos calores sæpè fulminat, & effundunt se nimbi. quia, inquam, Sol præcedenti ardore, plures vapores & exhalationes attrahit, quàm possit digerere.

Quartò: Oculisetiam ipsi cernimus primo manè nebulas & vapores è mari, paludibus, fluminibus, vallibus subeuntes. & hoc secururæ pluuiæ non mendax sæpè signum habemus.

Quintò: Si in campos æstare torridâ, Sole feruentes, oculos intendamus, subtilissimum vbique fumum exhalari deprehendemus; per quem medium conspectæ agrorum glebæ tremunt & vibrantur: veluti muri & lapides platearum solent, si per exhalationes, quas in publicis supplicationibus expirant nostræ faces, aspicimus.

Sextò: Confessum etiam est, matutinum rorem à Sole resorberi. quod Scriptura quoque de manâ Hebræorum faterur: *Cùm in-Exod. 16. caluisset Sol, liquefiebat.* & alibi: *Statim ab exiguo radio Solis calefactum, tabescebat.* ac deinde vanescebat in auras.

Septimò: Qui in Americâ sub Æquatore habitant, perpetuos & profundissimos imbres, cùm Sol in æquinoctiis, & vertici impendet, habent; ideoque incolæ tempus illud anni sui hiemem appellant. Causa autem non in ignibus subterraneis est, sed haud dubiè in Sole: qui infinitos panè è subiecto mari vapores simul haurit, quos perpendiculari etiam & præsentissimo radio nequit dissipare.

Solem etiam esse causam huius effectûs magis, quàm ignes subterraneos, vniuersalem, sic potest ostendi. Quamlibet partem superficiei terræ subdiualem sex menses totos singulis annis illustrat & calefacit. hoc tantùm discrimine: quod in Zonâ torridâ, & duabus temperatis, diem noctemque intra 24. horarum spatium alternet; in frigidis verò sub utroque polo, diem vnum perpetuum sex mensium faciat. Igitur ex omni terræ & aquæ ambitu halitus euocat. ignis verò subterraneus, non vndique & per totam terræ superficiem in aëra se expirat, vt iam iam patebit.

Ad Primum ergo, libenter damus, ignem è terræ & magnæ maris visceribus, pluribus locis in cælum suspirare. Nec enim eruditissimo Turnebo, in lib. de Calore, planè acquiescimus. qui, *Omne, inquit, calorem è calo proficisci certum habeo, eiusq, perennem & ingem esse fontem Solem, reliquis tamen stellis in partem conferentibus.* & deinde: *A medio terra centro se promit & quoquo versum diffundit frigus; vs à calis culmine se calor deorsum demittit.* Nam calorem



etiam aliquem terræ spiraculis imputamus. Sed ista tamen spiracula rara sunt: nec vlla satis manifesta in Belgio, nisi fortè circa calidos Aquisgranensium fontes. Similitudo etiam terræ cum animali, non conuenit. Animal enim vbique calet, nec vlla pars eius interior est actu frigida, vt Medicorum experientia docet. Terra verò vndique ferè sub cute suâ (æstate præsertim, quando plurimi tamen halitus exspirantur, & infra duos passus, quò caelestis calor non peruenit) absolūtè alget. Non mirum igitur, calorem animalis vndique per poros subtile aliquid, cuius odore canes heros suos & feras internoscunt, exhalare, terram verò plurifariam nil simile pati. aliàs vt hominis, ita terræ superficiem, calore & spiritu interaneorum se per cutem transfundere, ardescere, aut intepelescere ferè semper experiremur.

Deinde, quàm altè vbique defossi sunt ignes illi subterranei? Certè enim ex puteis & fossis carbonariis ac metallicis, quæ magis ab aquâ frigent, quàm ab igne caleant, apparet insignis eorum profunditas. Cautè igitur Io. Dondus, Philosophus olim Patauinus, ad triginta tota milliaria infra terræ superficiem abscondit. ne scilicet metallicas venas conflarent, aut amburerent, inquit, arborum radices. Sed quis tam credulus, vt per triginta milliarium crassitiem, spiritus illi vbique incolumes possint se in aëra nostrum extricare? sæpius profectò in viâ tam longâ adhærebunt, aut rigore terræ, vel subterraneorum aquarum exringuentur.

Denique niues nostræ, quæ tepore minimo tabescunt, manifestè vbique statim, subeunribus tot è terræ venis spiritibus, liquefient. Sic enim in animalium villis, hominum vestibus, circa arborum truncos, celeriter soluuntur aut tabescunt. quia etiam arbores teporem quemdam & spiritum naturalem exhalant, quem niues diu non ferunt. Scio, reponent, terræ poros frigore ambientis aëris & iacentium niuium constringi, ne spiritus subterranei valeant eluctari. Videmus enim fumare terram, si effodiatur hiberno tempore; & niuem, quæ in agrum recens in ararum ceciderit, citò disfluere, quia partes terræ infra spiritu multo tepentes aratrum inuertit in superficiem.

Fateor etiam profectò, terræ poros, & humorem, si quis ipsis inerat, gelu sic alligari, vt halitus inclusi non reperiant exitum. Nego tamen id futurum, si isti ignibus subterraneis, vt volunt, exhalantur. Ascenderent enim noctibus diebusque agmine perpetuo, & plurimi confertissimi que circa summam terræ superficiem aggre-



gregarentur, quia obstructis aut conuiuentibus terræ poris libertas euolandi retunderetur. Vnde frequenti appulsu ibi conglomerati & restagnantes, terram inflabunt, & meatus ad exitum subaperient; niuesque superiacentes in tabem, & aëra totum inferiorem in teporem remollient. Sic enim pori animalium hiberno frigore contracti, ambulatione & motu spiritibus intus agitatibus, etiam usque ad sudoris eruptionem relaxantur.

Exhalationes igitur quibus terra arata fumat, natæ sunt circa eius superficiem à Sole, quando vires ad eousque penetrandum habuit, vel in aëre à frigore nocturno aut alio deprehensæ, in terræ venas compulsæ fuerunt. Quod inde liquet: quia si fodias altius, fumum inde nullum exiturientem percipis. Nec omnis etiam aruus ager æquè halat; sed ille maximè, qui multo fimo & lætamine satur, sæpeque exercetur. Fimeta enim, ut agricolæ sciunt, plurimo spiritu ècrementis animalium turgent, & fumant. Terra etiam magis exercitata, fistulosior est, & idonea, hiatque magis recipiendis intra poros halitibus. Spiritus deinde inclusus, aliquatenus seipse amplificare, quia partes aliquas terræ, aut pinguis humoris intra meatus eius concreti, tepefacere & dissoluere, potest. Ita namque spiritus scæni mutuo contactu & confluxu se inuicem calefactant, ut faciant quandoque incendium. Non igitur necesse est credere, omnes istas exhalationes, quas terræ exspirare aliquando cernimus, aut à suppositis ignibus, aut inmediate esse à Sole.

Ad Secundum dico, ex decem illis terræ in profundum pedibus educas exhalationes, ventis & meteoris omnibus ignitis largiter sufficere; si plusculum illud supplementum adicias, quod è visceribus terræ afferunt subterranei ignes. Ratio à D. Augustino lib. 2. cap. 4. in Genesim, peti potest. quia quoduis continuum partibus infinitis constat, quæ sine fine rarefcere possunt in maius, & spatium amplius occupare. Quid ergo magni miri, si solidæ terræ particula in amplissimam exhalationem, aëre inferiori longè rariorem leuioremque, diffundi valet? Ecce enim granum vnum pyrii pulueris (quis credat?) flammatum, in spatium 125000. maius dispergi VVillebrordus Snellius se expertum affirmat. Deinde, non habeat sanè continuum & materia terrestris partes infinitas: admittendæ tamen plurimæ erunt, in corpore densiori sese penetrantes, quæ per rarefactionem extra mutuum situm distrahantur in spatium longè diffusius. Sed quare terræ tergum non tandem

exinanitur, vellicatis, & in sublime abreptis tot cottidie eius particulis? Petam vicissim ab agricolistis: Cur terræ viscera non erogantur & absumuntur tot intestinis depasta vbiq; incendiis? Respondeo igitur, facilius quàm ipsi: vapores & exhalationes in terram recidere, rursusq; in eam reuerti; vt denuo releuari, & perenni circulo iterum repluere, & ad nos valeant relabi. Respon- sionem ad hoc secundum argumentum implebunt, quæ iam ad- demus.

De Tertio. Verum est, ex terrâ inuinbratâ filius & ædificiis non tantum à Sole extrahi, quantum ex apricis. attamen radius, aliunde saltem, in vmbas repercussus ( nisi planè Cimmeriæ sint) modicè eas frangit & tepefacit. Verè & eleganter, id est, vt solet, Seneca: *Loca quæ aliquâ iniquitate natura ita clausa sunt, vt Solem accipere non possint, illa quoque nubila & tristi luce calefiunt, & per diem minus, quàm noctibus, rigent.*

Deinde, vmbæ frequenter se cum Sole gyraut: vt lux pleno ali- quando radio illustret quidquid superficiæ terræ ab vmbâ, cir- cùm arborem fortè aut domum se vertente & fugiente Solem, occupatum fuerit.

Denique ex plantis ipsis aliquid sublimari, inde liquet, quòd ni- mio Sole flaccescant, ac exsiccantur. ex odore præterea, quem vnà cum spiritibus exhalant, aëremq; vniuersum cum salubritate aut noxâ animalium implent. Hinc enim horti & siluæ in pestilentia peruntur: & olim tali periculo suasæ à Medicis Principi Com- modo lauræ siluæ; quia halitu suo luem abigerent. Fructus etiam plantarum latissimè & confertissimè spiritum dispergunt: vt iu- menta quæ aromata vehunt, sæpè etiam adigantur in insaniam. A lapidibus quoque ipsis aliquid extorqueri satis intelligitur: quia ve- rustate fatiscunt, & exsucto omni humore dissoluantur. Greges deinde animalium & armenta, & homines ipsi, præsertim qui vi- no, cereuisiâ pingui, aut alio spiritali potu se largiter inuitant, non parum fortè in nubes & tem meteorologicam expirant. Camini etiam domorum in frigidis regionibus facillè rependunt & pen- sant obstaculum vmbæ; quod ædificia Soli obiciunt.

Virgil.

*Et iam summa procul villarum culmina fumant,*  
inquietabat ille. Ita profectò, fumant totam aliquando nubem, aut, si tam altè non statim ascendat, nebulam. Manè & vespèri caminos, Leodienses præsertim, adspice, quando nouo carbonario igne recalère incipit focus; mendior, nisi me- cum

cum dicas, halitu illo tam copioso aliquid posse addi nubibus.

*Nigra piceus sensim caligine vertex*

Sil. lib. 4.

*Voluitur, & pingui contorquet nubila fumo.*

Hoc etiam valdè æstimandum: Maris, lacuum, fluminum superficies vbique ferè sine umbris Soli esse expositas: quæ tamen terræ aquis nudatæ magnitudinem faciliè adæquant. Hinc enim im-  
mensa vaporum, imò etiam exhalationum copia euocari potest. Nam aquæ marinæ, & pleræque omnes alix, terrestrium halituum miscellâ inquinatissimæ sunt. relabuntur enim in eas supernè plurimæ exhalationes; alibi quæ etiam è fundo veniunt, aut de rasus alueo limus humori confunditur. Igitur etiam ex aquis, terreni halitus aliquid à Sole sorberi potest in altum. Et hinc à mari, etiam ubi nullæ Insulæ eius interpellant vnitatem, venti afflant; licet exhalatione molliori, quàm à terrâ; vt retulerunt nobis Indici nautæ. Nam exhalatio terreno educta ferocior est, & magis procellosa.

Nec omitendum, quòd radius solaris altius multo in aquas, quàm terram, penetret. *Sol* enim, ait lib. 2. cap. 42. Plinius, *perspicuus vrinantibus est, in quamlibet profundam aquarum altitudinem.* Nimium tamen, & falsum hoc est. Nam piscatores vnionum maris Pacifici iuxta Panamam referunt non infra quindecim cubita aspici à se Solem. Idem adserunt vrinatores Indiæ Orientalis ad Ormutium, vt Ludouicus Barthena mihi testis. Verùm ex tantâ saltè ferè profunditate, præsertim circa torridam, halitus à Sole resolui è mari, & educi possunt.

Circa Quartum, multi mecum olim decipiuntur, qui feruentes solùm, aut sic tepentes vt digitus immersus persentiscat, ollas fumantes vidimus. Potest enim reverà tenuis vapor, & qui visum omnem effugiat, aquâ exspirare, etsi nullus teporem eius valeat percipere. Calorem etenim non sentimus, nisi intensior fuerit illo, qui organum tactûs nostri contemperat. Potest autem aliquis remissior, ad vaporem fundendum & exhalandum sufficere. Et nōne lintheum madens, frigido autumnio aut hieme, suspensum etiam extra venti flatus, Sol exsugit? tange tamen ipsum, teporem nullum tactus agnosceret. Nōne etiam illos ipsos lacus, quos æstate tepefcere vix affirmas, Sol tamen ebibit?

Quintum etiam falsum sumit. Certè enim in Belgio ex omnibus præne ruderibus, & stabulis animalium, halinitrum, id est, materiam pulueris pyrij educimus. Chymici etiam nostri è rore per distillationes aliquam nitri, & salis ammoniaci partem eliciunt, quam

quam Sol procul dubio summâ tellure vnâ cum roscido vapore extrahit. Itaque terra etiam nostra, halinitri ferax est, & materix fulminalis. Sulphuris quoque: cuius nuper etiam apud ocellum vrbium & Orbis, Antuerpiam nostram, venam satis vberem & beatam, repertam omnes scimus. Si quâ autem in parte halinitrum & sulphur Sol parcius extrahit, rariùs Iouem fulminantem sentit, aut aliunde materiam aduehunt flatus.

Sextò Respondeo, noctibus apud nos rorem, pluuiam, fulmina, &c. generari ex halitu quem dies antè proximè lapsi vaporaue- rint. Terra quoque diurno Sole calefacta, teporem etiam in noctem seruat, reliquia sçue halituum quasdam exspirat; vt incendiorum, postquam deflagrauerint, cineres solent. Hi autem nocturni spiritus pestilentiores sèpè diurnis creduntur: vt crassus ille & ater fuliginis, quam cādela recens extincta spirat, vapor, nidore suo & noxiâ qualitate magis nares ac cerebrum offendit, quàm si eo se ale- ret, venenique malignitatem discuteret viuens flamma. quomodo etiam pestiferorum halitus nocentiores sunt, calido adhuc & à vitâ fumante corpore. Vnde minus periculi habet, *decemesiam languentes inuisere*, inquit lib. 2. cap. 4. Cosm. noster Gemma, *quàm semel adesse mortuo, præsertim vbi recens cadauer exhalat, aut etiam illis adesse propius, qui primùm de domo funebri prodierunt: quia pestis fomitem in veste circumferunt*. Qui etiam in Sphærâ stante, siue sub polo habitant, medio anno quo Sol infra horizontem est, meteora, præsertim niues, sentiunt, de materiâ quam Sol longo & pertinaci dimidij itidem anni die vaporauit. Nec enim halitus in altum sublatus, statim necessariò totus & vniuersim relabitur, aut consumitur à Sole; sed multos dies, imò menses potest pendulus in sublimi fluctuare. Venti etiam à Zonis temperatis in frigidas refluantes, vaporem & exhalationem aliunde sublimatam adducunt. Stellæ deinde, circa polum præcipuè Arcticum, maximè illustres, conferre fortassis aliquid insensibilis teporis valent. Luna tamen magis: quæ singulis longæ illius noctis mensibus, dies circiter 14. supra eorum horizontem visitur. Ipsa enim, præsertim pleno aut tumidiori orbe, femineo & imbecilli radio, lenit tamen, quantum nos etiam experimur, noctis rigorem.

Nimio tamen acumine exerrat eruditiss. Medicus Franciscus Valesius cap. 26. Sacræ Philos. dum regiones sub polis temperatiores circumiacentibus esse contendit. Quia, inquit, regio Arctico polo subiecta *vincit proximas ac reliquas Septentrionales*  
plus

*plus dierum longitudiné, quàm vincitur rectitudine radiorum.*

Verùm cum experientiâ pugnat. diurnâ enim illâ sex mensium nocte totus diei antecedentis calor extinguitur. imò non sola nox, sed magna etiam diei pars apud ipsos hiemat. nam Hollandi, exitu etiam mensis Iunij, mare sex pedum altitudine congelatum inuenerunt. Causâ, penes longitudinem noctis; & quia soli ibi Aquilones, exulantibus mollioribus & tepentibus ventis, regnant. Audi Exercit. 37. Scaligerum: *Hieme, qua decem seu menses, quasi pavimento solidata maris superficies. æstate perpetua caligo, qua pomeridianis horis vnâ aut alterâ vix discussa, mox reintegratur.*

Sed addit Valesius, numquam ibi veriùs toto anno esse noctem, sed diem solùm, aut crepusculum. cùm enim eorum horizon incidat in Æquinoctialem, Sol numquam altiùs, quàm 23. paullò amplius gradibus demergitur: quanta scilicet est intercapedo Æquatoris & brumalis Tropici. crepuscula tamen durant, inquit, etiam cùm Sol 30. gradibus depresso est infra horizontem. Verùm à scammate & vero hoc abit. Circulus enim crepuscularis 18. solis gradibus describitur infra horizontem: quam distantiam vbi Sol transiit, lampades omnes crepusculorum extinguuntur. Deinde frigida sunt omnia crepuscula, nisi dies proximè feruidus præcesserit. Experientia denique illa pulchra & rarissima Clariss. Thomæ Fieni, probat solùm, quod etiam vtròq; damus, ignes aliquos sub fundo maris viuere, & halitum quandoque per totam aquæ profunditatem in aëra nostrum se transfundere. Sed recusamus tamen, ignes subterraneos omnibus aut plerisque terræ poris in cælum respirare. Igniculos etiam, radicibus præsertim montium sparsim & rarè suppositos, non refello. Tales quippe, thermas plurimarum nobis tepefaciunt; imò frigidorum etiam fontium soli faciunt, aut saltem adiuuant generationem, vt Lib. 5. ostendemus.

Hoc denique habe, & finio: Non scandunt vapores & exhalationes, attracti virtute aliquâ magneticâ Solis, vt Scaliger credit; sed dissolutâ elementi densitate, sponte suâ mouent pedem, siue succollantur à propriâ leuitate.

LIBERTI FROMONDI  
 METEOROLOGICORVM  
 LIBER SECVNDVS:

De Meteoris ignitis.

CAPVT I.

*Materia & forma ignitorum.*



A V S S A materialis transiens meteororum ignitorum est ἀναδυσιασις seu *exhalatio idonea flamma*. Hæc enim est, quæ inflammatione corrumpitur in ignem: qui est materia permanens huius meteori. Vt autem exhalatio flammam, saltem visibilem, concipiat; debet esse viscosa aut pinguis. quæ enim omni humore oleari carent, vt cineres, candelarum fuligines, &c. non recipiunt inflammationem. Hinc sequitur, materiam istam, non esse putam putam terram in fumos exhalatam. mera enim terra, arida est & omnis pinguedinis experta. macerari ergo eam antè oportet humore aliquo pingui, poris eius, virtute caloris solaris aut alterius, incocto ex aquâ pluuiali, & partibus terræ in eam fatiscenribus. Deinde bona, & fortasse melior materiz horum meteororum pars, ex mixtis, ve sulphure, bitumine, plantis, animalibus resoluitur.

Forma meteororum igneorum, vt talium, sunt *accidentia quadam, & præsertim situs, aut motus materia, qui meteoro tribuit nomen*. A situ enim & figuratione, aliquod lancea, aut trabs, &c. à motu, ignis fatuus, aut capra saltans, &c. appellatur. Forma eorum substantialis, est forma ignis, si exhalatio sit tota incensa. aliàs enim potest meteorum maiori parte constare exhalatione adhuc crudâ, quæ lumine partis accensæ perfundatur & resplendeat.

Aduerte, tamen multa sæpè haberi pro ignitis meteoris, quæ reuera



uerà non sunt: sed vel corpora sunt suapte luce fulgentia, vt ligna putria fungi&que putres; vel sideris alicuius reflectunt lumen, vt trabes illæ, & luminosi tractus, qui nocte concubiâ, post extinctas omnes crepusculorum reliquias, ab horizonte occiduo aut Boreali, subitò euibrantur, aliquando etiam vsque ad Meridianum. Imò Robertus Fluth, Anglus scriptor, affirmat se quondam ignem fatuum noctu secutum & assecutum: & materiam inuenisse non igneam, sed viscosam & lubricam, compactam in modum spermatis ranarum, distinguentibus nigris & exiguis maculis subalbida, quæ vice speculi redderet stellarum lumen. Causa efficiens proxima, non omnium ignitorum eadem est: dicitur&que ea in singulis. Initium autem ab iis, quæ in infimâ regione circa terram generantur, faciemus. deinde per mediam ad supremam ascendemus.

## CAPVT II.

*De meteoris ignitis infima regionis.*

## ARTICVLVS I.

*De Igne fatuo.*

**H**UNC ignem & alios similes Plin. lib. 2. cap. 37. dicit in Naturæ maiestate abditos, & incertâ ratione oriri. Nos eos tamen, quantum Deus & meditatio dederit, è latebris istis extrahemus. Ignis, qui vulgò fatuus, erraticus etiam, aut ambulo, solet appellari. Materia eius, exhalatio pinguis & viscosa: forma, saltus ille in modum hominis fatui. Causa exhalationem incendens, in difficili est & obscuro. Tres possumus imaginari. Prima, saltus ipse exhalationem confricans & attenuans. sic enim eam ad formam ignis (à causâ primâ, quando secunda deest, producendam) disponit. Deinde, antiperistasis nocturni frigoris. hæc enim exhalationem densat, & partes subtiliores, in quibus fortasse est aliqua scintilla ignis quam interdiu Sol accendit, in centrum, aut in angustum cogit: ibique mutuo contactu se calefaciunt, & ab vnâ reliquæ incendium rapiunt. vel certè etiam totam exhalationem Sol ante occasum incendere potuit; noctu&que demum, extincto maiori lumine, apparere cœpit. Sicuti enim alstra non minùs interdiu, quàm internoc̃tu lucent, et si non distinguamus: ita omnia ignita meteoro-

ra die iuxta ac nocte generari valent, licet lumine Solis nimis vberi perfusa, inter diem non conspiciantur. Tertia causa, antiperistaltis nubium esse potest; quæ stellas cadentes & fulmina etiam accendit. materia enim fatui in nubibus fortasse fuit, indeque expulsa, in infimo aëre tamdiu fluctuat, donec tenacitate digesta, tota deflagrauerit. Hæ causæ etiam accommodari possunt Castoribus, Helenis, & id genus aliis.

Causa saltus fatui, sunt rores nocte in eum recidentes, & depressantes, contra quos leuitate suâ resurgit: fluctus etiam & instantia aëris: denique, prout densatur frigore, aut calore rarefcit, succumbit, aut in altum resilit.

Locus ubi frequentius apparet, paludes, cloacæ, cœmeteria, patibula sunt. quia ibi copia halituum pinguium, quos loca vliginosa, & mortuorum cadauera exspirant. Tempus, æstas maximè, quando Solis efficacior ad soluendas exhalationes potentia; vel autumnus, quando terra incendio æstatis adhuc fumat, & Sol satis validus ad eliciendos, non absumendos, halitus. Hæc enim vnica videtur ratio, cur omnia meteora ignita magis autumnino, quàm aliâ anni tempestate frequententur. Durant autem fatui ignes aliquot etiam horis: quia licet perpetuò partes exhalationis subtiliores exspirentur, aliæ tamen contumaciores aduersus flammam, paulatim accenduntur, & (vt fit in candelâ) decedentibus succedunt.

Flammulæ istæ in Germaniâ & Belgio rariores, quàm in Hispaniâ, Africâ, & circa torridam, sunt. In montibus Hispaniæ viatores sæpè plurimas simul vident; in Æthiopiâ campi toti nocte ipsis, ceu stellis, nitent.

Quia verò in materiâ lentâ & tenaci ardent, aliquando signa militaria, aut viatorum hastas apprehendunt. *Vidi*, inquit Plinius, *nocturnis militum vigiliis, inharere pilis pro vallo.* Et, *Gylippo Syracusæ petenti, visa est stella super ipsam lanceam consistisse*, ait Seneca. Nuper etiam ante decretoriam illam Pragensem pugnam, narratur Illustr. & Inuictissimi Tribuni Legionis illius V Valonicæ, verè fulminatricis, D. Guilielmi Verdugi vexillo ignis talis insedis: idque augurium aliquod infecutæ mox ingentis illius victoriæ fuisse.

Solet sequi fugientes, aut fugit insedantes, quia aëri ei pro vehiculo est. aër autem versus tergum inambulantis, motu vacui, affluit, ducitque secum suspensam in eo flammulam: vnde videtur sequi. fugit verò, & quidem euidentius, quia aëris fluctus & vndatio quam ambulans facit, eam propulsat & abigit. vnde magis equitenti

Lib. 2.  
cap. 37.

Lib. 1.  
Nat. c. 1.



quitem quàm peditem fugit : ille enim maiorem aëris fluctum ante se agit. Ad flumina autem curiosos, aut turbatos, sequentes ducit: quia aqua crispâ, & sæpe fluctuante, superficie atriguum aërem secundo alueo deducit, in cuius locum alius, ignis fatui forte vector, defluit. Ad concauitates etiam & alia præcipitia; quia fortasse ventus ab eminentioribus repulsus eò se gyrat & deuolat. Adde, certum & expertum esse, malos Genios in perniciem mortaliū aliquando hunc ignem dirigere. Ostendo id manifesto exemplo cuiusdam mei affinis, qui mihi sæpe denarrauit. Redibatis nocte oppido Viseto Haccuriām, natalem meum locum, æquali inter Leodium & Mosæ-Traiectum distantia: & ecce medio campo circumuolant eum subito tres quatuorue fatuæ istæ faces. perterritus abiicit se illic in terram. permanent tamen illæ, & vno aut altero passu ab eo distantes, fixæ & immobiles circumlucent. Cū diutius terræ inhaereret, & inuocaret Dei opem, absiliunt inde dimidio ampliū milliari. Exsurgit tum quasi liber, videtque transuolasse Mosam. sed ecce vix duos aut tres passus confecerat, reuolant derepentē, & cingunt vt prius. ibi ipse maiori terrore in terram recidere, & pertinaci procubitu tam diu fatigare, donec rursus sine reditu diffugerent. Nihil certius, quàm talem motum non casu, sed ab Intelligentiā aliquā directum fuisse.

Vulgus etiam fingit, animas Purgatorij esse, quæ vagentur circumdata, & alligatæ, hoc expiatorio igne. Et auget suspicionem, quòd aliquando videantur voces quasdam edere. quia forsitan pars materiæ densior, concepto intus & intèro spiritu rumpitur, & cum crepitu dissilit: vel quia nocturnus roscum stridore flāmulam incidit; vel quia ipsa secando aëra sibilum facit. ipse etiam Genius aliquando rector, fingere voces ad terrorem aut dolum potest.

Id verò quod Robertus ille Fluth in manus nactus, vt in fine cap. præcedentis narrauimus, non ignis fatuus, sed gluten fortè aliquod in aëre concretum fuit: delapsū enim in terram ante se affirmat, quod ignis ille fermè non solet. vel fortassis reliquæ alicuius stellæ cadentis fuerunt, quas ignis in talem substantiam decoxerit: sidus enim aliquando cælo lapsū vidisse se, Clariss. Vir D. Petrus Castellanus, Medicinæ & litterarum Græcarum Professor, Vir tam fide dignus, quàm Medicinā, & omni politicij litteraturā inter Academicæ nostræ eruditissimos conspicuus, mihi narrauit, materiamque eius non longè abluisse, ab eā quam Fluth in fatuo igne deprehendit.

## ARTICVLVS II.

*De Castore, Polluce, Helenâ.*

**T**Res istos ignes, quæ etiam sidera à nautis appellantur, solus loci situs à fatuis distinguit. hi enim terræ, illi mari impendunt. unde aliquis è fatuo & ambulone Helena fiet & sexum mutabit, si ventus è terrâ in mare eum exsibilet. Si duo simul à nautis conspiciantur, Διοσχορυ, siue Castor & Pollux; si vnicus, Helena vocatur. Hispani & Galli circa mare Mediterraneum, S. Hermi aut S. Telmi ignes, Itali, S. Petri & Nicolai, nominant. Duo, felices, & tranquillitatis indices reputantur; vnicus, mali ominis, & tempestatem importare. Temerè tamen, vt credo: & ideo solùm quia Castor & Pollux benefici olim nauigantibus, profligatis toto mari piratis. Helena verò soror, à Paride rapta, calamitosa, & occasio longæ illius & famosæ Troianæ obsidionis. Cardanus tamen lib. 2. Subtil. nititur veram causam reddere. quia, inquit, cum duo, parui sunt, & minimè lentis; aliàs enim in vnum coissent. Sed frustrâ. Duo enim parui possunt æquiparari vni maiori: & licet forent lentæ ac tenacis materiæ, non ideo statim in vnum nodum confluerent; quia forrè vento aut fluctu aëris non permittuntur iungi. Meliùs ergo Seneca lib. 1. Nat. cap. 1. vim nullam in numero ponit, sed in quiete solùm & motu. *In magnâ tempestate*, inquit, *apparent quasi stelle velo insidentes. adiuuari se tunc periclitantes existimant Pollucus & Castoris numine. Causa autem melioris spei est, quòd iam apparet frangi tempestatem, & desinere ventos.* Quies ergo illa in antennis & velis significat status sopiri, & malaciam redire, siue vnus, siue duo, pluresque ignes fuerint. cum verò iactari & discerpi incipiunt, ventos sentiunt prodromos tempestatis. Multitudo tamen etiam materiæ huc refert aliquid. nam exhalationes plurimas, in status mox forrè recasuras, ascendisse satis indicat. & hinc quò magis vrit, & in materiâ densiore arder hic ignis, eò maiorem & prexentiozem perniciem affert. vt verum illud Cardani esse possit: *Helena sidus circa malum naui, quod cadens etiam anea vasa colliquat, certus submerisionis nuntius.*

Ceterùm, quia Castor & Pollux nautis salutare, aliquando effigies eorum pro Ὠκεῖον seu insigni figebantur in prorâ naui. Veteres enim, vt notat Ios. Scaliger, præter Turelam, quæ Deus aut Dea in puppi erat, Ὠκεῖον (à quo nomen, naui accipiebat)

vt Centaurum, Taurum, Arietem, Anguem, Castorem & Pollucem, in prora statuebant. Hinc S. Lucas Act. vltimo scribit, nauem Alexandrinam, quâ S. Paulus Syracusâ nauigabat, habuisse pro *Ἰδούριον, Διοσκύριον. Castorem & Pollucem.*

## ARTICVLVS III.

## De Igne lambente.

**H**ic ignis est exhalatio tenuis & vncta, ex spiritibus animalium concinnata, & circa crines eorum relucens. Id autem Veteres habebant pro rei cuiusdam & fortunæ ingentis præsagio. vnde ingeniosè capiti Iuli, filij Æneæ, talem circumfinxit Poëta:

*Ecce leuis summo de vertice visus Iuli*

*Fundere lumen apex, talisque innoxia molli*

*Lambere flamma comas, & circum tempora passus.*

Æneid. 1.

Et Æneas pater:

*Nos pauidi trepidare metu, crinemq; flagrantem*

*Excutere, & sanctos resinguere fontibus ignes.*

Sed non erat necesse. Flamma enim illa, innoxia lambere comas solet, vt Poëta antè dixit. Noto etiam, totam præne ignis istius naturam tribus versibus ab eo signatam fuisse. Inprimis *apicem* vocat, quia flamma hæc in conum fastigiari solet: subtilissimâ scilicet eius parte citius in altum fugiente, & ceteras præuertente, seque in apicem densante, vt sic facilius terebret, & vincat aëris ambientis resistantiam. Deinde *leuem* dicit; quia flammula est, texta è tenuissimo spiritu. Tertio, *talium* eius esse *mollem & innoxium*; & hoc ob materiæ tenuitatem. similis enim est flammæ vini ardentis, in quâ fluxa raritas vim amburendi planè discinxit. nam lineum eo madefactum nihil vstulat, contenta solum humorem exfugere. Quarto, *circum tempora passus*. eadem enim flammula non diu perseverat, sed alia & alia, perpetuo agmine, à spiritibus ascendentibus, in supplementum pabuli venit. Denique, tempus quo tales ignes videri tantum solent, nempe nocturnum (nam die, maius Solis lumen eos hebetat aut prorsus supprimit) egregiè obseruauit. Factum id enim ipsâ eâ nocte, quâ equus ille durateus Troiam cepit. Aliquando tamen, vbi halitus densior & pingui sudore (qualem magnus & improbus labor exprimit) est permixtus, interdiu etiam se, è vicino saltem, videndum præbet. Sic Alexandro in ardore pugne caput scintillauit, sic Tibeti equus quon-

quondam flammigeravit. & de L. Martio Scipionum in Hispaniâ ultore, Linius ex Antiæ, *Flammiam concionanti fusam è capite sine ipsius sensu, cum magno pauore circumstantium militum*, scribit. Seruio Tullo etiam Rom. Regi, puero in regiâ cubanti caput arsisse visum, creditumque Laris familiaris filium: & ob id Compitalia, & ludos Laribus primum instituisse, affirmat Plinius. Sed verisimile id puero in tenebris euenisse. nisi etiam Magicum aliquid interuenerit. Porro irâ aut vino æstuantia capita, facilius hic ignis circumfulget: quia illis poti aperti & dehiantes, & spiritus plures ac magis ignibus idoneos suppeditant in flammam. Hinc Alexander quia vinosus & igneæ complexionis (licet quidam apud Athenæum lib. 12. melancholicum, & ideo sanguinarium & crudelem fuisse dicat) aptus & procliuius hisce inflammationibus fuit. Existimo etiam, non raro spiritum sine verâ flammâ & igne lucere. Patet id in equis & felibus, quos si aduerso pilo vehementer frices, scintillas (nec puto ardentes) excuties. pari ratione, si saccharo (quod non semel sum expertus) in densis tenebris cultrum affricas, flammæ perpetuas, vix irritò vllò ictu, emicantes videbis. habeo tamen, cur dubitem igneæne flammulæ, an lux & albedo spiritibus saccharis nativæ sint. Certum enim est, multos esse spiritus qui lucem sine igne habent. Putasne Poëtam, cum Turnum iratum describit,

Aenci. 12.

*His agituri furis, totoque ardentis ab ore  
Scintille abstinent: oculis micat acribus ignis.*

intellexisse ignem, qualis qui focum nostrum accendit? Plus ingenij habuit. scintillæ istæ nitent tantum, ut nigedulæ & lampyrides, non vrunt. sunt enim animales aut alij in corpore spiritus, quos ira, pudor, & similis alia perturbatio per nervos opticos in tunicas oculorum expellit. Hinc flagrantés illi Tiberij oculi, qui cum primùm à somno patuissent, omnia in tenebris, ceu mediâ luce cernebant. tales etiam ferè Dictatori Syllæ. qui etiam rutilâ comâ, & rubcâ facie instar ochtræ fuit. quales, fallor, aut citiùs phantasticus iste ignis allambit. fulvus enim crinis fulgines aliquas concolores habet, spiritusque ruforum magis splendent. vnde & sudor eorum propius quàm ceterorum, ad croceum accedit. Tales deniq; oculi flammigantes C. Mario, quibus, ceu geminis facibus, Cimbrum exterruit, quem ad eum in obscuro carcere trucidandum submiserant Minturnienses, ut in Mario Plutarchus scribit. Vbi aduertere licet, tres Principes insigniter crudeles & sanguinantes, C. Marium,

rium, Cor. Syllam, & Tiberium Cæsarem, pari oculorum habitu fuisse. Similes etiam canum rabientium in tenebris oculi. Scio deinde, cui à largiori paullo vini Hispanici potu, experrecto, nox visa collucere. & de quadam Comitissa lib. 1. Obseruat. narrat Schenckius, in morbo oculorum, nihil inter diem ac noctem distinxisse, sed omnia per tenebras, vt claro meridie, solitam cernere. Cuidam etiam pestifero nuper Collegium nostrum visum fuisse. sed incendium in oculis eius tantum fuit. Asclepiodotus Philosophus in nocte, lucernâ nihil adiutus, libros legebat. Imò, vt iam video, duo Scaligeri, & Casaubonus tandem, si Deo placet, affectant Tiberianos oculos. vt vix me teneam, quin etiam clammem in hoc me mustaceo laureolam inuenisse. Spiritus autem tales clari & luminantes, oculis & poris capitis confertim erumpentes, ignis lambentis speciem facere possunt. Tales etiam fortasse illius Carmelitæ, de quo lib. 8. Variet. cap. 43. Cardanus, cui per annos tredecim, quoties cucullum in occiput reduceret, flammæ erumpebant. Magiam enim fuisse non existimo; quia Religiosus: neque etiam sanctitatem; quia sæpè ad prandia à miraculi curiosis inuitabatur, & ibat: magni autem sancti non tam facild vadunt pransum foras. Aliquando tamen Deus luminosæ eiusmodi indes capitibus amicorum suorum circumfundit, sicque vulgò eos pingimus. & S. Ioannes Apoc. 10. vidit *Angelum amictum nube: & iris in capite eius, & facies eius erat vt Sol.* Facies quoque Christi Domini in monte Thabor, resplenduit iuxta aut supra fulgorem Solis. hæc autem coruscatio lucem & puritatem mentis significat.

## CAPVT III.

*De meteoris ignitis media regionis.*

## ARTICVLVS I.

*De Dracone, & Stellâ cadente.*

**P**ARACELSVS ridiculè censet Draconem hunc esse animal igneum, natum in elemento ignis, vt muscas in aëre, pisces in aquâ, vermes in terrâ. dicitque brevis vitæ, vt Salamandras; *genitas, inquit, sine semine, ex putrefactione sulphuris adurentis.* Sed cineres, & reliquæ eius in terram decidentis, satis indicant ignem, non animal,

mal, fuisse. Repellitur autem, ut quidam existimant, hæc exhalatio à nubibus, in quas magno impetu incurrit. Verùm durities nubium non est tanta, ut retorquere deorsum tam valide possit, ut Lib. 4. circa causam efficientem ventorum dicemus. Itaque refrigeratio, quæ exhalatio in mediâ regione aut circa condensatur, & grauior aëre redditur, in quo pependit; vel certè explosio è nubibus, more fulminis, est causâ volatûs & obliqui delapsûs eius. Hanc secundam causam esse frequentiorē, probat color ille draconum cæruleus: qui haud dubiè nasci videtur ex mixturâ lucis exhalationis incensæ cum opacâ parte nubis, quam erumpendo sibi implicat & vnâ detrahit. vnde etiam exhalatio valde refrigerata, & tantum non extincta apparet. ut non sit iam mirum, tonitru nullum ab eâ edi, cum languido, frigido, & fracto verbere nubem cadat. sic etiam puluis madens, aut flammæ densioris, fragorem in bombardâ surdum facit, glandemque tardè & cunctanter expellit. Sinuoso autem corpore sunt dracones, eâ ratione, quâ turbines, itidem è nubibus explosi. quia scilicet posterior pars exhalationis grandiorē impetum, quàm prior, accepit; eamque premendo, arcu quodam aut gibbo in latus auertit. partes etiam nubis aut exhalationis vtrimque appositæ, alarum imaginem, uti scintillæ quædam igneæ circa caput, similitudinem flammæ ore vomentis, facere possunt. Censeo tamen fabulosum, veros dracones ignem (nisi fortè in irâ, quod & equi possunt) solitos spirare.

Ex his potest draco volans sic finiri: *Exhalatio pinguis & copiosa accensa, qua deorsum obliquè cadit è nubibus, similitudinem habens veri draconis volantis.* Forma autem veri draconis, oblonga est, tumente aluo, capite & caudâ gracili. Scaliger Exercit. 183. de Atlanticis, *Solo contactu, inquit, dracones Atlantis montis interficiunt. capite sunt & caudâ gracillimi: alui tanta vastitas, vix ut reptationi sint habiles.* alati tamen quidam sunt, & volant. quamquam Cardanus lib. 7. cap. 29. Variet. scribat se Lutetiæ quinque vidisse, *bipedes, alis exiguis, ut vix, inquit, volare crediderim. caput paruum, & serpentum capiti simile, color lucidus, pluma nulla, nec pili. magnitudo eius qui alios praecebat, cuniculi.* Sed hi dracunculi tantum erant. Plinius enim, etiam vicenū pedum, in Indiâ nasci affirmat. Miratur tamen idem, vnde Iuba, Rex ille & Scriptor egregius, citatos crediderit. nam *Draconum cristas, ait, qui videris, non reperitur.*

Dracones signa sunt pestilentiae & morborum, quia aërem mult-



cis exhalationibus grauem & infectum esse oportet, vt tantæ molis meteora generentur. Qui deuolantem aspexerit, vulgus credit breuî motiturum. sed vanè. scio enim qui dudum vidit, adhuc superstitem.

Stella cadens, inquit Aristoteles, è nubibus, vt nucleus è digitis compressis, excernitur. Generatur ergo vt draco, & fulmen; sed sine crepitu, qui saltem exaudiatur à nobis. habetq; se ad fulmen, vt glans sclopeti minoris ad maioris tormenti sphæram. ac veluti ex distantia medijs milliarijs, sclopeti flammulam vides, surdo sonitu; cum flammâ verò tormenti, audis & fragorem: ita lumen fulminis cernis, & audis simul bombum, non autem stellæ exsiliens strepitum. quia exhalatio minor est, nec latâ & sonanti plagâ rumpit nubem. Vt etiâ fulmina & dracones vero motu ad terram vsque quandoque decidunt, ita de stellis cadentibus asserit Aristoteles: atque aliquando in flumina delabi. Poëta 1. Georg.

*Sæpè etiam stellas vento impendens videbis  
Præcipientes calo labi, noctisque per umbram  
Flammarum longos à tergo albescere tractus.*

Et deinde:

*— De calo lapsa per umbras  
Stella facem ducens multâ cum luce cucurrit.  
Illam summa super labentem culmina tecti  
Cernimus Idæâ claram se condere siluâ,  
Signantemque vias. tum longo limite sulcus  
Dat lucem, & latè circum loca sulphure fumant.*

Vbi in fine, ad materiam fulminis sulphuream alludit; ex quâ etiam stella cadens.

Magnam porrò hoc meteorum cum pyrobolis nostris, & id genus ignibus artificialibus, habet cognationem: nisi quòd hos flamma leuet in altum; stellæ verò cadentes, contra naturam & cum iniuriâ ignis, explodantur deorsum. aliàs sæpè in his, vt illis, materia paullatim in ipsâ traiectione incenditur. sed non cum tanto crepitu stellæ in fine dissiliunt; quia materia oculamentum & claustra rumpenda non habet, vt puluis chartâ toties replicatâ pressus & constrictus in pyrobolo. Hoc etiam discriminis est, quòd quò magis pyrobolus flammam rapit, hoc magis festinat in cælum: vbi stella contrâ; incremento ignis tardatur; quia leuitas resistit motui deorsum.

Sed cur cælo sereno plures, quàm nubilo, faces cadunt, cum ful-



men in magnâ solùm nubium densitate generetur? Negare illud possum. quia fortè stellæ, quas in serenitate putamus cadere, discurrentes potius sunt; quarum generatio longè diuersa est, cum è nubibus non excutiantur, sed aliam & aliam materiam inflammando, imaginem tantùm discurrentis exprimant, cum reuerà locum non mutant. Deinde tamen etiam plures sereno cadunt; quia textura nubium tunc tenuior, & proinde faciliùs ab imbecillâ stellulæ exhalatione dirumpitur. fulmen verò nubem densam & atram postulat, vt plures exhalationis partes in easdem angustias cogantur, & simul accendantur, maioriq̃ue impetu ac tonante perfringant nubem. Interdum etiam conspicuæ non sunt, vt fulmina: quia lumen tenuius faciliùs Sole tegitur, & nubes deinde illa tenebrosa fulmini umbram & noctem facit, vt videatur. Aliquando tamen vincunt etiam diem. *Nostra ceriè atas*, inquit Seneca, *non semel vidit diurnas faces, alias ab Oriente in Occidentem versus, alias ab Occasu in Ortum*. Ita sidera dies suppressit: nuper tamen in fine mensis Augusti anni 1625. Venerem solari & purissimo meridie multis diebus aspeximus; cum aliquâ etiam vbique, vt postea audiimus, plebis trepidatione. Cometam enim iterùm aliquem obscœni ominis existimabant. Primi Antuerpienses viderant, gens ingeniosa, magnanima, altorum & cælestium cogitationum capax. Scripsit statim ad me, nuper hîc in Professione Collega meus, nunc nobilis Ecclesiæ Cathedralis Brugensis Canonicus, R<sup>mus</sup> & Eruditiss. D. Ioannes Vander Gouven, S. Th. L. Vir pietate, & scientiâ Theologiæ, Philosophiæ, aliæque variâ & miscellaneâ planè eximius. suspicatusq̃ue quod verum erat: nempe Venerem matutinam, quæ vno non ampliùs ferè Signo anteedebat Solem. Circa perigæum etiam erat, & satis admota terris, vt species amplior se oculis ingereret. *Argumentum tempestatis nausæ putant*, ait Seneca, *cùm multa transuolant stella*. quia scilicet cælum plurimis exhalationibus mœx reſaturis scatere oportet, in tantâ ignium multitudine. Sideribus etiam deciduis, totidem viros illustres tunc extingui, Antiquitas censuit: quasi cum ipsis denasci oporteret, quæ nata credebantur eisdem natalibus. & huius vanitatis adhuc memoria aliqua tenuis manet apud nostrum vulgus.

\* Cetera quæ de hoc meteoro possent, communia sunt stellis discurrentibus, aut fulmini, ibiq̃ue dicuntur. Tantùm ergo stellam cadentem definitio: *Exhalationem incensam è nube explosam deorsum, quæ imaginem habet veræ stellæ cadentis*: & ab eo.

## ARTICVLVS II.

*Quis modus generationis fulminis.*

**A**Vdite quæso Paracellsum cap. 8. Meteor. *In stellis fulminali-  
bus est sulphur in summo gradu, salpetra in summâ pinguedine,  
Mercurium in summâ contrarietate. Ex his tribus tonitru, fulmen, &  
sempestres fiunt; quæ maxima totius Firmamenti actiones meteori-  
ca sunt.*

Putat ergo ipse in stellis quibusdam Firmamenti, instar mortuorum cauis, sulphur, salpetram, argentum viuum permisceri, & inde fulmen accendi, excussumque ad terram peruenire.

Sed ridiculè. sic enim multis annorum millibus fulmen ad terram non pertingeret: cum lapis etiam molaris è concauo Firmamenti demissus, vix (si vulgarem Astronomorum de distantia eius opinionem retinemus) 90. annis ad nos vsque decideret. Vnde Vulcanus Iliad. 1. malus Geometer, aut certè, excusà ei, in lapsu tam longinquo, mente, errauit in tempore; cum die vnico artificia-  
li, ab oriente Sole ad Occasum, concionatur se è cælo cecidisse in Lemnum.

Sed exhalatio è terrâ in nubes sublata, sine dubio est materia fulminum. Ostendo vnicâ ratione. quia noctes, quas dies feruens & plurimum in altum exhalans præcessit, maximè fulminales esse solent. Deinde circa montes igniuomos frequentissima sunt fulmina & tonitrua: non aliâ causâ, quàm quia halitus multos & sulphureos expirant in eorum materiam.

De causâ verò efficiente, est quod dubitem amplius. Ea verò duplex est, proxima, & remota. hæc est, quæ exhalationem accendit, illa, quæ accensam deorsum torquet: ipsa enim dat vltimam formam fulmini, qui est motus ille deorsum obliquus & transuersalis. Et quidem de causâ halitum inflammante; Empedocles, & post illum Seneca lib. 2. cap. 26. Natural. non existimant ignem in nube generari, sed genitum antè, nubium conflictu deorsum elidi. vnde secundum eos, Sol aut ignis hic in terrâ flammâs illas, antequam ascenderet, fecit. Nec magis mirum, inquit, ignem in humore nubium tenui & roscido cõtineri, quàm sub ipso mari, cuius aqua tantò crassior, longè facilius ignem obruit. Ignem verò subesse mari, probat; quia memoriâ Maiorum mare *Ægeum* in fumum & flammam ebullit, quæ tandem etiam Insulam totam

congestis pumicibus rupibusque semiustis in altum expulit. Sed ridet hoc Aristoteles: & perinde est, inquit, ac si dicas, aquam, & niuem, & grandinem fuisse antè in nube, non ibi generari cum incipiunt delabi. Deinde sine vllâ arietatione & conflictu nubium sepe fulminat. Denique ex tonitru & subitâ rupturâ nubis, satis intelligitur, ignem ibi repentè generari, ac in flammâ locumque spatiosiore rarefcere. Plinius lib. 2. cap. 20. docet fulmina esse deciduos trium Planetarum superiorum ignes, & ab iis expulsi cum crepitu, vt è flagrante ligno carbo. Iouem tamen, qui inter Martem & Saturnum medius, dici præcipuè fulminatorem, quia à Saturno (vt interpretor) frigido, plurimum excrementiij humoris in eum decidit, recipitque à subiecto Marte ardorem quo digerat, & fulmina conflet. Sed sidera vaporibus pasci, antiquum nimis & iam antiquatum est: & cælestium lucernarum deciduæ istæ emunctiões eodem argumento contemni possunt, quo lebetes Paracelsi, quibus salpetram in Firmamento pro fulmine nobis coquit.

Itaque ignis iste fulmineus intra nubem nascitur, non aliunde, supernè, aut infernè, venit. Lucret. lib. 6. à ventis putat accendi: qui ibi tumultuantes,

*Quærentesq; viam circumuersantur, & ignis  
Semina conuoluunt è nubibus. atque ita cogant  
Multa, rotantq; canis flammam fornacibus intus,  
Donec diuulsâ fulserunt nube corusci.*

Sed ventus generare ignem, aut resuscitare mortuum non potest; sed viuentem, depulsâ fuligine suffocante, pascit.

Dico ergo Primò: Antiperistasis frigida nubis exhalationem feruidam, nondum ignitam, ignire per accidens potest. Ratio est, quia nubes se constringens, multas halitus & dispersas particulas in vnum locum exprimit, quæ mutuo affricu & discursu se extequant, & in tantum incalescunt, vt tandem recipiant formam ignis. A quâ causâ propriè efficiente? inquires. Dic tu mihi antè, quænam scintillas, quas attritu chalybis elicis, producat. si das cælum, si causam primam in defectu secundæ, eandem hic reddam tibi.

Dico Secundò: Sæpe ignea scintilla aliqua in tam spatiosâ nube, & tam latè disseminatâ exhalatione, inueniri potest, quæ reliquarum acervum incidens, incendium faciat. ardentibus enim illis diebus, quos sequi fulmen solet, exhalatio non rarè tota ignea (etia ob raritatem, flammam nullam videas) in nubes scandit: ibique

que magnâ sui parte extinguitur, superstite tamen aliquâ scintillâ in spem resurrectionis.

Dico Tertiò: Stellæ etiam discurrentes, & cetera ignita supremæ regionis, in stationem nubium deiecta, exhalationem forte ibi conglomeratam incendere aliquando in fulmen possunt.

Dico Quartò: Causa efficiens proxima fulminis, seu exhalationem accensam deorsum torquens, est impulsus, quem flamma rarefciendo, & intra angustias compressa, ad euadendum accipit. Itaque hic est modus generationis fulminis. Exhalationes multæ sulphureæ & nitrosæ, nubibus antè confusæ, frigore tandem & condensatione vaporis in vnum cœtum conglobatæ, flammam rapiunt, & collecto impetu extra nubis angustias se effractis claustris eiiciunt. sicut propemodum pyrius puluis rarefscens bombardâ erumpit, & excutit glandem. Sed non credet Bodinus: nec habet contemnendam rationem.

### ARTICVLVS III.

*Dæmones non esse, vt plurimum, causas fulminum:  
aduersus Io. Bodinum.*

**F**Acilè intellexit Bodinus, quomodo è bombardâ, aut tormento ferreo aut æneo, flamma pulueris tantâ vi exiliret: non quomodo fulmen è nube rarâ & fragili. *Cum nihil sit*, inquit lib. 2. *Theat. vapore mollius, nihil exhalatione leuius: cum nulla sint angustia, quibus aër quasi carceribus quibusdam concludatur, sed patentissimis regionibus excurrat; quis tam hebes, tam cæcus, qui rationes istas sine risu audire possit?* Itaque putat ipse à genii aëris & dæmonibus semper fulmina iaci, & tumultum illum cæli cieri.

Et reuerà, perperam saxea veluti quædam antra, & duros ac longissimi tractûs cauernarum fornices in nubibus pendulos, quibus illisa & fracta exhalatio sic mugiat, sibi quidam imaginantur. tales enim profectò ibi suspendi ne momento possunt. imò nubes & totusaër mediæ regionis leuior est aëre infimo in quo spiramus, vt Lib. 5. docebo. Parietes tamen quidam, & veluti claustra in nubibus sunt, etsi non tam dura quàm è metallo. partes enim circumfusæ nubis cingunt stringuntque exhalationis globum, retinentque ne liberè sursum euolet. Quâ ratione, inquis, medium tam fluxu raritatis id potest? Cogor hic fateri, profectò, exhalationem fulminatricem nihil aut vix leuiorem esse superiori parie-

te nubis: aliàs enim ( vt ignis noster per aërem inferiorem ) per-  
rumpere. Si autem paullo leuior est, longiori morâ tamen per nu-  
bem superiorem transiens, aliquantum (in circumferentiâ saltem)  
frigescit & densatur, grauataque in infimam nubem recidit. hinc  
enim fit, vt hæc pars & fundus nubis maximè, & pænè solus fulmi-  
net. nam rarissimè excelsos illos vapores iacere ignem videmus.  
sed nigri illi & vicinissimi nobis id sæpè faciunt: quia halitum ex  
superioribus nubium ordinibus deorsum expressum, aut pondere  
relabentem excipiunt: comprimunt deinde, eoque se densando,  
vt etiam aquefiant plerumque, & constringantur in pluuiam. vn-  
de ferè solemne & perpetuum est, vt in omni fulmine, præsertim  
validiusculo, pluat, & nubes exoneretur. imò (attende) post sin-  
gulos maiores crepitus, nouam habebis & insigniorem aquæ effu-  
sionem: quæ post sonitum quidem venit, sed antè tamen, aut si-  
mul incepit delabi. simul enim vapor in aquam se restringit, &  
exhalatio inter eum deprehensa, & premi indignata, erumpit. plu-  
uia tamen tardiùs ad terram venit; quia tonitru celeriùs per totam  
profunditatem infimæ regionis speciem sui ad auditum mittit,  
quàm cælestis gutta eam traicere possit. Quomodo autem tam  
tenuem textum nubium lacerando, tantum fragorem edat, postea  
circa fulminalia nostra tormenta, & tonitru, dicemus. Aliàs si ge-  
nij soli fulminatores sũnt, cur nubilo tantùm fulminat? cur non et-  
iam hieme? certè enim exhalationes dæmonibus ac-  
esse non pos-  
sunt; cum omni tempore, aliunde saltem, vbi magis feruidi soles,  
colligere valeant.

Plin. lib. 2.  
cap. 51.

Sed in *Catilianianis prodigiis*, Pompeiano ex municipio M. Herem-  
nius Decurio sereno die fulmine ictus est, ait ex Plinio Bodinus.  
Certè. sed ideo insolens, & inter prodigia numerari meruit. ac for-  
tasse genialis manus fulmen istud misit. quandoque enim fulmi-  
nant, vt liquet ex cap. 1. lobi, vbi oues custodesque satan cælesti  
igne percussit; sed nego, semper aut passim.

Verum tamen nondum satis intelligimus, quo pacto exhalatio  
non firmiùs quàm nube leui clausa, cum tantâ indignatione & im-  
petu, ad terram vsque, contra renisum ignæ leuitatis, se deiiciat.  
Fracastorius credit, calorem fulminis sic à frigore nubis repelli actio-  
ne intentionali, vt loquimur, iaciendo in eum scilicet specie tangi-  
bilem. Sed nimis hoc imbecille est iaculum. species enim frigoris  
nō est immediatè efficiens impetum calorem repellentis: nam aliàs  
manus v.g. frigida vicinâ candelæ flammam à se palam auerteret.

Itaque

Itaque cùm omnia circumspicio, non video quàm manus Bodi-  
 ni euadam, nisi per fugam penetrationis. Igitur ( vt in tormentis  
 nostris ) flamma in millecuplum & vltra, momento quasi, rare-  
 scens, ne magnitudo eius magnitudinem nubis penetret, eam quàm  
 promptissimè valet, dirumpit. Quare non sum mouet, inquires,  
 cùm tam flaccidè renitatur, sitque tam mollis? quid opus tanto  
 impetu, vbi minimum impulsâ flammæ se dilatanti aperit? Hic  
 nodus, non dissimulo, me stringit. Sic tamen dissoluo. Exhalatio  
 in angustum à nube se vndique stipante contracta, & deinde tota  
 simul inflammata, tam celeri motu rarefcit, vt vicinæ & contiguae  
 partes nubis, tantâ festinatione decedere ei & diffugere non va-  
 leant, quin flamma momentaneo ferè temporis puncto, tam la-  
 tam expansionem postulans, non sentiat se, vehementer etiam,  
 premi. Hoc enim hîc pensulatè cogito. Non solas partes vapo-  
 ris proximè ambientes, sed etiam longissimè vsque ad finem nubis,  
 supernè, infernè, flammæ resistunt. nam proximæ à fulmine im-  
 pulsæ, sequentes alias etiam trudent. quia verò vnaquæque non si-  
 ne pugná, etli leui, loco suo cedit, multiplicatæ tamen tot intra ve-  
 locissimum tempus, per eandem lineam resistentiæ, tantum flam-  
 mæ se diffundenti obstant, quantum pauciores in corpore duro  
 aut densiori, vt v.g. in tubo ænei tormenti. Et hinc ecce videor  
 mihi reperisse veram & legitimam causam, cur fulmina potissi-  
 mum emicent in terram, & per infimam nubis superficiem. Quia,  
 inquam, in atris illis & humore multo grauidis, terræque proximis  
 nubibus cuduntur fulmina. vt proinde à cauitate in quâ flammam  
 concipiunt, ad imam nubis superficiem, minor longè sit distantia,  
 & vaporis crassitudo, quàm ad conuexam & summam quæ supre-  
 mam aëris regionem tangit. tres enim quatuorve sæpè ordines  
 nubium sunt, superpositi infimæ nubi, in quâ est officina Vulcani  
 & fulminis. quia ergo à parte superiori, & lateribus (vbi etiam om-  
 nia plena nubibus) longior & maior resistentia est, flamma potius  
 deorsum erumpit. Sed ecce hoc iterum (dum cogito) progressum  
 opinionis meæ tardat. Aër namque infimæ regionis densior est  
 nubibus, vt Libro 5. probabimus: igitur magis fulmini, quàm nu-  
 bes supernè impendentes, obfistet. Hoc ergo, quod præcipuum est,  
 præcedentibus adiiciendum restat. Et signanter considero, fulmen  
 numquam deiici, nisi pluentibus, aut rorantibus saltē nubibus.  
 Itaque infinitæ pluuiæ aut roscidæ guttæ, ex superioribus nubi-  
 bus densissimo & continuo (nec enim in aquam reuersæ, vel mo-



mento temporis, inter corpora leuiora ibi consistere possunt) agmine defluentes, & toto aëre inferiori densiores, flammæ in superiora conanti obstant, & motu etiam suo in terram deducunt. Muginatio mea nihil præterpropter, in quo acquiesceret, valuit excogitare.

Hinc sequetur, vix vmquam, nisi depluentibus aut molli gravitate desidentibus supernis nubibus, fulmen in terram iaci: sed quandoque in cælum, aut latus nubis pertundere; vt verissimum existimo, cum nubes non valdè atræ & pluuias tonant. Sed etiam me retinebis, iniecto hoc vncō: Cur aëre infimæ regionis pluyente, aut nebula degrauiato, exhalatio etiam in eo, hic apud nos non fulminat, cum densitas eius satis magna sit, vt faciat resistentiam flammæ? Breuiter me expedio. Quia exhalatio in infimo aëre non tam diu hæsit, vt multa & conferta possit in vnum conglomerari: quod facit in nube. quod etiam ex variis & diffitis terræ regionibus, tamquam in locum communem, plurimæ ascendunt, maximæ enim affluentia opus est ad generandum fulmen. Deinde nubes guttatim, & interuallo aliquo aëris stillicidia discernente, per infimam regionem depluit: tota verò simul & continua (æstate præsertim, & in nimbis illis fulminantibus) in mediâ regione, vbi fulminis materiam vtero gestar, in aquam se, vndique fulmen amplectentem, resoluit.

Aristoph.  
in Nubi-  
bus.

Ex his liquet, non pessimè Socratem, apud Comicum, Strepsiadem suum docere, fulmen in nubibus nasci,

Οὐρανὸς ἰνὲς αὐτὰς ἀνέμους ἐκπνέει καὶ καταλάττει,  
Ἐνδεδυκὲς αὐτὰς ὥσπερ κύων φασγᾶ· καὶ πρὶς ὕπνῳ ἀνάλινος  
Πήλας αὐτὰς, ἔξω φίπης) σθαχέος.  
Cum in eas ventus siccus subuectus, inclusus fuerit;  
Intus eas, tamquam vesicam, inflat: & deinde vi  
Frangens erumpit violentus.

Virgil 9.  
Æneid.

quidquid nugator Aristophanes irrideat. Poëta etiam:

— Cum Iupiter horridus Austris

Torquet aquosam hiemem, & calo caua nubila rumpit.

Caua autem nubila sunt, quia exhalatio in globum & cinnum confluens, cauitatem aliquam & aluum concinnat. In vtroque tamen, pro vento, exhalatio reponi debet.



## ARTICVLVS IV.

## De fulgure &amp; coruscatione.

**F**ulgura Antiqui fulgetra dicebant, teste Senecâ; & fulgere, præultimâ breuî, pro fulgurare. Fulgur autem accidente tantum à fulmine differt. Pulchrè Seneca: *Eodem modo fit fulgur quod tantum splendet, & fulmen quod mittitur. sed illi lenior vis, alimenti que est minus. & ut breuiter dicam quod sentio: fulmen est fulgur intentum.* id est, impetu maiori vibratum. vnde fulmina perumpunt nubem, fulgura diducunt & aperiunt imbecilliori ictu. Iterum, *Fulguratio* (id est, fulgur; sumit enim concretum) *est fulmen, non in terras usque perlatum.* aliàs verò sic finit: *Fulguratio est aeris deductus se, corruentisq; iactatio, languidum ignem, nec exiturum aperiens.* Vnde intelligitur duplex esse genus fulguris: vnum, quod more fulminis nubem terebrat & erumpit, sed ad terram non venit; vel quia impetu non satis valido, vel quia ignis in iactu dissilit, aut in obliquum nimis se detorsit. alterum, ignem tantum in nube rarâ ostendit, non emittit. Sic ergo adæquatè definire fulmen potes: *Fulmen est exhalatio multa & subtilis in nube accensa, & deorsum ad terram usq; vi erumpens.* Hoc verò totum etiam in fulgur cadit, si tantum dicas, *ad terram non peruenire.* Excluditur stella è nube cadens; quia moles exhalationis non est tanta. Draco verò, non est exhalatio subtilis, sed densa, turbida, & partem nubi defractam secum deuoluens. ideoq; color impurus, & subuidis, non argenteus aut auratus, qualis solet fulminum.

Coruscatio, Græcè ἀσέων, concretum valet quod fulgur. abstractum verò significat iactum tremuli luminis ab exhalatione in nube accensa. hic autem iactus, non est localis & proprius, sed metaphoricus. est enim reuerà productio tremuli in speciem luminis, per medium. coruscus enim Latine tremulum significat. vnde Virgilius *siluas coruscas*, & quidam apud Plautum, se *frigore coruscum* dixit. Coruscatio igitur latius fulminatione & fulguratione patet. etsi fulminatio sæpè, non iactum corusci luminis à fulmine, sed ipsum fulminis, iactum signet. Iupiter enim fulminat, quos fulmine icit. Tremere autem lumen coruscatione iaculatum, videtur, & tamen non facit: quia momento iacitur & extinguitur; vnde radius in nubem retrahi apparet. & si noua flamma, quod solet, fulgurationem iteret, idem, videtur rursus, exsistere

qui se receperat. vibrari ergo dicas, ceu hasta, quam dextera nunc intentat, nunc reducit. hinc Habacuc cap. 3. fulmen, fulgurans Dei hasta appellatur. *In luce sagittarum tuarum ibunt, in splendore fulgurantis hastae tuae.* Binam similem fulgurationem inter prodigia anni 1564. refert Cor. Gemma lib. 2. c. 2. Cosmogr. vnam 18. die Febr. mediâ nocte, alteram 7. Octob. *Nube,* inquit, *illustri qua Luna claritatem vinceret, intra limbum obscurum atque sublimidum comprehensa, alternis excussi radij, alternis flamma ad singulos ventorum impetus excurrerant. qui subinde velut in hasta speciem dehiscente calo, ceu vastâ ingluvie sorpturi terras & maria videbantur.*

Ciliorum etiam & palpebrarum nictus, quas solemus claudere ad ictum coruscationis, auget imaginem tremoris. vnde fulgura etiâ nictate dicuntur. & eleganter Lucretius de materiâ fulguris:

*Semina qua faciunt nictantia fulgura flamma.*

## ARTICVLVS V.

### *Fulminum diuisio.*

**L**ongam illam, ex disciplinâ & superstitione Hetruscorum, fulminum diuisionem, in monitoria, pestifera, fallacia, deprecanda, &c. non attingo: & vide lib. 2. Nat. cap. 49. apud Senecam. Aristoteles magis pro Philosopho, duo tantum genera, *ἀπὸ τοῦ ὀλοῦ*, clarum & fumosum, facit. Primum tenuiore spiritu, alterum crassiore constat. Plinius tamen lib. 2. cap. 51. paullo distinctius, tria constituit: siccum, humidum, clarum. Duo priora non adurunt: sed siccum tenuitate suâ durâ dissipat, humidum tantum iufuscat. clarum, mira operatur: nam flammâ lucente & digestâ subtilitatis omnia penetrat, seque per omnes venas insinuat, & acerrimè vrit. Teneris tamen & rarioribus parcit; quia non inhæret, ac ita citius quàm vt possit amburere, se per poros transfundit: mora enim aliqua ad vrendum necessaria est. nam hinc manus sæpè ducta & reducta per flammam, vix calorem sentit. mollia etiam & rara sine vulnere transuolat, configitque solum cum duris & pressis, quia illa dant, hæc negant facilem transitum.

## ARTICVLVS VI.

### *De admirandis effectibus fulminum.*

**P**rimò, Loculis integris ac illæsis constat argentum. id enim Plutarchus lib. 4. Sympos. quæst. 2. narrat suo tempore accidisse

se militi Romæ excubias agenti. Simile est, quod incolumi vaginâ gladium fundat. Vetera iam non moror, audite quid M. Antonio Mureto Romæ contigerit. *Fulmen*, inquit, *in palatium Hippolyti Card. Ferrariensis decidens, ad mea usque cubicula peruenit. ibi gladij qui ad lectum vini de famulis meis pendebat, mucronem ita colliquefecit, ut in globulum conuerteret, vaginâ prorsus illesâ.* Inuiolato etiam ligno, circa pila ferrum omne destillat, ait Seneca. Quorum omnium vna causa est in raritate fulminis, quæ per corpora laxa & fungosa sine iniuriâ momento ferè se transcribat; in densis, ubi compressæ venæ, hæret, vique se insinuat, & spiritu conferto se per omnes meatuum angustias cuneante,

In Notâ  
ad lib. 6.  
Seneca.

*Dissoluit nodos omnes, & vincla relaxat,*  
metallaque fundit. Ex hoc effectu rectè probat Aristoteles, fulmen non esse (quod vulgus hodie & olim putat) lapidem, sed spiritum & tenuissimam exhalationem.

Lucret. l. 6.

Secundò, *dolia fulmine exsauriuntur*, ut Plinius lib. 2. cap. 51. scribit, *intactis operimentis, nulloq; alio vestigio relicto.* Et Carus:

*Curat item ut vasis integris, vina repente  
Diffugiant: quia nimirum facile omnia circum  
Conlaxat, rareq; facit lateramina vasis,  
Adueniens calor eius, ut insinuat in ipsum, &  
Mobiliter soluens, differt primordia vini.*

Lucret. l. 6.

Per venas ergo ligni, vasis, facili & lubrico transitu, illabitur, & immodico ardore vinum statim in tenuissimos vapores dissoluit, qui per poros vasis, traiectu illo flammæ laxatos, expirant in auras. Simili fulminis potentiâ V. Volfgangus Meurerus in Meteorol. narrat *quendam Ministrum, in viâ quâ Lipsiâ itur Torgam, ita subitò ereptum ex hominum oculis, ut postea nusquam apparuerit.* putat enim carnes eius & ossa in cineres & ventos abiisse. Et nescio an longè dispar Romuli exitus, magnæ & immortalis illius Romæ Conditoris. Cùm enim ad exercitum recensendum, ait Liuius, *concionem in campo ad Capra paludem haberet, subitò coorta tempestas cum magno fragore tonitribusq; tam densò Regem operuit nimbo, ut conspectum eius concioni abstulerit: nec deinde in terris Romulus fuit.* Fulmine igitur dissipatum, aut procellâ & turbine sublimem raptum oportuit: quod Patres, qui proximi adstiterant, retulerunt ad plebem.

Fulmini fortasse etiam & casui fortuito dabunt Athei nostri, decimationem illam admirandam anno 1599. periuri illius Pu-

blicani Gerardimontensis in Flandriâ. cuius miserum cadauer oculis etiam vsurpauit Clarissimus Vir, Medicinæ & omnis Litteraturæ eruditione excultissimus, Petrus Castellanus; descripsitque carmine Eruditiss. Vir Henricus Culens S. Th. L. Pastor etiamnum Gerardimontensis, qui infelicem illum funerauit:

Henricus  
Culens in  
suis Stren-  
is.

*Puluerem humanâ vidi sub mole cadaver:*

*In tanto nusquam corpore corpus erat.*

*Omnia puluis erant, iterum dico, omnia puluis;*

*Et versa in cineres machina tanta fuit.*

*Omnia puluis erant, cervix, caput, ilia, nervi,*

*Ossaq, cum pleno ventre, saburra, nates.*

*Puluis erant crurum tenus omnia: quæ velut icſu*

*Indeclinato casa fuisse putes.*

Sed nocte S. Andreæ, & tempore frigido ac minimè fulminali, id monstri accidit: & eâdem vespertinâ negotium ei fuerat cum quodâ alio tricone; adiuraueratq; se nil reculare, verti corpus in cinerem, nisi res quæpiam aut factum, quod in rixam venerat, ita haberet. Audite igitur hæc Athei, & agnoscite vindicem Numinis manum.

Tertium miraculum, planè oppositum est secundo. *Stat*, inquit Seneca, *fractò dolio vinum: nec ultra triduum rigor ille durat.* Oportet autem materiam huius fulminis densiorem esse præcedenti. quia ergo crassitiem suam per venas ligni extrahere non valet, diffringit. Sed cur etiam vinum non dispergit? Respondeo: Sæpius, sine dubio, id facit. aliquando tamen, magno miraculo factum, vt membrana quædam ex viscido humore & exhalatione, aut partim vino ipso, subito percocta, vinum, ceu vter quidam, inuolueret ac retineret. nec dissipat, quia omnem eius impetum retudit & fregit resistentia vas. fit autem illud verissimile, ex eo quod tradat Albertus, psyllium frigidæ & viscosæ temperiei, vino iniectum, calore eius reijci in circumferentiam, ibique durari in membranam, quæ sine alio vase contineat vinum. Aliquando etiam non tantum corticem vino obducit, sed ad centrum vsque, perpetuo rigore congeliat. *Vinum autem sic gelatum*, ait Seneca, *cum ad priorem habitum redit, potum aut exanimat, aut dementes facit.* Inest enim fulmini pestiferum quoddam sulphur, aut aliorum spirituum noxiorum miscela, vt ex pluribus aliis effectis probari potest. Sulphur autem in eo est quod præcipuè ardet & comburit. nam etiam, si sulphur inflammatum ferro apprimas, ferrum in guttas friabiles statim destillare videbis. Omni verò fulmi-

Lib. 1.  
cap. 57.

fulmini permixtum sulphur, ex puluere nostro sulphureo, qui fulmini planè cognatus, satis ostendi potest. Deinde omnibus fulguritis inest odor quidam sulphureus, vt Seneca, Plinius, & ipsa experientia dicit. Fulmine aliquo simili gelata, sic obriguiffe videntur octo messorum illorum membra: qui in Lemno insulâ sub quercu cœnantes, & fulmine ibi percussi, eâdem imagine quâ discubuerant, exanimati inuenti sunt: vt vnus comedere videretur, alter ori poculum ad mouere, tertius bibere. *Cumq; omnes nigri essent, imagines totidem statuarum representabant*, inquit Cardanus. Ab halitu etiam pestilente & sulphureo forsitan fuit, quod miratur Plinius, *Martiam principem Romanarum, istam grauidam, partu exanimato, citra vllum aliud incommodum vixisse*. Spiritus enim sulphureus intactis, admirabili euentu, ossibus, vitatis etiam partibus matris nobilioribus, per vteri tantum molliciem, & corculum ac vitalia partus in illo iacentis transuolauit: ideòque hunc innoxiam matre interemit.

Lib. 8.  
c. 49. Variet.

Quartò: Fulmineus ignis nullâ aquâ quandoque extingui valet. Sic Dion lib. 78. sub Imp. Macrino tactum de cælo, ipso Vulcanalium die, Theatrum narrat, nec aquâ fluminali, aut cælesti profusissimâ, incendium comprimi potuisse. fortè bituminosus spiritus sulphuri immixtus fuit. bitumen enim flagrare sub aquis, Lib. 5. vbi de Thermis, dicemus. Tale fulmen cum pluuiâ, cælo euocatum à Legione Melitenfi Christianâ (quæ ideo fulminatrix appellata) M. Aurelio Imp. in Quados (qui nunc Bohemi putantur, aut circâ) pugnante, & exercitu toto extremâ siti laborante. vapore enim fulminis torrebantur Quadi, nec vllum in aquâ cælesti remedium erat: alebat enim potius flammâ, leuabatque tantum Romanorum sitim.

Quintò: Plutarchus lib. 4. Sympof. q. 2. negat dormientes faciliè icipi fulmine. narratque ibi Dorotheus, cuidam domi suæ sterenti pecuniam in crumenâ conflata, ipso innoxio, fuisse. Philosophumque Pythagoricum fortè obuium, consultum de causâ, respondisse: consuleret deos, se verò nescire. Pharetra etiam Regis Mithridatis, appensa lecto, ista, arseruntque in eâ sagittæ, nescio ipso & dormiente. & aliquamdiu antè, pueriles eius cunæ fulminatæ, perstrictâ solum infantis fronte. ideòque Dionysius appellatus, siue Bacchus: quia hic etiam fulmine semiuftulatus in matre Semele. Causam affert Plutarchus: quia in dormientibus pori aperti & hiantes transitum facilem præbent fulmini. Sed profectò

contrà

contrà est. Extremæ enim partes corporis in somno potius rigent & condensantur, calore in centrum & interiora retracto. Deinde dormientium ossa saltem non se aperiunt, & laxantur. Altera igitur ratio eius melior est: nempe, vigilantes sæpè putari fulminatos, qui tamen tantùm afflati, corruunt solo metu vicini fulminis & exanimantur. timor verò iste dormientes non tangit. Hinc pastores, ut tonitruum terrorem pecori depellant, aut minuant, gregem sparsum colligunt, & immisso cane compellunt in vnum. societas enim ista leuat metum, qui non rarò trepidum à naturâ & imbellem pecus pænè exanimat. Dormientes etiam somno sternuntur, fulmen autem obliquo & transversali ictu facilius erectos in pedes ferit.

## ARTICVLVS VII.

*De lapide fulmineo.*

**L**apis aliquando è nubibus cum fulmine cadit, qui dicitur etiam telum, aut cuneus fulminis: numerarique inter effectus eius potest. Generatur autem ex exhalatione terrestri viscosâ, & humore nubis, quos ardor fulminis celerrimâ transmutatione, in ipso etiam casu (nam graue ibi suspendi aut hære non potest) permiscet, & in laterem coquit. Talem Cordubæ delapsum, & à se visum, testatus olim Auicenna, ut Auerroës lib. 2. Meteor. c. 2. scribit. odoris erat sulphurei, inquit, & naturæ ammoniaci. Leues etiam plerique sunt, & simillimi pumicibus illis adustis, quos interdum eruant flammivomi montes. Aliquando non lapis, sed ferrum, aut aliud metallum, cum fulmine cadit. Id autem fit, cum sulphureæ exhalationi argentum viuum temperatum fuerit, ut credunt Chymici. Sic in Persiâ cælo coruscante ærea corpora hæmatis sagittis similia cecidisse narrat Auicenna; & prope Lurgeam, ferri massam 50. librarum, Georg. Agricola: tentatumque ut inde cuderentur enses, sed materiam fuisse inobedientem, nec igne molliori, aut malleis duci potuisse. De lapide isto seu telo fulmineo silentium apud Aristotelem est; quia, ut Vicomercatus credit, de re hac, postea compertâ, nondum ei liquebat satis.

## ARTICVLVS VIII.

*Quæ res fulmini obnoxia, aut ab eo tutæ.*

**N**ihil celebratius est, quàm alta & eminentia frequentius fulminari.

*Aut Athon, aut Rhodopen, aut alsa Cerannia telo*

Georg. 1.

*Deiicit, —*

canit de Ioue Poëta. Hinc quia in vrbibus nil excelsius Templo-  
rum turribus, sæpissimè feriuntur. altissimæ etiam arborum, quæ-  
que in montanis, vt ilex, æsculus, quercus, ornus, fulminibus olim  
infames.

*Incubuit numquam caelestis flamma salictis,*

Claud.

*Nec parui frutices iram meruere Tonantis:**Ingentes quercus, annosas fulminat ornos.*

In causâ est, obliquitas fulminis. nec enim lineâ perpendiculari,  
sed transversariâ, ad terram venit. hinc faciliè incurrit quidquid in  
superficie eius eminet, antequam ipsam tangat. Motum autem  
istum obliquum Aristoteles, *per diametrum*, vocat. quia similis est  
motui quo aliquid per diametrum quadrati in superficie horizon-  
tis erecti decurrit. vnde etiam alibi quadrupedes per diametrum  
incedere docet. pes enim prior dexter & posterior sinister anima-  
lis, est in eâdem diametro quadrangularis figuræ, descriptæ in su-  
perficie terræ, sub ventre, inter quatuor pedes eius; sicuti etiam, pes  
prior sinister cum posteriore dextro. leuato autem primore pede  
dextro ac in terram defixo, sinistrum posteriorem admouet; & si-  
militer post priorem sinistrum dexter posterior sequi solet. id est,  
pes posterior priorem eiusdem diametri immediate consecutur.

Obliquitatis verò fulminis hæc ab Aristotele assertur ratio:  
quod leuitas flammæ per vim explosæ deorsum, in cælum resur-  
gat, quantum valet: ideoque in transversum deflectat, motu quasi  
composito ex descensu & ascensu recto. Siue, vt eleganter Sene-  
ca, *quia natura ignis sursum vocat, iniuria deorsum premis, incipit  
obliquus esse.*

Hoc etiam addendum: aërem, quod propius fulmen ad terram  
accedit, densiorem inueniri; & hinc difficilius secari, ac in latus  
magis magisque detorqueri. ibi enim aër rarior est, quia altior à  
terrâ, nec tam contumaciter transitum præbet, quàm alter fulmi-  
ni subiectus rectâ deorsum.

Tertiò, & principaliter: Quia vnica linea est, quæ à centro nu-  
bis, vnde exploditur fulmen, rectâ & perpendiculariter in terram  
decurrit, infinitæ verò, quæ circumcirca illam, ad angulos obli-  
quos descendunt; hinc longè procliuius est, fulmen angulo obli-  
quo, quàm recto, nubem pertundere; ac lineâ aliquâ transversali,  
quàm vnica illa perpendiculari, deiici. Trifurcum hinc etiam di-

H

citur,



citur, quòd pluribus simul foraminibus, & in sulcos diuisa, flamma erumpat.

Veteres autem magno consensu, inter arbores, laurum fulmine tangi negant. quod mirum, quia non tantum plana, sed etiam montes amat. plurima enim olim in Helicone & Parnasso, indeque Apollini sacra & Musis. Fracastorius lib. de Antipat. putat truncum solum lauri non percuti, quia rotundus admodum, & leuis densique corticis; ut proinde exhalatio ei non facile & tenaciter inhaerere possit. eadem enim ratione fulmen vix columnas ledere solet: quia, inquam, rotunditas declinat & eludit ictus. Sic etiam carbonarii nostri Leodienfes, ignem suum Græcum, fulminibus planè cognatissimum, innoxij sæpè euadunt, telâ benè firmâ, & à textore, recenti, vndique tecti. hæc enim, quia lubrica, & veluti cerata, & minimè laxa est, flammam illam circumuolantem agrè admittit. Sed amplius putauit antiquitas. Nam Columella folia lauri, gallinæ incubanti, contra fulmen & tonitrua, subici imperat: & Tiberium Cæsarem, tonante cælo & in fulminum metu, lauro solitum coronari, tradit Plinius. existimabant ergo etiam folia tuta esse à periculo. Mihi opinio hæc inualuisse videtur: quia spiritus quem folia lauri exhalant, contagioni aëris resistit. vnde Commodus Imp. teste Herodiano, consilio Medicorum, tempore pestis, in laureas siluas olim secessit. & in tali periculo etiam lauri ramos affigebant foribus. Cubili ergo etiam gallinæ, in tonitru supponi possunt, ne sulphurei halitus, qui tunc per aëra disperguntur, oua inficiant. & hinc quoque dolus quidam imponebant, ne tonitru liquorem peruerteret.

Aliàs quæ illa tanta vis lauri, quæ fulmen tam validi impetus auertat? nulla profectò. & ut absoluaui verbo: Vicomercatus, qui initio sæculi lapsi scripsit, à paucis annis, laurum in Italiâ fulminatam, ait. Eadem, credo, vanitas sicut à periculo immunem fecit. Inter lapides, hyacinthum non sentire fulmina, nec hominem qui eum gestet, asserit Cardanus; sed Scaliger & ego ridemus. Vitulum etiam marinum non percuti inter pisces, referunt multi antiqui. & explicant quidam, quòd raritate suâ pellis eius, fulmen transmittat; ideoque lædi non possit. Verùm, si nil aliud sit, frustra tabernacula ex pellibus eius facta contra fulmen, ut narrat Plinius, nisi exhalationem repellant. valde etiam frustra Inip. Augustus

Lib. 15.  
cap. 30.

In O 2<sup>da</sup>. fuit, qui, ut refert Tranquillus, tonitrua & fulgura paullo infirmius expauescebat: ut semper & ubique pellem vituli marini circumferret

ferret pro remedio; atque ad omnem maioris tempeſtatis ſuſpicionem, in abditiſſimū & concameratum locum ſe reciperes. Hunc poſtea imitatus Imp. Seuerus, leſticam etiam ſuam tali corio integri præcepit. Aquila etiam non icitur, ait Plinius, & ideo Iouis armiger, & eius fulmen gerit. Sed omnes Auctores ab alijs accepiſſe ſe referunt, nec vllus ſibi ſatis fidit.

## ARTICVLVS IX.

*Cauſſæ tonitruī, Anaxagoræ, Senecæ, Paracelſi, Bodini, reieſſæ.*

**I**Nter effectus fulminis Ariſtoteles tonitru numerat. Anaxagoras fieri illum ſonum putat extinctione flammæ in humiore nubis; vt ferrum candens in aquâ ferrariorum ſtridet. Sed ſolum etiam iudicium aurium, quæ de bombo illo ſatis aduertunt nubem rumpi & crepare potiùs, quàm extingui, & trucidari (vt loquitur Lucretius) in humido ignem, ſatis cum refellit. Aliter Seneca libro 2. Nat. c. 27. *Non quemadmodum, ait, illiſæ manus inter ſe plauſum edunt, ſic illiſarum inter ſe nubium ſonus poteſt eſſe magnus, quia magna concurrunt?* Oportet etiam concauitatem concauitati obuerſi, quia auerſa inter ſe manus non plaudunt, ſed palma cum palma collata plauſum facit. Sed fruſtrâ: quia nubes corpora mollia ſunt, quæ omni impetui facillimè cedunt, & ſtatim confundunt figuram. ſecus eſt in manibus: ſi enim cavitates complodantur, aër deprehenſus, ſoliditate manuum offenſus, neceſſariò rumpi debet, & ibi trucidari cum ſonitu. Quis etiam in omni tonitru adſpicit nubes inter ſe aduerſis frontibus arietare & concurrere?

Paracelſus verò hîc, vt vbique, miram Philoſophiâ dat ſuis Heluetiis. *Strepitus iſte, inquit, reſonat per totum Firmamentum, non aliter ac ſi bomba ſub teſtudine laxaretur. calum enim eſt reflexio- nis teſtudo.* Quod riſu magis dignum, quàm refutatione. ſi enim à fornice Firmamenti ad aures noſtras tonitru redire oporteret, multis annis, in tanto cæli à terrâ interuallo, poſt coruſcationem fulminis, ſonitum audiremus.

Bodinus, iterùm dæmonas ſuos tonantes facit, ratione duplici. quia ſereno cælo & innubi quandoque tonat: ergo non ex crepitu ruptæ nubis exiſtit ille ſonus. Deinde, fulgurat ſæpè, & exiliunt è nubibus flammæ, ſine fragore. igitur dæmones & aërij genij tumultus iſtòs ciēt, quandoquidem nulla alia cauſſa ſit in promptu.

Sed victus difficultate, aut odio Ariſtotelis ei ſolemni & inex-

piabili, huc confugit. Deinde nihil solidi afferre potest, cum non tam per hiemem ac æstatem frequententur tonitrua. dæmones enim omni tempore frangere aërem, aut exhalationes ad tonandum calefacere & disponere, item, si hinc desint, ex Zonâ torridâ adducere valent. Cur etiam dies feruidos & sudore diffuentes sequi sæpè solet nox tumultuosa & tonans? certè enim aliis etiam noctibus genij turbas istas turbare possunt.

Ad Primam rationem respondeo: Sereno cælo tonat, sed rarè, & inualido impetu. audimus enim tonitru, ut obscuros tormentorum ictus ex longo intervallo deficientes. ex altissimis igitur nubibus veniunt: quæ licet rariores & minus opacæ, quàm aliæ, radios solis transmittant; frigus tamen & densitatem reliquam habent, quibus ardentem & leuiorem exhalationem includant & nonnihil stringant, cogantque erumpere cum sonitu. Si verò pertinaciter affirmes, sine ullo nubilo, tonitru quandoque exaudiri; ausim quidlibet deponere, alterutrum horum esse: Aut terrestria tonitrua, aut extra visibilem nostrum horizontem in nubibus excitari. Terrestria voco, quæ ab exhalatione per cauernas subterraneas se versante & tumultuante, vel etiam effringente sita claustra, efficiuntur. Talia plerumque audiuntur ante terræ motum. Possunt etiam, defæcatissimo apud nos cælo, atræ & hiemantes nubes, quas non videmus, in proximo horizonte esse, ibique cum tonitru fulminare. Quàm sæpè in vicinâ Hannoniâ, quàm sæpè Gandavi (vrbe in toto Belgio, ut mihi videtur, fulminibus maximè obnoxia) nobis hinc tranquillis, cælum micat, mugit, & rumpitur? Tonitru igitur inde ad auditum nostrum peruenire, etiam si non coruscatio fulminis, potest. cum enim nubes fulminans, infra horizontis visibilis terminum, & terræ curuaturam sit, lunien eius, quod speciem lineis tantum reâs iaculatur, videre nequimus: sonus verò etiam per lineas incuruas exaudiri potest. nec distantia semidiametri horizontis visibilis, est nimis magna: quia nautæ Portugaleses asserunt, ex intervallo 50. milliarium in mari audiri tonitrua excitata in nubibus illis, quæ toto anno coronant verticem montis Serræ Leonis in Africâ, qui putatur *Θῆον ὄρη* Antiquorum. semidiameter verò visibilis horizontis vix 6. leucas Belgicas, siue milliaria Italica 18. ut Lib. 4. cap. 5. a. 3. dicam. Deinde in famosâ illâ Ostendæ Flandriæ obsidione, tormentorum fragor ad 30. amplius leucas horarias, seu Belgicas, se diffudit. Imò (quod magis mireris) strepitus tympani à 12. leucis in mari aliquando

quando intellectus fuit. Sed fulgurat etiam sine tonitru, inquit Bodinus. ergo exhalatio exsiliens crepitum illum fulminis non facit. Sed nego sequelam. *Quia* (dic tu Seneca) *tenuior & infirmior spiritus, quo in flammam valuit, non valuit in sonum.* Aut certe, si cum strepitu (quod credo) exiuit, imbecillior fuit, quàm vt potuerit aures nostras impellere.

## ARTICVLVS X.

*Peripatetica & vera caussa efficiens tonitru.*

**A**ristoteles tonitru cum Vulcani, aut, vt alij vocabant, Vestæ risu comparat: id est, cum crepitu quem ligna in igne, spiritus intus rarefacto, & cutem dirumpente, edunt. Hic autè risus in viridi corylo, & foliis iuniperi & lauri est maximè insignis. Lucretius:

*Nec res ulla magis, quàm Phæbi Delphica lantus,  
Terribilis sonitu, flammâ crepitante crematur.*

Sed si Aristoteles fulminalium nostrarum bombardarum tonitrua audisset, exilem & puerilem Vulcani risum contempnisset. Summa enim affinitas est inter nubium & tormentorum tonitrua, vt postea ostendam.

Itaque verissimum est, nasci tonitru ictu illo quo exhalatio aërem & nubem frangit. Sed antè diuidendum est tonitru in *crepans, stridens, & tumultuans* siue *murmurans*. non enim omnium eadem omnino sunt causæ.

Dico Primò: Tonitru crepans fit, quando spiritus intra nubem accensus, & subiecto latissimè & celerrimo impetu rarefactus, simul & semel nubem effringit & dissipat. exemplum eius rei tenue in castaneâ, non inciso cortice, extra ignem cum bombo & crepitu exsiliente, habemus. maius autem, in puluere nostro pyrio, qui flammatus & rarefactus, tanto fragore, tormenti tubo erumpit. Sed non est similitudo, inquiunt: nam flamma tormenti, duritiem metalli habet, quâ se allidat & frangat; fulmen verò mollissimam tantùm nubem cædit. Fateor, res non est extra difficultatem. Cùm tamen omnem lapidem tento & moueo, hoc mihi videtur: Sonitum bombardarum & tormentorum non ediallitione flammæ pulueris ad tubum metallicum (aliàs enim ferreus & æreus tubus differentes & dissonos efficerent sonitus, contra experientiam,) sed flammâ ex angustijs tubi in liberum aëra exsiliente, eumque dissiliente ac discerpente. omnis enim sonus videtur ex

laceratione aëris, vel alius corporis fluidi proximè nasci. Itaque tonitru crepans, ictu illo excitatur, quo & nubem & vicinum aërem exhalatio dissipat & displodit. Quod ex sonitu ignis fodinarum carbonariorum, quem Leodienfes nostri appellant Græcum, firmari potest. halius enim ille carbonarius & bituminosus conferatim candelam fortè incidens, valido & tormentario planè fragore discerpitur, sine allisione ad aliud durum, quod tam insigniter valeat sonare. Quæ verò sit illa vis propriè & physicè efficiens soni; an impetus, an virtus alia somniculosa, quæ impetu excitatur ad agendum, in lib. 2. de Animâ, Deo dante, dicturi sumus. Allisio enim illa corporum, item fractio intercepti aëris, sine dubio, tantum possunt esse causæ sine quâ non talis effectus: etiamsi passim causas efficientes appellemus.

Dico Secundò: Tonitru stridens fit, cum nubes non vnico ictu dispellitur, sed exhalatio successiue incensa, non vniuersim, sed per partes & agmine quodam erumpit. sic enim contingit longior sonus, & simillimus illi quo quis chartam, aut pannum nouum, subito & vehementi impetu discerpit. aër enim celeri motu, in hiatum laceratæ nubis, contra periculum Vacui, se iniiciens, sequentibus partibus exhalationis occurrit, discerpiturque in istà rixâ cum stridore.

Dico Tertiò: Tonitru tumultuans nascitur, cum exhalatio per nubem rumpit & discurrit. palàm enim motum illum ex sonitu mobili & fugace intelligimus. aliquando namque per totam nubium curuaturam ab Ortum ad Occasum transcurrit. Laborem etiam eius, vbi in nubem densiorem incidit, & quomodo tardiori gressu oblectetur, & vix se expediat, facile sentimus. Fieri tamen quandoque potest, vt vna exhalatio alteram inflammet, & sic videatur locum mutare; quod tamen non facit. Hoc tonitru, vt plurimum, sine coruscatione est; quia exhalatio aut non satis flammæ habet, aut clauditur & supprimitur opacitate nubis.

Ex dictis colligitur, ceteris paribus, insignius esse hoc tonitru murmur, si aduersus, quàm si secundum nubium agmen exhalatio nitatur & decurrat. sic naus aut homo aduerso flumine vadens, magis in aquâ strepit, quàm secundo defluens. vbi enim maior conflictus, ibi etiam vocalior sonitus. Ex quibus omnibus sic finietur tonitru: *Sonitus vehemens ab exhalatione excitatus fractione nubis.* Sed reliqua quædam, quæ ad ipsum, etiam addamus.

## ARTICVLVS XI.

*Cur demum post coruscationem fulminis, tonitru audiamus.*

**F**ulminis lucem, nisi fractâ iam nube, videre non possumus. unde laceratio ista nubis, & fragor seu tonitru inter eam excitatum, prius est, aut saltem simul cum coruscatione lucis: & tamen auditur sēper seriûs. Causa est, quia species vibilis ex quacumq; distantia ab obiecto in oculum momento emicat; species verò soni, tempore & per h̄sitationem quamdam ad aurem venit. Primo igitur instanti quo nubes rimam agit, & ostendit flammam, videri potest fulmen, quia tam repente species eius peruenit ad oculum: nondum sentiri potest sonus; quia per gyros quosdam & fluctus aëris, species eius descendit ad terram. Ita enim explico iam temporaneam illam & tardam traiectionem soni; ostendamque latè lib. 2. de Animâ: licet olim cum Conimbricentibus & aliis passim, contempserim vibrationem istam medij vsque ad aurem.

Hinc enim est, quodd in maiore sonitu & impressiore ictu, quia celerius crispatur aër, oculus etiam species veniat ad auditum. Id egregio experimento, Vigiliâ illâ fulminali sancti Laurentij anno 1625. comperi. Nubes enim immobilis, atrocissimè fulminans & tonans impendebat Louanio & meo capiti, idoneaque maximè erat, vt distantiam inter coruscationem & tonitru dimeretur. Cùm crepitus maximi erant, subito, viso fulmine, cum tremore fenestrarum, totiusq; ædificij vibratione, sequebatur tam propinquè sonitus, vt vix vnicius pulsus arteriæ intercederet. In minori autem fragore, duodecim etiam pulsus sæpè numerabam post coruscationem, antequam prodiret tonitru. pulsus verò vnus, est quater millesima, & quater centesima, quinquagesima pars horæ, cùm arteria mea salubriter & moderatè micat. micationes enim 4450. horæ spatio entiosè (paræ quippe istæ temporum mensuræ vsui sæpè veniunt) computaui. Hoc etiam adnotaui. vbi fulmen sine pluuiâ erat, tunc ictus languidiore, & tardiùs tonitru sequebatur coruscationem. Nempe hoc firmat, quod iam antè docui: arctissimè tunc exhalationem stringi, insignioresq; esse crepitus, quando nubes se exonerat, & resoluit in aquam.

Hinc deinde etiam, rudi saltem Mineruâ, mensurare poteris distantiam terræ à nube fulminante, comparando coruscationem & tonitru, cum flammâ & strepitu tormenti maioris, diffiti à te ali-



aliquanto interuallo. Ego certè anno 1624. die 6. Septembris, cum Serenissimus Princeps Poloniæ Ladislaus venit Louanium, inter coruscationem & sonitum moschetorum, quæ quadrante circiter Belgici milliaris obuiam processerant, interstitium Salutationis Angelicæ, quæ facile 10. arteriæ pulsus implet, numerabam. Paruum ergo nubis tonitru, pari expectatione sequens suam flammam, interuallum nubis æquale (milliarij scilicet quadrantis) significabit à terræ superficie. Sed tonitrua vix solent tam tenuiter sonare: & maioribus potius tormentis componenda sunt. vnde angustior est mora temporis. inter coruscationem & tonitru nubis, quadrante milliaris à nobis distantis, quàm inter fulgetrum & crepitum moscheti.

Hoc etiam in considerationem adduci debet: Tonitru in aëre rariore iuxta nubes, sonitum verò tormenti in densiore, iuxta terræ superficiem excitari. Hinc enim, quia medium densius, tardius impellitur & agitur in gyros, posito etiam pari ictu & sono, fragor tormenti motu illo per infimum aërem transversali, pigrius paulld (si Mathematicè rem examines) ad aurem post coruscationem venit, quàm fragor tonitru, qui per circulos in aëre leuiori promptius se diffundentes ad terram descendit.

## ARTICVLVS XII.

### *De effectibus tonitru.*

**T**onitru, quia sonus quidam est, physicè solam sui speciem efficit. Alij tamen quidam effectus ei tribuuntur: quia causa eorum physica tonitru comitatur, sed est magis occulta & insensibilis; ideoque vulgus, qui sensum libenter sequitur, ei que fauet, tonitruo potius adscribit.

Primò, Tuberæ terræ (quæ instar fungorum, & olim in magnis delicijs) gignit. Ita enim lib. 19. cap. 3. Plinius. & Iuuenalis de iis:

*Et faciunt lautas optata tonitrua canas.*

Plutarchus lib. 2. q. 2. Sympof. & Scaliger Exercit. 180. putant terram impulsu aëris & vndatione illà quæ fit in tonitruo, terram concuti, & superficiem eius ad proferenda tubera laxari. Sed id parum iuuat. præcipuum & pænè vnicum est, quod aqua nube tonante effusa, repens & spirituum plena ac turgida sit, quæ permixta & maritata terræ, facillè concrefcit in tubera.

Secundò, Tonitru vinum & cereuisiam musteam ac recentem acore



acore inficit. Thimon lib. 2. Meteor. l. 9. censet id fieri motu aëris, qui in liquorem adactus, cum turbat, ac sursum deorsum peruerit. Sed frustra. venti enim valide spirantes, magis aërem mouent, quàm tonitru; nec tamen ideo corrumpunt liquores. Thimoni tamen lib. 2. cap. 48. de Occult. assentitur noster Lemnius: dicitque se ante tempestatem solere vasa sua præmunire, superpositâ ferri laminâ cum sale, aut silicibus. quæ tamen videtur solum opponere fulminibus, non mero tonitruo: *Quia*, inquit, *fulmen cum durissimâ conflatur, in eâq. potissimè vim suam exerit*. Thimon non paullò antiquior, narrat suo tempore fragmina vitrorum vasis solere iniici, contra tonitruui metus. Verissima nihilominus caussa huius effectus, videntur esse tenues quidam halitus sulphurei, & ceteræ fulguris dissilientis reliquæ, quæ per aërem dispersæ, se in omnia foramina & rimas insinuant. vnde optimû remedium est, spiracula cauearum quàm diligentissimè obstruere, & vasa opperculare. Cereuisia verò recens & adhuc ab igne tepens, promptius acorem bibit: quia spiritus quibus tota turget, faciliè rapiunt aëris sulphur & noxam, eamq. vulgant & infundunt toti liquori.

Tertiò: Tonitru validum aliquando surdastros fecit. Tympanum enim auris, aëris impulsu rumpit aut laxat. In similem effectum, crepitus etiam tormentorum quandoque valuit. & hinc quoque molitores & tympanistæ, obtusi sunt auditus. Pari ratione coruscatio fulminum, aut tormentorum, quosdam olim excæcauit. Narrat enim lib. 1. Obseruat. Schenckius, Præfectum quemdam machinarum in obsidione Metensi, frequenti coruscatione, citra vllam pulueris offensionem, lumina amisisse.

Quartò: Terrore animalibus iniecto, multa per accidens operatur tonitru. De conchis margaritarum parentibus lib. 9. cap. 35. Plinius: *Tradunt*, inquit, *si tonueris, pauidas ac repensè compressas, quæ vocant phrysemata efficere, specie modò inani inflata sine corpore: hos esse concharum abortus*. Dicitur etiam tonitru iuuare & incitare ceruarum partus, iuxta illud Psal. 28. *Vox Domini* (id est, tonitru) *præparans cernuos*: vel, vt in Hebræo, *cernuas*. & D. Hieronymus vertit, *Vox Domini obstetricans cernu*. quia scilicet horrore tonitruui concussæ effundunt suos partus, aliàs, ob magnitudinem & perfectionem, difficiles. vnde Iob. 39. *Parturientes cernuas obseruasti? incuruantur ad sætus, & pariunt, & mugitus emittunt. separantur filij earum, & pergunt ad pascuum. egrediuntur, & non reuertuntur ad eas*.

Sueton. in  
Caligulâ  
c. 51.

Homines etiam valdè fulmina & tonitrua expauescunt. Sic olim Parthi tympanis quibusdâ & cymbalis æneis tonitrua menti-  
ti, aciem Romanam exterruerunt, vt narrat Plutarchus in Crasso.  
Cæsar Caligula, deorum ille aliàs contemptor, *ad minima tonitrua  
& fulgura conuincere, caput obuoluere; ad verò maiora, proripere se è  
strato, sub lectumq; condere solebat.* Quem tamen pauorem vt dis-  
simularet, machinam excogitauit, inquit Dio, quâ tonitribus ob-  
streperet; & cælo, tamquam terrestis quidam Iupiter, retonaret.  
Lapides etiam contra fulmina retorquebat, Iouemq; ad duellum  
euocabat, inclamans Homericum istud Aiæcis ad Vlysses:  
*Ἡ μὲν ἀνὰ σπῆν ἦ ἱγὼς σκ. Tolle me, aus ego te.* Quod etiam narrat & ri-  
det (quis enim tam helleborosum caput etiam non decachinnet?)  
Senecâ lib. 1. de Irâ. Homines enim *ἀσθενεῖν ἐν πύλῳ, fulgur ex  
pelui,* vt vetus adagium habet, excitare possunt, & inanes in cælum  
minas mittere. A Domino autem *ibunt emissiones fulgurum, &  
tamquam à benè curuato arcu nubium exterminabuntur, & ad locum  
certum insilient.* nubes, est arcus; Deus, sagittarius; fulmen, sagitta,  
scopus, peccator, aut quidquid tangere destinauerit. *Numquid ele-  
uabis in nebulâ vocem tuam,* inclamat Iobo, *& impetus aquarum  
operiet te? numquid mittes fulgura, & ibunt; & reuerentia dicent si-  
bi, Adsumus?*

Sap. c. 5.

Iob. 38.

Matth. 25.

Merito igitur veteres illi tenebriones, solum inter deos Iouem  
fulmine armauerunt. & nos quoties cælorum mugitus audimus,  
terrorem & reuerentiam veri & magni Numinis concipiamus: re-  
corde murq; extremi illius & decumani fulminis: *Discedite à me  
maledicti in ignem æternum.* O omni horâ vitæ nostræ timendum  
& horribile fulmen; & quo nocentius & maius nullum mitti pos-  
se intelliges, si intelliges quid æternum!

### ARTICVLVS XIII.

*Tempus, & signa fulminum, ac tonitruu.*

Fulmina sine veris, & initio autumnî, aut æstatis exitu maxi-  
mè hîc frequentantur. Maius enim (vt multis iam annis vidi)  
cùm arbores sunt in florè, & Augustus, collectâ partim, sed non totâ  
melle, vix vniquam euadunt sine fulgure & strepitu. Ratio est,  
quâ tunc sol multas, & quæ ad generationem fulminis sufficiant,  
exhalationes educit, nec eas tamen digerit, vt mediâ & flagrantissi-  
mâ ætate. Hieme verò, vix quod satis ad talem effectum esse pos-  
sit.

possit, extrahere valet, terrâ frigore adstrictâ, aut conuiuente. Hinc in Septemtrionalibus regionibus rara admodum fulmina, ob eandem rationem, vt narrat Olaus. In Angliâ etiam quoties fulminatum, inter illius anni prodigia recenset Polyd. Virgilius, Rerum Anglicarum Scriptor: licet cæli Anglicani temperies nostrâ longè sit tepidior, & vt quidam referunt, Italicæ suppar. nubes etiam plurimæ ibi coeunt, ob vapores vicini maris; vt inde fulminum non accidat defectus. Igitur ad inopiam, aut potius qualitatem exhalationum, recurrendum est. Terra enim Britannica, candida tota & cretacea est: nec sulphureas & nitrosas exhalationes expirat, quales fulmen flagitat.

Vbi autem hiemes tepent, minusque hiemant, circa etiam totum annum (modò terra sulphure fumet) tonare & fulminare potest. Pulchrè Plinius: *Crebra fulmina in Italiâ: quia mobilior aër mitiore hieme, & æstate nimbosâ, semper quodammodo vernat vel autumnas. Italia quoque partibus iis qua à Septemtrione discedunt ad seoporem, qualis est Vrbis & Campania tractus, iuxta hieme & æstate fulgurat: quod non in alio situ.* In Belgio rarissimum est hibernum fulmen: habetque hoc Lemnius pro certo signo secuturæ mox ingentis tempestatis.

Signum verò fulgurum & tonitruï instantis nullum colligo probabilius, quàm si dies vnus aut plures antecedentes valdè feruidi, & cælum deinde prætexat se nubibus. vt meritò intempestivas illas flammæ & tonitrua anni 1624. die 12. Nouemb. Louanij fuerim demiratus; cùm præfertim dies multi anteuiissent gelidi & humentes. Sed nesciebam, quid Neptunus & Iupiter in Oceano nostro contra nothum illum Mansfeldium, è Hollandiâ in Britanniam velificantem, molirentur. naufragium enim in illâ tempestate passus, suffocatus etiam diu creditus fuit: donec iterùm tandem, diuinâ prouidentia eum differente, emerfit, ad defaltandam, quam malè inchoauit, fabulam.

E fulminibus etiam olim, de variis euentis, lætis aut tristibus, coniectabat augurum supersticiosa natio. vanitates eorum non opus hic refellere: quibus nec ipsi Romani, qui aliquid amplius ingenij & Mineræ haberent, satis fidebant. Hoc solùm è Plinio addam: Quodd si ab Oriente iactum fulmen, eodém rediisset, summam felicitatem existimabant portendi: taleque ostentum Syllæ Dictatori datum fuit; qui deinde Felicis nomen sibi adoptauit. Sed quare Felix? quia scilicet tot millia ciuium proscribere, & truci-

Lib. 2.  
cap. 50.

Lib. 7.  
cap. 43.

cidare impunè potuit. *O prava interpretatio*, clamat Plinius, & futuro tempore infelix! non melioris sortis tunc fuere pereuntes, quorum miseremur hodie, cum Syllam nemo non oderit? Adde iam luem pedicularum, quâ infelix eius corpus seipsum erosit; & æstima, quàm felix & verax fulmen illud fuit.

#### ARTICVLVS XIV.

*Tormentorum nostrorum, & fulminum comparatio.*

**B**ombardæ & fulminalia nostra tormenta, Germanus Monachus, Bertholdus Schunarfus, vel malus genius, in perniciem generis humani reperit: vel fortè ars ex Oriente allata. nam in Iaponiâ & Regno Chinensi, bombardæ iam in vsu veteri erant, cum eò appulcrunt Lusitani. Quidam etiam nolunt rem hanc esse nouitæ inuentionis, sed veteribus cognitam, ex illis ueribus Poëtæ 6. *Eneid*os:

*Vidi & crudeles dantem Salmoneæ pænas,*

*Dum flammæ Iouis, & sonitus imitatur Olympi.*

Quomodo enim, inquiunt, fulmen Iouis & tonitru imitatus ille, nisi bombardâ & puluere pyrio? Sed non existimo. sequitur enim paullo post:

*Demens, qui nimbos, & non imisabile fulmen*

*Aere & cornipedum cursu simulabat equorum.*

Videtur enim Salmoneus ille quadrigis veclus, strepitu rotarum, & æratis equorum calcibus, tonitru imitatus. fortasse etiam æream machinam & tonantem, ut Caligula, in curru habuit: quod videtur Suidas insinuare. ardentes etiam faces, ut par Ioui à suis haberetur (Rex enim, an tyrannus, in Thessaliâ fuit) instar fulminum in obuios quosque è curru per medios volante iaculabatur. Veneti tormenta aliquot ex Germaniâ nacti, anno 1380. primi ad Fossas Clodias, contra Genuenses vsi sunt, ut narrat Guicciard. lib. 1. *Histor.* & Platina in vitâ Urbani VI. Sed usum aut famam paullo vetustiore faciliè ex Petrarchâ colligo, qui in Dialogo quodam bombardatum meminit. Petrarcha verò anno 1374. viuere desuit.

Pleraque machinæ maiores, teste Cardano lib. 2. *Subtil.* per quinque millia passuum, 60. ferri libras excutunt. res profectò incredibilis, nisi experimentum fidem assereret. Imò Rothmannus narrat, Principem suum, VVilhelmum Langrauium Hassiæ, fecisse periculum in ictu horizontali duplicis cartoz, ut vocant; inue-

inuenitq; globum vix intra duo horæ minuta, in terram delapsum esse. Vnoquoque verò minuto, tria circiter millia passuum talis tormenti globus conficit. igitur in exto tantum milliari Italico, id est, post iter duorum milliarium Belgicorum, defecit. Quod tamen, an credere debeam, paullulum subdubito. Ictus enim horizontalis, vt omnes fatentur, maximè omnium imbecillis est; vt fortissimus, cum tormentum mediam eleuationem habet, facitque cum plano horizontis angulum semirectum. qualem situm affabrè satis canis nobis repræsentat, cum clunibus insidens, priores pedes, quantum potest, stare facit; & iis, vt solet, semirectè in terram defixis sustentat arduum caput, & primam corporis longitudinem.

Pro quo notandum, duodecim plerumque statui tormenti eleuationes: sic vt vltima & summa sit, quæ os tubi directè respicit in cælum. verum sex solum primæ, seruiunt explosioni. Septem enim sunt species explosionis. Prima est horizontalis: in quâ scilicet tormentum non eleuatur, sed iacet parallelum horizonti. Secunda fit, in primâ eleuatione; & ita deinde vsque ad sextam eleuationem. Breuissimè exploditur globus ictu horizontali, longissimè in sextâ eleuatione: adeò vt Alex. Capobianco sextam eleuationem statuat in viribus duodecuplam ad situm horizontalem: vt si pila, 10. stadia ictu horizontali pererret, antequam in terram cadat, in sextâ eleuatione, 120. conficiet, si eodem tormento & puluere utaris. Ludouicus tamen Collado, (cui Adrianus Romanus noster in suâ Polemicâ magis fudit) experimento in falconettâ pilæ trium librarum à se factò, hanc differentiam constituit.

Eleuatio.	Ratio virium.	Differentia.
0.	368.	0.
1.	594.	226.
2.	794.	200.
3.	954.	160.
4.	1010.	56.
5.	1040.	30.
6.	1053.	13.

Nicolaus Tartalea eleuationes singulas in duas dissecat, & vniuersim 24. ponit. vnde duodecimam, quæ aliorum sexta est, validissimam constituit. expertum verò se affirmat, pilam quæ è duo-

decimo eleuationis puncto, ad pedes 1972. excussa fuerat, demisso ad decimum punctum tormento, 100. pedes longitudinis perdidisse. Tota hæc inter istos exploratores differentia, à magnitudine vel longitudine tormenti, aut qualitate vel quantitate pulueris venit. Infinitis enim exemplis constare (contra quorundam, inquit, mendacium) asserit Biringuccius, tormentum breuius, eodem puluere & globo onustum, per amplius spatium pilam eiaculari, quàm aliud longius; modò totus puluis inflammetur, & vniuersas vires colligat in tubo.

Puluis autem fit ex tribus, halinitro, vel potius, salpetrà (nam hanc à halinitro Veterum distare, probat Exercit. 104 Scaliger) ex sulphure, & carbone. Non idem autem sumitur pro maioribus & minoribus tormentis. Si enim sclopetum puluere illo crassiore machinarum oneraueris, vix ad decem orgyas glandem executies, ait Biringuccius: si minuto sclopetorum puluisculo, machinas franges. immensa etenim flamma, momento ferè temporis, ex eo accenditur; cum vnumquodq; pulueris granum, flammam (Snellij experimento) 125000. se maiorem spargat. Pro maioribus tormentis accipiuntur tres partes halinitri, vt docet Biringuccius, duæ partes carbonis, & vna sulphuris. Pro mediocribus, quinque partes halinitri, vna sulphuris, vna cum dimidiâ carbonis. Pro bombardis minoribus, decem partes halinitri, vna sulphuris, & vna carbonis ex virgis nucis auellane. Quidam, vt celeriores puluerem faciant, & intendant ictum, singulæ cuique libræ sulphuris, vnciam vnâ Mercurij seu argenti viui admiscunt; alij libræ halinitri, quartam vnciæ partem salis ammoniaci. quidam etiam, ex Colladi præcepto, puluerem in tubo, hastâ transfigunt ad accelerandam inflammationem. Porro vis præcipua pulueris est in halinitro, quod à sulphure promptè accensum, puncto ferè temporis vniuersum deflagrat sine vllò cinere.

Porro Cardanus pondus pulueris postulat ponderi sphaeræ executiendæ æquale: Biringuccius duas tertias partes dicit sufficere. Et hanc proportionem à fusoribus nostris Mechliniensibus seruari iam audio, cum de nouitio aliquo tormento experimentum sumunt. si enim sphaera 30. librarum fuerit, tubo 20. libras pulueris infundunt. Sed quid hinc pro fulmine nostro accipimus? Inprimis, materiam sulphuream & nitrosam pulueri pyrio & fulminibus communem esse. omnibus enim fulguritis odor sulphuris inest. spiritus verò nitrosus ad celeritatem inflammationis facit, est-  
que



que principalis causa, cur exhalatio angustiarum impatiens tam impotente impetu effringat nubem. Quædam acida etiam vaporis qualitas incitare quandoque fortassis ictum potest; cum acetum pulueri tormentario infusum, vires magnas addat & impetum, ut affirmat Libani Epist. ad Rulandum.

Præter similitudinem in materia, est alia in modo explosionis: quia utraque sit per subitam rarefactionem materię, vnius intra tormentum, alterius intra nubis cauum. Sed in hoc grande discrimen: quoddam flamma fulminis (excepto rarissimo euentu, quo lapis fulmineus iacitur) sine alio telo sit, flamma verò pulueris, pilam excutiat: ideoque plerumque magis nocet quàm fulmen. Imò nunc subit mirari, quomodo fulmen in terram vsque, id est, per 500. amplius passus, quibus nubes quandoque abest, delicti valeat cum tantâ noxâ & strage. flamma enim pulueris densa & conferta, quàm interdiu videre possis, vix longius vno pede (curiosè animaduerti) profilit ex ore moscheti. quâ ratione igitur illa flamma cælestis huc vsque venit? Si fulminaret, ut puluis aureus aut calx Martis, deorsum, facillè intelligeremus: nunc verò sursum aut in obliquum se iacit, ut puluis noster nitrosus. Ut illud autem de puluere aureo capias, hoc etiam accipe. Ex purissimi auri ramentis paratur puluis, qui radiis maximè solaribus, aut modico igne accensus, nõ sursum, ut puluis tormentarius, sed rectâ deorsum, cum maiori etiam boatu, & viribus decuplo potentioribus, fulminat, itaque si in mensâ accendatur, eam pertundet. Sed fulmen cæleste, tam pretiosâ exhalatione non constat. Itaque præter hæc, nihil quod asseram, habeo. Materia fulminis sæpius viscosam & tenacem aliquam partem permixtam habet, in quâ spiritus ille tenuior colligitur & coërcetur, ne motu dispergatur & dissuatur, sic etiam è tenaci quadam pulueris fuligine, circulos quosdam è moschetis & maioribus tormentis, se per longissimum aëris tractum conspirare & gyrare videmus. Deinde tantus etiam esse impetus potest, ut purus & liquidus flammæ spiritus, aërem ad terram vsque conglobatus terebret. Res etenim rara tota, & fluxu liquiditatis, maximo impetu, etiam cum naturæ renissu, iaci potest. Patet, vbi vapor leuis in pilâ aëreâ rarefactus vehementi flatu, per angustum foramen se deorsum exspirat. Audi etiam Libanum: *Dum as Cyprium in puram excoquitur, antequam perfectum sit, si inieceris aliquid aquæ, prorumpit ex casino motu violentissimo, proferensque & verberat quiddam attingit.* Puerilem etiam historiolum & quæ medijs quar-



tus, dum hæc commentor, accidit, nisi puerile sit, allinam istis chartis. tenuia enim quædam sæpè rebus maximis affundunt lucem. Philosophiæ in Collegio nostro studiosi quatuor aut quinque, atramentum in poculo satis grandi, & facili 32. vnciarum capace, infuso largiter vino ardenti & aceto, apud ignem coquebant, operculato etiam orificio, ne respiraret. cum ecce subito tonitru rarefacta materia poculum tumpit, & per omnes cubiculi parietes valido impetu dispersa, vicinos aliquot Æthiopas fecit, & grauiter ambussit. illi repentino fulmine attoniti, & se inuicem respectantes, vix diu pòst spiritum & sanguinem receperunt. nempe reuerà quiddam fulmini affine poculo inerat: vinum enim ardens, sulphuris vicem & halinitri simul implet, cum facillimè accendatur & rareseat in immensum. additum etiam acetum, tamquam altera halinitri portio: quia puluerem etiam tormentarium incitat, vt antè monuimus ex Libauio.

Lib. 2.  
cap. 54.

Denique, vt semel finiam, quod Plinius de fulmine narrat: *Neminem tangi qui prior viderit fulmen, aut tonitru audierit*, de tormentis nostris fulminalibus etiam verum est. Hoc enim, credo, tantum voluit Plinius: cum videmus fulmen, posse nos euitare, quia venit è longinquo: quando verò tonitru audimus, serum iam ferè esse de periculo cogitare; quia iactus fulminis, ante aut cum sono peruenit ad destinatum. si ergo ante sonitum icti non fuimus, eo audito sumus extra periculi aleam. Non ausim tamen vniuersim promittere securitatem. ocyor enim quandoque est strepitus, quàm telum. In bellis nostris, acies pedestris, vbi coruscationem tormentorum videt, procumbit in faciem. Marchio Vastius cum ab Inuictissimo Imperatore suo Carolo V. præmissus esset, vt exploraret è propinquo situm vrbs Arclatenfis in Prouinciâ, maiori globo traiectus erat, nisi abiliisset vbi conspexit flammam. Idem euenit Laurentio Mediceo Iuniori, Catharinæ illius Mediceæ, tot Regum in Galliâ matris, parenti, in Italiâ ante Mondolphum.

Hoc etiam ante abitu adiciam: Si verum est quod Seneca, Plinius, & alij expertum dicunt, fulmen non altiùs quàm quinque pedes in terram descendere; longè profundiorẽ noxam esse nostrorum tormentorum. sphæræ enim terram intrant etiam ad vigesimum pedem. Verùm tamen hæc inæqualitas oriri potest ex nimia distantia nubis à terrâ: viresque fulminum futuræ fortassis aliquando pares aut supra, si locus explosionis non longiùs abesset, quàm tormentum.

## CAPVT IV.

*De Procellis.*

## ARTICVLVS I.

*Quæ causse procellarum.*

**A**VVSÆ procellarum eadem penè omnes, quæ fulminum. Materia enim est exhalatio, sed paullo tamen crudior. forma, explosio illa è nubibus, & motus deorsum. caussa efficiens, antiperistasis frigoris nubium, & quas antè dedimus fulmini. finalis, etiam eadem: metus scilicet & reuerentia Creatoris; præter alias quasdam.

Procellas vocat Plinius repentinos status, aut ventos procellosos. eorum tamen ortus multum abít à generatione communium ventorum, atque à fulminibus propius absunt.

Tres species enumerat Aristoteles, Ecnephiam, Typhonem, & Præstera. *Ecnephias est exhalatio copiosa, tota simul exussà è nubibus magnâ vi deorsum, sine gyro & inflammatione.* Crudam ergo oportet exhalationem esse, & aduersus flammam, contumacem. calorem tamen magnum habet. quomodo enim aliàs tam subito resceret, & disploderet nubem? Nam dissicit veriùs, inquit Plinius, quàm rumpit nubilum.

*Typhon, Latine Turbo, est exhalatio copiosa, explosa è nubibus sine inflammatione, sed cum gyro deorsum.* vnde Turbo nil est aliud, quàm Ecnephias quidam vertiginosus & gyrans. vnde hac circulatione, partem aliquam nubis defringit, secumque deorsum rapit & versat, inquit Aristoteles. Huius porro vertiginis duæ possunt esse causse. Primò, si duplex sit ordo nubium, & superior extundat, inferior verò retundat exhalationem. sic enim pars exhalationis posterior priori reflexa superueniens, cum eà rixatur, quia vna abire, altera redire contendit. impetus tamén deorsum fortior est & magis intentus: atque ita pars posterior priorem detrahit, in rixâ tamen, & cum aliquâ vertigine. Secundò, exhalationem sine circumgyratione explosam incurrit deinde ventus aliquis transuersalis, circummagitque vsque ad terram.

*Præster est Typhon inflammatus.* Longâ enim vertigine, quâ par-

tes inter se confricantur, Turbo concipit flammam, & transit in Præsterem. nam

Lucret. l. 6.

*Fit quoque, ut interdum venti vi missa sine igni,  
Ignescat tamen in spatio, longoque meatu.*

Exploditur verò sæpè Præster,

Idem.

*In mare de celo tamquam demissa columna.*  
monstrum maximè formidabile nautis.

## ARTICVLVS II.

### *Procellarum effectus.*

**I**dem ferè sunt qui fulminis, nisi quòd procellæ, crassiore spiritu non ita penetrent sicuti fulmen, sed frangant potius, turbent, & disiciant. Turbo præterea rapidâ vertigine locum ex loco mutans, ait Plinius, nauigia contorta frangit; & percussus, correpta secum in cælum refert, & sorbet in excelsum. Compescitur tamen, inquit, facili remedio, infuso in aduenientem aceto, cui est frigidissima natura. Nautæ in nostro Oceano potentiori & tutiori vtuntur remedio: tormenta enim in aduentantem explodunt, vt globo, & aëris impulsu, exhalationem dissipent. torquet autem se & circinat longissimè per superficiem maris, specie aliquot modiorum calcis dissolutæ in fumos. Simpliciores nautæ dæmonem (quod etiam Bodinus, qui dæmones vbique fatigat, credit) fumum illum intus animantem & rotantem existimant. Ædificia quoque & ingentes arbores turbinibus sæpè eradicantur, & animalia in sublinie abripiuntur. quomodo fortè olim abreptus ille vitulus, quem repluisse narrat Auicenna. nimis enim vitulus sim, si putem in nubibus generatum.

## ARTICVLVS III.

### *Præfagia procellarum, & tempestatum.*

**T**empestatas, quando in malam partem sumitur, Ecnephias, Turbines, Præsteres, ventos etiam omnes validos, aëris inferioris tranquillitatem & statum turbantes, fulmina, & grandinem procellosam, comprehendit. Plurima autem sunt tempestatum præfagia, quæ apud Virgil. lib. 1. Georg. apud Plin. lib. 18. cap. 35. & Lucanum lib. 5. vbi Amyclas nauta (cuius tugurium Cæsar solus & ignoratus, intempetâ nocte pulsar) traiectum Adriatici, per

per omnia signa tempestatum, frustra dissuadet. Sed aduerte, ple-  
raque omnia non tantum turbines, & cetera quę amplectimur no-  
mine tempestatum, significare, sed simplicem etiam pluuiam, alia-  
que nubium missilia. Sunt ergo signa sæpè satis certa mutationis  
aurę, & vaporis aut exhalationis supernę relapsurę; sed non perin-  
de, an id in specie Ecnephię, an venti communis, an pluuię, &c.  
futurum sit. Ea autem in duas classes separabimus. Alia enim ab  
inanimatis, alia ab animantibus sumi possunt. Hęc sunt in pri-  
mâ classe:

Si Sol in nube oriatur, aut occidat. si parelijeum cingant. Hoc  
ab Arato est, illud à Virgilio:

*Ille ubi nascentem maculis variauerit ortum  
Conditum in nubem, mediòque refugeris orbe,  
Suspecti sibi sint imbres.*

Georg. 1.

& Amyclas apud Lucanum:

*Nam Sol non rutilas deduxit in æquora nubes.*

Quod verò Virgilius de sole, medio orbe refugiente, addit; clariùs  
Plinius: *Sol concavus oriens pluuias pradicat. Si nubes*, inquit etiam,  
*solem circumcludent, quantum minus luminis relinquent, tanto turbidior*  
*tempestas erit. si verò duplex etiam orbis fuerit, eò atrocior. Deni-*  
*que, si ante ortum radij se ostendunt, aquam & ventum significabunt.*  
Idem fiet, si ipse etiam orbis solaris, aliquanto maturius, quàm pro-  
ximis diebus, in conspectum venerit. Hoc enim, adagiale istud  
Gallicum, fundamentum habet:

*Femme qui parle Latin,  
Enfant qui boit du vin,  
Soleil leué matin,  
Jamais n'auront bonne fin.*

A Lunâ quoque præfagia quædam sunt. Si in exortu radios in  
Australium & Boream dispergat. si cornua crassa & inflata habeat.  
si insolenter palleat, aut erubescat. Si Planetę micent, & fixę su-  
pra modum lasciue sint & scintillantes. Si faces per aëra solito  
densius volent.

*Sæpè etiam stellæ, vento impendente, videbũ  
Præcipites calo labi, noctisque per umbram  
Flammarum longos à tergo albescere tractus.*

Virgil. 1.  
Georg.

Horum omnium vna ratio est, quia indicant multos vapores aut  
exhalationes pendere in aëre, quę materia sunt meteororum hie-  
mantium, & spargentium tempestates. Sol enim, Luna, & omnia

sidera per medios vapores refractè conspecta, ampliant speciem; per exhalationes verò, purpurant aut irrufant. subfiliunt & scintillant, ascensu, descensu earum, ceteroque discursu & gyratione per aërem.

Dices: Nubes in quâ v.g. sol exoriens surgit, ad limbum horizontis, & procul nobis abest: quomodo igitur illa potest in verticem nostrum recidere? Respondeo: Quas putas tam longè distitas, vix sæpè distant dimidio Belgico milliari. pater ex vapore qui impressam tenet Iridem: cuius cornua horizonti insidere videntur, cum tamen non rarè paullulum ultra nos attingant terram. Deinde tota semidiameter horizontis visibilis in superficie terræ non est 6. milliariibus Belgicis longior, vt Lib. 4. ostendemus. nec longè ultra hanc distantiam possumus in cælo videre nubem. Sol etiam exortiuus, vapores obidentes horizontem, rarefacit & dispergit aliquando vsque ad axem horizontis, & nostrum verticem. Denique vapor circa Finitorem, significat alium etiam passim fluctuare per totum aërem, à sole mox exorituro eleuandum, & recasurum.

Animalia quoque hæc signa habent. Si gallinaceus aut anas frequenter & temerè cantet interdum. si grues reuertantur, aut demissius volent. si cygnos, anseres, anates

Virgil.  
t. Georg.

*Certatim largos humeris infundere rores,  
Nunc caput obiectare fretis, nunc currere in undas,  
Et studio incassum videas gestire lauandi.*

si boues cælum suspicientes olfactent, aut se contra pilum lambant. si porci lasciuentes stramen & manipulos ore discerpant. si feles barbas lauent. si pecora indecorè exultent. Homines etiam, aut callo pedum digitos præter solitum vrente, aut podagrâ, aliisque vitiis admonentur tempestatum. Lemnius etiam lib. 3. cap. 3. de Occult. affirmat fatuos, & quibuscumque mens vacillat in Belgio, magis loquaciter & turbulentè per compita discurrere, tribus etiam diebus ante tempestatem. Causam istorum reddere tentauit Virgilius:

Lib. 1.  
Georg.

*— Vbi Iupiter humidus Austris  
Densat, erant quæ rara modò; & quæ densa, relaxat:  
Vertuntur species animorum, & pectora motus  
Nunc alios, alios dum nubila ventus agebat,  
Concipiunt. hinc ille animum concentus in agris,  
Et læta pecudes, & ouantes gutture corui.*

Itaque in densitatem & raritatem corporum, quæ ex aëris temperie

rie nascitur, reducit lasciuiam illam & motus animalium. Sed hoc latius explicandum, & addendum aliquid est.

Dico igitur, ante tempestatem, & cùm iam multæ nubes, aut vapor in aëre incipiunt cogi, humorem non paucum, deorsum, non quidem guttatim in pluuias, & ut percipi faciliè possit, sed in stâr aëris denlioris, aut rosis continui, perpetuè defluere. id enim necessarium est, simul atque vapor, minimâ grauitatis adiectione, aëris, in quo pensilis fluctuabat, superauerit æquilibrium. Hic ergo, quia tenuissimus est, in animalium poros & cutem faciliè penetrat, & titillando aut morsicando ad saltus inconditos, aut voces, sollicitat. quædam etiam se lanibunt, ut humorem illum titillantem detergant. facilius autem bruta, quàm homines, eum sentiunt, vel quia corpora mutationibus & iniuriis cæli magis obnoxia habent ( & hinc etiam non omnia æquè patiuntur, & præfagiunt,) vel, ut Beuerus noster lib. 1. Meteor. quia instinctu & impetu naturæ in perturbationes & motus abripiuntur, quos in hominibus frænât & componit ratio. Per illam etiam causam expediti potest, quod narrat Plinius, Trifolium inhorrescere & folia subrigere contra tempestatem: affirmatque Io. Porta, se expertum lib. 10. Villæ c. 25. Nerui enim quibus folia eius intenduntur, aut relaxantur, frigore & qualitate humoris contrahi possunt, & folia surrigere. Et sic etiam mirabile illud extrico, quod visum à se assueuerat Rondeletius: Corio scilicet vituli marini ventorum mutationes indicari. Austro enim afflante pili emicant & inhorrescunt: Boreâ verò redeunte ita reflaccescunt, & in planitiem desidunt, ut nullos esse putes. Hic deinde vapor rorulentus, supernè defluus, & tempestatum aut imbrium prodromus, omnium plantarum æstate, post siccitates, odorem irritat. quod sæpè in Orualâ sum expertus, quæ ante imbrem, aut vesperi, quando reflucere incipiunt rores, longius multo & incitatius odorem spargit.

Hæc eadem causa, cur fores acrius strideant, ligna in igne crepitent, fungi circa lucernas concrecant ante tempestatem.

Ceterum in peticulo procellarum aut fulminis pulsantur campanæ apud Christianos; quia Benedictione vim quamdam acceperunt ad abigendos demones, qui sæpè tempestatum auctores. Ventilatio etiam aëris auertere, aut hebetare aliquantulum potest impetum fulminis.



## CAPVT V.

*De Meteoris suprema regionis aëris.*

Lib. 1.  
cap. 16.

**C**um exhalationes sæpè leuiiores vaporibus sint, haud dubiè nubes, & in supremam aëris regionem transcendunt, ibique in varias meteororum imagines accendi possunt: quales capræ, trabes, bolides, faces, dolia, clypei, stellæ discurrentes, &c. Caue tamen existimare, hæc ita supremæ regioni affixa esse, vt similia, in mediâ (vbi raræ in eâ nubes, aut nullæ sunt) aut infimâ exoriri nequeant. *Fax enim, inquit Plinius, Germanico Casare gladiatorum spectaculum edente, præter ora populi, meridiano transcurrit.* Alia etiam incendia non rarè ad terram veniunt. adeò vt nuper lintea sub dium expansa Louanij vstulauerint. Hæc autem quæ flammam vsque ad terram ferunt, verisimile est, è propinquo rapuisse. Potest tamen, vt è nubibus, aut supremâ etiam regione descenderint; vbi præsertim incendium vastum est, aut materia tenax & ignium tolerans. Ita olim inter acies Mithridatis & Luculli, cælo repenti diffisso, ingentis dolij flamma, coloris argenti fusâ, ait Plutarchus in Lucullo, in terram decidit.

Omnia verò hæc meteora, eadem imagine & exemplo definiri debent. vt, Capra saltans est *meteorum igneum suprema regionis, figurâ & subsistiu similitudinem habens vera capra saltantis.* Trabs est *meteorum igneum suprema regionis, situ materia in longum porrecta & iacentis, habens imaginem vera trabis.* & ita in ceteris. Causa igitur eorum materialis, est exhalatio flammans. formalis, figura, aut motus, qui proximum fundamentum similitudinis sit, cum re aliâ, cuius meteororum adoptauit nomen. finalis, purgatio aëris, aut respectus Numinis, & mortalium terror. efficiens, sol & astra, aut scintilla aliqua alterius ignis exhalationem fortè incidens. attritus etiam & confricatio halituum; maximè, si suprema regio se, & vniuersa in se pendentia, cum cælo gyrat in orbem.

## ARTICVLVS I.

*De Caprâ, Trabe, Pyramide, &c.*

**S**eneca fatetur ignorare se, cur Aristoteles globum quemdam *Signeum*, capram appellarit. Sed ipse non fuit primus nomenclator.



clator. & à barbulâ, & floccis circumpendentibus, lasciuoq; saltu, nomen sine dubio accepit. Flocci autem illi peniles, partes exhalationis paulò rariores sunt, & in speciem lanarium floccorum interciscæ. Saltus potest esse verus, potest etiam tantum apparere. Verus erit, si spiritus rarior materiam densiorem identidem leuet, & subito destituat, expediens se & euanesceus. apparet verò, si flamma corporis densior & vberior, illic se in barbitium, anteuentulâq; caproneas, & crinientes vndique villos eiiciat; & iis statim deflagrantibus & dissipatis, iterum se (idq; sæpius inter polaris vicibus) in corpus exhalationis recipere appareat. Capram Lunari magnitudine visam, Paulo Emilio bellum aduersus Persecum Regem Macedonum gerente, narrat Seneca. *Nos quoque, inquit, vidimus non semel flammam ingentis pile specie, qua tamen in ipso cursu suo dissipata est. Vidimus circa D. Augusti excessum simile prodigium: vidimus cum de Seiano actum* (id est, mors ei à Senatu decreta.) *nec Germanici mors sine denuntiatione tali fuit.* Verum non hæc omnia capris, sed quædam trabibus, aut facibus, cometisve elementaribus adnumeranda. De excessu Augusti Dion: *Sol totus defecerat, magna pars cali ardere visa, ligna ignita de calo visa cadere, crinita & sanguinolenta stella fulserant.*

Trabs oblonga & iacens esse debet: aliàs si steter, columna potius erit. Trabem olim conspectam, cum Lacedæmonij classe victi, Græciæ imperium amiserunt, narrat Plinius. & à fido teste nuper audiui, autumno anni 1625. ingentem trabis molem, intempestâ nocte, ab Occasu exortam, paulatimq; ad cæli culmen euectam, Lunam clarissimè splendentem infuscasse. De trabe etiam admirabili anni 1560. quæ per duas horas arsit, vide Gemmam lib. 2. cap. 2. Cosmog.

Pyramis ab aliis vocatur ignis perpendicularis. erecta autem hæc flamma apparet, latiorq; in basi, sursum in conum & turbinem abit. describit eleganter, & simul causam talis figuræ scribit Iouianus:

— *Leue in ærîum se tollit acumen  
Consurgens, grauiora suo se pondere ad imum  
Detrudunt, donec cunei sub imagine flammæ  
Concipit, & rutilus micat inter sidera conus.*

Sic etiam in lignorum & candelarum flammâ, partes grauiores infra alias sidunt, leuioribus in pyramidis conum effugientibus.

Stipulæ ardentes sunt, cum exhalatio longè lateq; sparsa, & subinde relucens, speciem stipularum in agris flagrantium representat.

Cly-

Clypeus etiam ardens & in orbem scintillans, ab Occasu in Ortum, Marianis temporibus, visus transcurrere, Plutarcho teste.

Lib. 2.  
cap. 26.

Fax nomen est generale, & in stellas discurrentes, & cadentes cadere potest. Plinius in lampadem, & bolidem diuidit. Lampas *vestigia longa facit, priore parte ardente: bolis vero perpetua ardens, longiorem trahit limitem*, inquit. vnde etiam patet, vtramque appellationem in stellas discurrentes & cadentes competere. nunc enim lampadis, nunc bolidis formam adoptant.

Stellæ discurrentes serenâ ferè solùm & sidereâ nocte visuntur. Non exploduntur è nubibus, vt cadentes, sed per materiam in supremo aëre in longum expansam discurrere apparent; cùm reuerà locum non deserant, sed flamma vna alteram continentem accendat & fuscitet. sic flamma candelæ ardentis, in lychnum candelæ extinguit & adhuc fumantis, descendere videtur, ait Aristoteles, si hanc illi ita supponas, vt fumus in flammam incidat. pari modo ignis per stupam, aut puluerem pyrium, inuitatus aut abreptus pabulo, imaginem præbet discurrentis. Non est autem planè necesse, totam exhalationem continuam esse: quia vna pars aliam non longiter remotam per aërem interuallarem incendere potest, vt in stupâ igni ferè attiguâ cernimus. sed in naphthâ euidentius: in quam vndecumque visam transiliunt protinus ignes, inquit Plinius. Sic Medea pellicem, filiam Regis Creontis, à Iasone superinductam cremauit, coronâ eius sacrificantis naphthâ illitâ, & raptâ ignibus. Sed cur stella semper rectâ discurnt, cùm incredibile sit materiam flammæ numquam in obliquum disponi? Respondeo, sæpius tortuosam esse; sed distantia obliquitatem celat, nec è longinquo apparet, vbi hinc inde semita diuertit & se torquet. vidi etiam huc oculis non semel, stellas istas, non directo limite, sed hac illac vagas & palantes, veluti etiam tractum tenuem à tergo relictum, statim se dilatare, & vtriusque spargere.

Sed quæres iterum: Cur semper transversim discurrunt? Nego id esse perpetuum. est tamen solemnus. quia si exhalatio rectâ sursum deorsumve commeet, & vertici nostro imminet, stare eodem loco defixam apparebit. si autem à vertice absit, ascendere aut descendere videbis. sæpius tamen descendere: quia à parte superiori & celestibus propinquiore exhalatio promptius incendium rapit. ibi enim leuior, & purior, magisq; ignea, & vicina flammæ. Si etiam halitus dispositura horizonti parallela fuerit, & pars prima, media, ac vltima æquali interuallo à terræ superficie distent;

nisi

nisi motus in verticem & zenich nostrum tendat, parebit ferè descendere in fine: quia linea recta altior oculo, parte illà semper depressior & propinquior terræ videtur, quæ propius ad Finitorem accedit. Quante molis, inquires, oportet stellas istas esse, vt hinc eas conspiciemur? Respondeo: Satis grandis, præsertim si in altissimâ parte supremæ regionis sit inflammatio, quæ sententiâ Vitellonis, & ferè communi, 52. circiter Italicis miliaribus absistit à terrâ. quæ distantia est ter ferè longior, quàm semidiameter horisontis visibilis, seu linea quæ ab oculo nostro extenditur ad punctum in superficie terræ remotissimum, quod mitti à nobis visus potest. Nihilominus, quia fax in tenebris, etiam per totam illam horisontis visibilis semidiametrum, ex Pharo aliquâ oculos nauigantium facile incurrit; non est necesse, multis partibus faces nostras amplitudine flammæ superari ab illis cælestibus. Ratio est, quod faces per tenebras noctis conspiciantur, vicinum aëra perfundant radiis, cernantque se denso satis lumine, quod maiori Solis iubare non dilutum, simul cum luce facis ad aspectum venit.

Sed alius præterea videtur esse stellæ discurrentis generationis modus: si nempe vero discursu se traiciat, nec tamen nubes eam, vt stellam cadentem, extundat. quid enim vetat, exhalationem, materiâ affluente, & in nodû visco fortasse suo se alligante, grauatâ pōdere suo refluere? De talibus canere mihi iam videtur Virgilius:

—— *Cælo censæpè refixa*

Aeneid. 7.

*Transcurrunt, crinēque volantiā sidera ducunt.*

Ecce enim affixa cælo, deinde refigi, & transcurrere dicit. ergo flamma instar sideris veri eodem loco fixa primùm conspiciebatur, deinde absiliit. & hinc est, vt puris & sidereis noctibus tam numerosos stellarum populos videre putemus; cùm faculæ sparsim interlucentes (quas postea refigi & delabi etiam cernimus) pro legettimis astris fallant.

Motus verò earum in fine plerumque tardior, vel (vt in pyrobolis nostris artificialibus) quia materia in fine deflagrauit, & spiritus ignei molem ferentes, partim expirauerunt. quod verum est, si exhalatio se in cælum rectâ vel obliquè euibrauerit: vel (si deorsum est motus) quia aër versus terram perpetuò occurrit densior, densiusque ac per lineas centro viciniore, ideoque propius sibi admotas, halitus aquei & terrestres in contrarium scandunt. vel tertio; quia materia motu dissilit, aut rarefcit, vt pigrior in fine ad casum sit. vel denique, si exhalatio à vertice nostro pari celeritate,

tate, & lineâ ad superficiem horizontis parallelâ, abscurrat: ratione tamen opticâ, retardari parebit, quod longius abiuerit, motus; quia æquales portiones illius lineæ quam decurrit, minores videntur quod longius recedunt à nostro vertice.

Intelliges, quid velim, si magnæ alicuius aulæ tigna in tabulato trāsuerfaria suspexeris. quæ enim directe supra caput sunt, ampliora lacunaria aperire & magis à se distare, quàm remotiora, apparent.

Quæres tandem, an columnam illam ignis Exod. 14. quæ 40. annos filios Israel traduxit per desertum, meteoris igneis accenseamus. Franciscus Aguilonius lib. 5. Optic. nubi isti, in imaginem columnæ ab Angelo conformatæ, putat ignem diuinâ virtute infusum, prohibita tamen vrendi facultate, vt in rubo, & Babylonica fornace. Sed nil vsus tam insolenti miraculo. Exhalationes ergo flagrantæ potiùs erant de materiâ meteororum, quas Angelus singulis noctibus collecto nouo supplemento reparabat.

Denique hoc præcedentibus auctarium adiicio. Stellas discurrentes, & id genus transuersos ignes, in prodigiis & maleficis signis inhabitos à Veteribus, & iuxta Cometas fuisse. Ostendere possum infinitis exemplis. Sufficiet vnum à Poëtâ Pompeiano.

Lucan. l. 2.

*Ignota obscura viderunt sidera noctes,  
Ardensemque polum flammis, calig. volantes  
Obliquas per inane faces, & cinemq. tremendi  
Sideris, & terris mutantem regna cometem.*

Sed quantam hæc signa mereantur fidem, dicemus in Cometis Libro sequenti.

## ARTICVLVS II.

### De Galaxid.

**A**Ristoteles galaxiam, seu circulum lacteum, permiscet meteoris ignitis supremæ regionis. Parmenides, partes Firmamenti densiores, & ferè stellantes, Democritus legitimarum stellarum infinitam congeriem existimauit. Tres istæ sententiæ de veritatis principatu certant, ceteræ fabulares palàm sunt. vt esse lac Iunonis, ore Mercurij in cæli pauimentum abiecti effusum, aut partem illam vstulatam & signatam incendio Phaëthontis: & alia id genus somnia. nec longè probabilior etiam Theophrastus, qui duorum hemisphæriorum compagem & commissuram, ac veluti cicatricem dixit: quasi scilicet Deus integrum Firmamenti orbem, per

per diuifa hemisphæria, vt nostri tornatores solent, excauare, & deinde plumbaturâ ferruminare, debuerit.

Qui verò partes Firmamenti rariores, & illac efflorescentem Empyreï lucem crediderunt, non tam inepti, veri tamen non sunt: vt à nobis dicenda satis docebunt.

Dico Primò: Via lactea, non est congeries exhalationum in summâ aëris regione incensarum. Ita Auerroës, & passim omnes Peripatetici, qui deserunt hîc suum Aristotelem. Probatur duplici argumento. Primò, quia incredibile tam immensam exhalationum molem tot annis, circa totum cæli ambitum, perpetuò eadem imagine durasse. reliqua enim meteora constantiam illam non habent, sed figuram infinitis modis euariant. deinde, quæ terra, quæ maria in quotidianum tot ibi deflagrantium exhalationum pabulum tam diu sufficiant? Secundò, omnes qui vbique & ab omni xuo de galaxiâ scripserunt, eandem planè & circumcisè Firmamenti stellas intra eam includunt, & per Geminos & Sagittarium deducunt. Hinc colligimus, nullam pati aspectûs diuersitatem siue parallaxim: quam tamen satis grandem experiremur, si in regione elementari infra Lunam, & non in altissimo æthere, haberet stationem. Auerroës etiam fatetur, se Cordubæ in Hispaniâ, & Marochi in Africâ, in eodem prorsus Lactæ margine Aquilæ stellam adspexisse. quod in illâ ciuitatum istarum distantia facere non potuit, si galaxia intra Mundum Elementarem tam depressa foret, tamque insignem haberet parallaxim.

Sed dum hæc muginor, ecce prodit in lucem præclarum opus Eruditissimi Viri Fortunij Liceti, Philosophi Patauini, de Nouis astris: in quo cap. 56. libri 2. contra hæc tela tueri & retinere conatur Aristotelem, animo quidem grandi & à me laudato, sed non pari euentu. Duas ab Aristôtele galaxias, vnâ cælestem, alteram elementarem, agnitas credit. cælestis est tractus ille cæli, infinitis stellulis quas Aristoteles Sporades, id est sparsas, vocat, instratus & luminosus. Præter hunc est, inquit, simillimus ei directè in regione elementari suppositus, è tenuissimorum halituum stamine contextus. Sed cur hic non subit aspectûs diuersitatem? Quia, ait, tam rarus est ignis, vt vix, sine galaxiâ cælesti, per eum, Sporadum suarum radios traiciente, sit visibilis. Verùm facillè retrahi potest ex hac fugâ. Nam quod vix videri potest, reuerà videri potest. aliàs enim quo alio sensu, quàm visu, circulum illum elementarem deprehendemus? Itaque parallaxis sine dubio eum prodeat: fietque

vt galaxia elementaris nunc ab hac parte, nunc ab alterâ galaxiæ cælestis appareat. cùm enim cælestis galaxiæ margo qui prior oritur, prior etiam occidat; sequitur, alium marginem, post ortum eius, spectare horizontē orientalem, & alium spectare occiduum, ante eius occasum. cùm ergo & in ortu & in occasu galaxia elementaris infra cælestem & horizonti propior, propter aspectûs diuersitatem, appareat: vno tempore infra illum marginem cælestis galaxiæ, alio infra alterum erit. quod affirmari sine risu non potest. Cur etiam flamma illa elementaris numquam figuram hîc aut ibi turbat? cur pro copiâ aut raritate exhalationum ascendentium colorem non incendit aut relaxat? quæ causa materiam sub easdem semper stellas colligit? An vis quædam Sporadum magnetica, & spirituum attrahens? Sed nimis hoc quæsitum & metaphysicum est. vt quid enim pari semper mensurâ, cur non altius & in cælum usque trahit? Adde, quidquid galaxiæ videmus, moueri, & eundem æquo passu cum sideribus cælo adhærentibus: suprema verò æris regio, aut non sequitur, aut tardius, cælestes motus. galaxia igitur in eâ pensilis, relinquetur, parebitque singulis diebus, more Planetarum, aliquouſque reciprocasſe in ortus.

Dico Secundò: Nec galaxia est pars Firmamenti perpetua & densior, quæ tamquam continua Zona cælum cingat. Et quidem non cerni in eâ solem, vt speculo, scitè refellit Aristoteles: quia cùm in visione speculâri, angulus reflexionis angulo incidentiæ par esse debeat, non semper eodem modo sol in galaxiâ appareret, quandoquidem non vnum semper adspectum ad eam retineat. imò aliquando serenissimo & viridi cælo non videremus; quia species solaris à speculo isto reflexa, extra oculum nostrum caderet. Verùm, nec esse partem cæli, quæ perpetuam sine interpolatione densitatem & lucem habeat, iam patebit.

Dico Terriò: Galaxia est instar Zone innumerabilibus gemulis, angustissimis distinguentibus interuallis, intertextæ. Totam enim illam Viam eiusmodi sidereis lapillis stratam, nuper nobis arundo Batauica ostendit. Vnde alia causa quærenda non est, vbi certam hanc habemus. Facile autem intelligi potest, quare vnum & continuum Lacistud appareat. quia videlicet, etsi per singulas stellulas lux illa intercisa sit, & media spatia interpellent vnitatem; ex longinquo tamen, nisi Telescopij beneficio, discerni non valet. Ita centum nocturnæ facies vicinæ sibi, sed tamen diuisæ, imaginem procul aspectæ mentiuntur vnius continui ignis. quip-



quippe intervalla breviora sunt, quàm ut distinctè cerni possint; & reguntur insuper aspergine vicinæ vndique lucis.

Sed obiicit doctiss. Licetus: In capite Orionis, Præsepi, Pleiadibus, acervos stellarum, arundine illâ suâ faberrimâ, detexit nuper Galilæus; & tamen nullam ibi galaxiam repræsentant. Igitur pars cæli continua est, non discreta stellatim. Sed hoc Galilæi inuentum potius galaxiam nostram asserit. Nam nebulosa illa in capite Orionis, imaginem nubeculæ albensis habet, quæ non longè à galaxiæ Lactæ abludit. Est autem (quod antiquitas nesciit) vnus & viginti stellarum nodus. Præsepe etiam, seu nebulosa inter duos ællos in imagine Cancræ, subalbida nubecula est, quam concinnat 40. amplius minutissimarum stellarum cinnus. Vel. uti ergo hic vnum confusum & nubilo quasi implicitum lumen, non intervalla siderum, cernimus: ita in galaxiâ vsu venit. Vbi verò stellæ plures in vno grege, maiusculæ sunt, ut in Pleiadibus, aliarum minuscularum interiectarum luculas offuscant; ut manifestè spatia mediâ inalbare non valeant. sicq; in Pleiadum cœtu 6. aut 7. stellæ singulares & seorsim apparent, viridi aut cæruleo, non apertè lactescente, inter eas intervallo. Ita etiam Luna cum faxis est illustris, & Cancro aut Sagittario admotâ, galaxiam infuscat, candoremque eius, ut sæpè vidi, euanescere facit. Fieri etiam potest, ut minuta quædam siderum, ut sic dicam, puncta, sparsim per totum cæli forniciem collucentia, etsi plura fortè in gregem coierint, lucem tamen tam validam confundere non possint, quæ ad oculum sub imagine nebulosæ, aut galaxiæ, veniat, nisi iuvante & rapiente speciem eius tubo.

Sed, petet curiosior aliquis: In quo præcisè & adæquatè subiecto, est candor iste quem cernimus in galaxiâ? Respondeo: In stellulis partim, partim citra ipsas in propinquo medio, ubi radios satis densos & vberes tricant & confundunt. hoc enim etiam modo, maiorum siderum lucès cerni, alibi docebo. Ego etiam in Libello, quem de Cometâ anni 1618. cum Clar. Medico & Mathematico D. Thomâ Fieno, scripsi, huc illuc coniecturam meam versans & mittens, diuinabam fortè galaxiam cingulum quoddam solutile esse, pluresque eius gemmulas quandoq; in vnâ grandiore, & nouum aliquod sidus (quale famosû illud Cassiopæ, Cygni, &c.) confluere. quod etiamnum probabile existimo, cum fluctu tamen nunc maiori, ut facilè colliges ex Libro sequenti.

Ceterum galaxiæ circulus perfectus non est, sed multis partibus



defle&it & torquet, veluti semitæ in agris. alibi etiam duplex triplæve excurrit, vt iuxta Olorem, vbi latissimus. Verum etiam est, quod Aristoteles asserit, intra quàm extra Tropicos esse angustiorum. sed non firmiter inde collegit, ex halitibus contextam esse: quia scilicet sol inter Tropicos nimio ardore spiritus extenuat & absomit, vt proinde galaxia ibi ieiunè & malignè alatur. Verùm hac ratione, autumno & aliis partibus anni, quando densius adscendunt exhalationes, oporteret galaxiam ampliorem & vberiorè fieri: sicuti tum etiam cetera ignita pleniora sunt, & magis frequentantur.

Si verò me interrogas, cur extra Tropicos galaxia amplior, dic tu mihi antè, cur in hac quàm illà cæli parte plura aut illustriora sidera defixerit Deus. prior demisso capite abibis, ego deinde sequar. quàm multorum enim fines nos latent! Posidonius tamen, ne hîc obmutesceret, Extra Tropicos, inquit, galaxia maior, & densiores stellarum greges sunt, vt regionum illarum frigus & rigor sideribus minoribus molliretur, quando sole non satis possunt. Quod non perinde ridendum, ac istud Plinij lib. 18. c. 29. *Circuli Lactei defluuiis, velut ex vbere aliquo, sata cuncta lactescere, duorum siderum observatione, Aquila in Septentrionali parte, & in Austrinâ, Canicula.* Quæ tamen verba ad probabilitatem aliquam etiam reduci possunt, si vicinæ galaxiæ sideribus, similem Aquilæ & Caniculæ influentiam tribuamus.

Hoc denique bellum satis, nec insuper habendum, quod Iosephus Acoſta lib. 1. Hist. Ind. c. 2. sæpè adspexisse & admiratum se dicit: Circa polum Australem, galaxiam mirificè splendescere, multisque locis, maculis ferrugineis, instar Lunæ deficientis, distinctam esse: fixasque & immobiles eas perseverare. Quid autem ex sunt? Dic, partes cæli sine sideribus transparentes, aut plurimas fusci vel subtrufi luminis stellas colligatas in vnum nodum.

Finio, si id etiam accipis. Alia præterea, veluti circuli Lactei segmenta, dispersa esse aliis quibusdam cæli regionibus, extra famosam istam, quæ totum ambitum suum implet, galaxiam. hinc quidam tres aut quatuor galaxias memorant. dehniri verò illa potest: *Circulus lumbosus, ex minutissimis Firmamenti sideribus concinnatus, ipsūq; per Geminos & Sagittarium in duo hemisphæria diuidens.*

Ignis supremæ regionis meteoris Aristoteles etiam Cometas perennificuit. sed tractatio eorum plenior est, quàm vt huius Libri modus eam capiat. Itaq; in totum Librum tertium diffundemus.

LIBERTI FROMONDI  
 METEOROLOGICORVM  
 LIBER TERTIVS:  
 De Cometis.

**P**AVCA de Cometis à Veteribus cum magnâ curâ scripta habemus. serò & serò magis hanc rem aggressi Regiomontanus in Cometâ anni 1475. Vogelinius in altero anni 1532. Gemma Phrysius, & filius eius, Corn. Gemma. Sed parum adhuc effecerunt, si cum sequentibus componantur: & præsertim cum Tychone Brahzo, de No- uâ stellâ Cassiop. & in Cometâ anni 1577. pòst: & cum ipso infiniti alij propemodum turmatim concurrerunt, vt ex hoc mustaceo etiam ipsi laureolam peterent. Sed plurimos excitauit Cometa iste nuperus anni 1618. de quo Keplerus, Snellius, Cysatus, Clariss. & Ampliss. Vir D. Erycius Puteanus, Clariss. Vir & Academicæ nostræ Archiater D. Thomas Fienus, cuius onerariæ ego cymbam meam alligavi. & sine serè numero alij. sed notissimè, & satis ampliter Eruditiss. Vir & Clar. Philosophus Patauius, D. Fortunius Licetus, & Doctiss. ac Clar. eiusdem Academicæ Mathematicus D. Io. Camillus Gloriosus, & ante eos paullò, Clar. Viri, & perillustres Equitis, Scipionis Claramontij Antitycho: qui tamen omnes in varias sententias abièrunt, & litem adhuc in plerisque sub Iudice reliquerunt. Nos, quod verisimilius post tot illustria ingenia, & fortissimas rationes, subterhabitis ( ne Liber hic supra aliorum molem monstrosè se inflet ) leuioribus, in synopsim & aspectum dabimus.

Primò autem de causâ Cometarum materiali ac formali, dein de efficiente & finali, denique de effectibus & præfagijs agemus: Quia verò definiri materia Cometarum, sine loco generationis eorum, non potest; ideo de isto in antecessum, aliquid.

## CAPVT I.

*De loco generationis Cometarum.*

## ARTICVLVS I.

*Cometæ quidam caelestes sunt, ex minimâ  
quorundam parallaxi.*

**H**oc enim à Mathematicis, & præsertim Tychone, & Keplero, nuper sic probatum, vt pudeat non credere. Multis verò argumentis id conficiunt: sed vnum validissimum est, & sine quo fortasse alia contemni, aut eludi possint. Id verò est parallaxis, siue diuersitas aspectûs: quâ colligunt, sidus, aut quoduis aliud in aëre pendulum, eò altiùs à terræ centro eleuatum esse, quò minorem habet parallaxin. De parallaxi autem tota in Libris de Cælo, Deo dante, plenius dicemus. nunc, vt sine figurâ Mathematicâ (cuius exemplum tantisper à Tychone, aut Clauio in cap. 1. Sphæræ, sumere, si lubet, potes) Mineruâ saltē pingui, quantum ferè iam satis est, capias;

Nota, duplici viâ inueniri posse Cometæ parallaxin.

Primò, ex eodem loco terræ, considerando cometam in duplici situ, vno eleuatiore, & altero depressiori. cometa enim qui circa Meridianum v.g. alicui stellæ fixæ iunctus apparet, deurgendo cum ipsâ versùs Occasum, paullatim magis magisque ab eâ elongatur, si longè infra eam in aëre pendeat. ad eò vt linea visus, cometam transfigens, in partem Firmamenti infra stellam fixam casura sit; cui tamen circa Meridianum propinquissimus cometa apparebat. vnde cometam viciniorem horizonti, quàm stellam, iudicabis. Axioma enim perspectiuum est, *Cometam aut sidus semper à parallaxi deprimi.* Quod vt ostendant expressiùs, præter lineam loci visi (quæ à centro oculi per cometam, in octauam sphæram tendi debet) aliam loci veri imaginantur: quæ à centro terræ, iterùm per cometam, in sphæram octauam transit. si cometa citra aut vltra Meridianum fuerit, duæ istæ lineæ se interfecabunt in centro eius, modò tamen etiam cometa humilior stellis fixis sit. Angulus autem intersectionis eò obtusior & maior erit, magisque

quæ locus visus à loco vero distabit, quod cometa terræ vicinior erit.

Secundò, è duobus locis distantibus, vt v.g. Louanio & Pragâ, eodem temporis articulo, aspiciendo cometam, si enim dependeat in aëre longè infra Lunam, radij visus aspicientium, qui se in cometæ centro decussabunt, per valdè sensibilem distantiam diuancabuntur, & à se abibunt, antequam ad fixatum orbem perueniant. vnde ipsi eundem cometam sub diuersis Firmamenti partibus conspicient. Facile me intelliges, si pilam è fornice templi, paulò profundius in aëre pensilem cogites: & à duobus simul conspici ex oppositis templi angulis. pila enim ista vni aliam fornici partem tegere videbitur, quàm alteri.

Hæc facula tibi sic leuiter accensa, sublustriora quæ iam ostendam, faciet.

Dico Primò: Multi cometæ minorem quàm Luna parallaxin habent: ergo altius à terrâ eleuantur, & inter cælestes planetas curricula habent. Sequela est euidenter intelligenti patallaxin. De Antecedente est totum dubium. Sed probatur in cometis annum 1577. 1580. 1585. 1590. 1593. qui in Tychonem obseruatorem, rerum cælestium, quotquot à Ptolomæo huc vsque vixerunt, consultissimum, inciderunt. Nec Rothmannus etiam, VVilhelmi Lantgrauij Hassiæ, & insignis etiam Mathematici, Mathematicus, Mæstlinus Mathematicus Tubingensis, aliique plures, qui, omnes à se ad examen parallaxeos vocatos, reppererunt, quàm Lunam, habuisse minorem. Idem fortiter & impressè in cometâ anni 1607. & 1618. asserit Io. Keplerus, Mathematicus Cæsarius, & discipulus Tychonis. idem Clarissimi & Præstantissimi Viri Thomas Fienus, Erycius Puteanus, Cyfatus, Snellius, Piso, Rhodius, &c. tunc iudicauerunt. Pauci tamen, in veteri de Cometis tantùm ignitis opinione defixi, nihil se mouerunt; quorum aliquos videbitis articulo sequenti.

Dico Secundò: Noua sidera sine caudâ, sine barbâ, sine vllò crine, omni æuo, in cælo inter sidera etiam fixa nata sunt: quidni caudata etiam, barbata, crinita possint? Antecedens per varias historias deduci potest. Septima Pleiadum tempore Homeri, aut belli Troiani, nulla fuisse putatur, eum sex solæ, Iliad. λ. in poculo Nestoris in sculptæ fuerint. postea tamen Simonides apud Athenæum lib. 1. t. M. Varro, Plinius, & omnes passim septè effecerunt. Septima tamen iterùm iam excidit: nam Telescopium Galilæi nuper eam cernere non valuit. Verùm non existimo Pleiadum gre-

M gem

gem vñquam senis astris fuisse numerosiore. Fabula verò da septimā, nata ex errore & allucinatione oculorum. cum enim lubrici admodum & lasciui sint luminis, angustissimisque dispersantur interuallis, oculus in earum distinctionem intentus, & aciem breuissimo traiectu ab vnā in aliam versans & commutans, facile speciem alterius, in medium inter duas proximas spatium, secum defert, putatque septimam, aut quandoque etiam octauam cerne-  
re. Id ita habere, experimento cuiusque (certè tamen meo) constare potest. nam aliquando septem, & paullo post sex, & iterum septem aspicio. minora etiam quædam sidera, quæ numero 40. vicinissima Pleiadibus numerat Galilæus, aliquid fortasse adferre possunt (sed vix credo facere) ad illius septimæ speciem.

Certiora nouorum siderum exempla, inter omnia quæ celebrantur, sunt, illud quod Hipparchus suo temporeprehendit, vt lib. 2. c. 25. narrat Plinius: deinde famosum Cassiopæ anni 1572. de quo tam multa Corn. Gemma noster, & Tycho Braheus: tertio, quod anno 1604. in Sagittario fuit: quartum anno 1600. pettori Cygni enatum, etiamnum adspicimus. Hæ omnes stellæ sine parallaxi, & orbi fixarum insertæ & inoculatæ fuerunt; quandoquidem paricum ipsis passu, eodemque loco defixæ inceslerint ab Ortu in Occasum. De quibus plura admetiri, in Libros de Cælo differimus. Sed vide vt argumentum illud à parallaxi infringere, aut eludere quidam conati.

## ARTICVLVS II.

*Argumentum parallaxeos frustra elidunt Scaliger,  
Claramontius, Galilæus.*

Scaliger Exercit. 79. confitetur, cometas quosdam minorem subire parallaxin, quàm Lunam, etiamsi illi longè infra ipsam in aëre pendeant. quia cometa, ait, sequitur naturam & motum sideris, quod exhalationem attraxit, & suspensam tenet. Sed vide, quomodo Rothmannus in Cometâ anni 1585. eū tractet. *Verum enimverò, inquit, mi Scaliger, hæc tua subtilitas (quo honore aliquoties Cardani subtilitates dignari) scuticâ digna est. Homerum, optimum & ab omnibus probatum poetam, contumeliosè Graculum appellas, hic quo nomine te appellem? Sed cum contra ignorantem principia non sit disputandum, te prius Mathematicis corripiendum & erudiendum eradam, vt ab iis discas, quid parallaxis sit, & vnde. Hæc si didiceris,*  
faci-

*facilū mihi tecum contentio erit. quin tum ipse errorem tuum ad pudorem vsque agnosces, nec cometas supra Lunam, in sphaera Planetarum habere negabis.* Nimis tamen seuerè hæc & acri dente. Mirum tamen est in tanto Viro, nesciuisse, quid parallaxis. Alicubi, recorder, Erasmus nostrum, *totius naturæ ignarum* facit. certè ipse Mathematicarum (quæ tamen necessariæ Philosopho) parū gnarus fuit. Videte enim, quoties A, B, C, D, & mathema aliquod in Cardano occurrit, ab eo, vt à viuus carbonibus, abstinētem manum. Neque tamen per hæc, summi Viri magnitudinem detrectare est animus: sed Philosophos monere, quàm sine Mathematicarum rudi saltem fulcimento, facilis sit in errores inexcusabiles pro lapsus. Dialogus etiam, Problema, qui de grauium ac leuium motu, & Puerpera, quidè animâ, non significat tantam in Erasmo naturæ ignorantiam, quantam ei Scaliger offundit.

Sed ad diuerticulum, & demus (quod non ex animo tamen facio) Scaligero, astrum aliquod vi magneticâ Cometam in aëre suspensum gubernare; poterit certè, ne à recto tramite aberret, corrigere, non eripere parallaxin; vt intelligenti definitionem parallaxis liquet. Fac enim à sideribus fixis ad Lunam vnicum continuum & rigidum orbem esse, cui vniuersa omnium ælorum astra infixa sint; non ideo Luna minorem, quàm nunc, sentiet parallaxin. si enim à Meridiano cum aliquâ stellâ octauæ orbis directè superpositâ, in Occasum declinauerit, statim diduci ab eâ apparebit, & aperire parallaxin. si ergo cometa infra Lunam est, regatur, non regatur ab aliquo astro duce, quod excelsius sit quàm Luna; fieri tamen omnino nequit, vt parallaxis eius sit lunari minore: in quo deceptus est Scaliger. Verùm maius negotium facessit Scipio Claramontius, qui duobus libris Antitychonis sui, cometam anni 1577. quem Tycho tot rationibus in æthereâ regione supra Lunam firmauerat, in aërem retrahit. Parallaxin enim lunari ampliore habuisse, ostendere conatur, Tychonem quæ nunc calculum malè ponere, nunc refractionem, quæ parallaxin turbabat, non satis considerasse, & id genus alia: quibus non pauci credituri fortassis erant, nisi Keplen Hyperaspistes Claramontio maturè abrogasset fidem. Innumeros eius numeros & computus, infinitum sit, nec pro modo huius Libri, conari refellere. melius quàm equidem possim, & egregiè id egit Keplerus: quem adi, si lubet, in Hyperaspiste. Hoc solum addo: Nisi Tychonis organis & faberrimo illi Sextanti credimus, omnium fides abiicienda erit. Nemo



enim à Ptolomæi temporibus, aut fortè numquam, fuit, qui maiore curâ rem istam machinalem curauerit. Ex ære etenim solidissimo, & ingentis magnitudinis, vt omnibus etiam minutis sat ampla & iusta spatia aperiret, machinas fabricauit. In Geometriâ etiam & Astronomiâ, sui temporis facilè Princeps fuit; & eâ re à Diuo & Augustissimo Imp. Rudolpho ex Daniâ in Bohemicam Aulam aduocatus. Nec fuit etiam tam infans Tycho, vt nesciuerit refractiones attollere sidera, quæ parallaxis deprimit; vel eas in obseruationibus suis, vbi fortè parallaxin aliquid inturbarent, non attenderit. Itaque, sicuti in constituendis distantis, & ordine Planetarum, quem deinde adfirmare eclipses, parallaxis valuit; non video cur eadem etiam cometas cum Planetis componere, & de ordine eorum statuere non possit.

Vnde nec nobis contemptus Bodini satisfacit, quæ hac solùm ratione ætherios cometas abiicit, quia doctrina parallaxium incerta est, inquit, nec vlla earum differentia reperitur supra Venerem. Non enim tam incerta & fallax est, modò à viris eruditis, & concinnis organis administrata fuerit. Nec verum etiam illud, quod de Venere adiicit. In Sole namque & Marte manifestum est discerniculum parallaxis.

Sed istos dimittamus. Guiduccius ex Magistri sui Galilæi sententiâ aliter eludere hoc argumentum parallaxeos nititur: sed nititur tantùm, non facit. Vt parelij, halones, aut irides, inquit, sub cælo sunt & ferè apud nos; tamen nullam in iis obseruamus parallaxin: quidni idem esse poterit in cometis sublunaribus? Aliquid & multum diceret, si cometæ (quemadmodum halones) lumen Solis essent, per totam nubem vel ætherem sparsum, quod aliud aliudque in distinctis partibus nubis, è dissitis terræ locis appareret. nam quòd halo parallaxin non videatur pati, sed semper eodem ambitu sidus medium coronare, siue sidus altum, siue depressum sit, caussa est, quia non vnus idemque halo est, qui à Meridiano, cum sidere versus occasum descendit; aliàs, si idem perpetuò foret, iuxta horizontem occiduum maximâ parallaxi sidus non iam ampliùs in eius centro, sed supra ipsum totum, aut longè vicinius segmento superiori appareret. Cometa verò non est talis *ἑμφασις*, seu meteorum apparens; sed *ὑποφανὴς*, & corpus lucidum, quod sine comite sidere idem transfertur de loco in locum. cum motus ei sæpè sit à Meridie in Septentrionem, aut retro; quòd sidus cæleste nullum, motum dirigit.

Eodem



Eodem modo se expedit, & aberrat (vt iam recorder) Eruditiss. P. Dominicus Bañes 1. par. quæst. 66. art. 2. in difficultate nouæ stellæ Cassiopæ: quam in aëre sublunari (ne cælos fateretur corruptibiles) pependisse, nec parallaxin, vt in halone, notari valuisse, satis diffusè, propositâ etiam imagine, docet.

## ARTICVLVS III.

*Cometa quidam caelestes etiam esse colliguntur, ex motu proprio sub eodem circulo maximo.*

**I**Ta colligit Tycho, aliiq̃ue post eum. Quis enim existimet flammæ cometam aëri supremo, vt infimo solent ignes fatui, innatantem, tam composito proprio motu incedere, vt vix latum, vt sic dicam, vnguem abeat à tramite circuli maximi, totum cæli fornicem in duas partes æquales diuidente? Tot namque habitus ingiter summam aëris regionem incurrentes, vix potest, vt nō frequenter vibrent, & fluctu etiam aliquo isænt, cometasq̃ue aërios circulo incepto depellant. Sed accurrit Claramontius. & primò negat motum proprium cometarum per circulum maximum circuire. Verùm facillè repellitur, si sidera fixa obseruentur, sub quibus cometa anni 1618. per Libram, Booten, & Vrsam erepta-uit in circulum Arcticum. semita enim illa, vt hîc Louanij tunc notauimus, vix, nisi paullulùm fortè in fine, exerrauit à segmento circuli maioris. Idem Lincij in Austria Keplerus, Ingolstadij in Bauaria obseruauit Cysatus. & cùm etiam sub eadem astra singulo quoque die direxisse cursum, ab vniuersis tantâ locorum interceptædine diffisis, visus sit, non potuit, nisi exiguam admodum, subiisse parallaxin. Similem in circulo maximo, contra raptum primi mobilis, reciprocactionem habuit anni 1577, cometes. singulorum enim dierum segmenta, protracta eandem, per mediam cæli curuaturam, ad eclipticam habuerunt inclinationem, vt olim ostendit Tycho: reclamante tamen postea Claramontio; sed compressit eum Keplerus. Secundò tamen, ne nimis sit pertinax, dat Claramontius, motum iuisse sub circulo maiori; nec propterea tamen cometam inter Planetas in æthere fuisse. & rationem affert, quæ plurimum ingenij habet, sed parum veritatis. Omne graue, aut leue, inquit, circulariter motum, necessariò per circulum maximum mouetur: quia graue directè semper adspicit & nititur in cætrum, leue directè surrigit se à centro in mediam sphæræ curuaturam.

ram. Ita enim verba eius, pauca & perplexa, explico. Itaque cometa in summo aëre pendulus, aliquantulâ, quam adhuc retinet, gravitate, terram lineâ despicit, quæ rectâ tendit in centrum. vnde si circulariter impellatur, in circulum maiorem ibit, qui totum terræ globum, & (quod inde consecutarium est) cælum ipsum videatur secare in duo hemisphæria. Sed quàm id non sit necesse, ex omnibus cometis patet, qui raptu primi mobilis, nunc Æquinoctialem, id est, circulum maximum, nunc parallelos ad alterum Tropicorum declinantes, id est, circulos minores, describunt. quæ autem ratio est, cur gravitas potius motum eorum proprium per circulum maximum dirigat, quàm motum raptûs, ab aëre (vt patet) cui inequitat, communicatum? quando cometa anni 1618. à Tropico Capricorni ad Æquatorem motu proprio venit, cur ibi non adhæsit, circulumque illum eundem maximum identidem repetiit, non interfecando eum, & pedem vltra promouendo versus Cancrum, vsque ad ipsum etiam Arcticum polum? Sic enim Io. Baptista Benedictus Epist. ad Andr. Prouanam docet, nauim in mari versus Æquatorem semper declinare, & remotis terræ impedimentis eò delapsuram, perpetuoque ibi circumituram globum. quamquam nondum intelligam quomodo id futurum sit, etiam si terra tota obruta sit aquis, & aquæ elementum raptum primi mobilis sequeretur ab Ortum ad Occasum. Quæ enim causa mouens, nauem ad Æquinoctialem & mediam illam globi aquei curuaturam adduceret? Aqua enim à Tropico Cancri v.g. eò, naturali gravitatis impetu, non deflueret, cum nulla ibi lacuna, neque aqua centro, quàm sub Tropico, vicinior futura sit. Itaque vnda nauem sub Tropicum circumducat, neque inde, nisi vento aut aliâ vi expulsa, discedet. Sed *impetus naturalis corporum motorum, semper in superficiebus circulorum maiorum sunt*, ait Benedictus. Sit ita sanè. verum motus ille navis sub Tropico ab aquâ vehente, naturalis non est. non enim est descensus quidam; cum toto tempore periodi retineat parem distantiam à gravitatis centro. Fateor alias, motus naturales grauium & leuium, fieri per circuli maioris diametrum, si recti sint, (lapis enim directè in centrum cadens, ab vno puncto cæli recedit, tenditque in aliud directè oppositum) si verò ab impedimentis obliquitatem aliquam contrahant (vt cum lapis per recti planitiem, vel æquabilem montis deuexitatem probabitur) diriguntur necessariò sub eiusdem maioris circuli circumferentiam. Sit enim mons, qui à Septentrione deuerget in Meridiem,

diem, graue è vertice eius demissum, sub Meridiano (qui circulus maior est) decurret, eiq̃ue motu suo subtendet veluti figuræ oualis segmentum. Ratio est, quia nititur, quàm rectissimè potest, ad centrum.

Sed hæc neque Benedictum, neque Claramontium vel hilum iuuant; nisi ille ostendat Oceanum sub Æquatore esse depressiorem (quod quidam tamen affirmant, quia plures ibi vapores Sol feruidus & torrens attrahit) quàm sub Tropicis; hic verò, aërem supremæ regionis, in quo natat cometa, vel ipsum cometam densiorem grauioremq̃ue esse aëre ad quem motu proprio fluit, aut leuiorem: sed tunc motus proprius non erit circularis (qualem tamen Claramontius statuit) verùm rectus sursum aut deorsum, vel traiectorius & transuersalis. Itaque sicuti motu raptus, cometa sub polo Arctico breuem circellum circa axem Mundi, cum eodem semper ad centrum terræ respectu, circumcurrere potest; ita quantum est ex parte grauitatis aut leuitatis eius, nil vetat quin motu proprio ab Occasu v.g. ad Ortum eundem circulum conficere valeat. Finis igitur, & statuo probabiliter, Cometas illos tam composito nec fluctuanti sub eodem circulo maximo, motu proprio labentes, in regione ætheriâ, non tam turbidâ & vacillante quàm est ista sublunaris, circumagi: aut si ibi etiam exhalationes sunt, quæ ætherem quandoque fluctuant, non potest ex tanto interuallo error, quo cometa à circulo maximo excidit, notari.

Aduerte etiam, si cometæ proprius motus (vt plerique hætenus existimauerunt) apparens tantum sit, & instar stellæ discurrentis, parte scilicet vnâ exhalationis alteram inuitante, & rapiente eius flammam; vix probabili colore defendi posse, motum istum leges circuli maioris obseruare. nam exhalatio & nouus cometa inflammandus à veteri, non solum antè, sub eodem circulo maiori disponi, sed etiam ad latus vtrimque, & vndique potest materia illa circumfundi. Igitur verum potius in cometâ, etiam sublunari, motum agnoscere oportet. A quâ verò causâ fiat, & an circularis sit, infra dispungemus. Si autem ab Intelligentiâ aliquâ esse (& huc etiam satis inclinat Tycho) quis affirmet, facile sic per circulum maximum ibit; sed versari eum in elementari regione, statim parallaxis proder. Vides ergo, parallaxin vnicum pænè fulcrum esse, quod Tychonis & recentiorum de cometis cælestibus opinio nem sustentat. Nam etiam sine vllâ Intelligentiâ Cometæ elementaris motrice, defendi posse eius apparentem sub circulo maximo

ximo progressionem (modò traiectoria, non circularis sit) postea ostendemus.

Quid ergo hoc toto Articuli circuitu effecimus? Hoc. Si motus Cometarum proprius, circularis est, quod Claramontius, cum Tycho, & aliis statuit, non iturū sub eodē circulo maximo, si in Elemēto aëris turbido & vacillāte pendet, nisi Angelus eum ducat & gubernet. Si verò motus ille transversalis sursum est, & traiectorius, magis tamen etiam obnoxius turbationi erit, proniusque à circulo maximo deerrare apparebit, si in aëre, quàm si in æthere sit.

#### ARTICVLVS IV.

*Ex ortu & occasu cometarum colligi, quosdam saltem supremam aëris regionem longè excedere.*

**L**ibro primo, ex Vitell. & aliis, altissimos terræ halitus, qui videri à nobis possunt, 52000. passuum, id est, 13. ferè mill. Germanica, non excedere diximus. Verū statuāmus, inquit doctissimus Cysatus lib. de Cometā anni 1618. cap. 3. ad 20. milliaria Germanica illam altitudinem extendi, & cometam elementarem tantā intercapedine à nobis abesse. fac deinde oriri: totum arcum visibilem, quem supra horizontem nostrum describit, duarum horarum spatio percurrat, nec eum amplius illo die videbimus. quod de cometā anni 1618. & plerisque aliis ridiculum & contra sensum communem est: cū pluribus longè horis conspicui fuerint instar legitimorum siderum, & adhuc sine occasu ex oculis evanuerint, suppressi abundiori luce orientis Solis. Tam breui autem tempore occisurum, ostenditur ex eo quòd vix ad 6. milliaria Belgica visus noster in superficie terræ se extendat. & licet nubes, & supremam aëris regionem, finemque altissimarum terræ exhalationum, aliquantum ultra illam distantiam cernere valeamus; arcus tamen nobis conspicuus circuli, distantia 20. milliarium Germanicorum à terrā, descripti, tantus nō est, quin duabus solū horis percurri potuerit. nam 24. graduum & 28. minut. est. vnde vnā horā & 48. minutis absoluetur; quandoquidem integrum circuitum 360. graduum tempore 24. horarum exambiat. Itaque duabus & viginti amplius horis, ex illis 24. reliquis, conditus infra horizontem visibilem, abditos circuli sui arcus decurret: transvolabitque per apertam nobis cæli faciem, ut nubes propulsæ ventorum flabris solent, vnius alteriusve horæ spatio. Quòd autem astra  
inter

Inter ortum occasumque tam diu supra horizontem & in oculis nostris iter agant, causa est penes ingentem eorum à terrâ distantiam. quò enim longiori intervallo circuli circa tertiam describuntur, eò maiores arcus visibiles nobis ostendunt. Deinde linea etiam, vt vocant, visualis, ab oculo emicans, à puncto terræ longissimè distito quem videmus, infra istam terræ curvaturam perpetuò descendit, quia origo eius (id est, noster oculus) eleuata est supra terræ superficiem, altiorque est puncto illo remotissimo quem restringit. Et hinc quò longius versus Mundi circumferentiam educitur, eò prolixius infra horizontem, quem in terrâ nobis circumscribimus, decurrit.

Vnde quia multi cometæ parem cum astris supra horizontem moram non traxerunt, probantur etiam non inferiorem habuisse altitudinem.

Hinc etiam patet, quàm merito posteriores Astronomi, vt Regiomontanus, Vogelinus, & alij, qui cum Aristotele nostro omnes cometas sublunares existimabant, tot tamen eos milliaribus à terrâ remouerint. Nam Regiomontanus cometam anni 1475. nouem terræ semidiametris, siue, eius computatione, 8200. milliaribus Ger. Vogelinus cometam anni 1532. millibus passuum 4686. Germanicis verò milliaribus (quorû singulum quodq; 4000. passuum habet) 1171. attollit. hæc autem excelsitas omnes halitus illos solemnes & crepusculorum lampades longè infra se relinquit.

## ARTICVLVS V.

*An Aristoteles Cometas caelestes, & nouitia in calo  
astra, quandoque gigni existimauerit.*

**I**Ta putat Eruditiss. Licetus lib. 5. de Nouis astris cap. 41. ex lib. 2. de Cælo cap. 7. vbi Philosophus ait, *stellas esse ex eo corpore, in quo lationem habent.* ergo fiunt quandoque nouæ ex materiâ ætheris, vel orbium in quibus mouentur. Nam stellæ illæ veteres, coaræ sunt suis orbibus, non factæ ex aliquâ eorum parte. Secundò, & clariùs, c. 8. *Astra esse spherica, consentaneum est mihi*, inquit, *generanti ea ex tali corpore*, id est, cælesti. Vides ergo, ait Licetus, astra quædam generabilia esse: non autem æterna illa, sed alia ex materiâ cæli subinde concinnata. Vellem hæc esse vera, & Aristotelem trahi posse in consensum. sed vereor, frustra tentari. Quis enim non videat, hæc ingeniosè quidem, sed anxie conquisita ad

illinendum ori Philosophi hunc colorem? Sine dubio enim loquitur de omnibus astris, etiam illis antiquissimis, quæ semper in cælo suspicimus. hæc autem constare dicit materiâ suorum orbium, quorum sunt partes, sequæ *ea generare*, id est, genita docere, ex corpore, siue materiâ, cælesti. non tamen sic ut pars aliqua cæli rarior densata fuerit in astrum: sed astra cum ceteris orbium partibus genita sunt ab æterno (Aristotelis, & falsâ, mente) actione educuâ, ut loquimur, quam sæpè generationem vocamus, licet per eam nulla materia præexistens, à priuatione ad formam transiret: quod accidit, quando materia nullo reali momento temporis formam suam antecedit. Hæc ergo loca non sufficiunt ad infuscanda clarissima testimonia Aristotelis, ubi toties cælum clamat quintam essentiam, ingenerabilem & incorruptibilem esse: probatque, quia tot iam annorum circuitibus, nulla generatio, nulla corruptio, nulla accretio, nulla detractio animaduersa in sideribus.

Nec alia loca quæ Licetus affert pro cometis cælestibus, premerunt acrius.

Primò, Lib. 1. Meteor. cap. 1. affirmat cometas oriri in loco latiori siderum maximè vicino: igitur non in supremâ æris regione, inter quam & cælum interiecta est ingens profunditas Elementi ignis, inquit Licetus.

Sed id palam à mente Philosophi abit. Cometis enim galaxiam, & *ἡνωμένηα φάσμα*, ignitas imagines iungit, quas pariter in eodem loco sideribus maximè propinquo nasci dicit. nec tamen eas, sine dubio, supra totum æris Elementum extollit. Itaque summum æris fastigium, ad motum proximè sideribus dixit, aut quia nondum; determinauerat, an aliquod ignis Elementum interiectum esset, ut putat Vicomercatus; aut quia inter regiones meteorum feraces, illa est maximè contermina sideribus; aut denique, quia nullum aliud sub orbe Lunæ, Elementum ignis credidit, quàm aërem fumosis & ardentibus telluris expirationibus scaudentem, ut Lib. 2. docuimus.

Secundò, Lib. 1. Meteor. cap. 7. *Quando, inquit, in inferiori loco principium consistentie fueris, per se apparet Cometes: quando autem sub astrorum aliquo errante vel inerrante constiteris exhalatio, tunc cometes fit horum aliquod.* Vbi duplicem cometam videtur distinguere, vnum solitarium, procul à sideribus, in regione elementari infra Lunam; alterum supra Lunam, immediatè circa aliquod sidus, quod exhalatio crinit. Sed hoc intemperamentum euertitur  
proxi-



proximè sequentibus. *Non enim, inquit, apud ipsa astra coma fit: sed quemadmodum area circa Solem & Lunam, &c.* Sicuti ergo area, siue halo, non in cælo, sed in nubibus velaëre est; ita coma illa & crines, qui astris fixis, aut errantibus quandoque sparguntur. Discriminat tamen hanc comam ab areâ: quòd hæc per ἀνάλασιν, siue reflexionem, à nube aliquantum distante, ceu speculo; coma verò non sit lux astri visa reflexè in nube, sed color ipsius vaporis aut exhalationis mixtim cum radio sideris quem incorporat & bibit. Cùm autem Aristoteles ait: *Tunc cometes fit horum* (siderum fixorum aut errantium) *aliquod: significat ipsum astrum induere cometæ similitudinem, quia à suppositâ, in aëre longè inferiori, exhalatione videtur criniri.* Sed quid ergo postea addit? *Quando iuxta stellam facta fuerit talis concretio, eadem latrone necesse est apparere moueri cometem, quâ stellam, cùm autem per se seorsim constiterit, tunc videtur relinqui.* talis enim est latro Mundi circa terram. Putat Doctiss. Licetus clarissimè indicari genus vnum cometarum iuxta & inter sidera in ipso cælo, quod careat parrallaxi, idèoque pari passu videatur incedere cum vicino astro; alterum verò, quod in aëre profundissimè infra cælum versetur, relinquaturque motu siderum, & latam ac euidentem patiatur parallaxin. Vicomercatus autem, & alij plures hanc formant sententiam: Cometa, cùm *iuxta sidus*, id est, altissimè à terrâ eleuatus, & intra ipsam ignis sphaeram, videtur motum sideris assequi, propter celestem Elementi ignis conuersionem: cùm autem *per se*, id est, longè à cælo & sideribus, in aëre scilicet, statim supra nubes constiterit, tunc ab astris ocyùs prælatis relinquitur; quia aër in quo fluctuat, pigre cæli raptum consecratur. Et fauent profectò quæ deinde subiiciuntur: *Talis enim est latro Mundi circa terram.* id est, latro Mundi ignei & ærei, est velocior in altissimâ sui parte, quæ est ignis.

Verùm omnes isti interpretes videntur mihi extra oleas abire. Agit enim disertè Aristoteles de distinctione cometarum qui vera quidem sidera, sed comantia aliquo halitu sublunari, ab iis qui per se seorsim à sideribus proprio igne ardent. quàm enim violentum est, *ὅταν δὲ οὐρανὸν καὶ αὐτὸν, quando concreuerit per se*, interpretari, *quando procul à cælo?* planus autem & verissimus sensus est, *quando separatim ab astro concreuerit.* de astro namque aliquo singulari, non de toto cælo, loquitur. Itaque hæc mens Philosophi, quando coma ex radiis in vapore vel exhalatione subiectâ, circa verum sidus apparuerit (quo modo Aristoteles olim coxam Canis, nos



anno 1618. Venerem, & nuper anno 1624. Arciturum comantem  
 apeximus) non videtur deferi, nec pati parallaxin; non quia sit in  
 cælo, & circumliget proximè rotunditatem ipsius fideris, sed quia  
 cum ipso, vt halo (cuius etiam similitudinem adducit) solet, æquo  
 passu incedit, aut potius sic apparet, & reuerà tamen non facit. velu-  
 ti enim non idem est halo, sed alius aliusque perpetuà serie in di-  
 uersis vaporis superficiebus depingitur; ita non vna coma cum si-  
 dere circumambulat, sed diuersi halitus oculum & sidus interfusi,  
 diuersam rapiunt. quando verò crines illi, radij siderum in vapore  
 aut exhalatione tumentes, non sunt, sed ignea lampas seorsim ab  
 omnibus fideribus, in summo aëre supra nubes visitur, relinquitur  
 ab alstris, & manifestam subit parallaxin: quia *salis est latio Mundi  
 circa terram*, vt superiora rapidius ferantur, præteritque videantur  
 iis quæ oculo propinquiora. quod tamen, si fatendum est non vbi-  
 que habet veritatem. Nam cometa aërius cum sidere aliquo ex-  
 oriens, infra ipsum (quia parallaxis deprimet) apparebit, paulatim-  
 que ascensu ad Meridianum se illi propius admouebit: in de-  
 scensu verò ad Occasum, etiam præuertet, quia iterum, parallaxi se  
 diducente, locus visus infra verum manifestè cadet. Quid ergo?  
 An Aristoteles hic parum Opticus? nolim fateri. est enim, vbi et-  
 iam cometa inferior à sidere relinqui appareat. vt si ante occasum  
 prius, & deinde post exortum, vtrumque aspicias. sic enim cometa  
 primò occidentalior, & ante sidus, qui postea tamen, quasi prælato  
 sidere, in vtriusque ortu, retrò & orientaliore erit. Ratio est, quia &  
 in ortu & in occasu, parallaxis cometam oculo propinquiore,  
 deiciat, & horizonti magis admouet. Itaque verius longè, Aristote-  
 lem cometas aut nouitias stellas, excelsiores Lunari orbe num-  
 quam agnouisse. Incredibile enim est aliàs tam parcè de iis locu-  
 tum, & vnico solùm ac obscuro verbulo obiter tetigisse. Deinde  
 sidera, & cælum totum ex duro concretum (quidquid Eruditiss.  
 Licetus contrà responsitet) ac τὰ ἀστέρα ἐκιδιδμένα τῆς κίνητος  
 σφίρας, *astra in fixa orbibus ferri*, lib. 2. de Cælo c. 8. non per liquentes  
 aliquos ætheris campos, affirmat. quod tamen fieri, penè neces-  
 sarium est, si cometas & noua sidera in cælum attollimus.

## ARTICVLVS VI.

*Cometas aliquos, sublunares esse.*

**H**Oc enim saltem reddamus Aristoteli nostro, qui vniuersos  
omnes docuit sub Luna nasci. sed nondum nouum in celo si-  
dus

dus Hipparchus, nondum cometam supra Iouem Proclus, nondum supra Venerem Albumazar, nondum Tycho, Rothmannus, aliiq̃ue, hoc & elapso sæculo, p̃enè infiniti, variis partim cæli regionibus, viderant; nondum altitudines eorum ad exactas parallaxis leges vocatz, aut satis examinatz erant.

Nolim tamen pertinaciam Tychonis, qui nullum, nisi cælestem, cometam ṽmquam fuisse pertendit, sectari, ne que tot eruditissimis viris, Aristoteli, Ptolomæo, Regiomontano, Vogelino, aliisq̃, sine fine, glaucomam obicere. quamquam de cometâ illo anni 1475. Regiomontanum allucinatum contendat Tycho, & mendosâ demonstratione 6. gradus parallaxeos collegisse. & certè sic factum vehementer addubito. *In motu enim eius proprio quidam fuit diuinum, Geometricum, ætherium & cælesti corpori consentaneum, supraq̃ sortem penitus elementarem.* vt ait lib. 1. c. 8. Cosmocr. nolter Gemma.

Alij tamen cometæ quidam per varia tempora & historias sparsi, videntur fuisse elementares. vt ille inprimis, qui, teste Aristotele, sub Aristxi imperio, satus quosdam fecit, & tertiam cæli partem occupauit, propeq̃ue Orionis Zonam est dissolutus. Audi etiam lib. 54. Dioneum, de cometâ Agrippæ, generi Augusti, mortis prænuntio. *Cometa*, inquit, *cùm multos dies Vrbi imminens apparuisset, in faces abiit.* & Senecam, de eo qui Attalo regnante, initio apparuit modicus, deinde sustulit se, diffuditq̃ue, & vsque in Aequinoctialem circulum venit; ita vt illam plagam cæli, cui Latæa nomen est, in immensum extensus aquaret. Quidam etiam, vt narrat Sozomenus, olim supra Constantinopolim, ad terram vsque pependit. & Plin. lib. 2. cap. 35. Licinium Syllanum cum suo comitatu vidisse, scintillam cælo cadentem creuisse paulatim in Lunæ amplitudinem; id cælum deinde iterum receptam, factamq̃ue Lampadem, id est, vt planè apparet, cometam Lampadiam. Iouianus Pontanus, de alio à se viso circa Booten:

*Nam memini quondam Icario de sidere lapsum,  
Squalentem præferre comam, ardorq̃ meatu  
Flectere sub gelidum Boreæ penetrabilis orbem.  
Hinc rursus præferre caput, cursuq̃, secundo  
Vertere in occasum, ac laxis insistere habenis,  
Donec Agenorei sensis fera cornua Tauri.*

Hic igitur initio, comâ præeunte in Boream ibat, deinde in occasum iter, sequente crine, conuertit, iuxtaq̃ue Taurum contabit.

cur autem hunc aliosque existimem elementarios, statim edicam. Quid plura? anno 1470. cometa, quasi nubes, longissimis capillis, totum Zodiacum Idib. Ian. decurrit, ait lib. 2. Theat. Bodinus. & paullo antè, anno 1450. alius romphææ similis, plenum & tumentem Lunæ orbem subiens infuscavit. Cometæ etiam anni 1543. cauda euolauit, & riuum, in quem delapsa, exhaustit, vt narrat Sennertus. & Scaliger Exercit. 79. affirmat cometam sui temporis visum delabi. & Claudianus:

De rapto.

*Præceps sanguineo delabitur igne Cometes  
Prodigiale rubens.*

E simili cometâ deciduo, natam Phaëthontis fabulâ putat Vico-mercatius. quamquam ad Sodomæ & Gomorrhæ incendium referat Tertullianus.

Lib. 2.  
Apum  
c. 3. nu. 9.

E cometarum denique sublunarium materiâ, formata videtur crux illa, olim à Thomâ Cantipratano conspecta. Ego, inquit, *fideli-um nouissimus, antequam piissimus Ludovicus Francorum Rex, anno ab Incarnat. 1246. crucem transmarinam susceperet, crucem in calo ex clarissimo & sidereo lumine vidi. nec recolo me decentius & operosius formatam crucem vquam sub aliquâ materiâ vel figurâ vidisse. octonos habere cubitos in longitudine mihi planissimè visum est. serenum calumerat valdè, & sine aliquâ nube.*

Sed cur omnes illos cometas, elementares decernimus? Respondeo: Partim, quia motu turbido & incondito, partim subito incendio, & latissimâ diffusionem, aut lapsu etiam in terram, vel of-fuscatione Lunæ satis naturam igneam, aut aliter elementarem ostendunt. atque ita nobiscum Keplerus (qui hic à Tychone Magistro, in parte abiit) Mœstlinus, Thaddæus, Rothmannus, Liceret, alijque sentiunt.

Signum etiam ferè manifestarium Cometæ sublunaris est, eius immobilitas. Si enim summus æther, ab Ortu in Oceanum czlo obsecundat, aut in sequelam inuitus trahitur (vt non pauci rentur) necesse est inter nubes, aut proximè eas, cometam illum defixum esse, qui tam est pertinax, vt nullo sollicitetur motu. Talis fortasse Xiphias siue Gladius ille, quem tam diu, ante excidium, Hierosolymis inhæsisse narrat Iosephus. Et profectò, si in summâ ætæ regione, aut etiam infra, capras saltare, stellas discurrere, faces aut dracones volare facimus, cur non etiam igneos cometas, quos sola incendij pertinacia, aut figuræ discerniculum ab illis diuidit, damus? cur non deinde fieri potest, vt exhalatio à Sole, aut alio astro per-

perfusa, cinem sine incendio ducat, aut spargat comam?

Itaque, si me audietis, hoc statuam: In toto inter nubes & primum cæli fornicem interuallo, coiri posse cometas. nulla verò celi cameratio citra fixarum orbem occurrit, ut bellis validisque argumentis impressè mihi Vir Magnus, Thomas Fienus, in Cometâ anni 1618. adseruit. Vnde nulla eccentricorum soliditas & durities obstrigillare & officere valet cometarum, per Planetarum curricula, traiectionibus. Cometa igitur aliquis circa nubes, & in vicino stat: alius sublimior est, & in spacia etiam elementi ignis (id est, aëris, à cæli vicinâ, & adustis terræ halitibus, æstuantis) ut ille anni 1475. quem celebrauit Regiomontanus, se penetrat. tertius Lunâ excelsior, circa Mercurium aut Venerem expirat. est, qui ad Solem, Martem, Iouem, aut etiam Saturnum, & culmen ætheris adspirat. qui Lunam & nos interiecti (quia in loco proprio elementorum) elementares, qui lunarem orbitam & fixas intercurrunt, ætherios, aut cælestes nuncupamus. Inter Mercurium & Venerem, Cometam anni 844. Albumazar, inter Venerem & Martem (systema enim Tychonicum iam placet, quod Venere Solem includit, & illam proximè infra Martem locat) Cometam anni 1577. Tycho, & nostrum anni 1618. Cysatus, inter Martem & Iouem, Cometam anni 1580. iterum Tycho, & Mœstlinus, inter Iouem & Saturnum, Cometam anni 1585. Rothmannus immitit. In fine enim, inquit, omnem imaginem parallaxis amisit, quam aliàs, etiam dimidij minuti, emendatissimo Sextante facileprehendisset.

## C A P V T II.

### *De materiâ Cometarum.*

#### A R T I C V L V S I.

*Materiam sublunarium Cometarum esse terræ & aquæ halitus.*

**Q**UÆ enim promptior & probabilior afferri potest, quàm ea, quæ ceterorum ignitorum, & tot alias in sublimi pendantium imagines subit? Sed discrimen aliquod interiiciendum est. Nam Cometæ sublunares, alij criniunt sidus, alij seorsim liberi palantur, aut stant eodem loco defixi. Priorum materia, est, sine dubio, exhalatio

rio aut vapor, in quo sideris radius se multiplicat, & in comam trahit & confundit. Verum eiusmodi Cometæ non toti, sed comaduntaxat, sublunaris est: melior enim pars, sidus nempe ipsum cincinnatum, est in cælo; posterius etiam materia, saltem transiens, est exhalatio ignibus idonea, si cometa vero igne ardeat: si autem non ardet, sed nodus quidam illustris, & radiorum trices sunt, iterum halitum pensilem pro materia subiectâ habent. Eruuditiss. Licetus partem etiam Elementi ignis censet quandoque densari in Cometam: & hanc esse causam, cur autumno frequentissimi Cometæ, quia tunc exhalationibus Elementum istud incrementa rapit, seque densat potius, quam deorsum, depresso aëre, protuberet. Sed vix assentior, tantâ densitate cogi à seignem, ne descendat, cum raritatem tantopere amet, videamusque pulueris flammam undique in orbem, & deorsum etiam, ac cum descensu ignis, rarefcere. Deinde sic omnibus præne autumnis, nec solum particulam vnâ (vt sic dicam) ignis, sed quantum inter Tropicum Cancris & circulum Arcticum est, oporteret in Cometam conrescere. Scaliger verò Exercit. 79. negat vllum Cometam igne constare, sed omnium materiam, halitum crudum esse, & à Sole tantum, an alio sidere, perfundi. Causam dat Bodinus lib. 2. Theat. quia nullæ siluæ satis esse possunt diu alendo tanto corpori. Verum, si exhalationes instar Troiæ & ciuitatis ardentis, non raro in nubibus visuntur (qualia prodigia, initio Belgicorum tumultuum, sæpè à se conspecta narrat in Colimocritice noster Gemma) nescio cur ita metuat, ne pabulum Cometam deficiat, Bodinus. Talia enim incendia Troiana, parçè & malignè dispensata, diu sustentare Cometam, præsertim non altè eleuatam nec amplum, valent. Cogita etiam, multum vaporis admixtum oleo exhalationis, quam tenuiter è venis sorbet, & allambit ignis, nec quidquid in Cometâ cernis, flammam esse, sed vaporem, & partem exhalationis adhuc crudam & incendi contumacem, igneâ solum luce inclusæ flammulæ colorari, & desines fortasse alimentorum sumptus vereri. Deinde, sicuti cum flammâ facis per caliginem noctis visâ, multum luminis simul in aerem vicinum protuberantis, radiosque ignem coronantes cernis: ita non solum Cometæ lampadem, sed circumfusum vnâ lumen vides, tumidioremque coniectas, quàm reuerà sit.

Si verò omnes Cometæ sublunares lucent tantum, terebrati radio solari, nulli ardent, vt Scaliger credit, extinguerentur illapsi in  
vmbra

umbram terræ, vt in nocturnis nubibus vſu venit. oportet igitur aut vltra umbræ conum, in altiffimo æthere eſſe, aut ad latus, aut in umbrâ, propriâ igneâ an aliâ lucē, fulgere. Licetus etiam lib. 4. cap. 23. contendit Cometas quandoque eclipſin pati: quia erubefcunt, vt Luna in eclipſi. item à Venere & Mercurio, qui ſemper circa Solem, ſic totâ nocte illuſtrari poſſunt, vt deliquium & Solis abſentiam non ſentiant. Sed hæc vnâ operâ nubes totâ nocte illuſtres nobis efficerent. Itaque Cometarum rubor, à materiæ opacitate, non eclipſi, eſt: vnde non ſoli rubent, qui ex aduerſo Solis, in umbrâ terræ conſiſtunt. Venus etiam & Mercurius non in eo ſemper aſpectu ſunt, vt videre, & luculâ aliquâ aſpergere Cometam à terrâ inumbratum poſſint. Verſum deinde Homeri producit Licetus: ſed non amplius affirmat, quàm Cometam nunc nubibus condi, nunc rurfum emergere, nihil de eclipſi. Sed quis tamen nobis ſatis edicet, an Cometæ elementares quidam in umbrâ terræ numquam paſſi deliquium? Nemo, credo, poterit, in tanto hæcenus ſcientiæ huius & obſervationis neglectu. Et profeſſo, cum ratio affirmet, aliquos, ſine materiæ conflagratione, rapere poſſe radium Solis, etiam tales haud dubiè obtenebreſcent & exſtinguentur, ſi in umbram impegerint, venerintque in oppoſitionem Solis.

Si qui verò id non patiantur, aut ſupra umbræ conum & cæleſtes ſunt, aut, ſi infra, lucent propriis ignibus.

Verùm, qui poteſt, inſeclant, vt exhalatio tanta ex terrâ aquæve reſoluatur, quæ ex tam immani à nobis intervallo cernatur, & in conſinia etiam Lunaris orbitæ ſubeat, quæ Copernici calculo à terrâ abeſt 51. terræ ſemidiametris? Hæc aliquando aëris profunditas, fateor, deſpecta turbationem mihi fecit, vt negare halitus è terrâ in vicina Lunæ poſſe ſcandere. Sed reputanti poſtea, quàm blenni ergo & ſtupidi illi Veteres, Plinius etiam, Seneca, & alij, qui ſidera vaporibus tam certò putauerunt paſſi, ſi vſque eò nullâ ratione pertinere valuerint, quàm exiguus deinde titio, amplum exhalet fumum, & puluiſculi tormentarij granum in flammam intumeſcat 125000. ſe maiorem; ſubiit altiùs in hanc rem me demittere, & introſpicere, ſi qua via reliqua eſſet, reducendi Ariſtotelem in aliquam ſaltem huius ſcenæ partem, toties iam à recentioribus exploſum.

Demus itaque, Ariſtotelem Cometarum cæleſtium numquam veniſſe in mentem: hoc tamen etiam ei reddamus, ſublunares fu-

mosis terræ halitibus aliquando concrefcere, siue ardeant, siue splendeant tantum, perfusi ab astris, & præsertim Sole, in toto spatio quod hinc expanditur ad Lunam. Exhalationem, inquires iterum, ad tot terræ semidiametros ascendere? Ita dico. & cogita, quæso, mecum, quàm multæ quotidie nubes, sine sensibili aquarum dispendio, in altum vaporentur, quàm longi & continui ventorum flatus, sine terræ detrimento. Profectò, si nubium ille circulus Orbem terræ vndique præcingens, extollatur in Lunæ altitudinem, speciem explicabit lunari longè ampliorem; cùm terra nubibus tamen illis inclusa toties sit Lunâ maior. Adde, iam non opus esse tot fumis, ut imaginem crinitæ stellæ tam angustis ambitibus expriment: cùm præsertim exhalationes in immensum ferè rarefcere & discingi oporteat, ut tam altè subeant. nisi enim toto aëre sublunari rariores & leuiiores sint, nunquam ascensu eum transmitterent. Et hinc existimo, nubem circumferentiæ oppidi Louanienfis parem, in tantam raritatem posse diffuere, ut adæquet amplitudine totam Brabantiam, imò Belgium. imò (quid dico?) si vera est Peripateticorum textura continui ex infinitis, potest sine termino & sine in maius diffundi. Audi D. August. lib. 2. cap. 4. de Genesi præbentem, supra cælos sidercos, quos fluxos & liquentes putauit, suspendi posse aqueum vaporem. *Super illud cælum, inquit, potest minoribus guttis lenior halitus humoris extendi, qui pondere cadere non cogatur. ipsi quippe (Philosophi) subtilissimâ ratione persuadent, nullum esse quamlibet exiguum corpusculum, in quo diuisio finiatur, sed infinitè omnia diuidi.*

Sed ascendant sanè ad Lunam terreni halitus, minimè pertinax aliquis dicet, nemo tamen tam Argus, qui eos hinc videbit; uti nec Elementum ignis aut aëris ibi, propter fluxam raritatem, nullus umquam aspexit. extenuatio enim illa partium, & dissolutissima raritudo visus aciem transmittit, non tenet infixam. Hoc telum olim etiam timui, nunc pænè contemno. Nam eludi potest, distinctione raritatis ab opacitate. Fieri enim potest, ut corpus altero rarius, plus tamen opacitatis obtineat, videaturque ubi alterum lateat. sic nubes aëre infimo rariores leuioresque, ut Lib. 5. ostendamus, in mediâ regione conspicuæ, quia magis opacæ sunt, lumenque reflectunt; nec tamen grauiorem densioremque inter nos & ipsas aëra cernere, ob perspicuitatem, valemus. Ita ergo exhalatio in aëris fastigium euecta, retinere opacitatem nonnullam potest, quâ visendam se præbeat. Cui rei profunditas ipsius etiam plurimum



num conferet. nam sæpè, vbi duo, tres, decem, aut centum palmi eiusdem profunditatis, opacitatem notabilem concinnare nequeunt, aliquot tamen centeni aut milleni faciunt aspecti per eandem lineam. distantia etiam auget tenebras illas & opacitatem: manifesto exemplo nebulæ, in quam acies nostra è propinquo figi non potest, potest è remotiori. Hoc denique magnitudini Cometarum adiiciendum: Non tantùm, vt antè etiam monitum, lumen opacitati exhalationis incorporatum cerni, sed simul quod circà per aliquod spatium in orbem vbertim refusum. Hoc est, quod in hanc rem adnixus, valui. da tu, si plus potes, & reddamus gratiam.

## ARTICVLVS II.

*Cometæ caelestes, sidera non sunt ex illis Mundo coeui. Aduersus Chaldeos, Senecam, Cardanum, Fracastorium.*

**H**Os tamen non valdè longè reiicio, quia Viri eruditissimi etiam hodie ab ipsis sentiunt, & rerum caelestium, aliarumque plurimarum scientiâ Clariss. Vir Thomas Fienus, in Cometâ anni 1618. nouam iis & egregiam (licet ludenti nec pertinaciter inhærenti calamo) probabilitatis speciem fecit. Illi autem censent, Cometæ caelestes, astra quædam per ætherem inter Planetas palantia esse, quæ vel ingentibus epicyclis se in aspectum nostrum demittant, reuocentque (quomodo Cor. Gemma sidus Cassiopeæ anni 1572. ex altissimo æthere descendisse putat) vel radiis solaribus & die plerumque (vt Mercurius) tecti & suppressi, aliquando tamen longius in noctem & oculos nostros excurrunt. Igitur certas esse, licet hæcenus ignoratas, siderum istorum leges, & ad constitutum ire redireque existimant. *Veniet autem tempus*, auguratur Seneca, *quo ista qua nunc latent, in lucem dies extrahat & longioris eui diligentia. veniet tempus quo posteri nostri tam aperta nos nescisse mirentur.* Sed vix est, vt credam, Magne Sapiens.

Cardanus lib. Subtil. 4. globos sidereos per ætheris campos vagos & errantes credit, qui non semper faciem illustrem (quod in Lunâ etiam cernimus) obuertant terris, caudasque eiciant traiectione radio Solis. Vel, inquit, minuta quædam astra sunt, quæ, nisi defæcatissimâ cæli facie, latent. Fracastorius amplius audet, & cælum nouum Cometarum infra Lunarem orbem nobis fabricat. Multa aduersus istos dici possunt. hoc vno tamen videntur refelli, quòd Cometæ etiam caelestes, figuram & colorem in fine ita va-

rient, ut manifestè cernas pallefcere & in mortem diffolui, non abire incolumes à nobis. expirant enim quidquid habent viux lucis, luridi tandem & informes, manentque veluti cineres & claræ reliquix præcedentis cuiusdam ignis, aut digestæ exhalationis. Hoc etiam aduersus Senecam est, quodd sensum in descensu Cometarum speciem ampliari oporteret, si ex culmine ætheris paullatim defluant in Planetarum regiones. Aliter tamen omnino res habet. nam plerumque statim maximi sunt, & deinde carpuntur, detrectantque, non ampliant suam molem. Deinde, post mortem Demetrii Syriæ Regis, ante bellum Achaicum (Seneca ipse est testis) magnitudine etiam solari Cometes fulsit. talis verò, non nisi longissimo tempore, & per omnium stellarum magnitudines decrefcendo, semper interim coruscus & rotundi capitis (quod paulominus scio non factum) ex oculis se subducere potuit. Id verò deinde Cardano: obstat quodd si Cometæ fungosi capitis, transmittent omni tempore radium Solis, caudatumque aut barbatur plurifariam æthera toto anno videbimus. Quod etiam addit de stellulis, sereno apparentibus, latentibus nubilo, non potest estimari: quia & Cometæ satis ampli, & pluuiis etiam noctibus sæpè conspiciuntur. Sed lib. 1. Variet. cap. 1. mutat Cardanus: & docet, Cometam, nodum quemdam luminis esse, è multis stellarum in vnam cæli particulam confusis & interfecantibus se radiis, transfixum deinde (ut candelæ flammam) radio Solis. Sed motus Cometæ hanc causam respuit. cur enim noster anni 1618. ad polum Arcticum ascendere visus? certè nullis tunc aut vniquam altris in illam cæli plagam iter fuit. deinde plurimæ, vbique ætheris, radio- rum conspirationes & intersectiones fiunt sine Cometis.

Fracastorius etiam frustra est, cum suis nouorum orbium infra Lunam machinationibus, quia multi Cometæ Lunæ excelsiores; & infinitos fabricari oporteat, cum alij Cometæ in Austrum, alij in Boream, Ortum, Occasum, & quoduis horizontis punctum, motu proprio discedere valeant. singulis autem qui in diuersam abeunt cæli regionem, singuli & distincti dandi erunt orbes.

Sed ante huius Articuli clausulam, etiam accipite quid Bodinus de Cometis. *Democriti*, inquit, *sententia in mentem mihi venit, ut existimem Cometæ esse illustrium virorum mentes, quæ postea, quàm innumerabilibus sæculis vixerunt in terris, tandem obitura, (vide Politici stultitiam) ut omnia quæ oriuntur, occasum minantur, extremos peragunt triumphos, aut in calum stellarum quasi splendi-*

da

*da sidera remocantur. ac propterea sequuntur famēs, morbi populares, ciuilia bella: quasi ciuitates ac populi ducibus illis optimis & gubernatoribus, qui diuinos furores placabam, defererentur. Noli irasci, ride mecum Lector hunc Philosophum Rabbinicum, & Peripateticomastigem.*

### ARTICVLVS III.

*Nec Cometas esse plurium stellarum se in vnā conglomerantium cœtus.*

**V**Eterum quidam, vt Anaxagoras, Zeno, Democritus, quos Aristoteles refellit, Cometas, multarum stellarum glomeramina esse contendebant, & in partem eos hodie Cysatus Ingolstadiensis Mathematicus, & Licetus Philosophus Patavinus, sequuntur. Plurima enim sidera frequenti agmine per ætherem errare & palari, Medicæ circa Iouem, Borbonia circa Solem, satis euincunt. Medicæ autem, quaterna nouitia astra circumludentia Iouem, in Familiz Medicæ decus, Galilæus Florentinus appellauit: maculas illas vagâ & errante eclipsi Solem sublabentes, Regiz Borboniorum genti, Ioannes Tarde Gallus dedit. Hispani, quasi scientiz siderali minimè dediti, & curarum ab illo Magno suo Alphonsò longè diuersi, nihil dum pro suo Rege in cælo repererunt. Insulas fortasse in Oceano malunt. & profectò, nemo, credo, paulò indigentior est, qui simplicem in bulgâ ducatum, quàm sidera centum in æthere volantia, habere non præferat.

Sed intra oleas. Astra igitur talia, inquit, errabunda quandoque in cœtum eundem & consortium incidunt, apparentque iam vniuersâ & conglobata, quæ singula & dispersa ob paruitatem latebant. vbi etiam contigux omnes & compressæ stellulæ istæ fuerint, Cometa caluus, imberbis, & simius erit: si verò malè co hæserit, & per interualla radius solaris transitum inueniat, caudæ sryniate aut barbâ insignis, vel aliter acerscometes & intonsus apparebit. Atque ita rem habere, duplici experimento confici certò, vt videtur, potest. Primò, quia Nicephorus lib. 12. cap. 37. Cometam quendam, ex plurimis stellulis circa vnā grandiore, vt apes circa regem, confluentibus, coaluisse scribit. Deinde, ne hîc fortè tergiversemur, ecce ipse Cysatus, caput & nucleum Cometæ anni 1618. in plurimas stellulas & scintillas cælestis lucis, quale cingulum Orionis, & Medicæ comites Iouis, discessisse, per tubum Opticum,

cum, diu & multis aliis testibus, aspexit. dubitatque an Anaxagoras & Nicephorus illum stellarum confluxum, Democritus digressum & dissolutionem, simili etiam tubo olim non viderint. *Fuisse enim, inquit, & sum tubi Optici antiquis etiam Astronomis familiarum, testatur Liber vetustissimus, in Bibliotheca Monasterij Scheurenensis, scriptus ante 400. annos. quo in Libro inter cetera Schemata, etiam Astronomus per tubum Opticum in calum intensum, sidera contemplans visitur.*

Nihilominus Aristoteles olim, & Seneca hanc opinionem acriter oppugnavit, duorum Cometarum (præter alia) exemplo; quorum unus ante bellum Achaicum solari disco æqualis, alter Attalo regnante, totum cælum, instar Lactæ, ambitu suo cinxit. quantâ ergo stellarum istarum confluge, ad tantum orbem concinandum, opus erit? Si autem tot vagi greges per æthera palantur, singulis pænè momentis aliz in alias incurrent, numerosumque comitatum facient: sicque frequentissimi, qui tamen tam rari, Cometae erunt. Scio tamen reponi posse, Cometas illos ex elementaribus fortassis fuisse; & posteriorem, syrmate suo & caudâ, non ipso corpore, cæli ambitum circumligasse. Verum sine dubio est, ingentes etiam Cometarum orbes in cælis quandoque effulgere: neque tam levi declinatione vim & ictum huius argumenti posse vitari. Sed quid ais, Seneca, de famoso illo, & omnium mortalium oculis custodito Cometa, qui ortu suo Helicem & Burim merisit? certè enim in duas stellas abiisse Ephorus commemorat. *Non magnâ molitione, inquit, detrahenda est auctoritas Ephoro; historicus est. Quidam incredibilem relatu commendationem parant, & lefforem aliud acturum si per quotidiana duceretur, miraculo excitant.* & deinde: *Ephorus non religiosissima fidei, sæpè decipitur, sæpè decipit.* Siccine tamen per conculcatam boni fortassis viri auctoritatem transis? retrahi certè potes, exemplo Cometæ prodromi mortis Agrippæ sub Augusto, quem Dion (nisi hic iterum tamen Græcam fidem accuses) in facies (& quid, nisi stellas?) discessisse scribit. potes certius, oculorum Nicephori & Cylati fide.

Rationem tamen Senecæ contemnere non possum: nec istam Aristotelis; quod non aliquando tantum, sed semper oporteret Cometas cælestes, in stellas spargi & dissipari. Hæc etiam me ab illâ sententiâ valdè auertit; quod videam Cometas ferè semper totam plenitudinem initio statim habere, non sensim & particulatim incrementa attrahere. id tamen non fiat, si stellatim & minutatim

ratim tota moles coëat. vt enim dux trêſſe primùm apiculæ circa regem ſuum conuolant, & aliæ deinde plures plureſque conglomerantur, donec impleant totum globum: ita Cometæ multis diebus & menſibus (tardi enim ferè ſiderum proprij motus eſſe ſolent) magnitudinem ſuam colligent. Multi deinde parui Cometarum globuli paſſim in toto æthere, & longè faciliùs quàm vnus aliquis amplior, acervabuntur: quia procluius erit, ſtellas ſex aut ſeptem hîc, decem aut duodecim ibi, quàm vniuerſas in numeroſum vnum gregem confluere. Adde, inſolens eſſe, vera ſidera iter in Septemtrionem vel Auſtrum, etiam vſque ad polos, quod quidam Cometæ faciunt, intendere. & denique color ille rubidus & flagrans, & in ſenio luridus etiam & nigreſcens, ſatis ſignificare videtur, non argenteo aut cæleſti ſtellarum lumine coiuiſſe, quali albicat & lacteſcit galaxia; ſed inſinceriori alio, & in terreſtribus veluti fumis laborante, & ſemiſuffocato. Scio tamen mihi reponendum: ſidera quædam ibi interuolare maculoſa, quorum concretio aliquid quodammodò rapuit terreæ ſordis; quæque radium ſolis malignè bibant, & opacitate nimîa declinent in ruborem, aut pænè etiam in nigrorem infulſcent. tales enim tenebriones illi, & maculoſi hiſtriones, qui Pyrrhichen ducunt circa Solem.

Sed argumenta, quæ aduerſus illam Cometarum ſtructuram attulimus, fallor, aut ſatis oſtendunt coniecturæ huius debilitatem. & deinde licet Planetæ omnes, Planetarumque ſatellites, in parte à Sole auerſa caligent, in aduerſa tamen egregiè, & luce magis digeſta & amœniori, quàm vulgus Cometarum, ſplendicant. quod in Iouis comitibus, & faculis macularum Solis (ſic facies ſatellitum Solis illuſtres, & ad Principem ſuum reſpectantes, quas circa extremum eius marginem molli laterum inclinatione oſtendunt, iam vocamus) manifeſtè apparet. rident enim lætâ ſpecie, non lugubri & funeſtâ terrent.

Sed quid ergo oculis Nicephori & Cysati facimus? an cæcutiuiſſe, & collyrium damus? Non eſt opus. Ab illo incipiamus.

Nego igitur Cysato, Nicephorum vidiſſe per tubum, aut aliter Cometam illum examine paruarum ſtellarum coiuiſſe; non quia cæcus, ſed quia ſine oculis & vitâ, tunc fuit. Nicephorus enim iſte trecentis vix annis à temporibus noſtris abeſt, Cometa mille ferè & trecentis. igitur hic mille propemodum annis illo ſenior fuit. Nam circa annum Chriſti 390. & tempora cædis illius famo-

famofæ Theſſalonicenſium, ſub Theodoſio Imp. exortum ſcribit; Scriptor verò ipſe vix eſt, vt annum Chriſti 1300. dudum anteceſſerit, vt de Epiſtolâ Hiſtoriz dedicatoriâ liquet. Ab alio ergo, fortasſe etiam ſimili, Græculo, & fluxæ fidei (vidi enim Annales Cardinalis Baronij, & neminem, per totam Tomorum ſeriem, ſæpiùs vapulantem Nicephoro) Cometæ illius Theodoſiani hiſtoriam accepit.

Sed demus eſſe veram. reuſo tamen, ſcintillas illas quæ Cometam maiorem circumfluxerunt, ſidera fuiſſe: quod patet vel ex ſolo motu, qui perturbatus & inconditus fuit, non compoſitus & cæleſtis. nam vndique, vt teſtatur, ad Cometam aduolabant, vt apes ad ſuum ducem. Vnde in Ariſtotelis fauorem obedientiùs Cometa iſte trahi poteſt, quàm Democriti & Cyſati. flammulæ enim elementares, & veluti fatui ignes, aut exhalationes ſolâ luce perfulſæ, fuiſſe videntur. Quodd verò fortasſe etiam dioptrico tubo uſum Democritum & Nicephorum addubitat Cyſatus: ne faciat. nam id non ſilerent. & res iſta plus famæ habuiſſet, ſi olim paſſim cognita erudit. Poteſt tamen (& ita etiam ſentio) vt fuerit duobus aut tribus, quod ex lib. 17. Portæ ferè conſtat. & nuper in Hannoniâ, inter veterem cuiuſdam Caſtelli ſupelleſtilem, dioptricus tubus repertus narratur, æruginofus & multæ antiquitatis. Hollandum tamen, aut Genium Hollandi ſpecie (fratrem tamen ſuum Iacobum Metium fuiſſe, contendit Adrianus Metius, Franckerenſis Mathematicus) qui à Ioanne Lipperſein, Middelburgenſi opifice, cauum & conuexum ſpecillum fieri curauerat, repertorem ſcribit Hieronymus Sirturus, anno 1609. Opifex autem, cùm vi-diſſet Hollandum adducentem & reducentem ab oculo vitra, vt inueniret punctum concursus, ſtatim pro ſe ſimilia concinnauit: & primo pulcherrimæ artis experimento obſtupeſactus, & vitra tubo condenda ſuſpicatus, munus hoc Principi Mauritio deſert. Inde

PART. 2. C. 1.  
Teleſc.

*tanta rei nouitas, inquit Sirturus, per totum effunditur Orbem. & plura alia finguntur ſpecilla, ſed nullum ei contigit melius & aptius priore (ego vidî & traſtari.) adeò vt dicas non artes ſolum, ſed ipſam Naturam omnia conſerre, vt magnis Principibus inſeruiant.*

Verùm, quid iam Eruditiff. Cyſati Teleſcopio reſpondemus? Nolim planè offundere caligines. Nec do tamen etiam, congeriem Planetarum vidiffe: licet fortasſe quosdam cæleſtis exhalationis radiantes nodos, ſolutiles, & in ceteri ætheris raritatem poſtea diſſolutos. de quibus plura ſtatim Articulo v l.



## ARTICVLVS IV.

*Non omnium cælestium Cometarum materiam,  
esse terrestres halitus.*

**A**firmant tamen Rothmannus, Galilæus, Guiduccius, & quidam alij. Probant, quia *ὕμωρ μάζα* & exhalationes videmus sæpè altâ & concubiâ nocte, à Sole profundissimè infra horizontem demerso illustrari: igitur in altissimo æthere, supra vmbrae terræ conum, aut circa latera, prope verticem pendet. lumen enim non raperent, si caderent intra vmbra. si verò halitus terreni in cælum vsque scandunt, cur non hinc omnium Cometarum materiam sumimus? Et nocturnos illos splendores extra noctem & vmbrae esse, hoc etiam indicio coniectamus: quia æstatè præsertim se ostendant, & in Septemtrione: cum scilicet Sol versatur in Signis Borealibus, & vmbra terræ in Austrum declinat, & maius ætheris spatium versus Septemtrionem denudat, datque sub radij solaris idum. Deinde, nos antè terræ halitus ad Lunæ regionem admisimus, cur non (si etiam arque etiam rarefiant) altius, & in Planetarum superiorum circos euehimus? nullum enim in orbibus eccentricis obstaculum esse potest, quos antè liquefcere fluereque iussimus. Aut certè si à propriâ raritate & leuitate eò vsque eniti non valent, dicamus, cum Rothmanno, humeris Angelorum subuehi, ad terriorem mortalium, & ostentum.

Verùm id non satis philosophum est: & Deus caussis magis naturalibus uti amat, etiam vbi homines ad reuerentiam sui, aut scelerum pœnitudinem permouere talibus portentosis effectibus solet. Quod tamen me à sententiâ Galilæi valdè abstinere, est nouorum aliorum in altissimo æthere & sub ipso Firmamenti fornice generatio. videntur enim cælestes Cometæ ex eadem, aut proximè affini materiâ esse. astra verò illa, vix attrahi possum vt credam, concinnata ex halitu elementari. nam excitatissimus ille, & argenteâ radiorum comâ lasciuiens, sideris Cassiopæani fulgor, clamat se in materiâ nobiliori, & à se fortasse lucidâ & radiantem, flagrare. Vt enim exhalatio terrestris ad Firmamentum, aut orbitam Saturni ascendat, infinitum pænè rarefcere oportet: vnde si lumine perfundatur, non tam acriter id reflectet, quàm nubes albicans in mediâ aëtris regione. Si dicas, halitum accensum esse, & flammam suas vibrare. non tamen sic euadis: quia ignem illum

P sine



sine sine rariorem esse altero, qui Lunam ambiat, necesse erit; & proinde non satis conspicuum: quāto minùs, tam petulantèr immigantem? quæ terrestrium exhalationum etiā supplementa sufficere potuerunt, ad ignem toties Orbe terræ ampliorem, anno toto & triente, alendum? Si namque quævis stella primæ magnitudinis centies ampliùs, terræ & aquæ globum mole superet, quid dices de nouâ illâ Cassiopææ, quæ amplitudine omnes primæ magnitudinis longè viciat? Stet ergo fixum, aliam materiam querendam pro astris nouitius, quàm elementarem.

Igitur & hæc Cometis cælestibus, præsertim illis excelssimis, & ætæriori ac Veneriæ aut Iouiali luce fulgentibus idonea, inmaximeque probabilis erit. Video negari posse, noua sidera reuerà noua, sed vetera esse, quæ aliquando in conspectum se demittunt, & deinde reciprocant ac refugiant in altum. Sed ratio, cur anrè negauimus Cometæ id facere, etiā in astris nouis hoc refellit. Paulatim enim descensu isto incrementa sumerent, nec sic colorem mutarent, vt in mortem pallescere, infuscari, & satis manifestè exspirare apparet. quod tamen in Cassiopææuo factum, Gemma notauit.

In Cometa  
tâ anni  
1618. c.6.

Deinde, vide quousque exhalationes terrestres furcillet & abiciat VVillebrordus Snellius. *Fingamus*, inquit, *vniversam hanc ærïs regionem, quæ vndique circa hunc terræ globum* (ad 52. Italicorum, seu 13. Germanicorum milliarium altitudinem) *circumsunditur, totam, inquam, illam atmosphæram* (id est, vaporum siue halituum terræ exspirantium spheram) *in vnâ aliquam spheram contrahi & conglobari, ea tamen Cometæ corpus nequaquam suâ mole exæquabit.* Computat enim globi terreni diametrum triplam esse, ad diametrum globi qui ex toto illo ære trium regionum, sine refractione vllâ aut condensatione, compingeretur, & proinde globum terræ ad ærium, proportionem habere, qualem  $27\frac{1}{2}$  ad 1. Multi autem Cometæ propius accedunt ad terræ magnitudinem, præsertim excelssissimi illi qui circa orbitam Martis aut Iouis suspiriuntur. Cauda etiā Cometæ 1618. cùm longitudo 50. graduum, & latitudo trium aut quatuor fuit, si rotundetur in globum, aliquoties millies terræ spheram vincet. quàm ergo improbabile, imò insanum, imputare tantam molem terræ exhalationibus! Hi Egreditiss. Snellij clamores, fateor, me nonnihil feriunt, sed non perinde, ac ratio prior, deducta è nouis astris. Facile enim contrà reclamet Galilæus; non opus esse, vt exhalationem in globum

bum vnum contrahas, sed posse complanari, vt nubes; sicque visibilem diametrum multò longiùs, quàm si exhalatio sphærica foret, extendi. Deinde halitus sub eadem densitate, quàm in suâ atmosphærâ obtinent, ad sidera non ascendunt, sed largiter expandi & rarefcere debent. vnde Cometæ inter Planetas versantes, cum amplitudine exhalationum circa terram hærentium, & quidem in vnum globum restrictarum, malè comparat. Sinamque tota atmosphæra in illam raritatem, quàm halitus in æthere summo pendulus habet, diffunderetur, sine comparatione amplior, quàm nunc, esset; & si in vias Planetarum scanderet, maximæ cæli parti subtraheretur, non tantùm parvæ stellæ aut Cometæ imaginem ostenderet. Caudæ deinde molem de halitibus concinnatam negabit, sed radorum solarium fascem per caput Cometæ tractum dicet.

Ad rationem & experientiam Rothmanni & Galilæi, nego, splendor illos intempestâ nocte, circa horizontem Septentrionalem, subito relucens, in halitibus terrestribus, qui in vias Planetarum ascenderint, plerumque hære: sed vel in cælestibus, quos fortè expirant Planetæ; vel esse trabes aut stipulas longè infra Lunam ardentes, vel astrorum nocturnorum lumen in vaporibus densioribus incorporatum. Ita enim aër Ponti, Aristotele teste, quia suâ crassitie nocturnum stellarum splendorem combibit, auroræ æmulatur. Vel denique (quod super omnia præbo) radius Solis vaporibus infra horizontem condito insertus, in vaporem alium aut exhalationem nobis conspicuam, intra umbram terræ refringitur. Maximæ enim & insolentes circa horizontis limbum refractiones aliquando eueniunt. Sic Hollandi anno 1596. cùm circa Zemblam nouam, & vltimam Thulen, in perpetuâ medijs ferè anni nocte, nauigarent, Solem 17. totis diebus, ante legitimum, quo supra horizontem emergere debuerat, tempus, conspexerunt. consulti verò doctissimi quique Mathematici, in multitudinem & crassamentum vaporum illarum regionum, imaginem Solis refringentium, retulerunt. Rothmannus etiam ipse, Epistolâ ad Tychohem, scribit se Venerem quondam, toto penè horæ quadrante, vidisse quasi stationariam, nec motu primi mobilis se promouentem. duobus etiam gradibus supra horizontem apparuisse eleuatam, cùm exacto calculo, totidem esset infra. quod sine dubio, refractionis opus fuit. vnde dissoluto aut abactò vapore, dicit momento imaginem eius infra horizontem suppressam euanuisse.

Ad alterum, dico, ascensum terrenorum fumorum ad Lunæ orbitam, inò altiùs, si fortè supra ætherem rareſcat, vtcumque tolerari poſſe; ſed nego, ad omnium Cometarum cæleſtium, præfertim altiffimorum illorum, & ſic radiantium, materiam eos ſufficere. De minutis autem quibuſdam, fuſcis aut pallidis, nec longè excelsioribus lunari ſemitâ, nolim pertinaciter pugnare.

## ARTICVLVS V.

*Neque cæleſtium Cometarum materiam, eſſe partem fluidi ætheris in nodum contractam & addenſatam.*

**E**Ruditiffimus Licetus, infinitis prænè ſententiis laborioſè & doctè refutatis, tandem in illam Tychoſis, aut in partem eius, diſcedit, quæ mihi etiam, ſeptimo abhinc retrò anno, lib. de Cometâ anni 1618. ferè allubeſcebat, nunc ſatis diſplicer. Volunt, partem ætheris fluidam & raram, in nodum denſiorem alligari, qui radio ſolari traiectus barbam promittat, aut trahat caudam. Probari poteſt: quia vt aër apud nos ita quandoque denſatur, vt lumen ſolis ſorbeat & coloretur; cur non etiam vertex & nodus fluxæ illius ſubſtantix, in quâ Planetæ circumgyrantur? Si quæras de cauſâ condenſante, reſpondi anno illo 1618. eſſe frigus: nullam quippe aliam promptiorem videbam. Reiicit tamen id Licetus, quia nullum inter ſidera poteſt eſſe frigus, cum omne à terrâ & aquâ proueniat.

Duplicem ergo aliam cauſam excogitauit. Prima eſt, motus Planetarum, qui rapidiſſimâ vertigine ab Angelis rotati, æthera ante ſe propulſum denſant, vt aues, inquit, volantes, aërem; & naues velificantes, vndam. Altera eſt, natura & forma ſubſtantialis ætheris, quæ materiam ſuam radiis ſolaribus rarefactam, ad denſitatem, vbi poteſt, reducit. appetit enim, vt putat, æther denſitatem, & impetu naturæ in eam ſe contrahit, vbi radius ſiderum ſe extricare contigerit.

Sed vtræque hæc cauſa non magno opere videtur poſſe reſelli. Prima, quia motus localis rei duræ per medium fluidum volantis, non poteſt ita condenſare; vt de cauſâ motûs proiectorum, aduerſus Dandinum & alios alibi oſtendemus. auis enim aërem propellens, non valet ita addenſare, vt ille qui per ſyringem in folle luſorio eum conſtipat & intendit; quia habet quò diſſugiat, & ſe recipiat, ſine inſigni ſuâ vel alterius condenſatione. nam vnus loco

pulfus,

pulsus, alium deinde submouet, & hic etiam alium catenatim. Ne tamen minimo impulsu totum Elementum aëris vacillare oporteat, aliqua in singulis partibus accidit condensatio; sed tam tenuis & dispersa, vt in vnaquâque sit insensibilis. Similiter nanis potius in spumas rarefacit, quàm vel ferè hilum condenseret aquam. hanc enim condensacioni valdè contumacem esse, patet, quòd ne frigore quidem intensissimo & durissimè glaciante, vix ac ne vix contractior fiat, cum glacies neque densior neque grauior aqua fluente sit, cui innatat. Scio tamen, quid Licetus lib. 2. cap. 14. doceat. rem videlicet aliquam densiorem non esse grauiorem seipsa rarefacta: affertque exemplum in metallis, quæ liquata tantumdem ponderis, quantum dura & consistentia, habent. Verùm mollities largiter à raritate, & durities à densitate distinguenda est. plumbum igitur liquefactum mollius, non rarius, est consistenti: ideoque nullum reperire est in pondere discrimen. Non esse rarius, liquet, vel ex forma illâ, quâ infuso plumbo sunt glandes iaculatoriæ: quæ enim liquato impleta, eadem plenissima manet, vbi induit à refrigeratione. signum igitur est, frigore intra formam non contrahi & addensari. Deinde licet daremus Liceto, ætherem, Planetarum traiectione, colligi in nodos & densari, densitas tamen ista non esset tam pertinax, vt aliquot menses edurare posset, & quamdiu viuunt Cometæ. aër enim hic motu condensatus, statim, vbi solido nullo stringitur & tenetur, in raritatem suam resiliit. Sed fortasse hanc primam causam à se imbecillem, secunda iuuabit. Non facit tamen. Si enim ab intrinseco & naturæ impetu æther ad densitatem redit, & in eâ, quantum valet, se firmat & continet: ergo circa Mundi polos, vbi radius solaris inualidus concretionem impedire non potest, perpetua nubes, & Cometa circulo Arctico æqualis apparebit.

Secundò, singulis noctibus æther nobis impendens ad densitatem suam redibit: quia Sol longissimè abest; imò, vt alibi affirmat Licetus, extremus radiorum eius mucro ad oppositam eclipticæ semitam non pertingit. alia autem sidera sæpè non tantum habent lucis, vt dissoluere ætherem possint, & distingere ne condensacione se recolligat. Hoc quippe solùm accidere potest in plurimorum astrorum cœtu, & magnis Planetarum coniunctionibus, quod significat etiam ipse Licetus. nam ideo magnis coniunctionibus Cometas plerumq; enasci docet; quia æther aliquot Planetarum in vnum conspirantibus radius fusus & rarefactus, cœtu

dissoluto acrius se densat & in Cometam alligat; vt aqua post calefactionem facilius & durius in glaciem rigescit.

Tertiò, non capio, quomodo radij siderum substantiam ætheris rarefaciaht, si æther (quod credit Licetus) est incapax caloris. Nam, quidquid dicat, radius proximè non videtur efficiens raritatis; sed calorem producit, qui deinde subiectum suum dilatat & fundit. ideo enim glacies, pellucens & plena solaris luminis, non statim, sed pederentim, calore incrementum, tabescit. Igitur nihil, quod stringat ætherem in Cometam, video, præter frigus illud à me disputatum anno 1618. nisi Angeli condensantis manum implores, aut ad occultam, quæ sine frigore condenseret, influentiam fugias, teque in hoc ignorantia asylo abscondas.

Cur tamen etiam frigore & condensatione ætheris fieri Cometam, minus iam placeat, hoc est: Quia quidquid addensatur, in eodem medio succumbit, & descendit profundius. Cometæ ergo, incrementum paulatim condensatione, molliter subsident. cum tamen contrà sit, & primo ortu demissimi sint, & deinde perpetuò in altum scandant.

Deinde stellæ, si quæ sint, frigorificæ, ætherem è regione Soli oppositum semper conducent & densabunt; quia Sol ab eo longissimè abest, & satis diu. mouetur enim illa ætheris pars ab Ortu in Occasum ex aduerso Solis, donec hic se illi admovent, proprio & tardo regressu, ab Occasu in Ortum.

Adde, promptius in umbris Planetarum, quos altrinsecus Sol illucet, & circa senem & frigidum Saturnum, ac præsertim acronyctum & Soli oppositum, exorturos sic Cometam. quæ omnia experientia refellit.

## ARTICVLVS VI.

*Cometarum celestium materiam è sideribus fortè exhalari.*

**Q**uid enim aliud iam eligam? ceterum nihil mihi reliquum feci. Scio tamen hic mihi clamores paratos, ab iis præsertim qui cælestia corrumpi, crementa aut decrementa sumere, negant. sed per Deum immortalem, probabilius aliud nobis reponant, & beabunt. ego enim iam Cometam in maximis & abditissimis Naturæ miraculis pono.

Inter autem varias meas coniecturas in Libello Cometæ anni 1618. vna erat, halitus fortasse quosdam, vi præsertim Solis, Planeta-

netarum corporibus expirari ( quod Copernicanis videram non omnino displicere ) & inde materiam esse caelestibus Cometis. Ipsa enim similitudo materiæ talis cum exhalationibus terrestribus, quibus formantur Cometæ sublunares, colorem aliquem veritatis statim facit. Secutus deinde nuper Camillus Gloriosus, qui cap. 4. libri 5. de Cometis, egregiè hanc opinionem confirmat; nisi quod Solem, cum Snellio, se in illos macularum fumos putat nocte die-que expirare. cum enim astra ista Borbonia, siue macula, latissimæ & numerosæ sint, si Solis visceribus eruantur; metuo profe-ctò ne breui se euisceret, & totus erogetur. Solem itaque inter Planetas, ab hac expirandi lege excipio. quia magis immortalis hæc publica Mundi lãpas esse debuit, ne eã extinctã, esset sine lumine.

Itaque, vt perueniam quò tendo, hoc præstruendum, & in eam sententiam abeundum, quæ cælos & sidera è materiâ sublunari compingit, vt corrumpi aut decrescere, generari aut accrescere, quandoq; valeant. Nec difficilis veniæ futurus hîc est noster Aristoteles, qui lib. 2. c. 5. de Cælo, ait, Ταῖς μὲν ἀκείveis ἑταῖς ἀνάγκαις ἔστιν ἡ δὴ ὁππότε, τὸν χᾶριν ἔχον διὰ τῆς ὁρίσσεως. Si quis certiores necessitates affectus fuerit, gratias agere oportet inuenientibus. & cap. 3. se excusatur, quod ἀδύνατον, ἔχει ἔτι τῷ τόπῳ πολὺ δὲ μᾶλλον τῷ ᾧ συμβιβαστικόν αὐτὸς πίσει, παμπαν ὀλίγον ἔχει αἰσθῆναι, *eminus, non vt ipso loco: multò verò magis, eò quòd eorum, quæ calis accidunt, per paucorum sensum habeamus*, incertam & vacillantem cælestium inquisitionem faciat. Non vult igitur hîc in sua verba pertinaciter iurari, paratus etiam ipse melioribus acquiescere. Nos vero Christiani, quid propius rectiorem Sacrarum Litterarum interpretationem accedat, curiosè circumspicere, quàm in vnum Aristotelem oculum defixum tenere, debemus. Et quidem plurimi Genesii Interpretes, ac inter eos, Beda, S. Hieronymus, S. Cyrillus, S. Clemens lib. 2. Recognitionum, existimant, initio Mundi, totum spatium inter terram & Empyrium, impletum fuisse aquis, & partem earum duratam in Firmamentum, sidera, & orbes, si qui alij, cælestes. Vnde Vir longè Eruditissimus, Ludouicus Molina, in Opere 6. dierum, disput. 5. *Ex Scripturâ Sacrà aperitè colligi arbitramur, inquit, materiam calorum (si Empyrium excipias: de quo contrarium probabiliter defendi posset) conuenire in specie cum materiâ rerum sublunarium.* docet-que etiam concretos ex aquâ. Serrarius in 2. Petri 3. contendit, aduersus Franciscum Suarez, cælos fide- reos extremo die soluendos: nec esse cur Scripturam non tam propiè

prîè accipiamus, nisi anticipatam tantum Aristotelicarum quarundam, quæ facile solui possunt, rationum opinionem. & Doctiss. noster (sic conterraneum appello) Cornelius à Lapide, in cap. 1. Genes. ostendit Sacræ Scripturæ esse magis conformem. Hoc statuto, cum materia siderum, iam qualitatum elementarium sit capax, cur aduersus eorum expirationes, tam contumaces sumus? Certè dum cogito, omnes Planetas corpora opaca, & in parte à Sole auersa terræ simillima esse, dum montes, & valles, toriugesque cæsuras, verrucas, & tubercula in Lunâ, per Arundinem nostratē aspicio, minùs mirari eos incipio, qui cælestem quamdam terram esse dixerunt: & quidni etiam addam, fumare idē radio solari, & in vicinum ætherem se expirare?

Verum aliqua sunt, quæ me non leuiter conturbant. Primò, cur non iam tot annis cernimus figuram siderum deprauatam, & molem decreuisse, continuâ illà expiratione? Deinde, mollia sic, non dura & adamantina esse oportebit; aliàs enim non carperentur actione Solis. sed cur ergo non dissiliunt tam rapido circa Mundum rotatu? Tertio, venti & pluuie etiam ex eadem materiâ, in Orbe illo sidereo nascentur: quod inuisum, inauditum, incredendum. Hæc, vt verum fatear, me acriter vrunt.

De primo tamen Clariss. Virum, Thomam Fienum, in eruditissimo Cometâ anni 1618. audiamus. *Possunt, inquit, maxima generationes & corruptiones, maximæque permutationes in calo fieri, etiamsi à nobis non conspiciantur. hoc visus nostri debilitas, & immensa calis distantia faciunt. nec magis permutationes aut generationes vllas in hoc Mundo inferiore videremus, si in calo Luna esset, constituti (in quo tamen nunc, propter viciniam & propinquitatem, admirabiles quotidie fieri animaduertimus) quàm modò videmus in calo.*

Et Ampliss. ac Clar. Vir Erycius Puteanus in elegantissimo & bello de eodem Cometâ Libello: *Homines & bruta, arbores & stirpes, vrbes & ades oriuntur & pereunt; imò, vt pereant. Sed quantilla hæc, si tamquam membra Orbis censeantur? Manent interim regiones & maria, montes & flumina, passimque, tamquam non mutetur, moles hæret. In calo, quidni ad eundem modum varietas ludat? cogita minuta multa, & panè infinita, partim generari, partim corrumpi quotidie, sed humanis oculis nequaquam comprehendi. Minuta? imò, & magna quadam; rariùs tamen, quia magna sunt. Quid igitur? non ideo aut calum esse calum desinis, aut astra, astra. Omnino licet mutetur terra, Mundus tamen, Mundus est: Mundi enim pars quadam à*

Deo



*Deo constituta. Sic mutetur calum, permanere tamen Mundus potest: pars enim Mundi & calum est.* Breuiter ergo, Planetarum orbis detrimentum, aut mutilationem aliquam pati possunt, & patiuntur, etiamsi ex tanto interuallo id oculis non sentiamus.

Ad alterum, assero Planetas corpora dura, sed non adeo vt nihil inde radius Solis carpere valeat, aut exfugere. & lapides enim hic ac metalla detrequantur, & aliquid abiiciunt de pondere, si diu insolentur. nec tamen Planetas duritiei tam contumacis existimo. Neque mirum, raptu illo non dissilire; quia ne Cometæ quidem tam rari & fungosi dissoluuntur. imò spumarum globos, incolumes portari ac defluere videmus, secundo & satis rapido flumine, nec nisi ferò dispergi. Ratio igitur est, quia Planetæ, Cometæ, & æther vehens, fluunt in eandem Mundi partem, ab Ortu scilicet in Occasum. de motu altero, Planetis & Cometis proprio, dicemus, quod satis erit, postea.

De tertio, negare malim pluuias vñquam è halitibus Planetarum ibi concrefcere; nisi cum Keplero, & quibusdam aliis, affirmares, in Lunâ ingentia, quæ vaporari possint, maria esse. Verùm summo tantùm sicciores, non insigniter ad pluuiam humidos, extrahi autumo: quia Planetæ siccî & rigentes sunt, non humentes & fluxi. Sed an in ventos possint halitus eorum relabi? Dico, in regione illâ tot siderum luminibus feruidâ, difficulter fortasse ita posse frigore densari, vt magno, & in flatum valente impetu, queant defluere. Itaque sæpius erit, vt molliter residant, quàm præcípites & torrentes deuoluantur. Verùm, quò tunc recident? ad terramne, an ad Planetam suum singuli, vnde extracti sunt? Si hoc postremum fiat, hoc commodum nacti erimus, quòd habeamus, vnde sarcire detrimentum, quod passi fuerant Planetæ per illam exspirationem. vt enim terra se reparat per vapores & exhalationes, quæ in eam relabuntur; ita Planetæ facient. Sed tot centra gravitatis, quot Planetæ, sic statuenda erunt, vt cuiusque scilicet vñdique partes in suum, non in alienum nitantur. quâ ratione, longè promptius fuerit intelligere, quomodo ingentia illa corpora naturali libramento, in summo illo æthere dependeant sine lapsu. In quo sensu, aut prope, magnum Copernicum iam video. *Equidem existimo, ait lib. 1. cap. 9. Reuolut. gravitatem non aliud esse, quàm appetentiam quamdam naturalem paribus inditam à diuinâ providentiâ Opificis vniuersorum, vt in unitatem integritatemq; suam sese conferant, in formam globi cœuentes. quam affectionem credibile est etiam*

Q

Soli,

*Soli, Luna, ceterisque errantium fulgoribus inesse: ut eius efficacis, in ea, quæ se representant, rotunditate permaneant; quæ nihilominus multis modis suos efficiunt circuitus.*

Vel si pertinaciter contendis, siderum gravitatem eiusdem esse rationis cum elementari, omniaque in terram niti; do tibi, sidereas quandoque exhalationes eousque defluere, donec ætherem aut ærem se grauiorem inueniant: quomodo validè satis reicies?

Historiæ etiam quædam in cælestium exhalationum probationem attrahuntur.

Septem continuis noctibus post cæsum in Curiâ Dictatorem Cæsarem, resplenduit Cometes, & circa totum illum annum Sol lugubri & pallidâ facie semper fuit: aded vt malignâ, nec satis calorificâ luce, vix villos terræ fructus perducere valuerit ad maturitatem, vt in Cæsare scribit Plutarchus. & Poëta Princeps:

Georg.  
lib. I.

*Sol tibi signa dabis. Solem qui dicere falsum  
Audeas? ille etiam cacos instare tumultus  
Sapè mones, fraudemq; & operta sumescere bella.  
Ille etiam extincto miseratus Cæsare Romam,  
Cum caput obscurâ nitidum ferrugine texis,  
Impiâq; aternam sinuerunt sacula noctem.*

& lib. 15. Metamorph. ille ingeniosus, de eadem cæde:

*Arma, ferunt, inter nigras crepitantia nubes,  
Terribilesq; tubas, auditaq; cornua celo,  
Pramonuisse nefas. Solis quoque tristis imago,  
Lurida sollicitu præbebat lumina terris.*

Anno etiam Christiano 1547. quatrduo, à 24. ad 28. Aprilis, Sol vbique mœstâ & ferrugineâ specie illuxit, vt narrat Keplerus. quod, vt iam in mentem venit, Galli trahere possint in funestum Apollini (in quo Poëtæ Solem intelligunt) & omnibus Literatis, fatum Francisci primi, qui pridie Kal. Aprilis eodem anno, in Arce Rambuletanâ excessit.

Hebetatio autem ista radiorum Solis, per totam Europam, & latius fortasse visa, videtur in altissimos, & Soli propè admotos, halitus reiicienda. qui enim infra Lunam cum subtexunt, nisi immensam latitudinem occupent, non possunt, propter aspectûs diuersitatem, in toto vno hemisphærio se illi obtendere. Video tamen hîc maculas solares, siue astra Borbonia, culpa posse, quæ insolenti concursu & multitudine se Soli obiecerint. Aliquando enim

30. simul videntur : quidni potest, vt (licet euentu raro) etiam 50. aut plures? Nec statim etiam transuolant; sed quædam decimo, quædam vndecimo, aliz duodecimo, aut decimo tertio die diametrum Solis traiciunt.

Sed antequam discedam, non dissimulabo quid etiam me habet sollicitum. Dixi initio, Solem verius nil exhalare, aut certe minimum. quomodo autem, cum materia eius caloris capax sit, & in tantâ abundantia affluentissimæ lucis, oporteat etiam esse feruentissimum? si verò sic ardet, cur non etiam se in ætherem expirat? Dic tamen, aut habere temperiem calori repugnantem, aut si calet, duriciem tam obstinatam esse, vt nil sinat detrectari. Nec id in cælo mirum. Audi Plinium de terreno adamante. *Inuicta vis* Lib. 37.  
(adamantis) *violentissima natura rerum; ferri ignisq; contemprix,* cap. 4.  
*hircino rumpitur sanguine.* De ferro tamen negat rei geminariæ peritissimus Scriptor, Anselmus Boëtius Belga. quippe malleo frangi affirmat: sed ignis tamen iniurias ita perferre, vt viuidior & præstantior, nil diminuto pondere, exinatur. Item, ex amianto lapide nullo & friabili texuntur mappæ ignibus inuolabiles. olimque Regum inde tunicæ funebres fiebant, vt cremata cadauera à rogi cinere separarentur. *Ardentes in focus conuiniorem ex eo vidimus mappas,* inquit Plinius, *sordibus exustis splendescens ignis magis, quam possent aquis.* vidit & Baptista Porta Venetiis. Quidni ergo simili corpore, & minùs etiam ignibus obnoxio, Vniuersi illa lampas esse possit; *vas,* inquam, *illud admirabile, opus Excelsi?* Eccles. 43.

## ARTICVLVS VII.

*Quomodo è halitibus celestibus concinnandi ætherei Cometa.*

**H**OC est quod palleo, quòd quis non prandeat, hoc est. res enim <sup>Perf.</sup> perplexissima, & omnem ferè conatum eludit. sed cum aciem vndique verso, nil probabilius video, quàm si Cometæ cælestes generatione minimum à sublunaribus distent. Ascendunt igitur propriâ leuitate per vastissima illa ætheris spatia halitus Planetarj, & in lucidam tubem coeunt, quem vocamus Cometam. Rarissimi ergo sunt, cum tam altè, & ad fornicem ipsius Firmamenti quandoque, effugiant. quid tum? videri tamen, & reflectere lucem possunt; quia cum opacitatis aliquâ mixturâ sunt. Innumera ergo halituum istorum superficies, per longam & multorum milliarium profunditatem, sibi inuicem vtrò citroque lumen red-

dentes, & sic multiplicatum deorsum reicientes, speciem illam stellæ flagrantis, aut coruscantis, faciunt. Ingentis enim latitudinis & profunditatis nubes animo deformanda est, per quam radius solaris hæc illæc errabundus, & cum modicâ saltem vbique reflexione se contorquens, tandem in caudam aut barbam plerumque euadit: ita tamen, vt in profunditate tantâ, sat lucis amittat & relinquat, vtp̃sâ se eo tingat, & reflectat ad speciem. Cur igitur non magis frequentantur, inquires, Cometæ, cum verosimile sit, ætherias ibi nubes, vt ætias circa nos & terram, toto anno pendere? Negare tamen id possum, quia terrâ & aquâ molliores sunt, ideoque Soli halitum euocanti magis obediunt, quàm sidera, duri & contumacis habitûs. Deinde exhalationem amplissimam esse necesse est, vt hinc à nobis tam dissitis conspiciatur. quod estimare ex superioribus Planetis licet, qui terrâ maiores, tam angustos tamen in speciem orbiculos explicant. Itaque si in sphaeris Planetarum degeremus, plurima fortè cælestium nebulatum vellera, toto æthere passim dispersa videremus, quorum iam species euanescebat nimiam spatij intercapedine.

Sed quid de nouitiis fixis, & Firmamento velut inhaerentibus sideribus censemus? in genere ne Cometarum, an seorsim ea habemus? Pleniùs id in Libris de Cælo arbitrabimur. Obiter iam dico, è materiâ cælestium Cometarum videri. Ratio est, quia carpuntur, relanguescunt, & finiuntur, vt Cometæ. Fiunt ergo, cum halitus extra omnem parallaxin, ad Saturnum & vltra ascendit, vt iam appareat à solo primo Mobili, sine alio proprio motu, rapi. Ita verò fulget, quia materia cælestis auidè lucem bibit, & sidera fixa è propinquo certatim in eam radios coniiciunt. sæpiùs etiam in galaxiâ, aut iuxta, visuntur; quia infinitæ ibi Sporades, quæ confusis radiis viam illam lacte inalbant, suâ etiam aspergine vbertim halitum inebriant. Scintillant autem, & ardere videntur, ab eadem causâ, quâ fixæ: propter distantiam, & alia, quæ alibi enarrabuntur. Dubito etiam, an ex ipsis fixis, nihil ad nouarum materiam exhaletur.

Non est etiam perpetuum, nouas fixas Lactæ adferi. Nam Simon Marius anno 1612. vnâ in cingulo Andromedæ, Iustus Pyrgius Lantgrauij Hassiæ Automatopæus alteram in Antinoo, Keplerus anno 1602. aliam in Pisce, David Fabricius anno 1596. in Ceto, sat procul à galaxiâ, nisi caligo aut lippitudines eos fecerint, sunt conspicati.

## CAPVT III.

*De causâ formali, efficiente, finali Cometarum.*

**H**ÆC vniuersa breuiter, & in fasce dici possunt. Forma Cometæ tam cælestis, quàm sublunaris, est figura stellaris & lumen. hæc enim vniuersum fundant similitudinem Cometæ, mobilis, siue immobilis; comantis, siue calui, cum vero sidere. Species deinde singulæ Cometarum, aliquod aliud accidens, vt motum, aut quietem; vel etiã partem integrantem, vt comam, caudam, barbam, adiciunt. Figura autem capitis, licet è longinquo sphaerica appareat, quia distantia inæqualitates supprimit, & rotundat (quadratum enim, aut triangulare, & omne angulosum, imaginem rotundi procul ostendit) tæpius tamen reuerà non est talis.

Causa efficiens proxima, est Sol, aut aliud astrum quod radio suo materiam Cometæ traicit & colorat. Causa verò sitûs, quem in aëre siue æthere habet, est impetus qui halitum in altum abstulit, & in figuram talem concinnauit. impetus verò iste est à leuitate spiritus: vt statim, cùm de motu Cometæ proprio, dicemus. Finis Cometarum sublunarium, est purgatio aëris à noxiis exhalationibus; omnium verò, comminatio diuinæ manûs & flagelli imminentis. Quæri tamen potest, & meretur;

## ARTICVLVS VNICVS.

*An Cometa aliquid presagiant, & quomodo.*

**N**ihil vulgo magis persuasum est, quàm Cometas malorum prænuntios esse.

*Oὐδὲς κομήτης, ὅστις ἔ κἀκεῖ φέρη,*

*Nullus Cometes, qui malum nullum ferat,*

canebant illi Antiqui. Plinius lib. 2. cap. 25. Cometes terrificum magnâ ex parte fidem, ac non leniter præsum: vt civilis motu, Octauio Consule, iterumq, Pompeij & Caesaris bello. deinde ante pugnam Philipeusem, post cæsum Cæsarem, Virgilius:

*Non aliâs calo ceciderunt plura sereno*

*Fulgura, nec diu toties arserè Cometa.*

Georg. 1.

Silius lib. 8.

— non vnus crine corusco

*Regnorum euerfor, rubuit lethale Cometes.**Numquam futilibus excanduit ignibus ather.**Et numquam calo spectatum impune Cometem.*

Manil.

Claud.

Aenol. 14.

Tria autem publicè illa mala, bellum, famem, pestem, & priuatum Principum mortem, prælagire existimatur. Vnde cum sub Nerone Cometes effulsisset, vulgus passim, inquit Tacitus, quasi eo iam depulso, quisnam diligeretur inquirebat. sed cum multo toto eius Principatu exorirentur, vt cladem à capite suo depelleret, sanguine illustri solitus erat expiare: doctus id à Babilo Astrologo, vt narrat Suetonius. Infinitum autem sit consarcinare omnes calamitates, omnium Principum exitus, cum hac denuntiatione. Alios antè aut post, Romanos Cæsares omitto, Claudium, Vitellium, Vespasianum, Didium Iulianum, Seuerum, Macrinum, sic excessisse noto in Dione. Aut si recentiora magis allubescunt: Anno 1558. Augusto mense, Inuidiss. Imp. Caroli V. & anno 1618. Decembri & Ianuario sequenti, Augustissimi Cæsaris Matthiæ mortem Cometes antecessit. extinctus enim hic anno 1619. in Martio.

In Nero-  
ac. c. 36.Lib. 7.  
Nat. c. 17.

Quidam tamen etiam fausti putantur Cometæ. vt ille qui post necem Iulij Cæsaris, ludos Veneri Genitrici celebrante Augusto, horà diei vndecimâ emeritum enim tamquam sibi faustum coli in Templo publicè edixit Augustus. Et Seneca, alterum initio Neroniani Principatus (quem lætissimum vocat) exorientem, Cometis ceteris detraxisse infamiam affirmat. Quid itaque, credo, mors Neronis non respondit. Sed profectò, vel ideo infautissimus, quod pestem illam humani generis non sustulerit, & tot illustrium virorum, & in ijs Senecæ ipsius, eadem non præuenterit. Inter faustos etiam numerari potest ille anni 1607. qui Belgis duodecim annorum inducias tulit. sed ecce tamen tunc statim arma in Cliuiâ & Iuliaco suscitata, exitu, sine herede relicto, defuncti Principis. Ita sit profectò, si Orbem terrarum vniuersim circumspecis, læta semper alibi cernes pernixa tristibus: nec vllum credo tam nocentem Cometam fuisse, qui nulli Regioni parceret; imò qui multis etiam non potuerit videri noua gaudia attulisse.

Sed non in istum tamen, puto, finem, sed ad tristiora, mittitur. Solent enim benignissimum Numen, vbi mensura flagitiorum nostrorum



Arorum ad plenitudinem venit, & vindictam hinc potius temporariam quàm æternam parat, naturalium istorum effectuum occasione vti, & terrore illo ad pœnitentiam & sui respectum conuertere. Itaque cum Clar. & eruditissimo nostro Thomâ Fieno, in Cometâ anni 1618. ~~ergo~~ Cometam, maximè cælestem, calamitatum physicam causam (quomodo enim exhalatio illa, siue Sole tantùm perfusa, siue ignis etiam est, ex illo intervallo tantùm valeat?) non nego tamen, signum ex institutione diuinâ esse, quam omnium temporum historia affirmat. Igitur Cometa res quidem naturalis est, vt Iris; vtraque tamen supernaturalem à Deo significationem habet. Et huc verba D. Damasceni lib. 2. Fidei Orthod. cap. 7. ducere potes. *Cometa Dei imperio certis temporibus conflatur, rursusq; dilabuntur.* Dicitur enim specialiter effectum illum, etsi naturalem, producere Deus, quem ex mero arbitrio ad finem planè extrinsecum, quod causæ talis effectus creatæ, nullâ ratione aspirare dici possunt, mittit & destinat. vt etiam Genes. c. 9. *Arcum meum ponam in nubibus, & erit signum fœderis inter me & inter terram.* Arcum tamen istum non solus, & digito suo depingit, sine penicillo radij solaris, qui concaussa eius est, & quidem purè naturalis. Aristoteles tamen signum naturale ventorum & siccitatis Cometas autumat, non quia efficiant, sed quia exhalationes alitæ plurimæ & confertæ, quæ vnâ è terrâ (quam arentem ideo & exsueccam destituunt) in aëra scandunt, & miscelâ inquinant. *Inde mors imbecillum,* inquit Cardanus, *qui non exercentur, qui curis multis distrahuntur, qui cibis delicatioribus utuntur, qui Veneri indulgent, quiq; faciliè agrotant, & ad senium inclinant, & parum dormiunt. Tales igitur cum sint multi Principes, mori aliquem eorum, in quem omnia hæc magis conuenerint, plerumque contingit.* Adde, opinionem illâ, quasi noxiæ & in mortem missi, sideris, perturbari aliquando fortè Principes cum iacturâ valetudinis. Sed imbecillæ hæc causæ sunt, & si quid in sublunaribus fortasse valent, in cælestibus Cometis, qui terræ filij non sunt, nihil possunt. Igitur, aut non potius, quàm turba vilis, occidunt nunc Reges, videnturq; tantùm, quia sublimium casus est insignior, aut certè tali ostento nuntiatur Deus mortem ab aliis causis, iam iamq; paratis, inferendam.

Lib. 1. c. 1.  
Variet.

Porro ad præsagium & terrorem, Cometæ cælestes magis idonei sunt elementaribus. cum enim altissimi & in omnium oculis circulos suos decircinent, latius & ad plures Numinis metum spargunt. Colorem etiam huc referre aliquid putant. atrati enim

aut



aut sanguinantes, Saturninij aut Martiales existimantur, & argenteis illis ac Veneriis nocentiores. Fixæ deinde quibus subrepat, aspectus Planetarum mutus, & Signum ubi ortum & incunabula habuit, non negliguntur. barba deniq; censetur mucronem intendere in eam Prouinciam, cui dirissimè minatur. Verùm hæc interto fundo concepta, nimisquam vacillant. barbam enim casu in illud cæli punctum dirigit, quod contigerit opponi Soli. Sol quippe, caput, & barba Cometæ in eadem lineâ circuli maximi sunt. nequedum satis expertum, an Deus cuspidē illâ barbæ, in quam maximè partem defæutura sit ira, velit ostendere. Sed ad quos ergo pertinere debet metus? inquires. Dico, ad omnes & vniuersos; quia omnes peccamus. est tamen, cur iis crebrius arteria micet, corq; palpitet, qui pluribus aut grauioribus seeleribus sunt cooperti.

Hoc etiam festinanti exciderat. reprehendo in manum: & accipe, priusquam me hinc amolior. Doctissimus Keplerus in libro Cometarum anni 1607. & 1618. Cometæ causam turbarum sublunarium censet per sympathiam, quam elementaria cum Cometis & cælo habent. & Sebastianum Lusitanicæ Regem à Cometâ anni 1577. stimulatum, vt in Africam traiceret & suam perniciem. *Facultas Mundi sublunarij*, inquit, *Cometam persentiscit & obstupescit, vnaq; facultates cetera omnium rerum sublunarium.* & deinde: *Facultas telluris insolenti Cometa apparitione consternata, vno terrestris superficiei loco multum exsudat vaporum, pro qualitate illius partis sui corporis. hinc diurna pluuia & eluiones.* Quæ rîdenda paullominus hîc scio; quia ad istam sympathiam, oporteat vnâ & eandem cæli & rerum elementarium esse animam. item, quod terram ingens quoddam, & siderum etiam ac Cometarum intelligens, animal faciat, non dubito palàm à modestissimis etiam decachinnandum. & reuerà Vir ille in Mathesi tantus, tam pertinaci tot iam annorum quibus in eo durat, de Telluris animatione & motu, paradoxo, magnam ceteræ scientiæ suæ aspergit labem.

## CAPVT IV.

*De proprietatibus Cometarum.*

**R**ECIPVÆ, & quæ in difficultate insigni, sunt color, figura, magnitudo, motus. De colore tamen, vno verbo absoluo. tota diuersitas enim venit à materiæ opacitate aut transparentiâ. hæc nempe radium Solaris resoluit, digeritque in clarum & argenteum colorem; illa astringit, declinatque in ruborem, aut etiam propè infuscat in atrum. A figurâ sumuntur omnes species Cometarum. Aristoteles duastantum recenset, Crinitum ( qui propriè Cometes, sparsus in orbem comis) & Pogoniam, siue barbatum: ad quas reduci possunt omnes, quas Plinius ad decem multiplicat. qui-  
cumque enim pænè rotundi, proprij Cometæ, alij Pogoniæ qui-  
dam vocari possunt. Lib. 1.  
c. 25.

Ad Cometen ergo pertinent, *Διονέας*, qui colore electri, & figurâ disci, raras crines è margine mittit. *Πιθήκας*, doliani figurâ, in concauo, fumidæ lucis, inquit Plinius. *Λαμπρόδιδας*, facis ardentis æmulus. *Ἰππόδεις*, qui equinas iugas celerissimi motûs, atque in orbem circa se euntes imixatur. *Ἀργυροχόμος*, argenteo crine ita refulgens, ait Plinius, ut vix contrari luceat, speciemque humanâ dei effigiem in se ostendens. Quæ verba nebulosa sunt. & nescio, an ad Cometen, siue stellam, quæ Magorum ad Christi incunabula dux fuit, referri non possint. Fortasse enim fama, & res, fuit, sub Augusti Principatu, Cometam in Oriente & Iudæâ visum, in quo imago pueruli expressâ, quem Christiani dicerent hominem-Deum. Certè, dum cetera cælestis huius Natiuitatis admiranda cogito, hoc non pro maximo, sed in minimis, ducere non vereor.

Hi verò ad Pogoniarum classẽ spectant: *Ξιφίας*, breui & in mucronem gladij fastigiato crine. hic autem omnium pallidissimus est, ait Plinius, & quodam gladij nitore, sine radiis. *Ἀκοντίας*, iaculi modo vibratus, ocysissimo significatu. De tali Titus Imp. in quinto suo Consulatu, præclaro carmine scripsit. nec alius Cometa post hunc visus Plinio, qui cinere Vesuij suffocatus, breui illo Titi Principatu. *Κερατίας*, cornu speciem habens. qualis fuit, cùm Græcia apud Salamina depugnauit. *Λογχοίμος*, halæ effigie. qualis anno v. c. cccitc. Caudatum autem vulgò à Pogoniâ ipso, si-

R ue

ue barbato, non distinguunt. solus enim aspectus ad Solem facit hanc differentiam. Nam si raptu primi Mobilis manè præuertat Solis ortum, barbatus est, quia cincinnus prior supra horizontem assurgit, & spectat in Occalum: vt nouissimus ille anni 1618. Si verò vesperti in hemisphærio nostro relinquatur ab occaso Sole, caudatus erit, & syrma trahet à tergo: vt alter anni 1577. de quo tam multa Tycho. Causa est, quòd cauda, siue barba semper iaciatur in partem Mundi contrariam Soli. Sed hæc crinium & barbarum materia abire debet in longiorem disputationem.

## ARTICVLVS I.

*Causa barbarum & villorum in Cometis.*

**R**ochmannus, & plerique vetustiores existimarunt, barbas Pogniarum, esse tenues & villosos capitis floccos, huic aut illi parti, temporibus scilicet, occipiti aut sincipiti, casu adhærescentes. Keplerus, & Snellius, effluuium quoddam, quo materia capitis se exonerat in partem à Sole auersam.

Dico Primò: Negari non potest, quin in Cometis, tam sublunaribus quàm cælestibus, tam ardentibus quàm solâ siderum luce conspicuis, flocci quidam rariores dependere, & crinire capita valeant. Patet exemplo Caprarum: & quia Cometæ omnes in circumferentiâ magis fungosi & lanares, quàm circa centrum capitis apparent.

Dico Secundò: Caudæ pleræque omnes illæ longæ, barbæ, iacula, hastæ, siue quo alio nomine censeantur, radij solares sunt per cerebrum (vt sic dicam) capitis Cometæ transuerberati. Ita Appianus, vterque Gemma, Tycho, & plerique iam vniuersi. Probatur, quia in omnibus Cometis, qui à centum iam amplius annis effulserunt, obseruatum est, caudas à Sole auertisse. igitur signum pænè euidens, radios per medium transadigi, & auersâ parte extundi. Primus autem qui huius rei publicum indicium fecit, ceterisque oculos aperuit, fuit Petrus Appianus, vt Tycho & Gemma Phrysius testantur. hic deinde in octo continenter idem obseruauit. Hoc enim, ait in Radio Astron. iam inde ab anno 1532. à nobis iugiter obseruatum est, quòd cauda siue coma semper rectissima projiciatur in contrariam Soli partem. quod etiam diligenter à Petro Appiano est primò in lucem emissum. Cornelius Gemma, filius eius, in Cometâ anni 1556. & aliquot aliis, id est, omnibus à se visis, experien-

rientiam patris adfirmat : & vniuerſi quotquot huc uſque ſecuti ſunt. imò talem etiam fuiſſe caudam illius, anni 1475. ex hiſtoriâ eius apud Regiomontanum intelligi poteſt. *Contingebat, inquit, ut ſtatim poſt Solis occaſum, cauda Orientem reſpiceret : appropinquante medio noctis, reſpiciebat Meridiem : poſt medium noctis reſpiciebat Occidentem.* Similis denique caudæ fuiſſe videtur iſte in Principatu Macrini, apud Dionem. *Sidus, inquit, ab Occaſu verſus Ortum multo noctibus caudam porrigens, grauem nobis perturbationem attulit.* Sol enim ante ipſum occidens, caudam ei in Ortum intendebat. Quoddè non in pluribus id Cometis animaduerſum, oſcitantia ſpectatorum factum eſt, qui de ingenio caudæ & totâ naturâ Cometarum parum ſolliciti, vix hilum poſteriorum ſolertiam adiuuerunt. Noſtra demum & proxima ætas cum magnâ curâ rem iſtam habuit, & ad ſecuturam adminicula tranſmitteret, quibus forte perueniet ad hoc arcanum.

Verùm experimenta quædam regeri in nos poſſunt. Lantgrauius enim Haſſiæ, inquit Rothmannus, notauit caudam Cometæ anni 1558. decem etiam gradibus deſſeſſiſſe ab oppoſito Solis. & Tycho caudam famoſi, anni 1577. Veneri, non Soli, directè reſpondiſſe : quod Snellius etiam in Cometâ anni 1618. initio ſaltem, factum affirmat : poſtea tamen ad Solis oppoſitum ſe correxiſſe. Ita doniq; Michaël Mœſtlinus aduertit in altero anni 1580. qui primò deuians, deinde in eundem circulum maximum reduxit ſe cum capite ſuo & Sole. Sed paucæ iſtæ exceptiones legem generalem frangere non poſſunt, quâ ſe cauda ſolemniter & ferè conſtanter auertit à Sole. cauſa igitur alia potiùs quærenda huius varietatis. ſicut etſi Sole lucente, acerrimè quandoque gelet, non ſtatim ideo dicimus glaciem à lumine (quod plerumque aliàs calorificum experimur) ſtringi, ſed aliam huius cauſam ſolemus inueſtigare. Itaque axis caudæ, ſiue linea ducta per mediam longitudinem, aberrat paullisper in latus, à lineâ quæ è centro Solis per centrum capitis Cometæ, in oppoſitum circuli maximi punctum tenditur; quia radius propter materiæ capitis profunditatem, & variam opacitatem, auertitur ne exeat directè in oppoſitum. vnde initio ſtatim id euenire ſolet, quando ſcilicet cerebrum Cometæ maximè opacum eſt, crudum, & indigeſtum. vbi autem opacitas ſe paullisper diduxerit, & laxauerit exitum, radius tunc emicat in directum. Hæc eadem videtur cauſa, cur cauda ſub principium ortûs Cometæ, non effundatur ſtatim prolixiſſimè : quia, inquam,

radij solares cunctanter, difficulter, & malignè per obstantia, & nimis adstrictam capitis opacitatem in aduersum eluctantur. postea verò, digesta nonnihil materiâ, longius se eiacularur: donec halitu rarefcente, & vanescente, accidatur paulatim, & tandem vnâ cum capite expiret.

Quòd autem axis eius aliquando in oppositum Veneris exeat, ideo fortè est; quia Venus argenteâ & satis vberi luce, propinqui Solis radium iuuat, vnaque se per Cometæ caput transfundit. Non fuit etiam verum, Cometam anni 1558. tot gradibus à Solis opposito diuertisse. Nam Cornelius Gemma Louanij eodem tempore, quo Lantgravius Cassellis, eum obseruauit, caudamq; paulominus in oppositum Solis spectasse dicit. & Tycho Gemmæ potius credit: suspectatque Lantgrauij obseruationem, quia Torquetum, quo vsus, vidisse se, & vitiosum deprehendisse asseuerat.

Ex superiori etiam doctrinâ, non difficulter intelligi potest, cur aliquando cauda discindatur, & in ramos plures se spargat, quod in illo anni 1577. Cornelius Gemma tradit: aliquando etiam subito in caput retrahatur, & iterum se explodat; vt in nouissimo anni 1618. semel factum, Cysatus affirmat. hæc enim omnia dispositio partium cerebri in capite, item agitatio & motus, quo nunc viam radiis obstruit, nunc rursus aperit, efficere valet. Similis causa Pogoniam in proprium Cometen, aut retro, transformare potest. Ita Olympiade cVIII. iubar effigies mutata est in hastam, ait Plinius. Generatur enim vndique in orbem crinitus Cometes, quando radij confertim & vniuersi caput percudere non possunt, sed hæc illac disperguntur, & rebulliunt in superficiem, eamque coronant. Euenit autem aliquando, vt qui initio materiam non perruperint, postea halitu se dissolvente, viam reperiant.

Alio etiam modo è crinito Pogonias, aut contrâ, fieri potest: per accessum videlicet, aut recessum à Sole. Si enim Cometes Soli oppositus secundum Zodiaci longitudinem fuerit, sine syrmate aut barbâ, capite tantum comanti apparet; qui motu proprio ad Solem paulatim barbâ promittere incipit, aut extendere eandem, sicuti retrò, fit vt barbâ sensim artondeatur, quòd propius ad oppositum Solis accedit. id enim Tycho in Cometâ anni 1580. & Rothmannus in anni 1585. notauit. hic enim vbi ad oppositionem peruenit, perfectus Cometes factus, cano capite, dependentibus vndique villis. Ratio esse debet, quòd & radij Solis per tantum intervallum traiectionis, debiliores, & si quis est, cincinnus per capitis

pitis verticem directà in cælum è regione Solis exeat; vt non facile à nobis hinc cerni valeat, præsertim si fuerit valdè excelsus: caput enim tum cirro & comæ in altum surrectæ obstat, tegitque, ne longitudo eius videatur. quod etiam situs ille stans & in cælum erectus facit. nam columna etiam longissima, si oculo multò altior, breuissima tamen, aut etiam in globum contracta apparet; quia rectitudo eius non satis longitudinem explicat, & omnia superficiei puncta sub acutissimis angulis conspiciuntur. Et hinc etiam fiet, vt talis Cometæ caput, caudà, ceu orbiculari & vndique cingente comâ, inuolutum esse videatur.

Hoc etiam argumentum ferè mihi effugerat, quo olim in Cometâ anni 1618. ostendi barbâ radorum solarium fasce figurari. Die enim duodecimâ Decemb. mirabar horâ nonâ. decimâ, & porrò ad mediam noctem, ne pilum barbæ sub rotis Plaustrî à me videri, vbi tamen manè prolixissimam conspexeram. tandem verò post mediam noctem, cum Sol, & Cometa, qui Solem paululum antecedeat, reuerti ad horizontem nostrum ortium inciperent, barba iuxta Plaustrum paullatim redire & formari cœpit, tenuissimo primùm & albente tractu, vt planè matutina crepuscula solent: qui tamen sentim sumebat incrementum, & incendebatur, quò propius Cometæ caput & Sol ad horizontem & ortum accederent. Dixi tunc, & iam repeto: hoc argumentum nullâ specie eludi posse, quin conficiat, barbâ illam radios Solis fuisse per Cometæ cerebrum cuneatos. Nulla enim alia vel apparenter causâ fingi potest. Ideo autem albentes illi barbæ tractus tanto tempore auroram præuertebant, quia Cometæ caput longè altius omnibus vaporibus erat, qui prima manè crepuscula rapiunt: & proinde barbâ, quæ tali capite per altissimi ætheris spatia profundeabatur, necesse erat maturius apparere. quò enim aliquid excelsum est, eò citius exoritur, atque in oculos venit.

## ARTICVLVS II.

*In quâ materiâ lux illa caudæ Cometarum sustentetur.*

**E**Tiam hoc difficulter extricamus. Keplerus existimat, effluuium quoddam exhalationum ex capite, per radios Solis in plagam oppositam expelli, idque Cometæ caudam, & subiectum illius lucis esse. Verùm cum radij, corpora non sint, quæ instar cuneorum adacta, materiæ partem ante se extendant, sed accidentia,



quæ rarefaciendo solùm, tenuiore & leuiore spiritu sponte, quàm potest, diffugiẽte, caput exonerent, non est facile intellectu, cur non vndique, & maximè per partem capitis, Soli vicinissimam, quæ acrius in ingressu radiorum vri videtur, se halitus illi expirent. Deinde, quomodo caput nõ statim excerebratur & euanescit tam largo, profuso, & perpetuo multorum dierum effluuiò? Certè enim Cysatus barbam Pogoniz anni 1618. aliquando spatium 445. terræ semidiametrorum, id est 382700. mill. Germanicorum occupasse putat, aded vt totum terrarum Orbem septuagies potuerit circumligare: cum tamen caput, vnde flumen illud effundendum erat, non supra 550. mill. Germanica habuerit in circuitu. Denique, cur cauda toties capite, vnde expellitur, leuior, non resupinat se semper & surrigit in cælum?

Alij ergo malunt, inter exhalationes & strigmenta ætheris latissimè, circum diffusã, caput Cometæ incedere, iisque velut innatare. hæc autem licet rariora sint, & magis transparentia ipsò Cometâ, reliquum tamen æthera densitate & opacitate vincunt, ideoque lumine Solis colorantur. Sed quare igitur, inquires, color iste non vndique in orbem circa Cometam sparsus apparet, cum tota illa exhalatio lumine perfundatur? Respondet ingeniosè Licetus: Quia à fronte, quàm Cometa respicit Solem, & lateribus, nimiam luce opacitas exhalationis diluitur, vt reliquo ætheri similis videatur: non ita trans Cometæ caput, vbi umbra capitis, opacitatem quodammodò adiuuat, & lumen inumbratum irrufat, vt nigriori, & à circumfluo æthere, discolori specie appareat. Indignor professò, tam pulchram rationem falsitatis mixturâ esse deformatâ. Nam, quantum hîc cernimus, nec remissius in umbrâ lumen, specie rufi se oculis obiiicit. & deinde, cum Cometæ plerique omnes, orbe solari longè sint minores, umbras iacent pyramidas, latissimas statim à capite Cometæ, consumentesque se deinde paullatim, & finientes in conum. quod tamen minimè respondet figuris caudarum: quæ imagine potius scoparum plerumque visuntur, in exitu capitis angustissimæ, & thyrium satis gracilem habent, in fine dispersæ in muscarium. Itaque in oppositam totâ diametro sententiam (pedetentim tamen & morosè, vt in re anxiâ) discedimus. nempe, plurimam & vberriam lucem, à radiis Solis intra cerebrum capitis aggregatis, caudæ infundi dicimus. Imaginem huius refractionis putant quidam habere in globo vitreo solido, aut aquâ pleno, ita radio solari, per angustissimum foramen in conclaue obscuro



obscuratum illabenti, exposito, vt pars radiorum in parietem album incidat, pars margine vitrei globi excipiatur: sic enim speciem syrmatis non longè à comis illis Cometarum abludentem videbis. Verùm non constat vndique similitudo. nam caput Cometæ, solidum quoddam, densum, & continuum non est (vt antè satis, ni fallor, ostendimus) quod ita lumen aggreget, & ad perpendicularem refringat. condensantur tamen, & in nodum quasi vnum contricantur radij, propter qualitatem fortasse materiæ cælestis, quæ tenuissimâ veluti scobe & ramentis, infinitisque superficiebus constat, quæ lumen sibi inuicem dant redduntque. Radij tamen Solis non toti in illâ capitis materiâ consumuntur, sed longius in caudam traiciuntur, adiuti insuper & intensi à luce quæ in capite adhæsit. Cauda verò è capite, æquali circiter cum ipso latitudine, emicat, deinde radijs se dissecantibus rarefcit & dispergitur: eo ferè modo, quo cælo guttante & substillo, Sol per quædam nubium foramina, radios & virgarum veluti fascies iaculatur, in exitu strictos & compressos, sed paullatim se diducetes & spargentes vsque ad terræ contactum. Sed quomodo in raro & liquido æthere apparere potest lumen caudæ? Quia minima densitas sufficit ad reflectendum. color enim ille cæruleus, quem putamus hæere in fornice cæli, lumen ab altissimo aëre, siue æthere, ad nos reuerberatum est. quia licet vnaquæque pars illius aëris profunditatis paucum, nec satis sensibile lumen reflectat; vniuersa tamen simul in summam vnâ, quod facili cerni possit, conferunt. quia verò etiam plurimæ minutæ umbræ, & minima infinitarum partium aëris opacitasia vnum confunditur; ideo lucem, quæ aliàs candida est, inclinant in colorem cæruleum. Si autem contingat tractum aliquem ætheris vberiori & velut inculcato lumine perfundi, tunc illicò discrimen se prodet, & interlucebit illè, candoremque ostendet in cæruleo aut virenti vtrimque ætheris campo.

Sic ergo coloratî imaginor caudam illam Cometæ. Adde, iam non ambiri Cometam purissimo æthere; sed multos exhalationis rarioris floccos, aut tenuem puluisculum, qui capite expiratur, comitari. hic autem extra caudam Cometæ, lumen Solis non ita plenè, vt insigniter luceat, bibit; sed siccius & dilutius quàm cauda, quæ & à capite & à Sole abundantius perfunditur. Hæc tamen non omnino mihi mentem implent. sed abeundum tamen iam est vel semisamelico.

## ARTICVLVS III.

*Causa curuaturæ cauda in Cometis.*

**C**Vin ex Opticâ doceamur, ait Keplerus, radios luminosos, arcus non esse, sed lineas rectas; curuaturâ syrmatis Cometarum in motum materiæ è capite in caudam ebullientis referenda videtur. Sed non mihi. quia veluti fumi & spiritus incendio exhalantes non vno & constanti modo sinuosi sunt, sed in varias spiras & figuras se torquent: ita caudæ illæ non eodem schemate curuæ aut directæ tot diebus permanerent. Cauda Cometæ anni 1618. initio Decemb. cum primùm vidimus, in Austrum falcata erat, direxit se deinde, postremò concavum obuertit Septentrioni, & sic porrò perseverauit in finem. Similis ferè mutatio accidit in caudâ Cometæ anni 1596. & 1580. & 1577. Imò Keplerus lib. Astron. Opticæ cap. 6. num. 13. nec sine ratione existimat, curuaturam & gibbum caudæ, constanti lege ad eam Mundi plagam extuberare, in quam tota cauda ab opposito Solis deflectit. *Adcò, inquit, ut deflexus cauda à Solis diametro, nihil aliud quàm pars curuaturæ sit.* hæc ergo caudæ sinuatio tribuenda non videtur turbido & incondito effluuiò materiæ è capite Cometæ.

Guiduccius refractioni potiùs imputat: quomodo etiam remus in aquâ incuruus apparet. Sed aliud reperire oportet: nam sic iuxta horizontem, vbi maior & plenior vaporum abundantia, maximè curuam & arcuatam esse oporteret. non est tamen: imò non alibi, quàm circa horizontem, caudam Cometæ anni 1618. Cysatus & ego directiorem aspeximus. rectissimo enim radorum tractu surgebat, qui paullatim in ascensu versus Meridianum se falcabat. Nec in hoc tantùm, sed solemne etiam fuit in ceteris Pogoniis.

Tycho ergo & Cysatus censent, reuerà caudas omnes rectas & infestas esse; arcuatas tamen videri, quia pars vnâ oculo vicinior, obtusiori angulo, altera remotior, acutiori cernitur. Ita enim in tabulato aliquo quod oculus suspicit, pars capiti imminens, altior, quàm alia remotior, apparet. nam oculus in totâ tabulati longitudine duo puncta æquæ distantia non reperit; sed remotiora acutiori angulo, vltimum verò acutissimo omnium conspicit: quod proinde pauimento propinquissimum apparet, licet totum tabulatum rectum & horizonti ac pauimento parallelum sit, vt ex Vitell. lib. 4. theor.

theor. 3. 1. sumi potest. Sed hoc difficultatem non exhaurit, imò integram & plenam relinquit. Explicat enim solum, quomodo pars caudæ horizonti vicinior, depressior & terræ magis admota appareat, curuaturam in Austrum aut Septemtrionem deflexam non expedit. Nec causa ista adhiberi potest curuitati illi, tamen maximæ, quam Cometa per verticem transiens, dum in Meridiano ipso iacet, ostendit. Denique sunt, quibus satis est, curuaturam hanc, similitudine candelæ celeriter per aërem raptæ, depinxisse. motus enim iste, flammulæ pyramidem sinuat, & conum retro reflectit. Sed frustra. sic enim semper curuatura caudæ à lineâ motûs se auerteret. cùm tamen caput Cometæ & caudæ cuspis arcum aliquando faciant circa neruum per quem Cometa incedit. vt in illo anni 1618. vidimus. Item si cauda, radij Solis sunt, defendi ista opinio non potest. Quid ergo dicemus? ignorantiam hîc fatebimur (quod ingenuè faciunt Tycho & Keplerus) & latere etiamnum causam in Naturæ arcanis? Aliquid tamen etiam, ne obmutuisse videamur, coniectemus. Quid si quispiam quandoque, è cælesti aut aliâ exhalatione, lenis ventus barbas illas afflando sinuat? Quod tamen non omnino placet, quia etiam Cometæ caput fluuaret, & barba in vnam eandemq; curuaturam tam pertinax non esset. Quid si igitur (vt in caudis auium, & præsertim picarum, cernere est) quædam radiorum, vt sic dicam, in latere vno pennæ, mediis breuioribus, citra finem caudæ deficiant? ibi enim latior, & gibbo quodam intumescere apparebit. Sed cur in alterâ parte sinum facit, & se cauât? Accipe hoc, & abi, neque pluribus interroges. Quia radij ibi nulli, aut rariores quàm vt expresse, vt ceteri densiores, cerni possint. cavitatis ergo apparer, quia luce tenui & semiplenâ pars illa oculos effugit. hinc enim non statim à capite, vbi radij magis compressi & vberiores, sed aliquanto pòst, & circa medium sinus & curuatura insignior se aperit.

Sed quàm neque hoc, neque quidquid aliud prospicio, mihi intellectum in tranquillo ponit! Ite nunc Mortales, & acie illâ diuinâ rimamini & penetrate, quam vnus etiam Cometæ barba vobis hebetat & obtundit. Verè *mirabilia opera Altissimi, & gloriosa, & absconsa!* Hic fructus Philosophiæ nostræ, & studij quod in omnem Mundi partem mittimus, confessio imbecillitatis, & spontanea intellectus nostri, in tenebras Fidei diuinæ, abiectio, quæ alibi ferè vbique sic etiam caligantem experimur. Quid in arcanis illis & abditissimis diuinæ Triadis, Incarnationis, Eucharistiæ,

Prædestinationis, recessibus euidentiā à me exigis, quam in vno Cometz, imò tuo crine, mihi præstare non potes? Dic enim, quā materiā ē mento suspendas illam barbā? dic, quæ causā, vbi statim emicuit, ei duritiem istam faciat, & colorem? De hac enim lanā caprinā animosè rixantur Galenus & Argenterius, ceteraque columina Medicorum. Quam substantialem formam in barbā tuā locasti? fateberis, scio, ignorantiam. Sed audi, quid Magni Medici te fecisse autument. Plurimi inaniam, multi vegetatiuam, Clar. Fienus rationalem etiam animam, putant. Iam nota, & isto oculo cælum & Solem postula inspicere. Nec tamen ideo statim effodiendus est, quod faciunt scelerati quidam. humanæ, inquam, mentis imbecillitatem in mortalitatem eius ducunt; & quali gratias agere metuant, diuini muneris præstantiam adulterant aut corrumpunt. Ingratæ creaturæ in suum Creatorem! Scilicet, quia Angelis pares non sumus, suppare manere non possumus; sed ad porcos statim, cum sociis Vlyssis, descendere oporteat, & intrare haram. Audiamus veracem potius & cælestem linguam.

*Minuisti eum paullo minus ab Angelis, gloriā & honore coronasti eum, & constituisti eum super opera manuum tuarum.* Ita est, non tam acutum quàm Aquilæ illæ cælestes, quàm Angeli, inquam, cernimus: nocturnæ tamen plurima in tenebris nostris videmus; ad quæ non adspirant oculis, & omni cælesti luce capti isti talpæ. Cogita quàm multa de cælo & Mundo, Deo & Angelis, præteritis, præsentibus, futuris, eternitate ipsâ, virtutibus & vitiis, philosophemur, & infinitum inter nos & brutorum genus interuallum despicias, inspuesq; impurissimo istorum Epicureorum ori. Sed eos in libros de Animâ differamus, vbi pluribus vapulabunt: maneant quæ ipsi tantisper, nisi redire malint, inter pecudes & iumenta: digni mediis fidiis, qui cum Nabuchodonosore comedere fœnum, aut cum Asino Apuleiano fæcinas dorso gestare cogantur. nos, homines esse perseueremus.

## ARTICVLVS IV.

*De motu Cometarum.*

Cometarum motus potest esse vetus vel apparens. Apparere enim moueri Cometæ elementares & ignei possunt, licet tueri non faciant, si exhalatio vna aliam accendat; vt in stellis disc-

currentibus est explicatum . Ita fortasse aliquando Cometæ visi ad terram decurrere, aut subito & diffuso incendio comprehendisse magnam cæli partem: nisi hoc factum tamen, euibratâ derepente & dispersâ comâ.

Veros motus plerique Cometarum duos habent: primum ab Ortum in Occasum, secundum primi Mobilis, & æris siue ætheris in quo natant, raptum; alterum, proprium, ab Occasu in Ortum, aut à Septentrione in Austrum, aut retro, ab Austro in Septentrionem.

Ab Occasu in Ortum Cometa Vogelini anno 1532. & Tycho-  
nis anno 1577. reciprocant. A Septentrione in Austrum, duo à Senecâ, vnus sub Claudio, alter sub Nerone, conspecti. eodem enim Septentrionis loco enati, Claudianus per Occasum, Nero-  
nianus per Ortum deflexit ad Meridiem.

Sed plurimi iter intendunt in Septentrionem. Fecit hoc magnus ille sub Theodosio, de quo lib. 12. cap. 37. Nicephorus; alter item anno 1475. à Regiomontano celebratus, & alius anno 1533. de quo Gemma Pater, in Radio Altron. *Vidimus, inquit, Cometam anno 1533. in Iulio, ab Hirci sidere secundum via Lactæ ductum, motum per Cassiopeia sidus, hoc est, simul in præcedentiâ Signorum, & longè in Boream.* Talis etiam ille initio sæculi elapsi visus à Vicomercato (annum non designauit) qui iuxta Virginis Vindemiatri-  
cem natus, inde in Septentriones elapsus, voluminibus Draconis implicitus exspirauit. Talis deniq; nuperus & famosissimus noster anni 1618. Et simul obseruo plerosque affectare iter per Booten & Vrsam maiorem. Aliqui etiam iuxta Polum exorti, per medium ipsum transgressi in partem alteram. vt ille apud Claudianum, de Bello Getico:

*Qui primum roseo Phæbi prolatus ab Ortu,  
Quâ micat astrigerâ senior cum coninge Cepheus;  
Inde Lycaoniâ paulatim expulsus ab Arctō,  
Crine vago, Getici fadant sidera plaustris,  
Donec in exiguum moriens vaneſceret ignem.*

Sed quæ causa huius proprii morus? Res iterum in abdito & nebulosa. Vicomercatus tam simplex est, vt putet, ignem Cometæ prioris, quasi per stupam, venâ pabuli inuitatum, longius serpere, generarique nouum perpetuâ serie Cometen, non eundem ex vno in alium locum transgredi. Sed si vniuersim ita est, numquam diu sub eodem circulo maximo Cometa incedere parebit:

sed incerto & fluctuanti motu huc illuc, quò materia vocabitur, discurrere, vt volantia sidera solent, videbis.

Rothmannus, nec displicet Tychoni, Angelo hanc curam adscribit, & vnico ictu expedit se omnibus molestiis. Et profectò, si Cometæ motu proprio, circulum circa Solem ( vt Planetæ, Tychonico, & valde omnibus pænè iam probabili systemate, faciunt) aut circa aliud quodcumque centrum, decircinent, vix post longam fatigationem, aliam causam reperiarn: nisi fingas à propriâ formâ abire in hanc aut istam Mundi partem. sed incredibile est, omnes Cometas formâ substantiali disterre, qui carpunt diuersum iter. Et quidni ergo Angeli qui Planetas regunt, etiam Cometa- rum (qui temporanei quidam Planetæ) habenas accipiant? Quo fine? inquires. Incerto nobis. & quàm multi alij nos latent? vel certè isto: ad mortalium terrorem, & impendentium malorum metum. Verùm in effectibus istis tam naturalibus, vltimum effugium ad Angelos & occultas causas esse oportet, & vbi nullæ viæ, nullæ semitæ aliorum perumpi possunt.

Galilæus & Guiduccius verò hâc conantur. Cometam rectâ lineâ à centro terræ in cælum à propriâ leuitate portari existimant; nec vilo alio motu circulari, quàm raptu primi mobilis, circumferri. Motus autem ille rectus proprius, habet imaginem circularis: quia quò Cometa terræ vicinior, & maiorem parallaxin subit, eò depressior apparet: cùm verò ascensu parallaxin diminuerit, versus zenith & verticem nostrum se ad mouisse iudicamus. Imaginem huius rei tenuem, sed facilem intellectu, in alaudâ aue habemus: quæ se rectâ in cælum leuans, speciem tamen sub circulo maximo volantis præbet. vbi enim primùm terram deserit, segmento circuli horizontem tangenti respondet; deinde paulatim ascendendo, reliquis eiusdem circuli superioribus segmentis subuolare apparet. Idem fit in sagittâ rectâ sursum emissâ, ac per axem ipsum horizontis.

Hæc sententia prope verum est, sed nequedum attingit. Nam, vt optimè aduertit Camillus Gloriosus, nullus vmquam Cometa pet verticem nostrum transire parèret; quod tamen nouissimus iste anni 1618. fecit. Sequere enim oculo, aut imaginatione alaudæ aut sagittæ illum volatum, & ad ipsum etiam Firmamenti fornicem producas, numquam trans zenith & caput tuum ire videbis. Deinde Cometæ supra Lunam nati, vix vno aut altero gradu sic gressum promouebunt motu proprio, toto tempore durationis.

Ita-



Itaque verius est, quod Keplero & Cysato nuper visum: Motum Cometarum proprium, traiectionium & transuersalem esse, non circularem aut rectam sursum. Similis, inquam, est traiectionibus illis ignitorum, quæ non lineam ad terram perpendiculari, sed obliquam, & ut Aristoteles loquitur, per diametrum quadrati deferuntur. Probatur, quia hac una ratione, & causa efficiens illius motus, & incessus sub eodem circulo maximo, & quidquid aliud est, quod tam impense omnes admirantur, utrumque sic expediti poterit. Nam aufertur sursum à proprio, & cum quodammodo animante, spiritu Cometa. oblique autem, à simili causa, quæ traiectiones aliarum, ut fulmen & stellæ cadentes, transuersim deuolant in terram. id est, grauitas in capite Cometæ residua, rixam aliquam baiulo & succollanti spiritui facit. itaque lineam transuersariam per ætherem, in altum traiecit, si perpendiculari, & à centro terræ educam non valet. medium etiam secandum, & nonnihil fortè resistens, obliquitatem aliquam creare potest.

Eidem etiam circulo maximo subrepre apparet; quia linea illa traiectionis, recta est, quantum saltem hinc ex tanto intervallo cernere licet, & subtensa segmento circuli maioris. Imaginare globum tormenti oblique de cælo Lunæ (ut statue in angulo semirecto, & sexto puncto eleuationis, si vis) in polum Arcticum explodi, omniumque Planetarum vias traicere, sub circulo maximo & mediâ semper Firmamenti cameratione volantem hinc aspiceres, nisi tam paruus esset. existima iam sic traici à propria leuitate Cometam, & quod te deducere volebam, tenes. Interea tamen etiam motu ætheris ab Ortu in Occasum fluit, nec dissoluitur, quia æther tenuissimus, & facile se diuidi patitur ac cedit. ita aluo magnæ nauis, à prorâ ad puppim, inambulans, nullum aëris ibi concludi renisum experitur, etiam si hic cum naui in contrariam ambulanti partem tendat.

Initio autem celerissimi sunt Cometæ; quia spiritibus tunc magis turgent, & viribus integris sunt; quæ paulatim deinde hæc illæ, rarefcente à calore & radio solari halitu, se expirant. Quia verò quandoque circa medium plurimi spiritus simul & subito in raritatem dissoluuntur, qui antea pigri & densiores erant, ideo in saltus quosdam aliquando visus se concitasse Cometa. Deinde in principio, cum videlicet terræ propinquior est, æquales partes lineæ traiectionis eius, maioribus circuli in cælo maximi segmentis subtendi videntur, ideoque Cometæ caput oculis mo-



ueri; vt à paullisper etiam in Opticâ exercitato facîle intelligitur.

Sed quare plures Cometarum in Septemtrionem motu proprio nituntur? Hic hæreo. nec scio quâ extricem, nisi hoc sit: Raptus ætheris à Planetis cum secantibus, aut, si mauis, à primo Mobili, ab Ortu ad Occasum, circa Æquinoctialem & cæli medium, quàm circa polos Mundi, rapidior est. & hinc Cometa in æthere Zonæ torridæ natus, & eum traicere sursum obnitens, in latus, vbi elementior raptus, & æther veluti stagnans, sensim deducitur: sic-que leuitate Cometæ molliorem transitum veluti quæritante, ad polos Mundi, Austrinum aut Boreum submouetur. nisi hic iterum ploras, & imploras openi Angelorum.

## ARTICVLVS V.

### *De magnitudine, & duratione Cometarum.*

**C**ometæ primo exortu plerique omnes maximâ mole apparent: & quia terræ propinquissimi, & quia carpuntur deinde, ac rarefcente capite cerebrum & spiritum vitamque postremò erogant.

Si autem veræ sunt hypotheses Astronomorum de amplitudine Planetarum, & inter eorum orbes Cometæ penetrant, non potest, quin hi etiam ingenti mole sint, cum ex tam altâ distantia & diametro satis amplâ & insigni à nobis conspiciantur. Hinc Cometam anni 1577. die 13. Nouemb. cum primum ab eo visus, eratque apparens diameter 7. minutorum, distantia verò ab oculo, 210. terræ semidiametrorum, statuit Tycho bis ferè Lunâ minorem, habuisseque in verâ diametro, milliaria Germanica 368. Nouissimum autem istum anni 1618. Cysatus 550. milliariibus Germanicis per anbitum circumscribit. quem proinde duobus vix mensibus quis circumcurrisset quotidiano decem milliarium Ger. itinere. diametro autem eius milliaria Germ. 175. donat. Regiomontanus verò diametrum Cometæ anni 1475. ad 16. milliaria Ger. Vogelinus alterius, anni 1532. ad vnicum milliare & quadrantem, restringit. Sed Tychoni, & pluribus videntur aberrasse in metiendâ distantia à terrâ, ideoque capitella istorum Cometarum nimium circumcidisse.

Longitudo cometæ etiam est inconstans & incerta. Tycho in caudâ sui Cometæ anno 1577. sex & nonaginta terræ semidiametros (quarum quælibet 860. milliaria Ger. continet) Cysatus in  
barbâ

barbâ anni 1618. cùm prolixissima fuit, quadringentas quadraginta quinque, id est milliaria Ger. 382700. inuenit. vnde septuagies totum terrarum Orbem circumligare per circulum maximum potuit. Suffecit tamen Vogelino, syrnati Cometæ anni 1532. milliaria Ger. 182. dedisse.

De duratione Cometarum, lib. 2. cap. 25. sic decernit Plinius: *Breuisissimum quo cernuntur spatium, septem dierum annotatum est; longissimum, octoginta.* Mendum tamen hic subesse, & litteram C. numero excidisse putat Muretus, & Plinium scripsisse, *longissimum, C. octoginta.* Consentienter scilicet magno Senecæ, qui lib. 7. Nat. cap. 21. *Sex mensibus hic, inquit, quem nos Neronis Principatu latissimo vidimus, spectandum se præbuit.* Reuerà enim hunc ignorare non potuit Plinius, qui tunc etiam vixit, & omnia sciuit. dies autem 180. sex mensium æquant ambitum. Iosephus tamen Xiphiam quemdam toto anno supra Ierosolymam pependisse narrat, ante eius excidium. Sed tam pertinax duratio est insolens in Cometis. altra verò quæ nouitia, & attonso capite sine comâ effulgent, vitaliora sunt. nam Cassiopæanum anni 1572. solidum annum & trientem, alterum in pectore Cygni annos iam 26. edurauit, appareteque non valde festinare ad interitum. Tota diuersitas durationis in materiæ contumaciâ, & propinquitate viribulq; Solis reponi debet. tam diu enim Cometes viuit, quàm materia contra digerentes se dissipantesq; radios continere valet. Nouitia autem sidera facilius fortasse ætatem ferunt; quia altissima, & ipsi Firmamenti concamerationi fermè adhærent, adeoque non pleno illo (vti Cometæ) & torrenti radio Solis, è vicino perfunduntur, sed extremo solùm & morienti mucrone, ac blando molliq; Fixarum lacte inalbantur. Porro ætas Cometarum magis solemnis, est trium aut duorum mensium, aut sex hebdomadarum. tanta enim ferè Cometæ anni 1475. 1577. 1618. & aliorum passim.

## ARTICVLVS VI.

*Quo tempore anni plures Cometa.*

**O**Mnibus anni mensibus Cometæ quandoque exoriri, sed plurimos tamen autumno & hieme, historiarum fide ostendi potest. Causa obscura: & quæ sine dubio Aristotelem pertraxit, vt Cometæ omnes, terrestres decerneret, trabium scilicet & caprarum igneos fratres: qui, vt cetera meteora ignita, ideo autumno præci-

præcipuè vifantur, quia multæ tunc æftiuorum halituum reliquæ in aëre etiamnum pendent, quas Sol imbecillus & ad Capricornum recedens, abfumere non valet, aut diffipare ne in vorticem coëant, & Cometæ nodum. Et profectò argumentum validum apparet, ac quod terreat primâ specie. Sed benè inſpectum, non facit. Cùm enim Cometæ quidam, etiam circa altiffimos Planetas, & ad ipſum præne Firmamenti fornicem conſiſtant, non poſſunt tam breui aliquot menſium ſpatio, imò neque multis annis, à terrâ, etiam ocyſſimo aſcenſu, ad illam altitudinem peruenire. globus enim tormenti rectiſſimâ lineâ & per axem horizonſis in cælum exploſus, vix annis nonaginta ad Firmamenti contactum pertineret, etiam ſi horis ſingulis milliaria ducenta peruolaret; cùm tamen centum ſolùm & octoginta faciat. expertum enim eſt, ſingulo quoque horæ minuto, tria circiter ab eo percurri. Vide ergo, quot annos exhalationem terræ tantò ſæpè lentiorẽ, & tranſuerſario, non recto, motu expulſam, impendere oporteat, vt ad iſtam excelsitatem, vel dimidiam, aut quartam eius partem aſcendat. Non igitur ea quæ initio autumnii, aut æſtate antecedenti adhuc in terrâ fuit, poteſt in fine illius, aut hieme, tam alta ſuſpici.

Deinde Cometæ quos autumnio hîc adſpicimus, non *Septentrionalis* noſtri plerumque & terrigenæ ſunt; ſed è Zonâ torridâ, vt nuperus anni 1618. aut aliunde, ad Septemtrionem veniunt. Igitur ſi exhalatione terreſtri conſtant, non è climate noſtro aut Zonâ hac temperatâ, ſed ex aliâ, vbi autumnus fortè non erat, in cælum aſcenderunt.

Dico ergo Primò: Autumnio plures apud nos Cometæ terreſtres & ſublunares, eâdem de cauſâ, quâ frequentiora meteora alia ignita, ſunt.

Dico Secundò: Etiam Cometæ cæleſtes tunc faciliùs concreſcunt; quia Sol à Signis Septemtrionalibus diſcedens, halitus Planetarum corporibus extractos, in nubem & Cometæ globum ſinit coire.

Dico Tertiò: Aliquando à Sole circa æquinoctium autumnale, & vltrâ in brumam ſe verſante, euadunt in Septemtrionem Cometæ: quia materia ibi reſoluta, vires radiorum citiùs effugit (Sole præſertim in contrariam partem tendente) quàm diſpergi valeat, aut digeri.

Dico Quartò: Magnis Planetarum coniunctionibus enaſcuntur non rarò Cometæ; quia cœtu illo, & mutuâ è vicino irradi-

diatione spiritum fortè eliciunt , & materiem Cometarum.

Dico Quintò: Non solùm raptus Cometarum ab Ortu ad Occasum rapidissimus est, quia 24. horis circumcurrit circulum, orbitæ alicuius Planetæ parem: sed etiam motus proprius, quo è Zonâ torridâ v.g. paucis diebus in Septemtrionem elabitur & nostrum autumnum. Quod facile æstimabis, si perpendas, vnum aut alterum gradum, quem quotidie conficit, in cælis siue circulis Planetarum, multorum milliarium esse spatium.

Finieram, nisi hæc etiam clausula venisset in mentem. Cur motus proprius quorundam Cometarum, in fine, cochleæ instar, se torquet, & paulisper à circuli maximi segmento defleat? hoc enim Doctiss. Cysatus, hoc Eruditiss. noster Godefridus VVendelinus, Vir ampliore fortunâ dignissimus, in Cometâ anni 1618. notauit. Non existimo, quia plures stellulæ, ex quibus Cometa compactus sit, in vnâ Mundi partem, quàm alteram discedant, vt putat Cysatus (hanc enim Cometæ, è sideribus quæ nunc gregatim incedant, nunc se iterùm dispergant, concretionem iam ante reiecitimus:) sed quia Cometa extremis admotus, euandus, & vacui ferè capitis, tenui & imbecillo spiritu vectus, facile se motu raptus, aut ab aliâ causâ, in latus depelli sinit. vel certè, quia circa finem reliquæ spiritûs se hæc illâc displodunt, aut effundunt, & titubatione agitant velut ebrium caput. Imago huius in pyrobolis nostris est. puluis enim initio multus & accensus rectâ sursum aufert: in fine verò rectitudinem torquet & deprauat.



LIBERTI FROMONDI  
 METEOROLOGICORVM  
 LIBER QVARTVS:  
 De Ventis.

Pfal 134.

Ecclef. 11.

Ioan. 3.



VENTORVM scientiam in difficili & abdito esse significat Regius Psaltes: *Qui producit ventos de thesauris suis*. id est, potentiâ Dei secretissimâ, & ditissimâ, quæ numquam exauriri potest; vt interpretatur Illust. Card. Bellarminus. & Ecclesiastes: *Quomodo ignoras quæ sit via spiritus*, id est, venti, & quâ ratione compingantur ossa in ventre pregnantis: sic nescis opera Dei, qui fabricator est omnium. & Veritas: *Spiritus ubi vult spirat, & vocem eius audis, sed nescis vnde veniat, & quò vadat*. Nos tamen quod meditatio & longa observatio docere potuit, enarrabimus.

Ac in primis, quod solemus, doctrinam Aristotelis, & causas ventorum in compendium dabimus: omniaque deinde in disputationem longiorem mittemus.

Causa ventorum materialis Aristoteli, est *exhalatio sicca & cruda*. Formalis, *motus ille transversalis per terram*. vnde quia ventus, compositum quoddam accidentarium est ex halitu & motu illo locali, immobilis (quod mireris) est; quia forma & motus quo constat, transferri idem numero nequit de loco in locum. sola ergo exhalatio, quæ materia venti est, mutat locum. Causa efficiens proxima est illa quæ in halitu producit immediatè venti formam siue motum. Est ergo *impetus quidam*; si verum est, impetum distingui à motu, & esse instrumentum generale omnis alterius causæ mouentis, ad efficiendum localem motum. Ille verò impulsus, vel ex repulso nubium, vel à propriâ exhalationis refrigeratæ gravitate nascitur; vt docebimus statim. Causa finalis est, *euentilatio aeris, & utilitas animantium*. præter ceteros effectus, ad quos, vt fines, adhiberi possunt venti, vt cernere erit infra.

CA.

## CAPVT I.

*De causâ materiali ventorum.*

## ARTICVLVS I.

*Materiam venti non esse aërem.*

**P**LVRIIMI Veterum, vt apud Aristotelem & Plutarchum videre est, aërem in materiam ventorum traxerunt. quos postea nuper secuti Cardanus lib. 1. c. 1. Variet. Copernicus lib. 1. cap. 8. Reuolut. Bodinus lib. 2. Theatri, Benedictus Epistolâ ad Pancrat. Melanum. His omnibus placet vetusta Hippocratis definitio, Ventum nil aliud esse, quàm *aëris fluctum*. Et disertè dudum ante ipsos Seneca lib. 5. Nat. affirmat, aëra tranquillum hoc à vento distare, quod à flumine lacum.

Vt ergo aqua lacustris, si per alueum effluere incipiat, fluminis accipit nomen: ita aër silens & stagnans, ventus fiet, si in vnam aliquam partem impetum ceperit, & spiret. Et profectò ventum aut ventulum sæpè sumi pro fluctu aëris flabellati, non est dubium. Terentius:

*Cape hoc flabellum, & ventulum huic sic facito.*

In Eunucho.

quod Græci *πνίξ* dicebant, vt ad Varronem notat Ios. Scaliger. Imò Aristoteles ipse sect. 23. Problem. consentienter Veteribus, quos tamen in Meteor. refellit, Ventum definit, *αἰρὸς σύναωμ, αἰρὸς ὁρμησμός*. Et facillimè omnium hanc sententiam defendere possunt, qui ventos omnes etiam ordinarios ab Angelis cieri doceant. quis enim tam hebes, vt non facillè intelligat quomodo cælestes illi Æoli aërem huc illuc propulsare, & in ventum expirare possint?

Aristoteles tamen lib. 2. Meteor. cap. 4. materiam venti exhalationem & vaporem statuit, non aërem Elementarem. cùm verò in Problem. ventum, aëris impulsum dicit, aërem, vt sæpè etiam in Meteoris, pro spiritu & exhalatione capit; vt rectè in Theoriâ ventorum notat Eruditiss. Romanus noster.

Refelluntur ergo Veteres, & eorum hodie consectanci, quia fluxus ille aëris transuersalis, vel naturalis est, vel contrà, aut præter naturam. Non naturalis, quia aër animal non est, vt somniant

Stoici, quod sponte se in omnes differentias sitûs impellit, sed corpus inanimum, quod in medio graniori, leuitate suâ sursum, in leuiori, grauitate deorsum, rectâ tendit.

Si autem motus ille contra aut præter naturam est, ergo ab aliquo extrinsecus impellente fit. Quod autem erit illud? Certi quidam Planetarum aspectus, & ventus influentiæ, inquit Astrologi. & lib. 4. cap. 3. 1. de Angelis, consentit Eruditiss. Franciscus Suarez. si enim Luna mare ab Ortum in Occasum, Sol tot flores & heliotropia circumducit, cur etiam ipsi, aut certè alia sidera, non valeant aërem in ventum trahere aut propellere? Sed profectò sideribus non inesse vim aëris attractricem aut expultricem, inde patet, quodd aliàs omnes venti semper aut diutissimè in vnam Mundi partem inclinarent. si enim attraherentur, semper sequerentur sidera exorientia, ab Ortum ad Occasum, vt mare Lunam, & heliotropia Solem. si repellerentur, sidus quod vim extimulandi aërem in Septemtriones haberet, illorsum omni die, exoriens propelleret. Hoc autem experientia longè respuit. sæpè enim sub omnibus iisdem sideribus aër contrariis ventis iactatur. vt hodie fiat Austus, cras eodem horæ puncto Boreas, vt sæpè obseruaui, nullâ in villo siderum aspectu factâ insigni mutatione.

Theologi quidam malunt ab Angelis concitari & ventilari aërem. Sed eos ab hoc ministerio remouebimus, vbi causam efficientem ventorum disputabimus. Alij rarefactione aut condensatione huc illuc affluere, & sic in ventos & fluctus abire: quos etiam ibidem refellemus. Itaque præter aërem spiritus alius, qui per ipsum fluat & terebret, necessarius est, vt proximo Articulo ostendemus.

## ARTICVLVS II.

*Halitus, venti materiam esse.*

**N**Vlla enim alia statui potest, si aër elementaris, quem iam antè reiecimus, non est. Deinde, venti procellosi, vt Lib. 2. docuimus, exhalatione calidâ & siccâ, instar fulminis, generantur, igitur verisimile est, eandem esse materiam ceterorum. Tertio, nautæ vehementissimos & turbulentissimos ventorum circa Promontoria & littora experiuntur, vt Ios. Acoſta lib. 3. histor. Indic. cap. 8. fatetur. quia scilicet halitus è vicinâ terrâ resolutus constat, qui initio & integris viribus validissimus est, lassatus verò spatio, & debi-



debilitatus peruenit in altum mare. Vnde Christoph. Columbus, Indiarum ille repertor, coniecit terram vltra Oceanum Atlanticum esse, quia inde venti satis validi & feroces affluerent. Quare, nisi exhalatio materia ventorum sit, nulla causa est, cur Etesiz & alij venti solemnes, certis anni temporibus adspirent. Item, cur post pluuiam plerumque sequi soleat ventus. Terra enim mollita & tabefacta, facilius Soli obedit, & dissoluitur in exhalationes, quæ deinde ventis cedunt in materiam. Exhalatio tamen terrestris mera nunquam est tota materia venti. Multos enim vnà vapores perplexos & permixtos trahit. aëris etiam aliquam partem ante se agit, sequiturque deinde alia à tergo, vt repleat vacuum. Breuiter, cogita flumen aliquod rapidum aut torrentem in mare incurrere, aquas eius, canali per eas facto longè terebrantem, & vndam ante se propulsantem: & venti per aërem fluentis habebis imaginem. Denique, rubedo cæli, & omnia signa ventorum, indicant spiritus aliquos in sublimi hære, qui breui in flatus defluent.

## CAPVT II.

*De causâ efficiente ventorum.*

## ARTICVLVS I.

*Rarefactionem, aut condensationem, causam efficientem ventorum omnium non esse. Aduersus Vitruuium, & Io. Bapt. Benedictum.*

**C**AUSAM efficientem ventorum remotam hic non querimus. illa enim eadem est, quæ omnium Meteororum: Sol nempe, aut alia causa resoluens exhalationem. Proximam ergo inuestigamus, quæ motum illum obliquum imprimit, qui est vltima forma venti. Et quidem si impetus est qualitas secundæ speciei, & potentia naturalis immediatè efficiens omnem motum localem, vt plerique Louanienfes hodie censent, etiam motus ventorum erit proximè efficiens. sed alibi ostendam, impulsus illum non esse qualitatem, sed ipsum localem motum. Volumus ergo nunc scire causam, quæ det vento transversalem illum impulsus.

Vitruuius lib. 1. cap. 6. putat eum à calore aërem rarefaciente

excitari. & probat hoc exemplo. *Fiunt, inquit, Aeolipila aëra, ca-  
uæ. hæ habent punctum angustissimum, quo aqua infunduntur, collo-  
canturq; ad ignem. & antequam incalescant, non habent ullum spiri-  
tum: simulac autem seruere cæperint, efficiunt vehementem flatum.  
Ita scire & indicare licet è paruulo breuissimoq; spectaculo, de magnis  
& immanibus calis ventorumq; natura rationibus.* Existimat ergo, vt  
aqua in pilâ seu sphærâ illâ ætæâ rarefacta, per angustias foraminis  
se expirat; ita aërem subitâ rarefactione diffuere in ventum. ideo-  
que ventum definit, *Aëris fluentem vndam.* Idem ferè Benedictus:  
*Nec Aristoteles, ait, nec alius ex eius fautoribus animaduertit, rarum  
mediente calore, & densum mediante frigore, esse causam ventorum.*  
Et probat, quia si nubes Solem lucentem subeat & obscurat, sta-  
tim aliquâ aurâ perstringi nos & afflari sentimus. non quia aliqua  
tunc exhalatio magis adspiret, quàm antè Sole extra nubilum  
splendente; sed quia aër circa nos subito à nube inumbratus, se  
frigore colligit & condensat, quiq; remotior erat, ad nos conuo-  
lat & circumfluit. Et in parte saltem accedit Seneca lib. 5. Nat.  
cap. 6. *Aliquando per se ipse Sol, inquit, causâ venti est, fundens ri-  
gentem aëra, & ex denso coactosq; explicans.* ostenditur in flatibus  
antelucanis, qui moueri & extimulari solent sub auroram. quia  
etiam antequam Sol appareat, lumine ipso valet, inquit: *& nondum  
quidem aëra radiis impellit, iam tamen lacescit & irrisat, luce prami-  
ssâ.* Orto autem Sole, vis eorum relanguescit; quia spiritus nimis  
tenuatur, & tepore diffunditur. vnde numquam vsque ad meri-  
diem tales auræ producuntur.

Verùm licet Sol, aut etiam Aurora exoriens, aëra nocturnum,  
frigore rigentem & densatum, item vapores & exhalationes in in-  
fima regione hærentes, in blandam & leuem auram tepore suo re-  
laxet: hæc tamen validissimorum illorum flatuum causâ esse  
non potest.

Probatur Primò: Quia pleno sæpè meridie, v.g. quando aër  
plenam & totam raritatem habet, quam illo die à Sole accipere  
potest, repenè existunt venti: nec tamen à rarefactione aëris, quæ  
nulla est; neque à condensatione, quia suppono etiam nullum ei  
accedere nouum frigus, quod condenseret.

Secundò: Incredibile est, ventos autumnales validos & feroces,  
qui tantas sæpè edunt strages, solâ aëris rarefactione aut densatio-  
ne commoueri. Recordor tamen etiam (ne oblitum putes) quan-  
tis viribus, fulmina & procellæ è nubibus, flamma pulueris accen-  
sa,

fa, è tormento, ob subitam rarefactionem, erumpant : sed maxima & ignea, ac repentina rarefactio, item angustix loci, in quo exhalatio vel flamma constringitur, vehementiam illam faciunt aut intendunt. Aër verò quem in ventos rarefcere volunt, liber & solutus per totam infimam regionem expanditur, nec tantâ celeritate & impetu rarefcit, quantâ flammæ fulminum, aut exhalatio turbinum fumida, feruida, & pænè flammans : sed molliter & sine angustiarum vllâ resistentiâ funditur.

Tertiò : Æstate, quando calore maximè rarefcit, aut hieme, quando frigore densatur aër, plurimi & acerrimi venti cum exercent. contrà tamen est. & plures ac actiores per ver & autumnum discurrunt.

Quartò : In omnem differentiam positionis, sursum, deorsum, antrorsum, retrorsum, & vndique in orbem, calore rarefcit aër : ergo quando Louanij rarefcet, Thenenses, qui nobis siti ad Orientem, ab Occasu Zephyrum, Bruxellenses, ab Ortus Subsolanum, Mechlinienses, à Meridie Austrum, Namurcenses, à Septemtrione Boream, Louanio tamquam omnium ventorum istorum centro, spirare sentient. quod tamen palàm falsum. Tam vicinæ enim ciuitates vnum eundemque, vt plurimum, ventum vno tempore habent.

Si verò aëris condensatione venti oriantur : sit ergo iterùm Louanienfis iste aër qui condensatur. huc igitur ab Ortus, Occasu, Meridie, Septemtrione, rarior aër confluet, veluti in centrum circa quod fit condensatione : atque ita ab omni parte cæli vndique simul venti nos incurrent. quod etiam refutat experientia. Si dicas, numquam contingere, vt Louanij tantùm, & non in aliis circa regionibus, sic condensetur : demus hoc, tantumdem enim conficiamus. Itaque totius Brabantix, aut etiam Belgij, aër gelu constringatur, venti ab omni Mundi cardine in Belgium concurrent : cum tamen vnicum tunc plerumque ventum, vt Boream, aut alium frigidum, regnare experiamur.

Quintò : Venti gelidi & hiemales, vt plurimum, frigus & densitatem illam in aëre producant : ergo prius est, ventum hiemantem spirare, quàm aërem addensari. ac proinde condensatione causa venti non est, sed effectus.

Denique : Quando aër condensatione colligitur in minus spatium, ille qui circumcircuit, aliquantum quidem se promouet, metu vacui, vt impleat locum, ab eo qui condensatur, relictum ; sed  
non

non instar torrentis se per aërem illum densiorem effundit; nec, ut venti solent, transcurrit integram regionem; sed in vicino confistit, quia periculum vacui non flagitat motum ulteriolem.

## ARTICVLVS II.

*Motum venti non propriè fieri repulso exhalationis à nubibus, ut plerique existimant.*

**P**eripatetici pænè omnes ventum à nubibus, aut frigore mediæ regionis, deorsum repelli docent: ideoque motum obliquum esse, quia exhalationis leuitas sursum nititur contra repercussionis ictum, qui rectà deorsum tendit: ex quâ rixâ motus in latus deflectit, & fit transuersalis.

Dico Primò: Nubes non repellit deorsum exhalationem venti, ut paries pilam lusoriam solet. Probatur: quia licet exhalatio maximo impetu sursum ferretur; nubes tamen, quia mollis est & rara, non ita se ei obicit, ut transitu arceat. vapor enim nubium, quamdiu non depluit, rarior est aëre infimæ regionis, ut Lib. 5. ostendimus. Itaque ventus potius nubes pertundet, & se transcribabit, quàm deorsum, impetu præsertim tam valido, resiliet. Deinde, primo statim exhalationis ictu turbabitur & confundetur figura nubis: vnde secunda exhalatio in aliam figuram impacta, in aliam partem quàm prima reflectetur; fietque ut numquam diu ab eodem cæli puncto & per eandem lineam spiret ventus.

Dico Secundò: Nec frigus mediæ regionis habet propriam vim repellendi exhalationem calidam. Probatur, quia inter qualitates primas non est talis antipathia, quâ se virtute aliquâ loco motuâ abigant & repellant; ut magnetes aliqui ferrum. aliàs enim calor ignis aquam frigidam statim repelleret, & aqua ignem, ante qualitarum primarum actionem & reactionem: quod non experimur. calor ergo non aliter abigit frigus, quàm calefaciendo & rarefaciendo subiectum eius, dandoque ei leuitatem, quâ fugiat & mutet locum; frigus contrà, refrigerando, densando, & aggrauando caloris subiectum. Sententiam tamen quam iam oppugnamus, quidam credunt esse Aristotelis in libro de Mundo. sed liber iste, sine dubio, Aristotelis non est, ut docti pænè omnes fatentur. Libro autem 2. Meteor. cap. 4. hanc causam reddit obliquitatis motus ventorum: Ὅτι πᾶς ὁ κύκλος ἀπὸ συνίπτι τῇ φερόᾳ. *Quia omnis, qui in circuitu est aër, latigentem consequitur.* Id est, licet exhalatio

rectà

rectâ sursum, vt ibidem ait, feratur, deorsum tamen obliquè retorquetur ab aëre supremæ regionis, qui raptum cæli sequitur ab Ortu in Occasum. Sed Alexandro Aphrodisio, summo Peripatetico, displicuit hæc ratio Aristotelis, & egregiè oppugnat: Sic enim, inquit, omnes venti ab Oriente spirarent; quia à motu illo supremi aëris detorquerentur ad Occasum, cum suprema regio motu cæli rapiatur in illam partem. Adde nunc, in altissimorum montium vertices flatus vix peruenire, vt Sect. 26. Problem. fatètur ipse Aristoteles: quomodo ergo ab aëre, qui ibi incipit in orbem cum cælo verti, deorsum repelli possunt ventorum exhalationes? Deinde, aër supremæ regionis qui sub polis est, languidiùs retorqueret flatus, quia tardius circuit motu cæli: cum tamen à Septentrione irruant ferocissimi venti. Denique, probabilius fortassis est, vt Lib. 1. docuimus, vicinum cælo aërem, ne hilum, aut non tam longè saltem à cælo trahi, vt motus descendat vsque ad aërem, qui circumfunditur cacuminibus excelsissimorum montium. Itaque Sect. 26. Problem. aliam causam affert Aristoteles, quæ deinde placuit discipulo eius Theophrasto, multisquæ recentioribus, cum Doctiss. nostro Adr. Romano, lib. de Theoriâ Ventor. Affirmant, exhalationem partibus heterogeniis, vnâ calidâ, subtili ac leui, alterâ frigidâ, densiori & graui, constare. *Cum autem, inquit Aristoteles, alterum sursum, alterum deorsum versus nitatur, & neutrum alterum superet, nec fieri possit vt ibi pendulum hæreat, obliquè ferri necesse est.* Igitur ex rixâ partium eleuantium & deprimentium oritur motus ille transuersarius ventosæ exhalationis. Quia enim leuitas non sat virium habet, vt rectâ sursum grauitatem renitentem auferat, nec grauitas, vt leuitatem lineâ perpendiculari ad terram deducat; hinc vtraque iunctis & permixtis viribus, motum lateralem, ex rectis sursum & deorsum quasi compositum, facit. Verùm si tantoperè leuitas grauitati resistit, vt tantam curuitatem in motu venti efficiat; quâ potest, vt vehementiâ illâ, quâ domos sæpè & arbores euertit, ad terram se allidat? Deinde, si grauitas absolutè leuitatem superat, (quod necesse est, vt ad terram veniat) cur non rectâ deorsum potius, licet tardiori motu, exhalationem detrahit? Dices: Rariores spiritus materiæ grauiori permixti, & eam rectâ à centro terræ sursum subleuant, impediunt ne recidere possit contra directum eorum nixum, ideoquæ defluit obliquè in latus. Verùm, licet id intelligi queat, si materia illa venti densior & grauior, solida sit, & impediât, ne liberè trāsfirent inclusi spiritus: cum ta-

men tota fluxa sit, & motu illo, quo disceperitur & diffluit, laxissimum exitum det omnibus partibus leuionibus; nō satis capio, quomodo contra partium grauiorum propensionem sic renitentur, vt necesse sit motum obliquare. Conimbricenses igitur Tract. 6. Meteor. cap. 3. cū viderent hæc non planè satisfacere, ad influentias siderum recurrunt. Sed antè id reiecimus, artic. 1. cap. 1. huius Libri. Nec etiā Eruditiss. illis Viris vsquequaque placuit. addunt enim: *Verūm, vt ingenuè fateamur, hoc vnum (motus ventorum) est ex iis, quæ in natura contemplatione, magnā ex parte latent.* Ideoque aliquis fortè inueniatur, qui in Deum immediatè referat; quia dicuntur venti Psal. 134. produci de thesauris eius. Item Amos c. 4. *Formans montes, & creans ventum, faciens matutinam nebulam.*

Sed tales & tam ordinarios effectus non solet operari causa illa prima, sine ministerio secundarum: licet ei passim tribuantur. vt Psal. 73. *Tuum est dies, & tua est nox, tu fabricatus es auroram & Solem. Tu fecisti omnes terminos terra, astatem & ver tu plasmasi ea.* Diem tamen, & auroram, æstatem, & ver, non facit nisi per Solem & sidera. Alij ergo paulò molliùs & probabiliùs onus mouendi ventos in Angelos reclinant.

### ARTICVLVS III.

*Angeli non sunt ventorum ordinarij Acoli. Aduersus Bodinum, & quosdam alios.*

**D**Vbiū non est, quin Deus operā Angelorum vtatur quandoque in excitandis tempestatibus, & insolēte motu ventorum. vt Ionæ cap. 1. *Dominus misit ventum magnum in mare, & facta est tempestas magna in mari.* & Exod. 10. *Dominus induxit ventum vrentem totā illā die & nocte: & manè factus ventus vrens leuauit locustas.* Quæ sine dubio patrata sunt ministerio Angelorum, quos in talibus adhibere solet. Psal. etiam 77. plagæ illæ Ægypti vocantur, *immissiones per Angelos malos.* Dæmones etiam permissione, etsi non iussu diuino, sæpè ventos & procellas mouent, vt Iobi cap. 1. *Repentè ventus vehemens irruit à regione deserti, & conuersis quatuor angulos domus, &c.* Magi quoque Septemtrionales, ventos secundos nauigantibus vendunt: & Rex Sueciæ Ericus, vndecumque collibuisse, flatus adspirantes pileo euocabat. vnde & ipse, *Pilei ventosi* cognomentum accepit. Aristæus deinde in Cxā maris Ægei insulā, deficientes aliquot annis Etefias, sacrificio

Ioui

Ioui peractò, reuocauit, vt auctor Theophrastus libro de Ventis. Plutarchus etiam in Lucullo illustre exemplum habet. Cùm Mithridates Rex Ponti validà classe urbem Cyzicum premeret, laboraretque eum depellere Lucullus, Proserpina, cui fortè dies tunc festus erat, Aristagoræ, Magistratui urbis à secretis, nocte apparuit: & *Cras, inquit, tibi cinem Lybicum cum subicine Pontico committam.* Ænigma non intelligebatur, donec luce insequente, Auster ferox & truculentus à Libyà adspirans, tempestate commotà, Ponticam classem & omnes machinas Mathematici Niconidis collisit, & diffregit.

Tales ergo extraordinarij flatus, sine dubio Angelorum bonorum an malorum effectus sunt. Sed de omnibus alijs etiam, qui ordinarià lege fluunt, idem existimat lib. 2. Theatri Bodinus, & hic Louanij Philosophi quidam, à quibus aliquando propius, quàm nunc, abfui.

Sed tamen ostendi potest, Primò, ex Scripturà sacrà. Psal. 17. dicitur *Deus ascendere super Cherubim, & volare super pennas ventorum.* & Psal. 103. *Qui ponis nubem ascensum tuum, qui ambulat super pennas ventorum.* Currus ergo & quadrigæ diuinæ, sunt nubes; equi vectores, venti; aurigæ, Angeli, quos Cherubim vocat; sagittæ, fulmina quæ è nubibus iaciuntur, vt Illustriss. Card. Bellarminus commentatur. Veluti ergo equi ab aurigis insidentibus, ita Pegasi illi ventorum ab Intelligentiis reetricibus incitantur. Idem etiam fortasse significatur Psal. 134. *Qui producis ventos de thesauris suis.* Thesauri enim Dei, Angeli dici possunt, in quibus ipse tot diuitias recondidit. Denique Apoc. 7. S. Ioannes vidit *quatuor Angelos stantes super quatuor angulos terra, tenentes quatuor ventos, ne flarent super terram, &c.* Ergo penes eos est ventorum arbitrium.

Secundò: Angeli, opinione Aristotelis & D. Augustini, mouent cælos; quidni etiam idem faciant ventis? certè enim utilitas quæ animantibus prouenit à ventis, flagitare videtur, vt res tanta non committatur nisi causis intelligentibus.

Tertiò: Huc trahi potest, quod narrant quidam: in toto littore Perùano, seu illà Americæ longitudine quæ mari Pacifico adiacet, duos tantùm ventos, Australem & Occiduum, regnare. Item regiones multæ ventos quosdam peculiare & Prouinciales habent, vt Gallia Narbonensis Circium, Apulia lapigem, &c. quorum causa penes Angelos esse videtur, qui aëra vel exhalationem in



hanc vel illam partem, prohibitu, flabellant. cur enim aliàs non omnes regiones omnes ventos promiscuè sentirent?

Sed hæc sententia displicet. Primò: quia non satis Philosophicum, & imbecillitatis signum est, tam sæpe ad inuisibiliũ causarum opem, quando aliter potest, confugere. Deinde, nullà certà lege flant venti; sed eodem aliquando die ter, quater, & sæpius variant: modò etiam acrius, modò languidius veniunt ab eodem horizonis puncto. quæ irregularitas satis significat, non regi immediate ab aliquà substantià intellectuall, in cuius operationibus constantia maior & lex certior animaduerti solet. Tertio, cum in omni terræ puncto incipiat aliquis horizon, ubique disponendi erunt Angeli, aut nullibi: cum nulla sit maior ratio vnius horizonis, quàm alterius. Quarto, aliqui venti tantum die, alij nocte, sunt qui vere, aut autumno, vel alià parte anni flare amant. quorum ratio reddi non potest, si Angeli ventos arbitrio fruantur aut laxant: potest verò, si statuatur alia causa mouens.

Ad Primum ergo fateor cum D. Damasceno, *Angelos curare terræ certas partes, præfectosq; gentibus & locis.* & cum D. Hieronymo cap. 28. in Ezech. *Traditas esse Angelis ad regendum Prouincias, quasi iudicibus, ab Imperatore.* & cum D. Aug. lib. 83. q. 74. *Vnamquamque rem visibilem in hoc Mundo habere Angelicam potestatem sibi præpositam.* quod plerique omnes de speciebus rerum visibilibus, non indiuiduis interpretantur. Apoc. etiam c. 14. fit mentio Angeli ignium, & cap. 16. Angeli aquarum. Addamus Angelum aëris & terræ. nego tamen, naturales elementorum operationes plerumque per Angelorum ministerium exerceri. ignis calefacit, aqua frigefacit, aut per alueum fluminum delabitur, sine operâ Angelorum. Præfunt ergo solum elementis ad operationes extraordinarias per ea exercendas, vt 1. p. q. 110. art. 1. ad 2. docet D. Thomas. & secundum modos quibus res corporeæ subsunt diuina regule in ordine ad finem prædestinationis, vt ibi Caietanus.

Ventorum autem flatus tam naturalis est, quàm lapsus fluminum, vt postea videbis. Ex illis igitur Psalmis nihil aliud solidè colliges, quàm Deum Cherubinis, velut equis velocissimis, vectum, subitò Dauidi & amicis suis contra hostes opem tulisse, id est, per Angelos extraordinariam fugam aut cadem fecisse: aut excitatis undique ventis, & notâ tempestate, præsentiam suam ostendisse, vt pulchrè Psal. illum 17. Iansenius noster interpretatur. Non vult ergo Psalter, à Cherubinis esse ordinarios & cottidianos flatus

flatus ventorum. Adde, ascensum super Cherubim, ad D. Hieronymo intelligi de ascensu corporeo Christi super omnes choros Angelorum: & à D. Augustino, de ascensu super plenitudinem scientiæ (hanc enim significat vox Hebraica, Cherubim.) quia Christus charitatem omnem, quæ est plenitudo scientiæ, superavit, dum pro nobis posuit animam. Thesauri etiam de quibus Deus ventos producit, non Angeli, sed potentia Dei abdita, sunt, ut initio huius Libri diximus; aut certè loca subterranea & ignorata nobis: hæc enim propriè significat vox thesaurus. Patet ex vetusto Epitaphio Poëtæ Næuij:

*Itaque postquam est Orcino traditus thesaur,*  
id est, Orco subterraneo;

*Obliti sunt Roma linguâ Latinâ loquier.*

& Tertull. cap. 47. Apolog. *Si gehennam, inquit, comminemur, quæ est arcani ignis subterraneus ad pœnam thesaurus, decachinnamur.* Sic etiam sumpit verborum Psalmorum, *Ponens in thesauris abyssos.* id est, Psal. 34. aquæ molem, quæ initio totam terram operiebat, in subterraneis antris & cauernis. Locus etiam Apoc. tantum ostendit, Angelos extraordinario Dei iussu frænare posse, aut incitare ventos.

Secundum argumentum retorqueri potest in Auctores. Angeli enim mouent (sitamen etiam faciunt) cælos maximè regulari & compositissimo motu. nihil verò inconstantius vento. signum ergo est, huc illuc à causâ fortuitâ, non ab Angelis impelli. Nec premit, quod additur, de utilitate ventorum: quia causæ naturales sunt sic ab Auctore naturæ dispositæ, ut necesse sit ventum aliquando in hanc aliquando in istam partem inclinare, sicque vnaquæque Regio valeat perficari, nisi montes aut alia obstantia flatus obiciantur.

De Tertio, audiendus Iosephus Acoſta Americæ scientissimus & incola. ait enim lib. 3. Histor. cap. 21. littus Peruanum ab Ortu cingi duabus catenis altissimorum montium (priors Sierras, alios Andes vocant) qui ventos Orientales & Septentrionales arcent. Trans verò illos, in Orientali Americæ parte, perpetuò Subſolanus flat ab Ortu. Non ergo Angeli hanc ventorum diuersitatem faciunt, sed lorice illæ montium. Imò mihi ecce hinc in Æolos istos cælestes nouum nascitur argumentum. Si enim locorum Genij ventos faciunt, cur nullus in montibus illis positus est, qui Peruanis ab Ortu spiraret? utilis certè fuerit is ventus; cum, ut idem Auctor ostendit, eius defectu numquam toto anno circa

illud lictus pluat. Venti etiam Prouinciales, in altitudinem aut humilitatem regionum, obstacula montium, aut plana camporum, an aliam causam, reiiciendi, non in operam Angelorum.

#### ARTICVLVS IV.

*Causam efficientem motus ventorum, non esse terræ pulmones. Aduersus Keplerum.*

**E**Ruditiss. Vir Io. Keplerus, Mathematicus Cæsarius, lib. 4. Harmonicæ cap. 7. terram ingens quoddam animal esse, multis argumentis & seriò affirmat, quæ per montium crateres & caminos, ceu os aut nates, ventos nobis exspiret. Itaque veluti nos aërem, & interaneorum fuligines, ore, ministerio pulmonum, in obliquum effundimus; ita putat ventos à terrâ efflari, vitali actione, quâ pulmones, quos in visceribus ingentes habet, identidem dilatat & contrahit. Quòd autem certis Planetarum aspectibus venti aut tempestates commouentur, inde, inquit, est; quia terra sympathiam cum cælo habet, & naturali instinctu siderum posituram cognoscit.

Verùm terræ animationem Lib. sequenti, circa æstum maris, & longiùs in Libris de Animâ refellemus. Deinde, scèpe venti ab alto mari, aut partibus etiam mediterraneis aduolant, vbi terra nullos caminos aut insignia spiracula habet. Tertiò, plerumque crateres & spiracula montium & terræ, non in latus, sed sursum in cælum spectant: quid ergo spiritus in cælum directè euntes, in latus reflectit? hæc enim est proxima causa motus ventorum, quam tamdiu quærimus.

#### ARTICVLVS V.

*Ventos gravitate suâ in terram defluere, ut torrentes & flumina per alueos.*

**C**Ausam enim aliam, post longam meditationem, reperire nullam valui. Probatum Primò, quia pluuia, grando, niues, & alia ferè cæli missilia, gravitate suâ delabuntur; cur non & venti possint? Certum enim est, exhalationes non minùs in nubibus & mediâ regione refrigescere & condensari, quàm vapores: siue à naturâ terræ, quam nondum amiserunt, siue à frigore vaporum & illius regionis. Ergo sublato æquilibrio exhalationes tunc recident;

cùm

cum in medio liquido & fluente, id quod propensius & grauius est, cadat semper infra leuius aut minus graue.

Secundò: Non in aliâ causâ faciliè acquiescam, cur autumnus plerumque ventosus; nisi quia exhalationes plurimæ æstate collectæ, tunc refrigescunt, & refluunt deorsum.

Tertiò: Rubedo nubium & Lunæ ventos significat, quia per confertas exhalationes aspiciuntur, quæ paullatim frigore densantur in ventos.

Quartò: Dic quare Sol calore suo comprimat ventos, & meridie non rarè sopiuntur diurni flatus? quia, credo, insigne frigus & densitas necessaria est ad ventorum fluxum, quam nimius calor impedit.

Quintò: Ideo à polis & frigidis cæli cardinibus plures & ferociiores venti, Aristotele & Theophrasto teste; quia ibi plus frigoris spiritum condensans. Hinc etiam fluctus ab Aquilone excitati, simulac ventus posuit, sternuntur & conflagrescunt, vt ex Homero & experientiâ notat Agellius lib. 2. cap. vlt. cum tamen post flatum Austri mare diu permaneat vndabundum. causa est, Aquilonis, frigidioris & grauioris, lapsus in mare magis rectus & præceps. vbi contrà Austro, quia leuior & obliquior, propellit directè in latum vndam: ideoque diutius impetum & vacillationem retinet, quàm si fracta esset supernè. Fallor, aut idem significauit naturæ consultissimus Poëta:

*Incubère mari, totumq; à sedibus imis  
Vnà Eurysq; Notusq; ruunt, creberq; procellis  
Africus, & vastos voluunt ad litora fluctus.*

Virgil.  
Æneid. 1.

Nam eruere mare à sedibus imis, & voluere ad littora fluctus, est ventorum obliquè magis incidentium: quales Eurys, Notus, & Africus, qui in Europam non veniunt à frigido cardine.

Sextò: Matutinauræ, quæ à fluminibus aut lacubus molliter aspirant, planè videntur esse vapores antè sublatis, & leni frigeratione contracti, pondere suo relabentes. ergo simile erit in ventis illis grandioribus & legitimis.

Septimò: S. Iobum deduco in hunc sensum. *Qui fecit ventus* Iob. 19. *pondus, & aquas appendit in mensurâ.* Veluti enim Deus per causas secundas aquis grauib; leuitatem dat, & in nubibus suspendit: ita leuissimæ exhalationi grauitatem & pondus reddit, vt delabatur.

Denique, videtur id sensisse Aristoteles lib. 1. Meteor. cap. 3. negat enim in supremâ aëris regione nasci ventos, quia nimius ibi calor,

lor, coagulum & condensationem exhalationis impedit. Deinde lib. 2. cap. 4. docet, Austrum à Tropico Cancrì & Zonâ torridâ facilius ad Septentrionem & polum Arcticum, quàm Boream ad Meridiem & eandem Zonam peruenire. cuius vna videtur ratio, quòd Boreas à polo, rectori lineâ & breuiori in terram, vt pote grauior, decidat; Auster verò calidior & leuior per lineam obliquiorem & longiorem in Septentriones effluat. Et Sect. Problemat. 26. comparat ventum cum aquâ fluminum. vt sicuti in Artho & excelssissimis illis montium, nullæ aut parcissimè aquæ fluunt; ita venti ibi rarissimi. causa ytriusque eadem: quia insigne frigus abest, quod & vapores in aquam, & exhalationem in ventum cogat. vnde non pessimè lib. de Mundo Apuleius ventum definit, *Multum & vehemens in vnum coacti aeris* (melius tamen, exhalationis) *flumen*. Venti enim reuerà flumina quædam aëria sunt; quæ tamen non certo aluco feruntur, sed per vastum calis spatium, lato impetu, vt eleganter Seneca.

Video tamen, his aut similibus telis oppugnari posse nostram sententiam.

Primò: Cur tam obliquè, & non, vt pluuia aut grando, ad perpendicularum, venti in terram cadunt? Deinde: Cur tam procul per superficiem terræ se euoluunt, vt patet in turbinibus illis, quibus puluis per ingentes aliquando & planos campos æstate contorquetur?

Georg. 1.

*Ille volat, simul arua fugâ, simul aquora verrens.*

certè aqua pluuialis delapsa eodem loco adhæret, nisi eam torrens aliquis per decliue prouoluat.

Tertiò: Cur impetu tanto exhalatio aërem secat, cum aqua grauitate longè eam superet?

Quartò: Cur ab eodem cæli cardine tot aliquando diebus aut septimanis cadunt & effunduntur?

Vltimò: Venti passim omnibus dicuntur leues.

Quidius  
Met. 1.

— *Fugit ocyor aurâ*

*Ille leni.* —

Hæc aliquando visa mihi difficilia, sed non ob quæ veritatem deferamus.

De Primo respondeo, obliquitatem illam venti effici ab exhalationibus aut vaporibus, aut partibus aëris leuioribus, quæ perpetuò in sublime scandunt, vt statuatur æquilibrium inter partes Mundi Elementaris. cum enim venti exhalatio, propter ipsas sibi obuias,

obuias, non possit statim rectâ deorsum præcipitari, moræ impatiens, motum obliquat in latus. Quò etiam conferunt quædam exhalationis partes, leues & nondum satis refrigeratæ, quæ permixtæ & intricatæ vento grauiori, deorsum vi detrahuntur. Denique aër multâ & latâ exhalatione decedente percussus & resistens, eam declinat & excutit potius in latus, quàm sinat rectâ deorsum ferri. vnde etiam quia aër iuxta terram est densior, motum venti magis obliquat, quàm in sublimi. grando verò, aut guttæ pluuiæ exiguitate & rotunditate suâ obstantia faciliè secant. etiam si tamen ob easdem causas, vt equidem existimo, earum casus paullisper abeat à rectitudine perpendiculi.

Ad Secundum: Ventus post casum non statim quiescit, quia mobilitate suâ à terrâ resilit, & alia exhalatio à tergo præcedentem delapsam in obliquum vrget ac propellit. Iuuat etiam, quòd exhalatio fugientem ante se aërem prosequatur, vt vacuum repleat. potissima tamen causa consistit in impulsione sequentis exhalationis. quæ si frequenterur plaga, plagæ superueniens in longissimum spatium vrgeret & extundere spiritum potest.

Ad Tertium respondeo, ventos, qui tantas vires ostendunt, & arbores ac ædificia sternunt, sæpè non ordinarios esse, sed procellosos: qui ab iisdem causis mouentur, quibus fulmina, vt Libro 2. enarrauimus. Deinde, ordinarij etiam, qui à refrigerio exhalationis nascuntur, maximum impetum colligere possunt, & ab insigni grauitate, & à multitudine materiæ, cuius vna pars alteri superueniens impulsum addit, & intendit motus celeritatem. vt enim illa acies maximo impetu ruit, & hostem faciliè rumpit, in quâ posteriores præcedentium tergum vrgeret & propulsant: ita in vento fit. vnde vbi exhalatio prior exitum non reperit, aliâ à tergo premente, sæpè per obstantium stragem viam effringit. Sic Paschate illo ventoso anni 1606. & morte Iustri Lipsij nostri famoso, ventus Occidentalis aræ & porticibus Illustris Monasterij S. Gertrudis Louanij inclusus, nec ab Oriente exitum inueniens, magnam & nouam ædificij molem arietauit, & tandem impulit in plateam. Aqua tamen (fateor) grauior est vento; sed etiam maiori impetu cælo decideret, si conferta, & non guttatim dispersa, prorueret. Aspice vires torrentium, qui non tantum domos, sed integros aliquando pagos, aut regiones proluunt, & mecum dices.

Quarti ratio est, quia quòd principium exhalationis incubuit, & viam secuit, eò ceteræ partes sequuntur. Durat verò pertinaciter

tanto tempore vnus ventus, vel quia exhalatio ibi simul refrigerata, multa est, vel quia alia & alia è terrâ aut aquâ eodem iugiter ascendit, statimque frigore correpta & condensata, eadem semitâ defluit, quâ præcedens, & aër in illam partem incitatus, ducit. Priori modo, ventus velut è lacu; posteriori, velut aqua fontana è cauitate subterraneâ aërem aut vaporem in aquam perpetuò densante, fluit.

Ex dictis etiam sequitur, quod notat Theophrastus, ventos initio, & vbi origini propinquiore, magis densos & confertos esse, & frigidiore. vt enim halitus efflatus ore animalis, aut fons in riuum aut flumen se exonerans, in principio compressior est, deinde dispergitur: ita est in vento. frigus autem augetur densitate & vicinitate frigidarum partium exhalationis: nili fortè ardentis aliquos spiritus contineat, qui motu excutiantur; & ita ventus refrigescat in cursu.

De vltimo, nulla difficultas. Aura & venti dicuntur leues, sicuti aues; quia celeres. vnde etiam finguntur pennati. Silius libro 1. de Boreâ:

*Nunc ipsas alia frangit stridentibus Alpes.*  
& Iuuenalis Sat. 5.

— *Dum se continet Ausfer,*

*Dum sedet, & siccata madidas in carcere pennas.*

Hinc Ælius Verus Cæsar, teste Spartiano, cursoribus suis alas apponebat, & vnum Boream, alium Notum, & ceteris nominibus ventorum appellabat. Quidam tamen venti leuiore aëre inferiori sunt, ideoque ad terram non perueniunt, sed per mediam regionem aëris, vel supremam partem infimæ discurrent. Testantur id mihi nubes, quæ quandoque ventis agitantur, nullo tamen apud nos flante. Item duplex sæpè earum in contrarium, ab oppositis ventis, agmen est, cum tamen vnicum hic statum experiamur.

Lucret. l. 5.

*Nonne vides etiam diuersis nubila ventis*

*Diuersas ire in partes, inferna supernis?*

Alter ergo illorum ad terram non descendit.

Scio tamen multum incredibile fore, tantam in vento grauitatem esse, quæ tam validum impetum deorsum faciat. Sed talibus corrigenda imaginatio est, quâ sola corpora opaca insigniter graui reputant. Hi numquam credant, truncum arboris aquâ fluidâ & pellucidissimâ leuiorem esse, nili vidissent supernatantem: aut aquam marinam, omni fontanâ pellucidiorē, & tamen longè pro-



propensioſiorem, niſi vocaſſent ad examen: neque hodie etiam adduci poſſunt, vt mecum aſſiſtunt, aëra inſimæ regionis tranſparentem & inuiſibilem, plus ponderis quàm opacas mediæ regionis nubes habere. Vitrorum etiam ac cryſtallorum perſpicuitatem, & vnâ grauitatem cogitent, & minùs vtramque iunctam mirabuntur in vento. fluiditas enim non repugnat cum pondere, vt aqua, & metalla fuſa faciunt fidem.

## CAPVT III.

*De cauſâ formali ventorum.*

**D**e cauſâ formali nihil ferè præcedentibus addo. Forma enim veni ſubſtantialis eadem eſt quæ exhalationis, & vaporis, ſi quis vapor permixtus eſt exhalationi. vnde quia vix aut numquam ventus purâ exhalatione conſtat, multiplex eſt forma eius ſubſtantialis: prout ſcilicet, terra, & aliquorum mixtorum exhalatio, vapor, & aër, conſuſe in vno agmine venti fluxerint. Forma veni vt meteororum eſt, ita tuitur vulgò, curſus circa terram ille tranſuerſalis. hic enim compoſitum accidentarium, quod vêtum vocamus, conſtituit & conſumat. vnde ventus non mouetur nec currit accidentaliter & tamquam ſubiectum curſus; ſed prædicatione eſſentiali: quomodo ſedes v.g. figurata dici poteſt, quia figuram eſſentialiter includit. Cùm ergo ventus exhalatio appellatur, prædicatione cauſalis eſt, huic (ſedes eſt lignum) ſimilis. Niſi tamen quis maht ventum in recto ſignificare exhalationem, & in obliquo connotare ſolùm inotum illum tranſuerſalẽ. Verùm ſic motus non erit propriè forma conſtituens veni vt meteororum eſt; quia non componet id quod in recto denominatur ventus. quod à receptâ loquendi formulâ abig. Hinc non ineptè proſus, & ἀφιλοσοφῶς verſus iſtos Virgilij admordet Seneca:

— Hic vaſto Rex Aeolus antro

*Luſtantes ventos, tempeſtateſq; ſonoras*

*Imperio premit, ac vinclis & carcere franat.*

*Non intellexit, inquit, nec id quod clauſum eſt, eſſe adhuc ventum, nec id quod ventus eſt, poſſe ſam claudi. Nam quod in clauſo eſt, quieſcit, & aëris ſtatio eſt. Omnis in fugâ ventus eſt. Sic ergo nec Vlyſſes habuit vnquam ventum in vtre.*

Lib. 6.

Nat. c. 18.

## CAPVT IV.

*De causâ finali ventorum.*

**E**INIS ventorum, eorum utilitas est, quæ multiplex. Primo, aërem contra situm & putredinem exercent. & hinc causas morborum, & pestem discutunt, cui regiones stagnantes, obnoxie sunt, nec perflatæ ventis. Notum etiam olim, è cistâ diu clausâ, & apertâ, pestilentiam latè sparsam Babylone. Et Cardanus lib. 1. Varietat. cap. 9. narrat, omnes in Vico quodam iuxta Mediolanum intra triduum exspirasse, qui adfuerant, dum duæ cistæ, 30. annis metu bellorum reconditæ, referarentur, quique res inclusas, etiam dudum post, contrectauissent. Tantam pestem & noxam contrahit silens nec ullis auris exercitatus aër.

Nubes deinde è mari, lacubus, fluminibus eleuatæ, & suprà pendulæ, ad partes Mediterraneas flatu adducuntur, vt repluant & terram irrigent. vnde absque ventis foret, necesse esset maximam terræ partem sterilefcere. Respirationem etiam animalium refrigerant: & iactatione suâ, plantarum radices, vt altius defigantur, & liberius ac laxius eliciant alimentum, iuuant. Vt enim Aristoteles lib. 7. Polit. c. vlt. suadet, pueris permittere ploratum, quia id meatus corporis diducit, & facit ad incrementum: ita arbores ventis agitatæ patentioribus venis & auidius terræ succum bibunt, spatiosiusque adolefcunt. Breuiter, nihil certius, quàm cæli terrarumque temperiem maximè regi per ventos, hocque vnicum ferè esse serenitatis, aut hiematuri mox aëris signum. Commercia etiam humana permiscet, Oceanumque & totum terrarum orbem peruium venti faciunt. Molas deinde, quas Veteres olim tanto brachiorum labore, circumagunt. *Prætere, ait Cardanus lib. 1. Variet. cap. 10. non possum, quod adeò est admirabile, vt antequam viderem, credere non potuerim. In Italia multis regionibus & in Galliâ passim molendina fiunt, qua ventorum flatibus circumuertuntur. atque adeò vehementi impetu, vt tres equos cum equisibus circumagere possent: adeoque, præsentis utilitate, vt modios 8. Mediolanenses in singulis horis, id est, libras circiter ter mille frumenti molere possint.* Rationem deinde conficiendi ex Hieronymo Girauâ Hispano docet, quam, longum & nimis mechanicum, hic attexere.

In

In tantâ tamen ventorum utilitate, noxæ quædam & tam græ-  
ues sunt, vt Seneca dicere veritus non fuerit: *Quod de Casare olim*  
*maiore vulgò diffusatum est, & à T. Lilio positum, In incerto esse,*  
*utrùm illum magis nasci Reip. profueris, an non nasci; dici etiam de*  
*uentis potest.* O bellè! Sed veluti seditiones toties repetitæ Tribu-  
norum Plebis, & factiones Optimatum satis significabant utilio-  
rem Romanis futuram Monarchiam; ita venti plus commodi,  
quàm noxæ habent.

Lib. 5.  
Nat. c. 18.

## CAPVT V.

*De numero ventorum.*

## ARTICVLVS I.

*Quot, & quibus nominibus recensiti venti.*

**S**CRIPTVRA sacra sexpè quatuor ventorum memi-  
nit. Dan. 7. *Quatuor venti pugnabant in mari.* Za-  
char. 2. *In quatuor ventos calis dispersi vos, dicit Do-*  
*minus.* Et Veritas, Matth. 24. *Congregabunt electos*  
*eius à quatuor ventis.* Hi autem quatuor venti cardina-  
les sunt, à quatuor Mundi cardinibus (vtrouque scilicet Polo,  
Ortu, & Occasu) flantes. præter quos, alij collaterales intericiun-  
tur. Et quidem, quia infinitæ lineæ à circumferentiâ horizontis,  
ad centrum, in quo nos sumus, trahi possunt, infiniti etiam venti  
Mathematicè diuersi, per alios & alios spirationis axes, spirare ad  
nos valent. ad disciplinam tamen & distinctionem in certum nu-  
merum redigi debuerunt. Athenienses olim inter vtrumque car-  
dinalem, vnicum lateronem immiserunt; vt facerent octo vniuersi-  
sim ventos. In turri etiam marmoreâ octangulâ Tritonem æneum  
versatilem collocarunt, dextrâ manu virgam porrigentem: qui  
contra statum consistens, supra imaginem flantis venti, lateri turris  
insculptam, indicem virgam teneret. fuitque hoc Andronici in-  
uentum, vt lib. 1. c. 6. narrat Vitruuius. Numerus deinde ad duo-  
decimum auctus est; quem recepit Aristoteles, & passim Philoso-  
phi. alij tamen valde concinnè sedecim statuunt: ita vt inter quos-  
libet duos cardinales, tres alij laterales interlocentur. qui numerus  
abundè sufficit ad obseruationes & vsus ventorum in terrâ. Nec  
tamen etiam ferè minor esse potest: quia inter duos cardinales,

X 3 mani-

manifestè fiat aliquis, qui pari interuallo ab utroque est diffitus, quem tamen Aristoteles neglexit, contentus duobus lateralibus. Nautæ verò, quorum valde interest, quo præcisè statu impleant sua vela, in plura segmenta horizontem dissecant, & in pyxide suâ duos & triginta ventos notant, & obseruant. Inter enim duos quosque cardinales, septem collaterales interponunt. Nomina putantur à Carolo Magno inuenta; & Belgica sunt. vtunturque omnes pænè Europæ nationes, Germani, Angli, Hispani, Galli (et si parum in pronuntiationem suam frangant) præter Italos.

Nomina eorum apud Latinos varia, & perturbatè leguntur, dum alij Cæciam, alij Boream vocant Aquilonem: quidam Eurum cum Subsolano, quidam cum Vulturno confundunt. Nos nomenclaturam Phauorini apud Agellium lib. 2. cap. 2.2. Plinij lib. 2. cap. 47. & Senecæ lib. 5. cap. 16. ferè sequimur.

Itaque Aristoteli à polo Arctico fiat Boreas siue Aquilo, ab Antartico Auster siue Notus, ab Ortu æquinoctiali Eurum siue Subsolanus, ab Occasu æquinoctiali Zephyrus siue Fauonius. Atqui hi quatuor vocantur principales & cardinales, quia à principibus Mundi cardinibus spirant. Duobus versibus sic eos complectitur Iouianus:

*A summo Boreas, Notus imo spirat Olympo.*

*Occasum insedit Zephyrus, venit Eurum ab Ortu.*

Qui Boreæ à dextris, Thracias, à sinistris Meses, dexter Austri Phœnicias, sinister Libonotus, qui ad dextram Subsolani Cæcias, qui ad sinistram Vulturnus, Zephyri dexter Africus, sinister Caureus, appellatur. Aristoteles tamen Libonoti non meminit, Austrumque sine laterone sinistro reliquit. In obscuro causâ est, quia fortè, vt quidam credunt, non insigniter in Græciam spirabat. Sic Belgæ Vulturnum negligere possemus, quia hîc imbecillis, & rarissimus. Verum inter duos quoslibet laterales, tertius, vt antè monui, inferendus est, pari distantia ab utroque cardinali. Itaque inter Boream & Eurum medius erit Boreapeliotes (vt Guil. Casanates vocat, qui 32. ventis nomina Latina fecit) voce ex Boreâ & Apeliote siue Subsolano compositâ: Flandris *Nord-Oost*, Italis *Greco dictus*. Inter Boream & Zephyrum Boreolibycus, Belgicè *Nord-Vuest*, Italicè *Maestro*. Inter Eurum & Austrum Notapeliotes, quem Belgæ *Zuyd-Oost*, Itali *Syrocco*. Inter Zephyrum & Austrum Notolybicus, apud Belgas *Zuyd-Vuest*, Italos *Lebecchio* aut *Garbino*.

## ARTICVLVS II.

*Quomodo Indices ventorum describendi.*

**I**N descriptione ventorum, primò inuenienda est linea Meridiana, decurrens directè à polo Arctico versus Antarcticum; cuius inuentio facilis est ex Vitruuio lib. 1. cap. 6. per obseruationem vmbre gnomonis solaris, aliquanto ante & post meridiem. Vel certè potes sic ruditer. Obserua longitudinem vmbre tue, cum datur signum horæ meridiane, quæ apud nos est duodecima, vel certè vmbra stili alicuius tenuioris, ac per eam mediam, ducito lineam à radice stili versus Septentrionem. hæc enim meridiana erit, nisi horæ perperam regebantur. Aut noctu adspice stellam polarem per cuspides duarum, si vis, hastarum, aut baculorum in terram interuallo aliquo defixorum. Linea enim iterum inter vtrumque protracta, erit Meridiana. Alia deinde per hanc mediam ad angulos rectos, ab Ortum ad Occasum ducenda. & habes iam quatuor puncta istarum duarum linearum extrema, à quibus flant versus centrum seu punctum intersectionis, quatuor venti cardinales. Deinde pro ventis collateralibus alix lineæ, quæ priores ad angulos obliquos in eodem puncto interfecent, protrahenda: vt vna à puncto medio inter Boream & Eurum, quæ à Boreapeliore, inter Zephyrum & Austrum cadat, id est, in Notolibycum. Et ita in ceteris. sic vt pro quoque pari oppositorum ventorum vna tantum linea ducatur, quæ sit axis spirationis ipsorum, & à cuius extremis punctis flent in ora mutua, & reslent. Hæ autem omnes lineæ circulo vno circumscribenda sunt, qui imaginem horizontis habeat, & cuius centrum sit punctum illud in quo omnes ventorum lineæ se decussant.

Talem circulum in villis suis ab agricolis deformari, suadent Scriptores rei rusticæ. Vel potius, Andronici illius Atheniensis imitatione, duodecim, aut magis sedecim angulorum turriculam concinnent, angulo quoque prospiciente in suum ventum; Tritonemque, aut gallinaceum in culmine, qui rostro angulum ostendat, & inde flantem ventum. Vel si id nimium habet operæ, current saltem operum publicorum præfecti, vt cruces Templorum ita collocentur, vt vna pars transversalis subiaceat loci Meridiano, cornuaque protendantur versus vtrumque polum. sic enim altera necessariò monstrabit Ortum & Occasum: habebuntque ab extremis

tremis illarum linearum punctis quatuor ventos cardinales, quorum super sedens gallinaceus index erit. Collaterales etiam inter cornuum intervalla, mente designare, difficile non fuerit.

### ARTICVLVS III.

*A quo horizonte sumendum initium ventorum.*

**V**itruvius lib. 1. cap. 6. horizontem, unde ventos rectâ linâ ad nos spirare imaginamur, facit maximum terræ circulum: siue est ei horizon naturalis, qui terram in duo hemisphæria æqualia secat. unde, quia octo tantum ventos statuit, dat unicuique in circulo horizontis amplissimum spatium, scilicet octauam circuli terrestris partem, quæ secundum ipsum & Eratosthenem est, inquit, *ter millies mille & noningentes trigies septies mille, & quingenti passus*. Verum necesse non est tot miliaria vni vento tribuere, præsertim cum numquam, puto, eueniat, ut aliquis idem ventus à linâ horizontis naturalis, id est, per totum terræ quadrantem, ad nos usque fluat. Alij ergo melius, lineam visibilis horizonis in terrâ sumunt, & inde lineas & axes spirationis ventorum, ad nos, id est, ad centrum horizontis adducunt. Quanta autem sit semidiameter horizontis visibilis in terrâ, siue linea ab oculo nostro ad punctum terræ remotissimum, quod ablatis omnibus montium, ædificiorum, impedimentis videre possumus, est adhuc incertum. Proclus existimat esse 1000 stadiorum, id est, 125. milliarium Italicorum, siue ferè 42. Belgicorum. sed hæc longitudo est quintuplo maior iusto, si oculum non è monte, sed è superficie terræ spectantem accipiamus, ut statim patebit. unde etiam Daniel Barbarus in Vitruuij lib. 8. cap. 3. nimis liberalis est, cum ad 500. stadia extendit. Longè parcius lib. 2. Theat. Bodinus, qui 14. tantum miliaria donat: quousque (putat ipse) apes, cum longissimè ab alueari ad florilegia & labores euolant. Macrobius lib. 1. in Somnium Scipionis 180. stadia statuit, id est, miliaria Italica 22½. & Belgica plus 7. satis consentienter Alhazeno lib. de Crepusc. qui, cum videns, inquit, *est super aequalitatem terræ, non peruenis visui eius, nisi quasi ad 23. miliaria ab omni parte*. Nautæ tamen nostri parum minuunt, & intra sextum milliare Belgicum, demum emergere summa vela nauium in mari referunt. hos ergo, ut duces certos, sequamur. Itaque tota diameter horizontis visibilis erit 12. milliarium Belgicorum, siue 36. Italicorum. quæ longitudo triplicata efficiet

efficiet circiter circumferentiæ ambitum, 36. Belgicarum leucarum. In quo si 12. Aristotelis venti ordine disponantur, quisque rectis spatij leucas, si sedecim, duas & amplius; si tringinta duo ( quot solent à nautis) vnâ, & quod abundat, obtinebit.

Quæ tamen non sic accipe, quasi omnis ventus à circumferentiâ horizontis illius visibilis inceperit flare, & versus nos recidere. Multi enim è longiniori veniunt, alij etiam iuxta nos orti sunt, citra illum terminum. omnium tamen flatus in aliquam lineam & axem spirationis, qui ab illâ 36. leucarum circumferentiâ ad nos rectâ protenditur, incidunt, & indidem venire censentur. Idem etiam ventus de vnâ lineâ in alteram transilire potest. vt qui initio secundum axem Boreæ, directè à Septentrione spirabat, in viâ, & antequam ad nos perueniat, in axem Thraciæ vel alterius collateralis deflectere. Montes enim obiecti, & difformitas aëris secandi, exhalationem hanc illâc detorquet, & motum eius, instar torrentis, turbidum facit & inconditum.

Sed è quanto intervallo, inquires, potest exhalatio eadem ad nos peruenire? Macrobius lib. 2. cap. 5. Somnij Scip. putat, Austrum gelidum, & Boreæ nostro simillimum, esse in suo ortu, feruorem autem contrahere longo per Zonam torridam traiectu. vnde censet, eundem ventum ab vno polo ad alterum, per 180. gradus posse transuolare. Sed hic campus est nimis magnus. probabilius Aristoteles, qui Austrum Græciæ suæ, circa Tropicum Cancrî credidit exoriri. Cùm enim ex ipso antè docuerim, ventos instar fluminum & torrentium per aërem grauitate suâ delabi; consequens videtur, vt non ex quantolibet intervallo in nos possint recidere. Duplici autem de causâ fieri potest, vt alius alio longius feratur: vel quia grauitas exhalationis minor est, vel quia locus originis est altior. Prima enim causâ facit, vt linea spirationis sit obliquior, & tardiùs tangat terram. maior autem grauitas per lineam breuiorem, & perpendiculari viciniorem, detrahit habitum. sic lib. 2. Meteor. cap. 4. dicit Aristoteles Austrum longius fluere, quàm Boream. Si etiam exhalatio è loco eminentiori decidat, plus spatij (ceteris paribus) conficere debet, antequam pertingat ad terram. Ex vtrâque causâ venti Australes prolixiùs quàm Boreales, spirant. grauitas enim eorum minor, quia calidiores & rariores sunt: & quia exhalatio rarior altiùs scandit, ideo excelsiori mediz regionis parte cadunt: nisi tamen vapores multi permixti spiritum suppriment & prægrauent. vnde venti Occidentales, qui



ab Oceano Flandrico nobis spirant, maiori pondere Brabantiam premunt, quàm Subfolani, qui à vastissimis illis & mediterraneis Germaniæ regionibus veniunt. Postquam autem exhalatio in terram cecidit, non statim componitur & quiescit, sed per multas adhuc leucas aliquando ab aliâ superueniente propelli potest. In vento enim valido, & per totam aliquam Prouinciâ generali, imaginari oportet, vnam partem exhalationis in vnam urbem, aliam in alteram sequentem obliquè incidere. vt si pars venti Occidentalis cadat in Brugas, altera in Gandauum fortè ruet, tertia in Bruxellam, quarta in Louanium. ita tamen, vt exhalatio illa prima Brugenfis, ab iis quæ per totum spatium medium deciduat, protundi valeat vsque Louanium. quæ enim inter Brugas & Gandauum, verticem Brugensem radendo, cadit, eam ante se, aut secum agit vsque Gandauum; Gandauenfis deinde vtramque fortè excipit, & rapit versus Bruxellam. Dices, hinc sequi, ventum semper in remoto quàm in propinquo esse longè ampliorem & validiorem. Respondeo, plerumque saltem id esse verum, & ab Aristotele lib. 2. Meteor. cap. 4. assertum; vbi docet, status initio inualidos, supplementa & vires, vt flumina in fluentibus riuus, colligere in progressu. Bona tamen pars exhalationis deciduæ hæc illac diffluit, aut montibus, ædificiis, arboribus, alijsve obstantibus hebetata, alteri us cadentis impulsu non sequitur. vnde accidit, vt aliquando longitudine vix non fiat ei magna accessio. Ibi autem expirat & immoritur ventus, vbi vltima exhalatio delapsa aliquamdiu voluta fuit per terræ superficiem.

Ex his patet, non posse certò definiri distantiam terræ, è cuius vertice in nos decidit, aut quousque prolapsa euoluatur exhalatio, quod significatur Esdræ lib. 4. cap. 4. *Vade, pondera mihi ignis pondus, aut mensura mihi flatum venti, aut reuoca mihi diem qua præterit.* Mensura enim longitudinis axis per quem spirat, reuerà non potest à nobis sciri. vnde Saluator Ioan. 3. *Nescis vnde veniat, aut quò vadat.* Quia tamen Ætne cineres, Plinio teste, ad 150. miliaria pass. inde recidunt: & apud Dionem lib. 66. Vesuvius Campaniæ mons, sub Tito, cinerem Romam vsque, imò trans mare in Ægyptum & Syriam ructauit, nec videtur cinis vento aditus ad hæc omnia loca, quæ contraria sunt, peruenisse: ventus è supremâ mediæ regionis parte (vbi Ætna verticem habet) tam procul etiam recidere potest, quia sæpè non est grauior cinere. vnde cum 150000. pass. colligant 50. leucas Belgicæ, patet, ventos sapius ori-

Lib. 1.  
c. 103.

ri vltra horizontem nostrum visibilem, cuius semidiametrum antè tantùm fecimus 6. leucatum. & hinc venti & nubes videntur nobis supra horizontem ascendere: cùm tamen neutri reuerà scandant; sed nubes circulariter agantur, & venti potius cadant. Imò origo & fons eorum longè vltra 50. leucas abesse potest: quod hinc licet æstimare. Ad fluxum enim facilem & satis prouum fluvialis aquæ, sufficit alueum intra mille passus vno passu deuergere, & ad terræ centrum inclinare, vt docebimus Libro sequenti. pone ergo fontem venti in supremâ parte medix regionis aëris, quam Libro primo diximus 4. circiter mill. passuum a terrâ distare. hinc si paricum aquâ illâ fluviali inclinatione in terram defluat, necessariò 4. millia milliarium in aëre conficiet antequam attingat terræ superficiem. sed tamen ventus sæpè est magis præceps, maximè qui flat à gelido aut humeti cardine. horum enim, vt sic dicam, alueus rectior & magis præruptè decurrit in terram. adde, vix vnquam tam altam esse ventorum originem: cùm summas illas nubium plerumque aspicimus tranquillas à ventis; vt & vertices illorum montium, qui attingunt circiter medix regionis finem. Itaque è mediâ statione nubium, aut etiam proximâ, quæ dimidio tantùm milliari abest à terrâ, vt plurimùm venti decidunt. quod maximè verum, si à nubibus deorsum repelli deberent. Si autem à dimidio mill. defluat, deuergendo per singula milliaria tantùm vno passu, post decursum transversalem 500. milliarium in aëre, tandem veniet ad terram: quia sunt 500. passus in dimidio milliari. Quid sit, vix mihi dubium, quin humidi illi & frequentes Zephyri & Africi nobis ex Oceano Flandrico & Gallico surgant. id enim & qualitas indicat, & assiduitas: quia faciliùs Sol è mari & humen- tibus spiritum, quàm è sicco, resoluit. De Austro etiam probabile est, aliquando è mari Mediterraneo huc vsquè peruenire. nisi tamen (quod, puto, sæpè accidit) è Prouinciâ, & viciniore Galliâ, imbris propinqui vtriusque maris, Oceani scilicet & Mediterranei, humectâ, spiritus ille pluuius surrexerit.

## ARTICVLVS IV.

*An eodem vento naui totum Orbem circumnavigare possit.*

**R**esolutio negativa clara est ex iam dictis, si de eâdem numero venti exhalatione res sit. vnus enim & idem spiritus sæpè lassatus concidet & exspirabit, priusquam Orbis totius ambitum de-

currerit. Sed difficultas est de vento eodem, id est, qui ab vno eodemque horizontis puncto venit. Petrus Medina lib. 3. c. 6. Mundi sui, de omni vento, sine discrimine, affirmat: Io. Bapt. Benedictus Epist. ad Andream Prouanam, de solis cardinalibus. ait enim, *Fieri non posse, ut manus ab aliquo loco ad alium, breuissimo interuallo ire possit, per gyrum circuli maioris sphaera, vno tantummodo vento eam impellente, praterquam in Aequatore, vel in aliquo quouis Meridianorum.* Itaque venti qui per azimutha nauem ducunt, quales sunt collaterales, non poterunt iidem nauem circa totum aquæ Orbem circumuehere; sed vnus per vnum azimuthi segmentum, alius per aliud impellet. Sed id non videtur verum. Si enim Boreas per eundem Meridianum subuehere nauem potest, & Subsolanus aut Zephyrus Zonæ torridæ, per Aequatorem, cur non etiam Cæcias per azimuthum suum, quod per Africum, siue ab Ortu æstiuo per Occasum hibernum transit? Quod sic ostendo. Cæcias & Africus tam sunt oppositi, quàm Boreas & Austro: ergo sicut isti ideo nauem sub eodem perpetuo Meridiano propellunt, quia per eandem lineam rectam Meridiano subtenfam spirant & respirant; ita Cæcias & Africus sub eodem azimutho propellent, quia linea spirationis eorum est similiter subtenfa azimutho. Deinde, Meridianus ipse inter azimutha, seu circulos verticales qui transeunt per zenith & nadir polos horizontis, numerari debet. imò azimuthum quod iam ducitur per Cæciam & Africum, Meridianus fieri potest, si, terræ & aquæ immobili manente, Deus cælum sic transferat, ut poli statuatur in punctis imaginariis vnde iam sunt Cæcias & Africus. Sicuti ergo tunc venti isti nauem circa totum Orbem, sub vno eodemque Meridiano per polos Mundi transeunte, impellere possent; ita nunc sub eodem azimutho poterunt, qui non est Meridianus ideo tantum, quia per polos Mundi non transit. quid enim ad hoc refert, quòd Boreas ab illo puncto imaginario, vbi polus Mundi realis est, spiret, non autem Cæcias, aut alius collateralis? nihil profectò (quantulum videre valeo) cum terræ & aquæ globus vndique pariter sit rotundus. Demonstratio Benedicti longa est: & eadem operâ conficeret, nauem eodem vento numquam sub eodem azimutho, valere propelli ab vno Meridiano ad alterum etiam vicinissimum. quod patiam, credo, est falsum. Assentior tamen, non posse id fieri sub parallelo qui non sit æquinoctialis, quia venti per circulos maiores, qui Orbem terræ in duas partes æquas diuidunt, spirare describuntur:

tur: omnes autem paralleli, circuli minores sunt, excepto *Æquinoctiali*. igitur nullus idem ventus ab Ortu aut Occasu veniens, vniquam circumcurrit totum eiusmodi minorem parallelum: sed omnes, excepto Subsolano & Zephyro, interfecant *Æquinoctialem*. An ergo, inquires, omnium ventorum exhalatio relabitur per circulum maiorem? Respondeo: Omnino faceret, nisi medium quod ipsa sulcat, inæquale & non vniformis resistentiæ, eam detorqueret. graue enim etiam si obliquè cadens, breuissimâ tamen, quàm potest, lineâ, centrum grauitatis quærit. quod agendo, sub aliquo segmento circuli maioris motum suum dirigit. vnde etiam flumina sic fluunt, nisi obliquitas aluei, per circulum minorem, cursum deprauet & abducat. Igitur eadem exhalatio detorta, & à circulo maiori aberrans, nauem sub parallelo minori ducere valebit, inquires. Respondeo: Verum est. sed vna eademq; exhalatio huc illuc se torquens & palans, à diuersis horizontis punctis rectâ adspirare videtur; ideoque variorum ventorum rationem induit.

## CAPVT VI.

*De Ventis anniuersariis.*

**V**ENTVS generaliter in procellosum, & non procellosum, diuidi potest. De procelloso Lib. 2. circa materiam fulminum diximus. Non procellosus est, qui vulgariter appellatur ventus, & ab Aristotele definitur, *Exhalationis sicca copia per terram currens*. Hic vel anniuersarius est, vel non talis. Anniuersarius, à Græcis *Etesias* dictus, stat statibus quibusdam & solemnibus anni temporibus. In Græciâ quidem & plerâque Europæ regione, estate à Septemtrione. vnde Aristoteli, Plinio, & aliis *Etesia* passim dicuntur venti Septemtrionales. Non vbiuis tamen indidem spirant. Scaligerum Exercit. 47. audi. *Hic in Gasconiâ*, inquit, *eos* (*Etesias Aquilonares*) *numquam sensimus, sed Austros, tum crebros, tum perniciosos. Quin etiam in orâ Carnorum ad Adriaticum, eorum nullum sensum cepi, sed potius Subsolano, qui secundo Sole flant, ut loquitur Nigidius, id est, ut obseruauimus, Solem comitantur*. Vbi paullisper etiam resisto super isto Nigidianæ phrasæ interpretatione. verba eius sunt ex lib. 2. de Ventis, apud Agellium lib. 2. Noctium cap. 22. *Et Austrî anniuersarij secundo Sole flant. vbi considerandum*, (ait Agellius, nec

refoluit) *quid sit, secundo Sole*. Non ergo de Subsolanis, sed Austris, loquitur Nigidius: qui stant secundo Sole, id est, ut existimo, Solem comitantur, ad nos motu proprio à Brumali Tropico reuertentem. Etesiz enim Australes & Ornithiz spirant, ut statim dicam, post hiemale Solstitium. sic dicimur secundo flumine nauigare, id est, aquà obsecundante, & comitante nauem.

## ARTICVLVS I.

*Tempus Etesiarum.*

**E**Tesiz Septentrionales flare occipiunt, inquit Aristoteles, post Solstitium æstiuum, circa exortum Canis. De Cane verò minore siue Caniculâ intellexit lib. 2. c. 47. Plinius. Dicit enim: *Ardentissimo aëstatis tempore exoritur Canicula sidus, Sole primam partem Leonis ingrediente: qui dies decimus quintus ante Augustas Kalend. est. Huius exortum diebus octo fermè Aquilones antecedunt, quos Prodromos appellant. Post biduum autem exortus, iidem Aquilones constantius persilant diebus 40. quos Etesias vocant.* Vbi tamen non nihil memoriâ lapsus est. anno enim veteri Iuliano, Sol, non 15. Kal. Augustas, sed 18. ingrediebatur primam Leonis partem, die scilicet 14. Iulij, quando ipse Plinius lib. 18. cap. 28. dicit in Ægypto Prodromos incipere; quos tamen, ex sententiâ Cæsaris, decimo demum Kalend. Augusti sentiat Italia. Itaque opinio Cæsaris, in Italiâ non antecedunt, ut antè dixerat Plinius, Prodromi diebus octo exortum Caniculæ, sed sequuntur. Verum, ut est ventorum inconstantia, præcedere aliquando, & aliàs sequi possunt. Sed stemus, si placet, contra Cæsarem à Plinio, & octo diebus ante ortum Caniculæ Prodromorum flatus statuamus incipere. Cum ergo Louanij in eleuatione Poli fermè grad. 51. Canicula circa 5. Leonis gradum manè ascendat cum Sole, Prodromos iuxta hanc legem sentiemus primùm circa diem 21. Iulij, quando Sol est in fine Cancræ. Quod verò addit, post biduum exortus, spirare constantius Etesias, non intelligit, credo, post exortum Prodromorum (quod putat in suâ Isag. Maginus) sed ipsius Caniculæ. ut videlicet decem totos dies Prodromi suos Etesias præcurrant, Etesiz quæ 31. Iulij, id est, ultimo ipso mensis die, nobis assent. Quod quàm sit affine vero, ex hac Tabellâ Aneinologicâ à me olim concinnatâ discite. Etiamne tu tam vacuus, inquietis, ut potueris in hac

hac ventorum perpetuâ curâ esse? Tacete. Tam citò hoc potuit subnotari, quàm vos nasum emungere.

*Tabella Anemologica Etesiarum anni 1614.*

**A** Primâ Iulij ad vndecimam, venti Occidentales flarunt sereni.

Vndecimâ, lenis & rorans Aquilo.

A duodecimâ ad 17. Auster pluuius.

A 17. ad 20. molles Aquilonares Etesiz, siue mauius Prodrumi, qui vix valuerunt reddere serenitatem.

A 21. ad 24. Nôtolibycus, inter scilicet Africum & Libonotum, serenus, intercurrente tamen frequenti nubilo.

A 24. ad 27. Fauonius cœpit, & deinde Caurus, Thrafcias, Bo-reas, Mefes, in orbem flatus sibi tradiderunt.

A 27. ad 1. Augusti, Etesiz affluerunt, cum effuso in fine nimbo, fulmine & tonitru, præsertim nocturno.

Die 2. Augusti, Fauonij cum pluuiâ diurnâ & pomeridianâ.

A 3. ad 8. Africus pluuius, & subinde tonans.

A 9. ad 11. Etesiz rorantes.

A 12. ad 13. Zephyri primùm, deinde statim Libonotus atrocior, & effusè pluens.

Dubitarunt hic Etesiz, an redire vellent, sed se compresserunt.

A 14. ad 15. humentes Zephyri.

A 16. ad 19. Austri sereni ac ridentes, & verè Leuconoti.

A 20. ad 29. Nôtolibyci, qui inter Austrum & Zephyrum, & in Belgio frequentissimi omnium & validissimi.

Die 30. Etesiz respirant.

A 31. ad 8. Septembris regnavit Auster.

Dies notauit, nox, quia dormiendum erat, sine obseruatione fuit: sed non puto eam longè ablusisse à die.

Ex illâ autem Anemologiâ patet, à 21. Iulij, quando, lege Plinianâ, aspirare deberent Prodrumi, ad 8. Septembris, quando exspirat Etesiarum tempus (post enim 10. dies Prodrumorum, dixit Etesias constantius perflare 40. diebus) Etesias non fuisse valdè pertinaces, sed variè interpolatos, & raros: imò Zephyros, & qui quadrantem horizontis ab Æquinoctiali ad polum Austrinum tenent, sæpius flatus frequentasse: longissimumq; Etesiarum tempus, sex dierum perpetuorum, à 27. Iulij ad 1. Augusti fuisse.

Sed

Sed vt similitudinem aut discordiam annorum intelligamus, iuuat, nisi tibi qui leges molestum est, alium experiri.

*Tabella Anemologica Etesiarum anni 1625.*

- D**ie 1. & 2. Iulij Caurus nebulosus & subinde pluens.  
 Die 3. Zephyrus Cauro similis.  
 4. Boreas & Meses, stillantes & humecti.  
 5. 6. 7. Africus cum pluuiâ interuallari.  
 8. Caurus.  
 9. Zephyrus.  
 10. Caurus.  
 11. Thrafcias effusè pluens.  
 12. & 13. Dies primi æstiuales, cum Boreapeliote, inter Cęciam & Mesen, sicco & feruente.  
 14. Eurus vrens.  
 15. Zephyrus stillans & tonans.  
 16. 17. 18. idem, sed serenatus.  
 19. Aquilo Etesias, clemens, feruidus, & nocte tonans.  
 20. Zephyrus in nubilo.  
 21. idem siccior & feruens.  
 22. 23. 24. 25. 26. Thrafcias, Boreas, Meses Etesiaz, calidi.  
 27. Zephyrus eiusdem temperiei.  
 28. & 29. idem, sed pluuius & fulgurans.  
 30. Africus pluens, tonans, & multâ grandine delapidans.  
 31. & 1. Augusti, Zephyrus amœnus & ridens.  
 2. Augusti, Etesias pluens, & statim siccans.  
 3. Eurus serenus, & subito Zephyrus pluens.  
 4. 5. 6. Zephyrus similis præcedenti.  
 7. 8. Thrafcias Etesias, serenans.  
 9. Boreas & Meses Etesiaz, pluuij & tonantes.  
 10. 11. & 12. Zephyrus serenus, aut nubilus, & quandoque destillans.  
 13. Caurus serenus, sed interuolante nubilo.  
 14. 15. 16. 17. Africus siccus, aut subinde guttans.  
 18. 19. 20. Zephyrus ei non dissimilis.  
 21. 22. 23. 24. 25. Zephyrus & Africus ferè alternis, & qualitate prioribus affines.  
 26. Caurus.



27.28.29. Zephyrus per lucida interualla nebulosus.

A 30. Augusti ad 24. Septembris, pertinaces, & vix alio breui subinde flatu interpellati Etesiz, qui etiam Louanij 7. Septembris incendium latissimè sparserunt. Cùm enim celebri illo Encenio- rum die, imprudens aliquis igne bombardario stramineum tectum incendisset, Etesiz Aquilonares in aduersam & Australem plateæ regionem scintillas distulerunt, & integram duarum & triginta circiter ædium insulam, cum horreis multis plenis, funditus & sine remedio absumpserunt. Nos enim hic, vt scias, velut in viridi illâ & suburbanâ Platonis Academiâ habitamus, & (vt Lipsius noster in suo Louanio) *Rui in urbe habemus.*

Ex hac porro huius, in quo scribo, anni 1625. ventosâ Tabellâ, colliges, Iulio & Augusto iterum Zephyros, & qui inde ad Austrum deurgunt, constantiores fuisse Etesis. Prodromostamen staturâ ferè die affuisse, sed 5. tantum diebus tenuisse, à 22. Iulij ad 26. Etesias verò tentasse non semel subsequi, sed inualido conatu, donec tandem toto pæne Augusto à Zephyris pulsâ, Septembrem longè inuaserunt. Causam eius facti, Articulo sequenti red- dere conabimur.

Præter Etesias Aquilonares, sunt alij Australes, quos Aristoteles λευκονοτος, id est albos Austros, alij ὀρνιθίας, seu Auiculares vocant. Leuconotos quidem, quia sereni & innubes, inquit Theophrastus. Auster enim tenuis & inualidus, quales verni illi Etesiz, solet serenare. Auiculares autem, quia procreandis auibus maximè faciant, ita vt aues solo eorum afflatu oua concipiant, vt Vicomercatus (non ego) credidit. vel potius ab aduentu auium, vt Plinius. aut etiam, quia venti Australes circa initium veris, aues imbecilli & brevis volatûs (quales coturnices, philomelæ, aliæque è peregrinis) ex Africâ & locis Zonæ torridæ vicinis, reflant in Europam. vnde quia lato Maris mediterranei traiectu, multæ viribus defectæ, & in mare deciduæ, aquis suffocantur, accolæ quotannis piscationem coturnicum instituunt, si credimus Bodino. Hinc à me obserua- tum, anno 1619. rarissimas apud nos fuisse coturnices, quia toto vere Aquilones in Africam respirauerunt. Ornithiæ post Solsti- tium brumale, vt Etesiz post æstiuum, incipiunt flare, sed tardius, & septuagesimo demum die, inquit Aristoteles: flatu etiam inua- lidiori, & sæpius interpolato. Circa ergo initium Martij nobis redibunt.

## ARTICVLVS II.

*Caussa efficiens Etesiarum.*

**A**ristoteles & Theophrastus docent, Etesias Aquilonares esse à liquatione niuium & glaciei sub vltimo Septemtrione. Toto enim medio anno suæ noctis plurimum niuis decedit, & mare sic glaciatur, vt Hollandi, dum nuper viam illac in Sinas quæ-  
runt, in ipso Solstitiali die glaciem totam marinam 6. pedes altam reperiunt. Non statim autem à Solstitio Etesiarum adspirant; quia longà morà Solis (præsertim quia radius ibi eius valdè obliquus est & inefficax) tanta concretio debet dissolui: ideoque non primo statim accessu sideris, sed paullo postquam incepit abire. Canis, & Canicula etiam, quibus tunc iungitur, fortasse aliquid in commune conferunt ad illam niuium & glaciei tabem. Ex spiritu ergo niuali in altum sublato, & deinde post frigerationem relabente, est illa materia Etesiarum. Notavi tamen non vno anno, & præsertim proximis istis 1624. & 1625. Etesias istos Aquilonis, non semel tantum, sed bis, velut ad constitutum, redire, & pertinaciter fatis edurare. Primum, mense Maio, deinde Augusto, aut initio Septembris, vt antè vidimus. Caussa videtur esse, prima tabes & liquatio summarum aut rarissimarum partium niuis, quæ diu tolerare nequeunt Solis teporem. aliæ verò densiores & compactæ, tardius obediunt, & aliquantò post Solstitium. Nec enim verum est, quod lib. 5. cap. 11. Seneca, mense Iulio dispoliata esse omnia, aut pauca adhuc iacere ibi sub niue. Hollandi enim dissentunt: cum præsertim plurimi etià alibi montes se toto anno vix exuunt. Et sint, etià sanè omnia dispoliata niue; ex aquâ saltem illà multâ & niuali, quâ terra illa cõputruit, resolui possunt Etesiarum. Caussa verò inconstantiz eorum, reiicienda, vt facit Theophrastus, in liquationis & resolutionis dissimilitudinem, aut quia certè exhalatio aliorum auertitur. ipsa enim in sublimi pendula, diffuere in orbem potest, & in quamlibet Mundi partem. pronius tamen è Septemtrione versus torridam recidit; quia aër hic rarior & solutior, & exhalationi se diuidere conanti, faciliè obediens. dubia ergo exhalatio quânam defluat, potius inclinât, vbi inuentura resistentiam minorem. vndique enim exite & se exonerare tentat, impellitque partem infirmiore.

Delicati autem & somniculosi à nautis Etesiarum vocantur, vt ait apud

apud Senecam Gallio, *quoddam nesciant surgere*. vt enim lib. 2. cap. 47. Plinius, *noctu desinunt ferè; & à tertiâ dici horâ oriuntur*. Somniculosi ergo sunt, quos tribus integris horis præuerit Sol exorians. Sed cur potissimum interdiu spirant? Quia, inquit noster Aristoteles, internoctu aquæ concretæ non liqueſcunt, nec exhalationes funduntur, sed aliquot horis (quando etiam siccantur, & diffugiunt rores) post Solis ortum. Sed ecce mihi scrupulus, & lapis totus, vbi omnia plana rebar. Sol enim sub polo, toto illo medio anno numquam occidit, cur ergo etiam nocte nostrâ, quæ ibi dies est, non expirantur è niuibz illis, & in nos recidunt Etesizæ? Dic ergo, eos qui die tantum spirant, ex vicinâ v.g. Hollandiâ, non ab ultimo polo nobis aduolare. Cum enim venti Aquilonares, vt Aristoteles etiam & Theophrastus nos docuerunt, grauiores & propensiores sint ceteris, non longè cadunt: vnde sapius in terram decidere oportet exhalationes sub polo eleuatas, & denuò resurgence, vt tandem in nos recidant. Venti enim postquam in terram delapsi, in superficiem eius effunduntur instar inuisibilis aquæ, ibiq; hærent, aut certè, si paulò leuiore, in aëre tamen infimo penduli oberrant & fluctuant. hinc autem radio surgentis Solis isti, denuò in sublime retrahi, & in nubibus refrigerati, longius recidere possunt. Aliàs enim fieri non potest, vt à polo Arctico, spatio trium aut quatuor horarum, per gradus ferè 40. peruenire ad nos Etesizæ, languidi præsertim, vt solent, & remissi, valeant. Dupliciter autem Sol exorians ventorum affluxum adiuuat. aut excitando materiam, quæ statim in sublimi densetur & defluat; aut aërem nocturnum tenuando, vt facilius in illam partem exhalationi delabenti cedat. Tam citò autem, inquires, exhalatio scandens refrigerat & densatur, vt statim recidat? Ita. Et ne mireris, vnde halitum hieme in aërem frigidum expiratum ore animalis, subito sic addensari, vt palàm sit visibilis, & lumen reflectat, cum tamen æstate propter raritatem nemo eum videat. Ceterum Ormithæ Australes tardiùs & interpellati spirant, inquit Aristoteles; quia circa Solstitium hiemale Sol nimis à nobis abest, nec per hiemis rigorem, sat multas exhalationes ex locis circa & citra Tropicum Cancrici acen-  
tibus, ad ventum saltem constantem, excitare valet. Itaque Orni-  
thæ differuntur ad initium fermè veris.

## CAPVT VII.

*De Ventis Prouincialibus, Apogais, & Auris.*

**V**ENTVS Prouincialis est, qui Prouinciā aliquā specialiter, non alias vicinas, perflat. Talis Iapix siue Atabulus in Apuliā, Circius in Narbonensi Galliā, Olympias in Eubecā, Sciron Athenis. Phauorinus apud Agell. lib. 2. cap. 22. Iapiga, pulchro argumento, existimar esse Caurum; quia Virgilius Cleopatram è nauali ad Actium prælio in Ægyptum Iapige vento fugientem facit. Fallitur ergo noster Lemnius lib. 3. cap. 3. de Occult. miracul. qui *Vuest Zuyd-Vuest*, inter Zephyrum scilicet & Austrum, medium putat. Circio autem, etiam ædificia quassanti, gratias tamen agunt Narbonenses, ait Seneca, tamquam salubritatem cæli sui ei debeant. Templumque illi, vt benefico, Cæsar Augustus, cum in Galliā moraretur, & vouit & fecit. Hodie etiam & nomen & vehementiam retinet, vt in Notis ad Senecam testatur M. Ant. Muretus. Hic quoque Caurus, aut prope ipsum est, qui in Occidentalibus etiam Nortvegiæ & Islandiæ litoribus omnia euerit, vt scribit Olaus. Galli Picardi, teste Bodino, excoiactorem viculorum appellant: nomenque idem, vt iam intelligo, apud rusticos nostros habet; quia per Martium aliquando debacchans, vitulis frigore necem affert, & corium detrahit. In Hannoniā & Artesiā passim ventum Scotum nominant; quia à Scotiā pænè iis venit.

Subsolanus etiam toti Zonæ torridæ dici potest quodam modò Prouincialis: circa enim totum anni circulum mollior spirat. adeò vt Ios. Acosta, diligens rerum Americarum Scriptor, censeat non esse exhalationem, sed aërem motu primi Mobilis in orbem circumuentum. sed raptus cæli, vt Libro primo docui, vsque ad terram non descendit.

Causæ ventorum Prouincialium, in primis, sunt montes, qui à vicinis Prouinciis auertunt flatus. Ita Circium arcet modicum iugum, vt lib. 2. cap. 47. ait Plinius, ne in proximam Viennam penetret. sic etiam ab Olympo & Ossa Aquilo ita reflectitur, vt sibi ipsi reflect, & nubes inferiores agat in Septentrionem contra seipsum directum, vt docet Theophrastus. Venti autem sic in se reflecti, Trôpæi, aut Versorij appellantur.

Angu-

Angustiz deinde regionis quam perflat ventus, facere eum possunt magis insignitum & Prouincialem. Inter enim montes v.g. spiritus densior & torrentior est, vt fluxus aquæ in angusto. Pari modo, ventus per rimulam fenestræ in cubiculum inspiratus, appositâ manu, densius & frigidius sentitur, quàm si toto ostio admittas. Denique, vicinia terræ fungosæ, aut perpetuè humentis, item maris, aut insignis alicuius lacus, ventum inde pertinaciorem & ferociorem, in illam Prouinciâ expellit.

Apogæi, quos Plinius Altanos, Apuleius Terrigenas vocat, sunt venti è certâ Prouinciâ nati, & in eam recedentes.

Auræ verò, molles quidam & humentes ventuli, è mari, lacubus, aut fluminibus vaporati, & in vicinum refluentes.

Manè autem potissimùm exoriuntur, humore in altum, tepore primi Solis, exsucto, ac deinde frigore superioris aëris, leniter densato, & sic per aëra leuiorem relabente, vt Theophrastus & Aristoteles verissimè. Si verò spiritus è sinu aliquo profiliat, Encolpias, quasi Sinualis, vocatur; vt docet Auctor Libri de Mundo.

## CAPVT VIII.

### *De proprietatibus Ventorum.*

**V**ARIA, perplexa, & confusanea pleraque ab Auctoribus de proprietatibus & qualitatibus ventorum. Ratio mihi esse videtur, quia quisque patriam suam aspicit, quæ non vbique experitur eodem temperamento ventum ab vno eodemq; cardine venientem. Fabr. Paduanus Philosophus Foroliuiensis affirmat, Eurum in Italiâ esse calidum & humentem, & Austro nostro similem: Fracastorius, Vulturum & vicinos Syroccos, effusè pluuiosos, qui hic sæpius aridissimi sunt. & Plinius: *Auster Africa serenus, Aquilo nubilus est.* Iosephus Acoſta narrat, inter Æquatorem & Tropicum Capricorni, Austrum esse Hispanico Boreæ, frigore cognatum. Itaque, vt omni confusione & perplexitatibus me expediam;

Dico Primò: Naturales qualitates omnium ventorum, quæ exhalatione constant, frigus & siccitas, quæ vapore, frigus & humiditas sunt. Ratio est, quia probabile est, exhalationem adhuc retinere formam terræ, & vaporem, aquæ; illæ verò qualitates, terræ & aquæ naturales sunt.

Dico Secundò: A terrâ tamen & aquâ, aut aliis corporibus, unde resoluuntur, item ab aëre, & locis per quos traſiciunt, varias alias peregrinas qualitates contrahere poſſunt. Pater, quia hæc omnia contagione ſua alterare & inficere valent exhalationem.

Dico Tertiò: Omnis ventus ſimpliciter frigidus eſt. Teſtor experientiam, & cauſſam efficientem; quam antè docui, eſſe frigus mediæ regionis aëris, condenſans & prægrauans, vt decidat in terram.

Dico Quartò: Alij tamen alijs frigidiores; vel quia per loca algentia, vt Aquilonares, tranſeunt; vel quia è mari ſublati, & inſuper nubes inde vehunt, vt Occidentales. horum comparatione, Orientales & Auſtrini, calidi dici poſſunt. & Ariſtotelem volentem in hanc mentem adduco; cùm Aquilonibus frigus & ſiccitatem, Auſtris calorem & humiditatem, Subſolanis calorem & ſiccitatem, Zephyris frigus & humiditatem, id eſt, ſingulis alicuius Elementi naturales qualitates diſtribuit. Aquilo enim terreus, Auſter aërius, Subſolanus igneus, Zephyrus aqueus ſic erit.

Dico Quintò: Venti omnes qui exhalatione conſtant, reuerà ſicci; qui vaporem trahunt, humecti ſunt. unde qui à mari vel aquoſis, multum humoris; qui à mediterraneis & areniſſimis afluunt, multum ſicci habent. Sed de ſingulis maniſeſtus aliquid autumemus.

## ARTICVLVS I.

### *Ventorum Septentrionalium qualitates.*

**A**quilones vbique ſerè in Europâ celebrantur algentes & ſicci: quia frigida loca permeant, & ex ſubtiliſſimâ & aridiſſimâ niuium frigida Zonæ parte reſoluuntur. hinc etiam ſereni, & corporibus humanis ſalubres exiſtimantur. Homerus Odylſſ.

*Και Βορέας δι' ἀπρηγνέτης, μέγα κῆμα κυλίνδων.*

*Et Boreas ſerenator ingentem fluctum voluens.*

Experientes in Belgio Architecti eum in cæde lignorum obſeruant, & magis eos qui paullisper declinant in Ortum. Non minus enim contra teredinem, venti ſiccitatem, quàm Lunæ, putant reſerre. Serenat autem, vt equidem exiſtimo, & quia frigore aërem denſat, ne facile coire, & in vnâ guttam maiuſculam, quæ ſat ponderis ad relapſum habeat, confluere vaporis minimæ particulę valeant: & quia nubes è longinquo multas & confertas adducit.

cùm

cùm enim præcipiti casu, tamquam gelidior & densior, in terram se exoneret, nec in longum, vt Auster, spiret, in latus etiam nubium non incurrit: sed vel origo eius infra ipsas & prope terram est, vel si est supra, perpendiculari propemodum lapsu eas incidit, nec inde aspellit, procul. Hinc in regionibus à Polo remotis, & ferociâ & frigore longè sibi dissimilis est. & Plutarchus in Sertorio causam temperiei Fortunatarum Insularum potissimam in Aquilonem retulit; quicquid fractus & elumbis, & rigore per spatia calentiora mollito, peruenit. hincque Sertorium sumplisse impetum, vt reliquâ Romanis Hispaniâ, in beatas illas Insulas demigraret, molliorem fortunatamque extra bellicos tumultus interque blandimenta regionis exacturus vitam.

In Belgio tamen Aquilo cardinalis non semper serenitatem, imò sæpissimè nubes adducit & humorem; vti docuit me longa & certa experientia. Ratio, sine dubio, est; quia à mari Deucalionis & Hollandico nos hic afflat, vnde nubes è vaporibus illius Oceani concretas, in verticem nostrum propellit. Manifestius tamen id Thracias & alij ad Occasum inclinantes faciunt; quia ab ingentibus Oceani Scotici spatiis, vbi Sol etiam præsecurit plures nubes euaporat, adspirant. His ventis Boreolibycis annus nuper 1624. & præsens 1625. aliosus, & perpetuò per multos dies profusè pluens fuit, circa æstiuum Solstitium; aded vt Solstitiali ipso die, frigore pænè dingerim, dum inter Duacum & Valencennas curru fortè vehor.

Longè verò sicciores, & vnici ferè serenatores nostri sunt, Messes, Boreapeliotes, Cæcias; qui scilicet arcum illum obsident inter Boream & Subsulanum: quia nobis à sicco fermè & terreno flant.

Salubres etiam Aquilones, vbi frigidi & sicci, sunt: quia purum sine nebulâ aërem vehunt, & impuros Austros abigunt. frigore deinde cutem animalium stringunt, & calorem naturalem in interaneis & partibus vitalibus, quæ coquunt alimentum, continent. Et abhinc Septemtrionis populi salubriori corpore & viuaciori sunt; aded vt vegeti & robusti ad annum 80. ait Asclepiades, facillè perueniant: vbi Æthiopes anno 30. senescere incipiunt; quia carne rariori, & calor regionis aperit poros, effunditque spiritum & calorem naturalem. Nec enim quoddam Hispani, Itali, & Meridionales, salaciores Belgis, maioris caloris est argumentum. Lepores enim longè proniores in Venerem, quàm leones sunt; & tamen multò minùs feruent. humor ergo melancholicus magis, quàm calor,

acti-



acrimoniâ suâ videtur acueri & sollicitare Venere<sup>m</sup>. Abundantiam autem melancholiæ in Meridionalibus affirmat tanta furiosorum in Africâ multitudo, quibus ubique publicè domus constitutæ sunt, vt ex Leone Afro ostendit cap. 5. Methodi Bodinus. & Antuerpiæ profectò plures in furiosâ illâ domo, Hispanos, Italos, hypochondriacos & furere videas, quàm Belgas, qui molliter potius dementiunt, quàm furiis agitentur. Irascuntur etiam faciliè Meridionales, sed nò ab excessu caloris, at frigore magis, id est calore modico, vt feminæ; quæ Hippocrati *ὀξύθυμοι*, non *θυμώδεις*; *feroces*, non *animosa*, appellantur, vt lib. 8. cap. 2. pulchrè docet Laurentius. vel certè à frigore & siccitate in vnâ complexionem melancholicam colligatis. Salubritatem Aquilonis etiam egregio exemplo M. Varro, ille Rei rusticæ Scriptor, ostendit. Cùm enim Corcyræ per classem & exercitum grassaretur mirum in modum pestis, immisso fenestris nouis Aquilone, & obstructis pestilentibus, ianuaque permutatâ, suos comites & familiam incolumes reduxit. Magnus etiam Hippocrates pestilentix illi famosæ, quæ totam pænè Asiâ ab humano cultu vastam fecit, plurima mortaliū millia, simili arte enpuit. Vnde Varro lib. 1. cap. 56. de Re rusticâ, *Triticum*, inquit, *condi oportet in granaria sublimia, quæ persentur vento ab exortu, ac Septemtrionum regione, ad qua nulla aura humida ex propinquis locis adspires.*

Vitruuius quoque lib. 1. c. 6. dispositionem vrbis Mitylenes damnat. *In insulâ Lesbos, ait, oppidū Mitylene magnificenter est adificatum & eleganter, sed positum non prudenter. In quâ ciuitate, Austër cūm flat, homines agrotant, cūm Corus, susiunt; cūm Septemtrio, restituntur in salubritatem: sed in angiportis & plateis non possunt consistere propter vehementiam frigoris.* Similem errorem in ædificatione Hordei noui (oppidum est Venetorum) castigat Dan. Barbarus. quia studiosè sic factum, vt singulæ plateæ ad singulos dirigantur ventos, excipiantque omnes. Præcipit ergo Vitruuius, *Directiones vicorum ita conuertendas à regionibus ventorum, vt aduenientes ad angulos insularum frangantur, repulsiq; dissipentur.* Maximè tamen omnium admittendi Aquilones (aut in Belgio, qui inter Aquilonem & Ortum Equinoctialem sunt) & Subsolani. Quod prudentissimè & affabrè seruatum in dispositione fori vrbis Tornacensis nuper vidi. vbi malignis Austis alta & perpetua ædificia obiecta sunt, admissis per magnam platearum amplitudinem Aquilonibus & Subsolanis.

Sed

Sed nihil etiam Aquilo nocet? *Tussim mouet, ait lib. 2. c. 1. Celsus, fauces exasperat, ventrem astringit, urinam suppressit, horrores excitat, item dolores lateris & pectoris. Addit tamen: Sanum tamen corpus spissat, & mobilius atque expeditius reddit.* Noxas tamen illas per accidens solum, & in corpore humoribus tumido creat, vt ad Celsum Ronsæus docet. Dum enim per poros se insinuat, & humores siccare nititur, ac sollicitat ad expulsionem, nec tamen valet expellere, corpus frigore suo adstringit, & humorem à capite in fauces & thoracem exprimit. vesica quoque faciliè frigore læditur & contrahitur, quia exsanguis. aluum etiam suâ siccitate indurat: aliquando tamen etiam exprimendo humores in sentinam illam corporis, citat & præcipitat. vnde Plinius lib. 18. cap. 33. gregem contra Aquilonis flatum pascere vetat. *Clodunt enim, ait, lippiuntq; ab afflatu, & aluo citâ pereunt.*

Licet etiam sæpius leniat aut extinguat; aliquando tamen etiam incendit pestis ardorem. Miratur enim lib. 2. c. 2. Cosmocr. Cornelius Gemma in acerrimâ illâ anni 1564. Aquiloniâ hieme (quâ etiam *passim, inquit, pauperioribus aures, pedes, manusq; decidebant*) pestilentiam Bruxellæ aliisque Belgij locis nil remissile, sed seuiisse atrocissimè. quia, vt existimat, nimia frigoris adstrictio impediuit sanguinis humorumque transpirationem. In Britannia etiam Scal. Exer. 200. negat esse vinum vernaculum; quia egressum è Leone Solem excipiunt frigidiusculæ Etesiarum auræ, quæ non sinunt vuas perducere ad maturitatem. Et hoc anno 1625. omnem vini spem, aliosq; illi circa Solstitium Aquilones, & Etesiarum deinde per totum pænè Septembrem secuti, extinxerunt.

Certum quoque est, & à Columellâ notatum, cortices arborum Septemtrioni obuertos, duriores esse, ideoque in transplantatione, rubricâ signari. & Poëta lib. 2. Georg.

*Quin etiam cali regionem in cortice signant:  
Vt quo quaque modo steterit, quâ parte calores  
Austrinos tulerit, quâ terga obuenteris axi,  
Resituant. adcò in teneris consuescere multum est.*

Sed quâ vi Aquilo omnia sic adurit, & congelat? Non frigore & siccitate, vt vulgus Philosophorum existimat, aiunt Chymici, sed vi quadam aliâ opiatâ & frigorificâ, quæ non sit formale frigus. Et Quercetanus: *Non quia siccus & frigidus, glaciât, sed quia eius proprietates vitriolatæ, acetosæ, & berberizatæ sunt.* Vt res, sic verba mira.

Verum, stultum est, inquit alicubi Aristoteles, sensu relicto, sectari velle rationem. hoc enim est eruere sibi oculos, quod olim fecit Democritus, ut solâ imaginatione vtaris in tenebris. quare ergo volumus Boream, ut opium & cicutam, frigefacere, & non magis, ut aquam vel niuem? frigore ergo, quod in eo sentimus, refrigerat & addensat, perinde, ut ignis calore dissipat ac rarefacit: indurat etiam & glacie incrustat, si siccitas insignis frigori adûit. Indicât hoc Sapiens ille Eliud Iobi 37. *Ab interioribus* (id est, Austro. sic enim mihi interpretatur ipse Iob cap. 9.) *egreditur tempestas, & ab Arcturo* (id est Septemtrione, vbi sidus Arcturi) *frigus.* & volens significare effectum frigoris Aquilonis, subiungit: *Flante Deo concrefcit gelu, & rursum latissimè funduntur aqua.* Idem innuitur Psal. 147. *Attittis crystallum* (id est, glaciem) *suam, sicut buccellas. ante faciem frigoris eius* (à quo scilicet aqua mollis & fluens in lapideam glaciem sic duratur) *quis sustinebit?* Quod etiam satis apertè experientiâ probatur: quia expulso per calorem ignis frigore, glacies, nix, metalla etiam pleraque tabescunt & liquantur. Igitur frigore tenebantur antè, & fugebantur in isto rigore, ne diffuerent partes. Doctiss. nihilominus Valesius lib. de Sac. Philos. c. 50. perseuerat negare, Boream astringere aquam frigore, sed efflando ex aquâ ignem, quem putat tenuissimo spiritu permixtum omnibus corporibus; illumque esse, qui liquores omnes fluxos efficiat. Itaque stat & concrefcit aqua, inquit, quia Aquilo ignem è poris expellit, qui partes eius fundebat. Sed difficulter persuadebit. Sic enim alij venti, etsi minùs frigidi, passim etiam gelabunt, quia & ipsi se insinuare intra meatus, & flabellare ignem illum spiritalem valent. deinde, substantia venti non tam altè in aquam, quàm congelatio, descendit. & glacies sæpè aquam infrà profluentem sibi frigore alligat, vento ultra summam eius superficiem non penetrante. Denique cur ignis ille leuior, aquâ non exspirat; aut cur in eum non collabuntur, & extinguunt partes illæ aquæ fluentes?

Sed ne longitudo ista frigore me percutiat, & extinguat gratiam, vento alio me calefacio feruentiori. Pulso igitur Aquilone, Austrum induco.

## ARTICVLVS II.

### *Ventorum Meridionalium qualitates.*

**A**uster, & qui circa eum proximè, vulgè calidia audiunt & humentes. Calidi, id est, ut autumno, minùs frigidi: quia ex locis  
Zonæ

Zonæ torridæ propinquieribus rectâ ferè & breuissimâ lineâ spirant, ideoque exhalatio & vapor quem vehunt tepidior, tamquam potentiori Solis calore resoluti; & deinde aliquid etiam frigidius posuerunt, longo sæpè per calidas regiones & obliquo transcurso. Cùm enim obliquiores ceteris sùnt, necesse etiam est, vt diutius per infimam & tepentem aëris regionem moueantur, anrequam ad terram veniant. Et hinc etiam *Austro*, inquit Plinius lib. 2. cap. 47. *maiores fluctus eduntur, quàm Aquilone: quoniam ille infernus ex imo maris spirat, hic summo.* Humidi verò sunt, quia & multo vapore è mari Mediterraneo & aliis aquosis eleuato constant, & maximè, quia plurimas nubes, longo illo transuersali volatu, imbrium secundas colligunt, quæ in capita nostra repluentes, ventum aliàs fortè satis siccum, ceu nimis madentem infamant. Ventum enim humidum appellamus, non solùm qui in se humectus, sed etiam qui aridus humorem secum affert. sic pincetnam, humidum dicere possumus, qui portat humoris amphoram. Vnde eleganter D. Hieronymus Austrum vocat, *Pincetnam pluuiarum*; Plautus, *Imbricum*; Ennius, *Imbricitorum*; omnes passim, *Imbriferum*. Nec satis habet, aduehere ipse nubes, sed conuectas ab Aquilone, vel aliis, molli suo tepore regelat & resoluit in pluuiam. sic nubes quæ à Boreâ fortasse exsufflata, sicca pertransiuit nostrum verticem, dum redit, & ab Austro restatur in Septemtrionem, recidit & exonerat humorem. Ratio est, quia, vt aliàs dixisse memini, paruulo illo quem habet tepore relaxat mediæ regionis aërem, vt minutissimæ vaporum atomi in grandiores guttas confluere possint. deinde etiam aërem infimæ regionis fundit & diducit, redditque istâ rarefactione, humore nubium leuiorem, vt proinde, iuxta æquilibrium leges, necesse sit decidere. Omnia contraria facit Aquilo. frigore suo aërem infimum stringit & grauat, & eum qui inter particulas & guttulas pænè indiuisibiles vaporis mediæ regionis interceptus est, sic densat, vt guttulæ leues & inualidæ iungi, & percurrere ad mutuum contactum non possint. Hinc in Belgio, vbi Boreas non rarè pluuius, stillicidia ramen eius plerumque maligna & minima sunt. *Austro* verò *stante imber improbius, & gutta pleniores sunt*, inquit Seneca. Et vt intelligatis hanc causam esse: Austro hiemalis longè minoribus, quàm æstiuus, guttis depluit. insignes enim illi plenissimarum guttarum & pænè oualium nimbi, cælo tantùm calidiore, & ferè tonante, id est, aëre prorsus in raritatem dissoluto, fiunt.

Tepor etiam Austri manifestè se prodit, cùm hiematam & glaciaram Aquilonibus aquam, tam citò & subitò refundit. Quod inter cetera Dei opera admiratur Psaltes Psal. 147. *Ante faciem frigoris eius quis sustinebit? Emittere verbum suum, & liquescies ea: stabit spiritus eius, & fluent aque.* Auster verò specialiter dici solet, spiritus Dei, & Meridies sapè in Scripturà, sedes Dei; vt Aquilo & Septentrio, diaboli: quia Dei spiritus, similis est Austro. corda enim hominum calefacit, & igne Charitatis accendit, quæ diabolus Aquilonis sui frigore stringit & indurat. vnde meritò spòsus Cant. 4. abigit Aquilonem, & inuitat Austum: *Surge Aquila, clamat, & veni Auster: perfla hortum meum, & fluant aromata illius.* D. August. epist. 120. ad Honoratum, *Spiritum, ait, inuocat gratia, flantem de Meridie, velus à parte feruida & luminosa, vt fluant aromata.* Adipiret etiam nobis blandus iste & gratiosus Spiritus tuus, Domine Deus meus. Peruolet rorantibus alis aridum mentis nostræ hortum, vt fragrantia virtutum germinet aromata, quæ tibi molliter spargant odorem suauitatis. Hic etiam ille Charitatis Auster, est quo in portum salutis nauigatur. Spiritu enim amoris ad te itur, Domine. Pandamus, obliquemus & hac, & illac, & illac, & vndique vela, mortales, vt spiritum istum tam secundum & leniter ferentem colligamus. Ex omnibus, inquam, fororibus creaturis, Patris nostri communis & benignissimi materiam admirationis & amoris colligamus. Nullam propter se, sed in vniuersis Auctorem dissuauiemur. Ab omnibus & vndique in cælum extiliamus: vnde humana, & terrarum Orbem, quem velut ingentem hic suspicimus, tamquam punctum Lunæ cælisque, vti breui pyxide, inclusum, despiciamus: in quâ longa illa, vt putamus, ventorum flabra, angustissimo & indiuisibili pæne ambitu circumcurrunt. Non hoc punctum, neque quidquam in Mundo hoc inferiori, pro magno, præter vanitatem, admiremur. clame- musque istud tantum:

— *O quantum est in rebus inane!*

Sed à cælo deuolemus rursus in terram. Et de Austri nostri no-  
 Cora. Cel- xis, loqueretur Hippocrates Latine. *Auster aures hebetat, sensus tar-*  
 sus l. 1. c. 1. *dat, capitis dolores mouet, aluum soluit, totum corpus efficit hebes, hu-*  
*midum, languidum.* Hinc à Græcis Auster *καρφαρινός* capus gra-  
*uens* dictus. grauedinem autem istam, & destillationes humore  
 partim, vel calore facit, quo corporum sanguinem, pituitâ, bilem,  
 & omnes humores regelat, fundit, & intendit. Vnde homines  
 passim

passim triftiores & morosiores eo flante cernimus. Magna enim omnino vis ventis in corporum temperiem est, cum per minimos poros in secretissimas latebras se penetrent, qualitemque suam inuehant. & Austro hoc magis, quod calore suo meatus laxiores faciat, sibi que aperiat viam. Lepidum est, quod incola quidam Flandicarum Insularum, quæ vulgò Azores, mihi narrauit. Ibi Austro spirante homines manifeste morosissimos ambulare, pueros triftes & lugubres domi desiderere, nec solemnes amplius eorum lusus aut cœtus apparere in plateis. qui Boreâ reflante statim in alacritatem redeunt, & in publicum lati refunduntur. Hinc etiam fuso & rarefacto humore podagrici altius clamant, phrenetici magis frendent, præsertim si vnâ accesserit Lunæ plenitudo. Lennius noster lib. 2. cap. 3. de Occult. mirac. multitudinem in Belgio epilepticorum, qui passim *in compitis*, inquit, *ac truius miseranda spectacula hominum oculis exhibent*, frequentibus Austris tribuit. Cornelius Gemma tamen lib. 2. cap. 2. Cosmocrit. asserit, propter humoris affluetudinem, vel quamdam sympathiam, inter pluuias hic commodius degi: nisi quod tunc feminæ & pueri, tamquam humidiores, vermibus sint obnoxij. sibi que, ait, sæpè expertum, ita esse. *In diuturnis tamen*, addit, *squaloribus, præsertim si adsit vehemens calor, aut frigus, tum demum Medicorum mensis vberissima*. Paræus quoque lib. 10. negat, Narbonenses ceteris Gallis alacritate, agilitate, & sanitate corporum esse similes, ob Austrinas ibi tempestates, quæ vigorem & motus corporum tardent, auditum grauent, vertigines faciant, oculos hebetent.

In res quoque inanimas exerit se vis Austri malefica. Granaria putri mucore, & curculionibus implet: lineæ in ædibus, locis etiam secretissimis, lodiæ, chartæ, flaccescunt, carnes marcescunt in putredinem; ferrum etiam ipsum, teste Theophrasto, linæ facilius obedit. hinc hiemes Australes pessimæ, quia indulgentiæ cæli fruges & arbores citò nimis in germen euocantur: sequiturque deinde alia florescendi exinanitio, vt inquit Plinius, quæ si per plures annos continuetur, exhaurit & enecat arbores. Sic anno 1427. hiems nulla in Belgio fuit, passimque Nouembri mense arbores floruerunt. Denique sub finem molliis hiemis, sæpè irruunt repentina frigora, quæ adurunt germinationem nimis festinatam. Sic factum profectò hoc anno 1625. post enim desperatam ferè hie mem, Fauonius mense Februario profusissimam niuem sparlit: secutæ deinde gelidissimæ aliquot leui Boreâ spirante dies, & præ-

fertim vltima ipsa Februarij, quæ totius anni hiemantissima, & intolerabili pænè frigore fuit, plurimarumque arborum, & maxime iuglandum, nimis properantes ramos, ad ipsum vsque truncum siderauit, annonamque rotam in eas, partim saltem (nam alix etiam postea caussæ accesserunt) angustias adduxit, in quibus eâ videmus.

Hoc etiam de Austro obseruant venatores: à canibus, eo flante, melius & certius vestigari feras. quia spiritus illi odoriferi quos spargunt, calore fiunt fragrantiores, liberiusque commeant per tepentem & laxatum aëra: vbi contrâ, Boreas frigore odorem hebetat, expirationes alligat, aut pigras reddit.

Sed quæ potest, inquires, vt aër calorem Austri tam facile sentiat, cum frigidum potius experiamur, & ante docuerimus frigore densatum in terram delabi? Respondeo, calorem aliquem secum vehere, sed non satis ad absolutam denominationem calidi (vt Philosophi loquimur;) quia plus frigoris habet. calorem verò eius vix sentimus, quia tactus exuberantias solum percipit, & qualitates intensiores similibus quas in organo habet. calor autem organi & cutis, plerumque maior & intensior est illo, quem affert ventus. Aër tamen gelidus statim eum sentit, & de rigore multum remittit, quia frigus exhalationis in aërem sibi similem non agit, sed calor solus: qualitas scilicet efficax & actiuosa, præsertim in subiecto satis denso, qualis est ventus. vel si densum negas: dico, calidum, etsi rarum, posse valere in insignem etiam calefactionem, si multum & amplum sit, vt ventus. Causa est, quòd licet singulæ venti partes, aliquod patibile ad lambentes & præteruolantes, parum in eo suæ qualitatis relinquunt, multæ tamen sibi succenturiaræ, plurimum valent. Hæc etiam mihi causa esse videtur, cur Aquilones, aliquot etiam horarum spatio, terram sic & aquam quandoque incrustent. quia, inquam, & exhalatione satis densa (etsi perspicua & transparente) constant, ideoque frigus in eâ acriter agit: & maxime, quia venti partes sese catenatim subsequentes, singulæ aquæ superficiem spississimo agmine distringunt, & breuî, aucto ad certam summam frigoris cumulo, congelant. Quòd autem aliquando, nullo vento spirante, gelet, fieri existimo (& firmabo alibi) ab aëre mediæ regionis frigeraro, & pondere suo mollioriter, & sine sensu nostro, ad terrâ subsidente, vt videmus in nebulâ. hoc enim mihi certius, quàm ad Saturninas quasdam siderum influentias confugere.

Ceterum quàm citò calore, etiam pusillo, aër rangatur, egrègiè ostendit fistula illa vitrea psychologica, index crementi & decre-

menti



menti frigoris. si enim vel minimo digito fistulam extrinsecus attingas, statim aër qui intus est funditur & rarefcit, aquamque deorsum premit. Hoc attende, & mirari minues, aërem sic leni Austro liquefcere. Hoc etiam in mantissam accipe. Cur olim in prouerbium abiuit,

Οὐ ποτε νυκτερινὸς Βορέας ζῆτον ἰκὰς φέτω;

*Tertia lux numquam nocturno Aquilone laborat?*

contrà verò, Auster nocturnus pertinacius spirat? fatentur & hodie nostri nautæ. Et celebris ille Andreas Auriæ, classis olim Genuensium Præfectus, Carolum V. Cæsarem, paratum iam nocturno Boreâ repente exorto, prospero & ferente, in Africam classem traicere, monuit, breui & intra triduum destituendum à vento. Aristoteles Sect. 26. Problem. has rationes tentat. quòd Aquilo nocturnus sit imbecillis, quia ab imbecilli calore ortus: venti autem omnes, inquit, imbecilli intra tridui tempus expirant & finiuntur. Ideo etiam fortasse, ait, quia tertius dies est decretorius. aut denique, quòd more ecnephix & procellæ vniuersim, non particulatim, è nube prorumpit. Nolo Magistrum refellere. Quid si tamen fortassis hoc etiam sit? Exhalatio aëre nocturno & densato, in sublimi, tamquam vallo quodam, circumdata, dubitat quâ potissimum cæli regione se exoneret. & quia aër ille pari ferè densitate vndique in orbem resistit, exhalatio pluribus simul locis se hæc illac effundit, adeoque in vnam partem parcius & interruptè fluit. Imaginem huius rei in lacu aliquo tumente & inflato habes. cuius aqua, si canalem certum non reperit, vndique se superfundit. Boreas verò diurnus, quia aërem versus Meridiem rariorem calore Solis inuenit, illac se statim elicit; diutiusque durat, quia totus exhalationis, vt sic dicam, lacus, per illam vnam partem longo agmine se profundit. Austri est alia causa. Sol enim die exhalationem eius sæpè, nimis rarefacit, reliquoque aëri refundit & permiscet; quæ nocte demum refrigerata, densitatem & pondus ad labem accipit. Stet ergo firma satis regula nostri Aristotelis. vnà etiam hæc Plinij: *Noctu Austrum, interdiu Aquilonem esse vehementiorem.* Lib. 2.

cap. 47.

### ARTICVLVS III.

#### *Ventorum Orientalium qualitates.*

VEntos ab Ortu calidos & siccos adspirare, vulgò existimant. sed lex ista perpetua non est. Blondus enim & Iouianus, Cam-

Campaniæ Subfolanum, humetum faciunt, & Austro nostro cognatissimum; quia scilicet à vicino mari flatus eius in Italiam sunt. In Asiâ tamen, & nobis, omnes Orientis venti siccissimi; quia ex aridis & spatiosissimis Germaniæ regionibus orti, per nullum etiam mare adit insignes lacus ad nos spirant. Semper ergo ferè toto anno sicci, æstate calidi, hieme gelidissimi apud nos sunt. Nulli enim omnium magis gelant & acrius stringunt: præsertim Cæcias, qui defleat ad frigidum Septemtrionis axem. sic enim cum siccitate insigne frigus coniungit in vnam crasin. Hinc liquet, calorem qui ventis Orientalibus tribuitur, non tam eorum esse, quàm aëris; quia flant per æstatem. habent tamen etiam ipsi aliquid ab æstiuis & ardentibus solibus, qui exhalationem resoluunt. refrigerantur tamen in mediâ aëris regione, vt ceteri: licet tantum frigoris & ponderis non postulent, vt per aërem æstate tenuem & rarum decendant, quantum per densum & hibernum. Quod autem affirmat Plinius, Ventos Ortiuos diuturniores esse Occiduis: nescio quid viderit in Italiâ; certè in Belgio, omnium pertinacissimè flant ab Occasu, vt vbique solent à mari.

Flumina quæ in Ortum cursus habent, salubrioris aquæ putantur; quia Subfolani sicci, & æstate feruentes, aduersi & reflantes, eam discutunt, coquunt, & perducunt ad laudabilem tenuitatem. In istos etiam ventos, villarum ostia & fenestras dirigunt, Rei rusticæ Scriptores. imò Plutarchus narrat, famam esse, urbem suam natalem Chæroneam, quæ olim occidentem Solem spectauerat, à Chærone iussam transferri in ortium. Sed quid est, quodd Plinius scribit, *Observatum à meridianis partibus ad Occasum Solus pestilentiam semper ire: nec umquam ferè aliter nisi hieme, nec ut ternos excedat menses?* Et licet legem istam tam generaliter & affirmatè nolim recipere; alij tamen, & experientia ipsa, adfatentur, plerumque ab Ortum versus Occasum, aut ab Austro versus Septemtrionem luem incedere, & in illas partes latissimè & atrocissimè se spargere. Famosas illas duas sub Antoninis Principibus, & veteres alias non memoro, adspice truculentissimam istam anni 1450. quæ in Asiâ exorta, per Dalmatiam & Illyricum, in Italiam, Germaniam, Galliam, Hispaniam se effudit, sicque grassata, vt tertia vix mortalium pars ei superstes fuerit. Causæ fortasse alia reperiri poterunt: hæ mihi obuiz, & inuentu faciliores. Longiores sunt, quia obliquiores ob calorem & leuitatem, Subfolani & Austri flatus, ideoque longius aëra pestilentem euentilant. Calore deinde suo, humen-

lumentem antè à diutinis fortè imbris putrefaciunt, & auferunt in Occasum aut Septemtrionem, quò spirant. Subsolano à dextris, id est, ab Ortus Solstitiali, spirat Cæcias; qui Aristoteli & Theophrasto, hoc est, in Græciâ, dicitur reflexè & per lineam arcuatam flare, cuius concavum spectet in cælum, quia scilicet exhalatio iugo montis fortassè offensa, & in proximas nubes resiliens, eas versùs Ortum, & in venti originem reducit. & hunc Græcis adagium, inquit Aristoteles,

*Κατὰ ἰσὶν ἰαυτὸν ἔλατ, ὡς ὁ Κακίας νέφος.*

*Mala ad se trahit, ut Cæcias nubes.*

Hic, ut autè monui, in Belgio aridissimus, & hieme gelantissimus est. vehementiam tamen non habet, nec confertim venit, sed dissolutus, & laciniatim in plures quasi riuos dispersa exhalatione. sic enim ferè solent, qui è sicco: nam vapor implet, & incendit præcipuè pondus ventorum. Odoratorem fieri putat Democritus arboris fructum, si propendeat in hunc flatum. In hunc etiam opiones gregem pascunt, cum concipi mares volunt: nam partus masculinos calore & siccitate creditur adiuuare. Simili de causâ Aristoteles in Politicis, iubet, Boreâ aut alio sicco spirante, nuptias celebrari; & Bonum factum, si Luna etiam sicca sit, in interlunio, & Solis cœtu. humor enim abundus calorem hebetat, & femellarum est pater.

Ad Subsolani sinistram, & ab Ortus hiberno, Vulturnus est. In istum apiaria, & vineas Italiz, Galliz, spectare docet Plinius. Ipsi etiam Cannensem & famosam illam cladem imputant Romani. nam secundum eum tunc fortè flantem, aciem direxerat Hannibal, verteratque in ora Romanorum. Post Liuium & Senecam, audite Silium querentem:

*Sternuntur tellure & miles, & arma, tubaque,*

*Atque omnis retrò statu occurrente refertur*

*Lancea, & interdum Rutulis cadit irritus iectus.*

*Atque idem status Pænorum tela secundat,*

*Et velut amento contorta hastilia turbo*

*Adiuuat, ac Tyrias impellit stridulus hastas.*

*Ipse caput flammæ caligine conditus atrâ*

*Vulturnus, multaq; comam persusus arenâ,*

*Nunc versos agitas tergo stridentibus alis,*

*Nunc mediam in frontem veniens clamante procellâ*

*Obuius arma quatit, patuloq; insibilat ore.*

Lib. 9.

## ARTICVLVS IV.

*Ventorum Occidentalium proprietates.*

**Z**ephyri nomen, omnium post nata nomina, mollissimū, blandissimum existimat Cardanus: talis est ipse ventus, vbi per aetatem aut ver, & procul à mari Occiduo spirat: nam nobis nimis vicinus & feroculus est, in quos primum impetum statim, ab Oceano frangit aut hebetat. Frigidus, vt plurimum, & humectus est. vtrumque potissimum à marino vapore, quem multum secum trahit. Frigus eius mollius longè Aquilonari: mitigatur enim tempore occidui Solis. calor tamen ei remissior, quàm Subsolanis; quia copiā vaporis suffocatur. Fauonius autem à fouendo appellatus, putatur. Vere enim nouo flare consuevit, subindeq; pluens primum Solis feruorem temperat, & humori aptissime ad generationem miscet. Poëta Georg. 2.

*Parturit almus ager, Zephyriq; tepentibus auris*

*Laxant arua sinus: superat tener omnibus humor.*

Hanc causam Alcmaeon habuit, cur Zephyrum faceret patrem Cupidinis. Zephyri vesperi, aut horis pomeridianis, frequentius spirant, exhalatione & vapore relabi iam incipiente propter abscessum Solis: Subsolani verò sub auroram aut manè; quia vapor nocturnus, pondere suo circa terram desidens, resurgit ictus radio Solis, & paulò pòst frigeratus, refluit deorsum versus Occasum, vt Sect. 26. Problem. docet Aristoteles.

Zephyrus humore suo appetentiam cibi comprimit; & magis Auster, qui præterea calore suo dissoluit ventriculum. vnde Plinius: *Minus esurire eo spirante creduntur animantes.*

Oua etiam quædam hypenemia & Zephyria vocantur, quæ à gallinis, columbis, &c. generari putantur solo Zephyri inflatu, sine alio mare. vnde irrita sunt, & sine pullagine. quin etiam equas iuxta Olyssiponem in Lusitaniâ, à Fauonio vitalem spiritum accipere, & inde partum gigni perniciosissimum, sed triennium vitæ non excedere, lib. 8. c. 42. còstare scribit Plinius. & Virgil. lib. 3. Georg.

*Ore omnes versa ad Zephyrum stant rupibus altis,*

*Exceptantq; leues auras: & sæpè sine vllis*

*Coniugiis, venio grandida, mirabile dictu,*

*Saxa per & scopulos, & depressus conualles*

*Diffugiunt. —*

Vcrè

Verè mirabile dictu: sed verum hodie negant Lusitani. quia tam perfecta animantia gigni non valent, sine mixturâ seminum utriusque sexus. Oua etiam illa hypenemia probabilius imaginatione maris formari existimabis. oua enim pullorum tantum semina sunt: imaginatio autem feminare potest.

Zephyro à dextris & ab Occasu hiberno flat Africus, creber procellis, ut ait Virgilius. & hîc egregiè experimur. nullus enim turbulentior & maiori strage Belgium incurrit. Nam ut singulorum pœnè annorum damna fileam, anno 1558. & iterum nostrâ memoriâ 1606. arbores, domos, templa passim diffilauit aut euerit. Nullum etiam Louanij esse frequentiore flatum, vel ex famosa turri *Verloren-cofs*, quam Nannius noster *frugiperdam* vertit, intelliges: ab Africo enim fatiscere & solui incipit. deinde arbores omnes in aperto in oppositum Cœciam inclinant, omnesque agrorum nostrorum atistz; nisi Etesiaz ante messem quandoque in Austrum auertant.

Potro venti Occidentales hieme niuales sæpè sunt: & quia nubilosi ac molliori frigore, floccos ingentes ac decumanos ( uti etiam Australes solent ) & verè *niuem sicut lanam*, nobis spargunt. Psal. 147. Boteas verò, Subsolanus, & quicumque cum frigore acri & vrente siccitatem habent, minutiori farinâ nubem cribrant.

Præter autem qualitates istas generales ventorum, aliz sunt quibusdam in tractibus propriæ & peculiæ, quas afferunt exhalationes ex elemento aut mixtis, vnde extrahuntur. Quidam enim in Americâ, mordaci qualitate ferrum etiam, ut testis Ios. Acosta, exedunt, fetreosq; fenestrarum clathros breui tempore decinerant: alij pulices infinitos per mare, per continentem spargunt. Quædam præterea sunt, quæ dici de ventis possint: ut oppositos inuicem à se sterni, nisi vnus depressior, alter sublimior in contrarium fluant: meridiæ, aut pluuiâ sopiti; dissolutâ videlicet nimio æstu, aut impeditâ, ne latissimum guttarum pluuiæ agmen perumpat, exhalatione. Sed hæc, & id genus, facilia sunt, intelligique, nisi fallor, ex principijs nostris possunt. Aliqua etiam vana: ut istud Eudoxi: *Eisdem ventorum vices exacto quolibet quadriennio redire*. Cetera fluxa & incerta, nec in vnâ legem & disciplinam ( quidquid Veteres conati ) alligari possunt. Itaque ab eo, si tamen etiam ventis istam laciniam adtexam, quæ de terræ motu.

## CAPVT VLTIMVM.

*De terra motu.*

**T**ERRÆ motum omnes ventis subiiciunt, tamquam eorum effectum, aut exhalationis, simillimæ illi quæ est materia ventorum. Olim tamen causa eius tam in abdito fuit, vt Romani, vbi terram mouisse senserant, & serias supplicationesque edicto imperabant, nomen Dei, vt solet, cui feræ seruandæ, non exprimerent: *ne alium pro alio nominando, falsâ religione populum alligarent*, inquit Agellius lib. 2. cap. 28. Noct.

## ARTICVLVS I.

*Quæ causa efficiens terræ motus.*

**N**VLLA nobis iam quæstio de motu, quo terra, opinione Pythagoræ & Copernicanorum, cottidie circa centrum, & quotannis circa Solem reuoluitur. neque de libratione, quâ fortasse perpetuò titubat, vt grauitatis suæ centrum, accedente hinc aut inde nouo pondere, restituat in meditullium Vniuersi. De pulsu ergo, aut tremore illo agimus, quo concutitur, vt homo in febris.

Antiquissimi Græcorum, hunc motum à fluctibus aquarum in terræ cauis vndantium esse, opinati sunt: ideoque Neptunum *ἐκπυκνῶν τὴν γῆν* *terra quassatorem*, & *συσείγων τὴν γῆν* *motorem*, appellauerunt. Sed frustra. aquæ enim subterraneæ fluctuatio par esse non potest tantæ concussioni, quæ vrbes aut montes euertat, vel nouos erigat in plano. Deinde, maximè post ingentes pluuiarum eluui-ones, quando aquæ subterraneæ redundant auctæ cælestibus, existerent terræ motus: quod non videmus. Denique, ignis potius quàm aqua è hiatus emicat, cum terra tremore discessit. vnde faciliè etiam reiicitur Thales, qui terram instar nauigij putauit in aquis natare, & nutare cum vnda fortasse eam inclinasset in latus. Fundamentum præterea eius falsum est, cum grauius non supernatet leuiori. & deinde terra semper tota moueret; vt naui non partim, sed integra agitur aut impellitur à fluctu.

Alij malunt, specus subterraneos, & totos aliquando mon-  
tes



tes incidere, & terræ tremores inde existerent.

*Et meritò, quoniam plaustris concussa tremiscunt*

*Tecta, viam propter, non magno pondere, tota:*

inquit Lucretius. Sed hæc etiam causa nimis imbecillis est & angusta, vt terram tam latè concutiat. sæpè enim tota Germania, imò tota pæpè Europa simul tremuit. Nec pondera plaustrorum valdè iuuant Lucretium. Si enim via terrena, nec silice strata sit, vt in pagis, plaustrum pertransiens, tremorem nullum vicino ædificio incurrit, nisi fortasse cameratio plateæ subsit, quæ vsque ad ædificij fundamenta pertineat. In oppidis verò tremunt aliquando propinquæ domus, quia strata platearum perpetuo silice contigua sunt ædificiis. rota ergo vnum aliquem lapidem premens, & in alium vicinum & attiguum protrudens, omnes deinde catenatim in ædificij murum propellit. Postremò, domus malè nixa, & in aëre pendula, facile vibratur. quod in terrâ, præsertim tam latæ & vastæ molis, locum non habet.

Bodinus, vt breuiter omnibus vniuersim molestiis defungatur, & Aristoteli, suo more, calcem impingat, recurrit ad dæmonas & *νομαίους*. Ratio vnica est, quia alia nulla causa est probabilis.

Dico tamen Primò: Sententia Aristotelis, & verissima, est, spiritum subterraneum causam esse terræ motus effectricem. Probat: quia quoties terra pulsu pertunditur, aut dehiscit, euolant halitus aliqui, sæpè pestilentes, ignis etiam aliquando & cineres. ergo ille fuit, qui terram rupit, & eam suffodiendo concussit. Idem patebit pòst ex omnibus terræ motus effectibus. Sed accurrit Bodinus: Non posse sic valere tenuem spiritum, vt vrbes totas quandoque & montes in altum excutiat. Deinde, in locis planis, aquosis & irriguis, qualis Ferraria in Italiâ, accidere aliquando maximos terræ motus. Tertio, hieme, quando terræ pori gelu constricti, futuros præcipuè: cum tamen Aristoteles asserat plures vere & autumno.

De Postremo respondebimus, vbi tempus terræ motus examinabimus.

Ad Primum: Certum est, potentissimas vires esse spiritui. probatq; Aristoteles exemplo febricitantium, qui extra morbi accessionem debiles & inualidi, vbi tamen spiritus per corpus & nervos diffusi, vix vllis vinculis possunt coerceri. Huc etiam flammæ pyris pulueris in cuniculis & tormentis, fulminis in nube, vires & impetus admirabiles possunt asferri. vbi enim halitus intra angustias



inculcatum rarefcere, & fe vltà non capere, cœpit, metu penétrationis proxima quæquæ remolitur & iactat, & quando aliter non valet, effractâ viâ per vulnus exit.

Pro Secundo, fateor, Ferrariam, quæ anni 1570. tremore ita vexata & lacerata fuit, innumeris patnè riuus & fluminibus irriguam: sed non ideo solo ejus subesse non possunt plurimi, feruentes & conferti spiritus, imò verò tot riuus per abdita subterlabentes, aut aqua plurifariam alueo excidens, & cæcis cuniculis se condens, terram illam potiùs fistulosam faciunt, & capacem spirituum. Sed à quâ causâ spiritus illi resoluuntur?

Dico Secundò: Magna sæpè eorum pars ab ignibus subterraneis est. Probat: quia montes & loca igniuoma maximè tremoribus obnoxia sunt: vt Sicilia, Lipara, Campania, item loca thermis naturalibus tepentia; quales in totâ Italiâ sunt, Bodino teste, facile 60. vt proinde non tam impensè mirari debuent, mouisse Ferrariam à subterraneo spiritu. præsertim cùm præter Campaniam, in agro etiam Florentino, Mutinensi, Bononiensi Ferrariæ contermino, crateres quidam igniuomi sint, vt lib. de Thermis cap. 5. fatetur Fallopius. Igitur vero simillimum est, spiritus illos quassatores latentibus istis ignibus exhalare. vnde Aristoteles, qui parcissimè aliàs eorum meminit, disertè asserit, halitum terræ motorem esse *ἄρδ' ἢ ἡλίου, & τὸ ἐκ αὐτῆς πνεύματος, à Sole, & eo, qui in ipsâ est, igne*. Huius etiam rei euident signum est, quòd vix vñquam montes rupto vertice eructent ignes, nisi præcedente terræ motu. Patuit in conflagratione famosâ illâ Vesuuij sub Tito, quæ Plinio Maiori fatalis fuit: patet in plurimis Americæ montibus flammionomis, de quibus Acoſta scribit. & Auctores fatentur, Siciliam olim, ante effractum Ætnæ carcerem, sæpiùs tremuisse, quàm nunc, vbi viam laxatam habent quâ se exonerent subterranei ignes & spiritus.

Dico Tertid: Sol etiam halitibus à se resolutis aliquid confert ad terræ motus. Ita Aristoteles plurimis locis. Reclamat tamen Georg. Agricola lib. 2. de Ortu subter. Sol enim, inquit, exhalationes è terræ superficie extrahit, non resoluunt in ejus visceribus. Contrâ, lib. de Terræ motu anni 1601. Keckermannus, vultq; vim Solis altius, in ipsas venas metallicas, penetrare. Saturnum etiam, spiritum multo intra magnæ matris viscera generato, plurimùm motum intendere. Verùm hæc mihi in incerto & fluctu sunt. & influentias illas occultas stellarum differimus in Libros de Cælo. Demus ergo  
Agri-

Agricolæ, Solem è dorso solùm terræ, & quatenus vis radiorum eius calorifica ingreditur, exhalationes resolvere; nego tamen, omnes extrahi & in aërem venire. multæ enim non satis leues, aut poris non satis hiantibus præpediuntur, vel ventis aut aquâ superueniente in abscondita repelluntur. Deinde, per me licebit, in aërem & sublime attrahantur, abeantque in ventos: modò postremò recidant, & terræ poris, aut meatibus grandioribus sese infundant, atque in viscera eius redeant.

Certè enim Aristoteles non vno loco ventos terræ motores facit. vt cùm Boream auctorem excidij duarum Achaïæ ciuitatum, Helices & Buris, affirmat. pugnabat enim, inquit, cum Austro, paulò antequam terra moueret, & victus intra cauernas terræ se abstruserat: quærensque deinde regressum, nec reperiens, duas clarissimas vrbes effracto chasmate absorpsit. Non prorsus ego vana Boreæ iactantia apud ingeniosum Poëtam lib. 6. Metamorph.

*Idem ego cùm subij conuexa foramina terra,*

*Suppositi, serox imis mea terga cauernis,*

*Sollicito manes totumq; tremoribus Orbem.*

Eadem sententia Callisthenis, nobilis Philosophi, quem Alexander Magnus, æterno crimine, inquit Seneca, quod nulla virtus, nulla bellorum felicitas redimet, occidit. qui etiam addit, terram aliquando spiritu extrinsecus accidente quassari, sicuti nos vento frigidò subito perstricti, quatimur & inhorescimus. Vtùm terra animal non est, vt spiritu algido in poros penetrante; horrore se contrahat. Sed quâ viâ exhalatio terram ambiens, eam intrat? Seneca lib. 6. Nat. cap. 24. negat id per poros & tenuia illa foramina posse fieri. *Nam in nostris quoque corporibus, inquit, cutis spiritum respuit: nec est illi introitus, nisi per quem trahitur.* Agricola amplius audent & ne quidem per laxos illos fossarum metallicarum hiatus, ingressum concedit. quia scilicet Metallici in Germaniâ ingentes folles & spiritalia organa fabricare coguntur, vt supernum & recentem aërem venis subterraneis ad valetudinem inspirent. Sed fallor, aut vterque fallitur. Seneca quidem, quia etiam per inuisibiles cutis nostræ meatus aër intrat: vt cùm vacuatâ vesicâ, spiritus externus, propter periculum vacui, se infinuat, & horrore membra conuulcit. pori etiam terræ, ætate præsertim, satis aperti & hiantes sunt, vt aërem admittant. corpora enim ista fluida & tenuia per minimas etiam rimulas & mazandros, timore vacui, in omnes recessus penetrant. Do etiam Agricolæ; organis pneumaticis sæpè inuocandum

candum in fossas metallicas recentem aërem: non do tamen, numquam eouque decidere venti exhalationem, aut aërem infimæ regionis grauiorem. hic tamen citò corrumpitur, & à spiritu metallico aut alio subterraneo, pigro & silenti, noxam contrahit, vt meliora peioribus faciliè vincuntur. vnde nouum & purum identidem inspirare oportet, vt multitudine sincerioris supprimatur inquinatio. Non rarè tamen, fateor, subterraneus aër nostrate crassior & ponderosior est. quo euentu noster cadere sponte in fossas & cauernas non potest, sed viribus reluctantem oportet inigere.

Sed spiritus retrocedet itinere quo incessit, inclamant, nō erumpet foras cum tantâ strage obstantium. si enim per fossæ v.g. metallicæ patentem hiatus infusus est, vbi premi se senserit, illac redibit in libertatem. Minimâ enim rimâ, puluis in cuniculis nostris bellicis perdit, aut relaxat impetum. Hoc argumentum me vincit, vt asseram, principalem causâ terræ mouentem, esse spiritum sulphureum & igneum è terræ visceribus resolutum, non ventum aut aërem supernè per meatus infusum. probarique potest ex profunditate sæpè ingenti causæ illius morticis, quæ sub fundo maris & radicibus Insularum, imò tam altè aliquando defossa est, vt fornicem alicuius subterranei specûs arietando, subsilire faciat integram regionem. aquæ etiam puteanæ sulphur resipere solent ante terræ motum, permixtione scilicet spiritus, qui ignibus illis euaporatus, scandit sursum.

An ergo retractamus quod antè Aristoteli concessum? Minime verò. Iuuant enim venti & exhalationes à Sole excitæ terræ motum, & aliquando etiam fortasse, etsi rariùs, solæ faciunt. ideo enim vere & autumno, & sopitis conditisque flatibus, vt postea ostenderetur, crebrior. Nam exhalatio quæ supernè terram ingreditur, alteri confusa & pernixta quæ ex ignibus subterraneis ascendit, vbi concalesceta & rixando & feroore eius fuerit, vires in vnum confert, & impetum ad effringendum intendit. Non regreditur autem & reciprocatur per viam quâ se intrusit: vel quia casus aliquis (vt v.g. terræ labes) apertos antea meatus sepsit, vel quia per longos, angustos, & sinuosos ramites, spiritus se in alueum quem dant & locum capaciorem expressit: vbi multâ lucâ & conflictu rarefactus, capi ampliùs tam breui spatio nequit: nec regredi tamen id quod abundat, per tortuosos illos & angustos amfractus, tam celeritè valet, quin totus antè spiritus, in flarus ibi & intentus,

ac moræ impatiens, viam laxiorem facere tentet, & vicina concutiat. Vnde falsum etiam est, puluerem cariturum effectu, si rimulâ alicubi cuniculus dehiscat. nam aliàs flamma bombardæ hærentem glandem numquam excuteret; quia spiraculum peruium, quâ ignis iniectus est, habet, illacque se tota refunderet potius, quàm eiacularètur per tubi orificium.

## ARTICVLVS II.

*Species terræ motus.*

**A**Vctor Libri de Mundo, & ex eo D. Damascenus, septem species accidentarias terræ motûs fecit. Primus est Epiclintes, siue Inclinator: qui ad angulos acutos latera cauernarum tundit, & superposita more nauigij in vnam partem inclinat. Secundus, Brastes, seu Efferuescens, dictus à similitudine aquæ bullientis. hic terram angulis rectis in altum identidem attollit, & deponit. Tertius, Chasmatias, hiatus aperit. Quartus, Rhectes, vi viam effringit. Quintus, Ostes, vno impulsu euertit in quod incubuit. Sextus, Palmatias, vibrat. Vltimus, Mycetias, cum mugitu venit. Aristoteles tamen duabus speciebus, Pulsu & Tremore, contentus fuit. sed tertiam, Inclinationem, optimè Seneca adiecit. Pulsus est motus, quo terra, instar arteriæ animalis, diastole & systole, vicissim erigitur & subsidit, vel generaliùs: est qui terram succutit. vnde à Senecâ vocatur Succussio. Tremor enim concutit & vibrat: Inclinatione verò in vnam solùm partem totum onus suspendit. Sufficientia diuisionis hinc facillè probatur. Quia spiritus intra claustra fremens, vel rectâ sursum se eiiculando, fornicem cauernæ pulsât; & succussionem ac pulsus habet, vel latus vtrumque alternis & celeriter tundit & retundit; sicque vibratio & tremor erit. vel denique ita vnum latus arietat, vt ad alterum vsque non resiliat; & inclinationem habemus, exhalatio autem (quod restabat) solo tantummodò cauernæ illisâ, vix terram, sicut ad sensum nostrum perueniat, mouere potest. Septem autem aliæ species, à diuersitate effectuum sumptæ sunt, & ad tres istas possunt reuocari.

Ceterùm pulsus Rhectes & effractor, omnium sine dubio est perniciosissimus. deinde, longâ & vndans inclinatio, quæ parietes & fastigia ædificiorum Extra fundamenti perpendiculum suspendit. Brevis autem & crispans tremor partem inclinatam statim contrario motu in sedem restituit, præuenitque lapsus. vnde Plinius

nus lib. 2. cap. 82. tutissima ædificia censet, in quibus fornices, anguli, parietes alterno pulsu resistunt. *Latere etiam facti parietes, minore noxâ quatiuntur*, inquit. quia, credo, duriores lapides, quales nostri Namurcenses, prementibus nihil cedunt: ideoque vnus aliquis facilius ædificij iactatione eliditur, trahitq; cetera in ruinam. Docet etiam fornices tremoribus resistere. quod abnuat tamen Keckermannus, exemplo terræ motûs anni 1601. quo omnium penè templorum in Heluetiâ camerationes rimis affirmat dehiisse. Sed nec ignorauit Plinius fornicum commissuras tremore, præsertim tam valido, posse laxari. vt tamen homo varicus horizonti insistent, difficilius in hoc aut illud latus, quàm si compressis esset feminibus, impellitur: ita diuarcatio illa parietum, imposito fornice benè colligata, firmior est aduersus lapsum. pars enim vna curuaturæ alteri obnititur, partemque oneris eius sustinet, aliamque reficit in aduersi parietis perpendicularum.

### ARTICVLVS III.

*Que loca obnoxia terra motibus.*

**A**Ristoteles, Seneca, & plures alij consentiunt, terram littoraleni esse maximè obnoxiam tremoribus. Causa est in meatibus & venis subterraneis, quas aqua vbique excavat: sicque spiritui viam quâ se insinuet, concauitatesq; spatiosas, quod multus in vnum confluat, facit. Hæ tamen venæ & cauitates non nimis laxæ & hiantes esse debent, quia per eas itum reditumque liberum & innoxium spiritus haberet. hæc enim causa esse putatur, cur media Cycladum, templo Apollinis & mercatu olim celebrata Delos, solaterræ motum non sentiat. caui enim rupibus imposita est, si Callistheni credimus, quæ exhalationi deprehensæ facilem dent exitum. quamquam tamen, cum Darius exercitum in Græciam duxit, & semel aliàs concussam, prodiderit Mucianus. Audi lib. 2. cap. 82. Plinium. *Oppida minus quatiuntur crebris ad eluuiem cuniculis cauta. multoq; sunt tutiora in iisdem illis quæ pendent: sicut Neapoli in Italiâ intelligitur, parte eius quæ solida est, ad tales casus obnoxia.* vbi enim omnia cuniculis & aquæductibus perforata sunt, spiritus laxius discurret, nec exitum difficilem & perplexum habet. vnde in bellis nostris cuniculi agi ab hoste contra cuniculos solent, vt via aperiat, quâ flamma pulueris, per istos canales innoxia se euoluat. Itaque breuiter, concauitas quidem exhalatio-

nis

nis capiens ad terræ motum, sed tamen sine exitu facili, esse debet. obstruuntur autem meatus, vel limo, vel ruinâ terræ quam aqua labefactat.

Non omnes tamen maris oræ, aut insulæ æquè tremunt: quia non vbique idoneæ subsunt cavitates. deinde, quæ ignes solo subiectos habent, in maiori & præsentiori sunt periculo. igneus enim spiritus præcipuè, & maximo impetu mouet. sic in Campaniâ, vbi Vesuuus & totâ naturâ tepidi fontes, in Peruuia, in Sicilia, in Æoliis, Moluccis, & Flandricis Insulis, frequentes motus. Hoc verò mirum, quod audiui de Flandricis istis seu Terceris: solemniter ferè quotannis agitari, & vniuersas tremere. quod signum est, spiritum motorem fundo eidem solido subesse, cui omnes impolitæ. Aër tunc etiam ruber & veluti flagrans, satis significat ignem periculi auctorem esse. Keckermannus nullas in totâ Europâ vrbes magis quàm Constantinopolim & Basileam, existimat obnoxias. Hanc, quia ad ripam Rheni sita, & fundo lapideo inædificata, ignesque sub terrâ absconditi non procul inde: quandoquidem iuxta Badenam Heluetiorum Thermæ ebulliant, quæ Basileâ absunt vnius diei itinere. Ægyptus omnium regionum tutissima creditur, quia Nili, vt putant, se superfundentis limo, fluido primùm, deinde in solidum se densante & sic inarescente, sine venis & cavitatibus creuit. Argumento, quodd apud Homerum Odyss. 4. Menelaus Telemacho narret Pharum tantum à continenti Ægypti abesse, cui iam adhæret, quantum naus diurno cursu plenis velis metiri potest. quod Plutarchus etiam de tempore quo Homerus, tot scilicet post bellum Troianum & Menelaum annis, vixit, intelligit. nisi ergo Homerus vanus, faciliè 36. nostratium leucarum distantia ista fuit; etiam si duodecim tantum horarum nauigationem accipias. singulâ enim quâque horâ naustumente velo ternas leucas emetiri valet; vt ego ab Oceani nostri nautis accepi. consentitque Brodæus, qui fide in mari supero inferoque nauigantium 8. milliaria Italica vnâ horâ decurri secundo statu affirmat. Igitur Ægyptus terræ motus non sentit, non quia nimis patentes, vt Delos, meatus; sed quia nullos, habet. Agathias tamen de Bello Gothico, Alexandriam, cum ibi Iuri operam daret, tremuisse narrat. rem tamen pro prodigio fuisse, quia nemo tam senex erat qui alterius exempli meminisset.

Simili de causâ Belgium nostrum, & præcipuè quod in Septentrionem & Hollandiam spectat, rarissimè mouet. aggeratione



namque Oceani surrexisse putatur, olimque vulgata traditio habet, mare aliquando Tongros alluisse. fitque id profectò, præter alia, verisimile humilitate littorum, quæ non saxea & montosa, qualia Natura fluctibus obicere solet, sed mollia, terrena, aut glaucesca, & plerumque facta manu, ad submouendum, aliàs inundaturum, pelagus.

Lib. 1.  
Cosmog.  
crit. c. 1.

Sæculo tamen elapso, ut terribilium nihil deesset, Belgium etiam non semel agitatum fuit. *Rarum est*, inquit noster Gemma, *regionibus nostris terrarum motus persensiscere, neque ab annis pluribus quidquam de his maiorum industria designauit. Vehemens tamen concussio fuit anno 1554. primum 21. Martij horâ 12. noctis: ut multis locis vasa in sublimi constituta deciderint. erat, ut rectè marmi, cum tremore mugitus ingens, ac velut athenæus clangor multorum curruum, qui concitato agmine præterirent. Alter successit 22. Martij, horâ quartâ post meridiem, bis valide subsiliente solo. multis metu ferè sanguis obriquit. Quamquam fortius iterum 30. Aprilis, horâ quintâ pomeridianâ usq; ad tres vices continuas. Iterum ad annum 1569. post acre gelu Secutus est, inquit, è vestigio terra motus 14. Martij, circa 12. noctis, cum raucò murmure. Itaque loca aliàs minimè fistulosa quati etiam quandoque possunt, à spiritu præsertim in altissimis cauernis deprehensò: quo modo etiam ipsum mare ebullit aliquando & fluctuatur, exhalatione succutiente eius fundum. Licet enim fortasse terra Belgica, perinde ut Ægyptus, ad aliquantam altitudinem, quam superflus quotidie & oblimans æstus fecit, satis firma sit, & exhalationum respuens; alij tamen fundo, lapideo scilicet & cauernoso, inædificata est, qui spiritum capere, & tremere possit. Leodium verò in Belgio nostro rarò vacillat, eâ ratione quâ Delos; quia tot discurrentibus venis carbonariis nimis laxè cuniculosum, libero ferè vbique exhalationis meatu. Itaque propius fortassis est alteri, id est, suffossionis, periculo. Si enim M. Varro narrat oppidum quoddam in Hispaniâ à cuniculis, alterum in Thessaliâ à talpis suffossum; cur non idem meritò à suis carbonariis metuat Leodium?*

Ex antè dictis, facilis est intellectus Aristotelis, vbi docet, terras fungosas, ut Hellepontum, Achaiam, Siciliam, frequentius sentire motus. non enim capiendus est de nimis laxè fungosis. Vbi etiam mare longè exæstuat, inquit, facilis tremor esse solet. quia videlicet exiturentem per oræ littoralis venas & potos spiritum æstus in viscera terræ repellit.

ARTI-



## ARTICVLVS IV.

*De magnitudine, & duratione terræ motus.*

**S**ed per quanta terrarum spatia vnus idemque motus decurrit? Seneca lib. 6. Nat. cap. 25. definit. *Numquam, inquit, per ducenta milliaria, id est, ferè 67. leucas Belgicas, motus extenditur. Ecce hic qui impleuit fabulis urbem, non transcendis Campaniam. quid dicam, cum Chalcis tremuit, Thebas stetisse? cum laborauit Aegium, tam propinquas illi Patras de motu nihil audiuisset illa vasta concussio, quæ duas suppressit vrbes, Helicen & Burin, citra Aegium constitit.* Similiter Dion lib. 66. narrans horribilem illam alteram Campaniæ quassationem sub Tito, quæ Herculanium & Pompeios euertit, Vesuuiumque incendit, affirmat aliquot antè diebus fumum & cineres ardentis montis Romam, quàm tremoris & tantæ cladis famam, impleuisse. Spatium tamen à Senecâ circumscriptum nimis angustum est, vt possit omnibus exëplis sufficere. Nam lib. 3. cap. 26. Histor. Indic. Iosephus Acolta scribit, in regno Peruano motus frequenter ad 160. leucas, imò ad 300. à Meridie in Septentrionem excurrere. Item circa annum 369. sub Valentiniano Cæsare, & anno 1116. totus pænè terrarum Orbis, denique anno 1601. Asia, Hungaria, Germania, Italia, Gallia, vno ferè momento feruntur tremuisse. vnde nec perpetuò verum est, quod quidam asseuerant, terræ motus obiectu magnorum fluuiorum terminari & stare. Igitur nihil certò & affirmatè hîc dici potest, sed multitudo, vires, profunditas exhalationis mouentis, firmitas etiam terræ superstantis, inspiciendæ. Spiritus enim multis locis dispositi latius mouent: etli difficulter possint simul & eodem temporis articulo, nisi aut concavitas continua sit, vel per angustias aliquas detur spiritui accenso & ignito meatus ab vnâ in aliam. sic enim alter ab altero flammam & impetum accipiet. Halitus etiam crudus non tam validè & latè ferit, quàm incensus & rarior. profunditas deinde cauernæ facit, vt idem spiritus vno ictu maiorem partem subûlire faciat superficiëi terræ. Cum enim lineæ à circumferentiâ ad centrum terræ deductæ, parallelæ non sint, sed magis magisque appropinquent, quò altius descendunt, necesse est, partem terræ inter vtramque interceptam, perpetuò cuneari & abire in arctum, latissimamque esse in terræ superficië. vnde cauerna, cuius latitudo quadrantem milliariis non excedat,

modò non procul à centro & regione Inferorum sit, sustinere potest totam Europam. verùm vires & energiam spiritus propè incredibilem esse oportet, vt emoueat, aut sollicitè tantam molem. Itaque cùm tota v.g. Europa contremiscit, sæpius fit vt non vna, sed pluriariam dispositæ exhalationes sint, nec vnico ictu, sed pluribus varias eius partes concutiant, flammâ vnius cuniculi, vt statim antè imaginabar, in vicinum per aliquam rimam se effundente. Vel, ex mugitu illo huc illuc discurrente, quis existimet eundem spiritum, seu fulmen quoddam subterraneum, per longissimas terræ cavitates diffugere; sicque minimo temporis intervallo dissitissima loca tentare? Ne autem tam longas & perpetuas sub terrâ venarum decursiones mireris, cogita tot ibi aquarum receptacula esse, & infinitos fluminum per abdita labentium alueos.

Durities denique & soliditas terræ incubantis multum adiuuat, vt vicina, quæ spiritus non suffodit, tamen etiam contremiscant. Molle enim solum si succutiat, diuidit se, nec impellit quæ circumstant. Hinc etiam fit, vt subterraneum fulmen hæc illæ cuniculati oberrans, & exitum quærens, alicubi quatit tantum, aut surrigat vano conatu; alibi, quia mollior & infirmior, effringat impositam molem.

Non de nihilo etiam quidam terræ motus dicuntur finiri occursum fluminum. nempe illi, quorum spiritus profundiores alueis fluminum non sunt. ripa enim vna agitata, alteram aquâ interfluentem diuisam concutere non valet.

Keckermanus denique probabile existimat (sed nullo argumento probat) terræ motus, vt Plinius dixit de peste, diffundi ab Ortum in Occasum, aut à Meridie in Septentrionem. Tentavi an venti, aut marinus æstus, qualitasve regionum, firmam mihi aliquam rationem asserere possent; sed nihil pro voto effecerunt. Hoc saltem est verum, per Marinas oras, quæ sententiâ Aristotelis, & satis expertâ, facillimè tremunt, longissimè excurrere terræ motus. Oræ autem istæ, vel ab Ortum in Occasum, (vt in utroque maris Mediterranei litoris vides) vel à Meridie in Septentrionem (vt in Hellesponto, Euxino, Mæotide, Oceano etiam nostro, Africano item & Americano) extenduntur. Sed an à Meridie cœperit aliquis motus, & in Septentriones se sparserit, an retrò, quis nobis satis dicet? præsertim vbi eodem pæne temporis articulo littus vniuersum concutitur. Possemus tamen ex mugitu exhalationis, in quam partem se conuoluat, aliquid discere: perinde vt è tonitru, quò se

per

per nubes agat fulmen, solemus intelligere. Sed sicuti fulmen nullâ certâ lege in omnes cæli regiones discurrit: ita de spiritu terræ motore, est proum suspicari.

Duratio terræ motûs incerta etiam est & inconstans. Aliquando enim momento panè absolvitur, aliàs per menses totos, aut annos edurat. Maximus ille anni 1601. qui ab Asiâ ad Oceanum Gallicum, id est, per totam Europæ longitudinem se effudit, vltra quadrantis horæ spatium non iuit: nisi quòd trigésimo pòst die Heluetia reliquias eius aliquas sensit. Pugnante & vincente apud Trasymenum lacum Hannibale, Italia tota cum multis passim ruinis quassata est; sed intra pugnx breue tempus concussio stetit: vnde neutra acies eius motûs sensum accepit. Anno 1538. Italia iterùm, 15. diebus, Fallopio teste; anno 1570. duobus integris annis, Fabricio Paduanio, agitata fuit. Auerroës Hispaniam suo tempore totos tres annos vacillasse dicit. Aristoteles & experientia affirmat, 40. dies sæpè solemnes fuisse. Vbi tamen tam diu durat, motus non continui, sed vt plurimum interpolati sunt, vt solent in nube fulmina. Ratio est, quia non statim & vnico ictu exhalatio tota erumpere, aut ita dispergi, vt non iterùm reliquæ coëant & vires resumant, potest. Secundi tamen ictus debiliores ferè sunt: nisi aut parum spiritûs primo impetu defluerit, aut rarior longè & intentior agitatione factus fuerit. aliàs enim terra primis ictibus quassata plerumque se laxat, & venis ac meatibus de spiritu largiter bibit. hæc enim caussa est, cur sæpè citra vllum manifestum chasma aut hiatus cesset terræ motus. quâ, inquam, terra poris causam eius efficientem accipit & consumit.

## ARTICVLVS V.

*Quæ anni tempora maximè sentiunt terræ motus.*

**O**Mnia sine vllò discrimine, inquit lib. 4. de Ortu subter. Georgius Agricola. Ratio eius, quia à solis ignibus subterraneis (quidquid Aristoteles ad Solem referat) effici putat terræ motus. ignes enim isti toto anno euaporant motores spiritus. Ita etiam Bodinus, qui dæmones *ἐννορύδιος* facit. Nec reuerà destituuntur exemplis. De vere & autumnino res controuersiam non habet. Sed Lib. 1.  
Nat. c. 1. Senecam audiamus. Pompeios in Campaniâ terræ motu defedis-  
se vbi affirmavit: & quidem diebus hibernis, (inquit, nempe Nonis Februarij) quos vacare à tali periculo maiores nostri solebant pro-  
mittere.

*mittere.* Famofus etiam ille Olyfiponenfis motus, anni 1531. quando Rex, & totus populus defertâ ciuitate, oâto diebus, quibus durauit, in campis egit sub pellibus, in Februarium incidit. & tempore Alberti Magni Longobardia concuffa eft ipfo brumæ die. Nec æftas etiam caret tremoribus. Anno 1586. in Regno Peruanio terræ motus nonâ die Iulij per orâ maris Pacifici 160. leucarum longitudinem cucurrit. & hoc anno, inquit Agricola, qui vigefimus Imperij Caroli Quinti eft, ipfo Solftitio Mifnia contremuit.

Sed nequidquam in Aristotelem & veritatem pugnas Agricola. Infinitis enim exemplis certiffimum eft, terram fæpiſſimè mouere autumno aut vere. Belgium fæculo elapfo, vt ex Gemmâ nostro Articulo 3. retuli, ter mouit, bis Martio, ſemel Aprili. Sed plurimi tamen in omni memoriâ facti autumno. Quo tempore Auguſtus Antonium ad Actium vicit, Palæſtina tremuit. pugnatum autem eft 4. Nonas Septemb. vt ex lib. 5. 1. Dionis patet. Veſuuius arſit, & Campania titubauit ſub Tito, quando curiositas viſendi miraculi Plinium perdidit (fumo enim & cinere incendij ſuffocatus eft vir ille maximus) extremo autumno, teſte eodem Dione. Conſtantinopolim fæpiſſimè conquaſſatam, ſed diſſiſſimè anno 1509. legi, & ſemper menſe Septembri. Italia anno 1538. ſpatio 15. dierum tota vacillauit, inquit Fallopius, & Septembri. Motus ille anni 1601. tam celebratus, Europam pæuè totam, die 8. Septembris inter primam & ſecundam nocturnam, agitauit. Clariff. Academiæ noſtræ, & famâ ſcriptiſque celeberrimus Medicus, Thomas Fienus, mihi de eo aliquando hæc narrauit, Sereniſſ. Ducem Bavariz Maximilianum, à cuius tunc cubiculis Medicus erat, motu exterritum, cùm putaret vim Palatio fieri, aut omnia corruere, gladio ſtriâto exiliſſe, familiamque inclamaſſe. Fieno interim altiſſimo ſomno ſepulto: & cùm manè negaſſet ſe quidquam ſenſiſſe, plures dies deriſo decachinnatoque à ſuo Principe. Sed & iſtud extra oleas è Keckermâno, linguæ Hebraicę in Academia Heydelbergenſi tunc Profeſſore, adiciamus. *Natus*, inquit, *paullo ante hunc terra motum potentiſſimo Galliarum Regi filius primus, Delphinus: natus item potentiſſimo Electori Palatino ſub ipſam terra motus horam, terrâ adhuc velut tremente, filius tertius. Vtinam cum terra motu ad Eccleſia & Reipub. quietem uterque Europa à Deo donatus aliquando intelligatur! Vtinam poſteritas id experiatur, contremuiſſe coram viroq; Principe Gallia ac Germania hoſtes! Vtinam de utroque*  
*veram*

*veram illam vocem ac praconium possis usurpare: Heroicorum animorum magnose, facileque motus!*

De Christianissimo Rege Ludouico XIII. iudicium non interpono, & posteritas videbit. De tertio illo Palatino vanissimum Keckermanni vaticinium erit, nisi publicæ Quieti magis quàm frater litauerit; qui illo suo Bohemico ambitu, Germaniatum, & totius pænè Europæ, Statum conturbauit.

Admirandus denique ille Ferrariensis motus, anni 1570. primos assultus dedit mense Nouembri, ipso festo die D. Martini. Et ne infinitus sim, animaduerte tu cùm historias leges, & intelliges, quod dixi, exempla plura autumnum aut ver incidere. Et hinc facillè coniectamus, Solem aliquid afferre ad terræ vibrationem. Si enim penes solos subterraneos ignes caussa, vt Agricola & Lydiatus volunt, esset: hieme sepiùs, quādo frigore omnes pori & ignium spiracula clausa & adstricta, spiritu scilicet deprehenso & circum sua claustra fremente, terra tremere. Autumnus autem & ver, quia modico & tepenti Sole fruuntur, exhalationes reddunt, quibus algidæ hiemes carent; nec feruore nimio consumunt, quod æstas solet. pigræ ergo illæ exhalationes circa terram sæpè hærent, & facillè relabuntur in eius meatus, miscenturque ignium subterraneorum halitibus. Pluvia etiam regredi in terræ penetralia compellit. & dehinc post largos imbres, inquit Aristoteles, non rarò terræ motus. Plures deinde & maiores nocturni, quàm diurni sunt; & antelucani, quàm vespertini: quidquid iterùm Aristoteli resistat Agricola. R itio est, quia veluti extremum hiemis gelidius est initio, & hiemat acriùs: ita quod noctis citra dimidium est, magis tepet à reliquiis nondum extinctis diurni caloris, quod verò ultra ad Auroram decurrit, magis alget à vaporibus in naturam aquę perfectè restitutis, & caussis aliis refrigerantibus in longiori absentia Solis. Nocturnum autem frigus spiritum interdum resolutum intra terram adigit & continet. qui si satis altè descendat, ceteroque spiritui subterraneo misceatur, implere mensuram caussæ potest, quæ mouendæ terræ sufficiat.

Hinc etiam facillè intelligitur, Lunæ aliquid imputari posse in terræ motibus. Plena enim & tumens, spiritus calore suo multiplicat; sed tamen etiam terræ poros nonnihil diducit. sicca verò & illunis, meatus non laxat, cùm in facie ad nos spectante, lumine indigeat, sed neque spiritus resoluit. Dignum etiam notatu duxit Aristoteles, in Solis & Lunæ deliquiis aliquando exortos terræ tre-

mores, spiritu scilicet subito calore destituto, & condito in subterraneos specus. Imò morum anni 1601. geminæ eclipsi, Lunæ 5. Solis 19. die Iunij Septembrem illum præcedentis, in parte Kekkermannus tribuit.

## ARTICVLVS VI.

### *Quæ signa antecedentia terræ motus.*

**P**rimum est, si aquæ puteorum aut fontanæ subito turbentur, & tingantur sapore sulphureo. hic enim est halituum è terræ secretariis in libertatem suspirantium, & in transitu aquas inficiendum, effectus. Sic Pherecydes Præceptor Pythagoræ haustu aquæ putealis terræ motum instantem denuntiavit.

Secundum est, si mare sine flatu & fluctu derepente attollatur & intumescat. Ita Posidonius, vt Strabo lib. 6. narrat, æstiuo Solstitio, sub Auroræ crepusculum, vidit mare Mediterraneum inter Æolias insulas (quæ & ignibus flagrant, & sæpè tremunt) subito in immensum surrexisse, desedisseq; paullatim, spiritu euanescente.

Tertium, si volucres præter morem sedent impauidæ. Signum enim est, ventos & omnes auras sopitas esse. libentius quippe volant aues, leni aliquo flatu adspirante. Malaciam autem & aëris insulitam tranquillitatem solere terræ motum antecedere, omnes fatentur. *Quia*, inquit Seneca ex Aristotele, *vis spiritus, qua concitare ventos solet, in infernâ sede detinetur. Nunc quoque cum hic motus in Campaniâ fuit, quamvis hiberno tempore & inquieto, per superiores dies aer stetit.* Potest tamen, vt vento vno spirante, alter sub terrâ tumultuetur: quia aliquando duos simul, etiam in aëre, conspirare, ex agminibus nubium in diuersa tendentibus, intelligimus, inquit Aristoteles. Sed hæc causa tam statæ ferè tranquillitatis ante terræ motus, mihi mentem non implet. venti enim non semper (imò fortasse rarò) sunt terræ motores. deinde plerumque qui in nos recidunt, Apogæi non sunt, & apud nos nati, sed ex longinquiori, vbi frequentius nullus est terræ motus, veniunt. Existimo igitur, flatus eorum sustineri, aut aliud auerti ab exhalatione, quæ multa & conferta per terræ meatus, ante tremores, in altum transpirat. vnde aues etiam nonnumquam exterritæ auolant & fugiunt terræ motus: quia halitus ille præcursor eas abigit.

Quartum signum ex Aristotele est, linea nubis in longum & directum porrecta. hoc tamen, vt & antecedens, immediatius tran-



tranquillitatem & statum aëris, quàm terræ motum significat. Et ego centies eiusmodi lineares nubium tractus vidi sine terræ motu. Vt enim tràquillo mari fluctus longi & recti ad littus veniunt, ait Aristoteles, quos in tempestate contorquet ventus: ita in turbatione aëris, magis sinuosa sunt nubium volumina, tot impellentibus hâc illâc flabris. Hoc igitur signum tenuæ est & remotum. quod tamen etiam Gemma noster, anno 1562. respondente euentu, æstimauit. *Vidi, inquit lib. 2. Cosmocrit. cap. 2. ipso die Natiuitatû Domini, horâ terciâ pomeridianâ, sub Sole lineam tenuem, nigram, quæ in raram longitudinem exposita diu permansit. Sol autem in nube aequali, densâ, radios nigerrimos spargens, interdum velut subsilire videbatur, credo ex vaporibus interiectis. Secutus est, uti tum præfagieram, terra motus 17. Ianuarij anni 1563. cum fulminibus, quæ post ventos atrocissimos, tandem in maximas ac diuturnas pluias eruperunt.*

Vltimum, & omnibus facilè anteferendum, est, Mugitus subterraneus. vt enim vix vmquam fulmen sine tumultuante antè tonitru emicat: ita rarissimè terra mouet, quin antè mugiat: comper- tumque id est per omnes historias. Exemplum vnicum, sed insigne, ex Dione, in concussione illâ Campaniæ & Vesuuij conflagratione sub Tito, sumamus. *Sonitus, inquit, tum subterranei tam- Lib. 66. quam tonitrua, cum super terram mugitibus similes fuerunt dein mare simul fremere, calum vnâ sonare, ingensq; & repentinus fragor, quasi montes simul corruerent, exaudiri. Tum exsilire primum immensi lapides, &c.* Mugitus autem & vlulatus iste, exhalationis per caua aut aspera cauernarum se versantis & frangentis, effectus est; simillimusque est tonitru in nube: nisi quòd allisio ad dura & concaua (quæ exhalatio non reperit in nubibus) sonitum illum ad vlulatum canum propius, quàm ad bombum tonitruorum, sæpè deflectit.

## ARTICVLVS VII.

### *Effectus terræ motus.*

**Q**ui terræ motui vulgò tribuuntur effectus, potius exhalationis sunt. imputantur tamen illi, quia per terræ motum exhalatio eos producit.

Primus est, ædificia succussatione sternere. vbi enim superiorum pondus extra fundamentorum perpendicularum diu inclina-



Lib. 1.  
Annal.

tum est, tandem procumbit. Sic tremor Campaniæ sub Tiro duas vrbes, Herculanium & Pompeios, populo sedente in theatro, penitus obruit. Sic diu antè, circa initia Principatûs Tiberij, duodecim Asiæ vrbes simul collapsæ nocturno motu: quò *improvisior graniorq; pestis fuit*, inquit Tacitus. *neque solitum in tali casu effugium subueniebat in aperta prorumpendi, quia diductis terris hauriebantur*. Secutus deinde alter miraculo plenissimus, Christo patiente, anno circiter decimo octauo Imperij eiusdem Principis, vt ex Scripturâ constat: meminîtq; Phlegon Adriani Cæsaris libertus. & Didymus: *Mei Christi tempore*, inquit, *non priuatus aliquis terra motus, sed tota terra conuulsata, & centro conuulsa fuit*. Diuinam ergo aut Angelicam virtutem, causam habuit: nec dubium, strages multis locis editas esse, qualem in Nyssênâ vrbe, ex Phlegonte narrat Eusebius, aut fortasse vibratio breuis, non inclinatio longa fuit, quæ statim omnia prona in ruinam, in libramenta sua restituit. Misericabilis etiam facies terræ motûs Antiochiæ, Traiano Principe; vbi omnes pænè domus in puluerem comminutæ, & ipse Princeps, qui tum fortè ibi hiemabat, per fenestram vix euasit incolumis. Anno 1509. tredecim hominum millia Constantino-poli obruta, anno 1531. Olyssiponæ 1500. euerse ædes, anno 1570. Ferraria miserrimè tota dilacerata fuit.

Secundus effectus est, montium in plano excitatio. hæc autem fit motu qui Brastes siue Bulliens dicitur, estque similis illi effossioni, quâ talpa terræ metam in altum egerit. vel

Ouidius  
15. Met.

— *ceu spiritus oris*  
*Tendere vesicam solet, aut direpta bicornis*  
*Terga capri.* —

Lib. 6.  
cap. 21.

Tumor ille postea permanet, & xuo indurescit. Tali motu, anno 1538. in agro Puteolano, è cineribus & pumicibus mons altitudinis integri miliaris, qui ideo Nouus appellatur, excitatus fuit. pari modo plurimæ insulæ è mari emerferunt; vt Delos, Rhodos, Anaphe, Nea, Alone. inter Cycladas Thera, Therasia. De hac Seneca: *Therasiam nostra ætatis insulam, spectantibus nautis in Aegeo marienatam, quis dubitat, quin in lucem spiritus vexerit?* denique Plinij xuo, Thia.

Tertius est, montium suppressio. Motu enim Rheæte, siue effractore, in abruptum aliquando hiatum montes, vrbes totæ cum populis, aut insulæ etiam hauriuntur. Ita perierunt famosæ illæ Achaïæ ciuitates Helice & Buris, de quibus Aristoteli aliisque tam fre-

frequentata mentio, quarum illa 12. stadiis, hæc 40. à mari aberat. & tamen Seneca dicit suo tempore super eas nauigari; Plinius, quædam adhuc earum vestigia apparere in alto. cum terrâ enim & hiatu quieas condiderat, à mari statim absorptæ sunt. Similis exitus magnæ illius Atlantidis insulæ, de quâ Plato in Critiâ & Timæo. vnicâ enim, vt narrat, nocte terræ motu plurifariam discissa, & Oceano Atlantico hausta euauit, superstitibus tantum velut naufragij hinc inde dispersis tabulis, Fortunatis & aliis aliquot illius maris insulis. Tertullianus Apolog. cap. 40. *Memorat*, inquit, *Plato, maiorem Asiâ & Africâ terram Atlantico mari creptam. Vancillat tamen libro de Pallio. Inter insulas, ait, nulla iam Delos, arena Samos & (si Plato non mendax) Acon in Atlantico, Libyam aut Asiam adæquans, quaritur nunc.* Mendacem tamen Platone in censet Keckermannus lib. de Terræ motu anni 1601. & Iosephus Acoſta lib. 1. Histor. Indic. cap. 22. Primò, quia in Oceano illo inter Africam & Americam nautæ vix vllâ bolide reperiunt fundum. igitur nullæ ibi sub mari reliquæ insularum. Deinde, fateatur Plato, inquit Acoſta, se à Critiâ puero id accepisse, qui inter pueriles cantionculas, hanc etiam de Atlantide solitus minurire. Lipsius tamen noster lib. 2. Physiol. cap. 19. rem factam, non fabulam existimat. Pamelius etiam in cap. 40. Apolog. Tertulliani, narrationem Platonis partim fabularem, partim compertæ veritatis affirmat. Christophorus enim Columbus, inquit, anno 1492. 3. Nonas Augusti ex Hispaniâ soluens, per Oceanum herbidum, & veluti in pratis, multos dies nauigauit; sed nullos scopulos qui submerfæ insulæ darent indicium, reperit. vndecimo tamen post die, insulas illas alias, Cubam scilicet, Hispaniolam, Iamaicam, per quas Plato transitum in continentem (Americam) esse dicit, inuenit. Sed profectò, nescio cur soli scopuli, & non etiam herbæ illæ mari enatæ, suspicionem facere possint virentis alicuius insulæ prolutæ fluctibus. quia enim molli terreno, nec benè hærenti compage fuit, ideo tam faciliè vniço terræ motu dissoluta in cœnum aut arenam diffluxit. Sed Oceanus ibi altissimus est, inquit. Nego, vbique. quis enim tam curiosè scrutatus fuit? Verum & istud demus. Fortasse, inquam, insula totum hiatum non impleuit, qui eam sorbuit. vel potius, insulæ lutum æstu & fluctibus aliò euectum est, & fundo maris vbique refusum, aut gurgites oppleuit. Nec id etiam tantum à puero aliquo somniantie, aut dementiente, acceptum; aliàs enim diuinus ille Pla-

to nimisquàm puor sit ( & quis etiam puer tali ingenio , vt hæc tam ingeniosa fingat ? ) sed ab Ægypti sacerdotibus, Philosophiâ & omne genus scientiâ canis, audierat, cùm apud eos peregrinaretur, Solon; à Solone Critias maior, à quo tandem Critias nepos, vt patet ex Timæo.

Franciscus denique Gomez Parte 2. Histor. Indic. asserit, memoriam adhuc aliquam demersæ cuiusdam ingentis illic insulæ apud Indos superesse. Sed super omnia me, vt in hanc Platonis sententiam labar, mouet, quòd sine miraculo & transpositione Angelorum, nesciam quâ viâ lupi, vrsi, tigres, leones, & cetera animalia humano generi noxia, ex Arcâ Noë in Americam peruenerint, nisi hæc aut perpetuo continenti, aut per insulam saltem aliquam, similem Atlantidi, cum Africâ ferè cohæserit. Imò nec etiam est, vt ipsi homines (nisi fortè tempestate eiecti) sine acûs nauticæ vsu, qui non ita pridem repertus, ex Africâ per illam Oceanî, quæ nunc est, vastitatem, traiciant in Americam. Aliqui tamen per mare glaciale Septemtrionis, & niues Polo subiectas, homines & bruta huc sponte transgressa credunt. sed cogita horridam illius cæli faciem, & multa animalia aliosia, & intolerantia frigoris, non accredes. Sed sat procul à scammate abiui.

Quartus terræ motus effectus est, terrarum cohærentium discidium. Sic Britannia à Galliz, Africa ab Hispaniæ contextu auulsa putatur. Sicilia ab Italiâ reiecta, Ossa ab Olympo recessit, &c.

Quintus, montis, ædificij, arborum, &c. in alienum locum translatio. Id autem accidit, quando spiritus molem in altum eiaculari non valet: eleuat tamen, & exitum per latera quærens, asperitates aliquas resistentes inuenit, quarum impulsu onus quoddammodò succollat & vehit. vnde Albertus hunc motum, Veſtitionem appellat. Ita supremo Neronis anno prata & oleæ Vectij Marcelli, Procuratoris Neronis, in agro Marrucino, in contrarias viæ publicæ sedes transgressæ. ita dudum antè, in agro Mutinensi, duo montes, ait lib. 2. cap. 83. Plinius, inter se maximo crepitu concurrerunt, assultantes recedentesque. Sic etiam anno 1575. collis in Angliâ (quæ tamen rarissimè sentit terræ motus) cum vicinâ planitie permutauit locum, & anno 1586. mense Aprili in Hiberniâ iuxta fluuium Barum, arbores cum spinetis, vt cap. 6. Apocal. narrat Franciscus Ribera.

Sextus est, fontium aut fluuiorum insolentibus locis per aper-  
tas terræ venas eruptio. siccantur etiam, aut alueum mutant aliquando,

quando, vel in scaturigines suas refunduntur. *Amnes retrò fluere*, Lib. 2. inquit Plinius, & *nostra atas vidit, Neronū Principis supremis, sicut in rebus eius retulimus*. Nec dubium, quin aliquo terræ motu; & fortasse eodem illo, qui oleas Procuratoris Neronis, supremo etiam vitæ eius anno, transtulit. Idem factum sæculo nuper elapso in Americâ Iosephus Acosta lib. 3. cap. 26. affirmat. Conimbric. Traët. 11. Meteor. cap. 8. terræ motu illo admirabili sub Emanuele Lusitanæ Rege, *Tagus*, inquit, *diffugientibus in viramque ripam undis, sicca in medio vada ostendit, omnibus qui spectarent, terrore & stupore percussis*. Nec opus in re certâ & compertâ pluribus exemplis.

Septimus, & omnium pessimus, est pestilentia. Solemnis enim hæc est, post omnes ferè terræ motus: idque per infinita exempla doceri potest. *Nec id mirum est*, inquit Seneca; *multa enim moris Lib. 6. fera in alto latent*. Exhalationes ergo terræ mouentes, sulphure suo, aliisque qualitatibus, sæpè letales sunt, vel ipse saltem aër in cauernis illis pigritiâ æternæ noctis, aut culpâ terrarum, corruptus, quem disscisso hiatu, vel per laxatos vt minimū poros, exhalatio secum in auras nostras expellit. Hinc Campano illo motu, gregem sexcentarum ouium, peste statim infecutâ, in regione Pompeianâ exanimatū, narrat Seneca: redditque pulchram rationem, cur bruta facilius hanc à terræ motu luem, quàm homines, sorbeant. quia videlicet, prono capite & in terram respirante sunt: homines verò è cælo, aut parallelum ferè horizonti spiritum ducunt. Simili etiam halitu Avernus, Charonix scrobes, & plurima alia loca aui- bus superuolantibus pestem asslant. qualem se Hierapoli vidisse, & periculum in quâdam auiculâ fecisse, lib. 68. narrat Dion. *Is spiritus*, ait, *omnibus animantibus pestilens est, præterquam castratis hominibus. Cuius causam equidem asserre nequeo. ea tantum vt vidi andiniq. refero*. Rogavi Clarissimum Medicum & Philosophum Thomam Fienum, vt vellet Dioni subuenire. sed negavit statim se fabulis responderè. Si aliqua tamen causa est, in frigore castratorum debet inueniri. spiritus enim illi pestilentes, sæpè feruidi sunt, & multitudine ac calore suffocant, cui fortasse potentiùs resistit castratorum frigus. sed id genus miracula non rarò vanitatis quàm fidei pleniora sunt. Vel certè Galli illi Matris Deū, antidoto præmuniti, aut spiritum tantisper continentes, innoxij autrum illud inspectabant. quod fama deinde sparsit ad omnes castratos. quod indicat Strabo. Cardanus etiam lib. 1. Variet. cap. 9. quatuor ordine

ordine opifices, qui in caueam subterraneam, ubi ipse intererat, descenderant, exanimatos scribit. nec tamen ideo, credo, quia nimiserant viri. Non omnibus tamen, aut omni tempore equè nocent. Charonia scrobs Plinio, hodie Antrum canum, in agro Putcolano, hominem confestim necat, bruta supit tantum: excitanturque merfione vicini lacus. Pighius nihilominus in eo innoxius ambulauit, ultra æstum, nihil expertus. Turcæ tamen quidam aliàs immissi, statim extincti sunt.

Vltimus, & vtilissimus omnium effectus, est timor Numinis: qui simul etiam est finis eius principalis.

## ARTICVLVS VIII.

*Timor Numinis, caussa finalis terræ motus.*

Ecclef. 1.

**I**Ta dico. Nam licet *omnia opera sua feceris Deus, ut timeatur*, nullo tamen ferè maiori terrore id assequi potest, quàm terræ motu. vnde Aristoteles lib. 3. Ethic. cap. 10. dicit Celtas intrepiditate excedere, vocatque *μᾶνοίμους, insanos*: quia non timeant terræ motus. *Quam enim latebram prospicimus*, ait egregiè Romanus Sapiens, *quod auxilium, si Orbis ipse ruinas agitet? si hoc quod nos tuetur ac sustinet, supra quod vrbes sita sunt, quod fundamentum quidam Orbis esse dixerunt, discedit ac titubas? quid tibi esse non dico auxilij, sed solatij potest, ubi timor fugam perdidit?* Non perdidit tamen: & Deum habemus, quod confugiamus. ideo enim hæc & paria terculamenta ostendit, vt perituris inherētes ad sui respectum conuertat: vt quàm instabili vestigio humana omnia, in quibus pendemus, nitantur, intelligamus: quandoquidem etiam terra, quæ firmissima & in æternum stare dicitur, pedibus mortalium se subducatur. Heu, quod anchoram iacimus, si vbique tam lapsaris & inlidelis fundus? In te, Domine Deus meus. Tu enim solus immortalis & immobilis es, *habitans aternitatem*. Tibi ergo soli infigamur, qui firmare nos potes. Mortalia omnia circa nos diffiunt aut cadunt, nosque pariter cum ipsis; quia miserrima particula eorum sumus. Cui igitur manus iniciam? quid arripiam, ubi omnia mecum labuntur, & eodem agmine tendunt in mortem? In Te me reiciam, *in quem proiectus sum ex utero*, qui *de ventre matris mea Deus meus es*. Per Fidem, Spem, & Amorem Tibi inhærebo: imò pleno me saltu in *pelagus illud intransnabile* mittam; ubi tamen *nihil de me reperiam, nisi nihil, & nihil, & ex toto nihil*. Sed nihilum

Seneca  
lib. 6. c. 1.

Isaia 17.

psal 117.

A. Kemp.  
lib. 3. c. 14.

nihilum tamen meum adharebit dulci Tosi meo: aut in ipsum, ut guttula roris in mare magnum, dissoluetur, eritq; aliquid in ipso, atatemque sic feres, imò aternitatem.

Sed quid ego frigido pectore, tam feruentes & alienos, non meos, sensus effutio? Repræsentata tamen hoc votum Domine Deus meus!

Terræ motibus etiam excitare vult nobis Deus memoriam illius magni terræ motus, & calamitatum quæ superuenient vniuerso Orbi, de quibus Lucæ 21. *Quando concutientur fundamenta terræ. quando confractioe confringetur terra, contritione conteretur terra, commotione commouebitur terra, agitatione agitabitur terra, sicut ebrius. quando deflagrante Orbis incendio, chasmate ingenti dehiscet terra, & cineribus permixtas hauriet victimas illas diuinæ Iustitiæ piaculares. quando infernus dilatabit animam suam, & aperiet os suum absque ullo termino: & descendent sortes eius & populus eius, & sublimis gloriosus, eius ad eum. quando dicemus, Quid nobis profuit superbia? aut diuitiarum iactantia quid consulis nobis? Transferunt omnia illa tamquam umbra, & tamquam nuntius præcurrens, & tamquam nauis quæ pertransit fluctuantem aquam: cuius, cum præterieris, non est vestigium inuenire, neq; semitam carinæ eius in fluctibus. quando miserabile corpus cum infelici animâ mittetur in stagnum ignis, & in profundum lacu: vnde fumus tormentorum ascendes in sacula sæculorum. Quis poteris habitare de nobis cum igne deuorante? quæ habitabis ex nobis cum ardoribus sempiternis? O æternitas! O abyssus temporum impenetrabilis! O breue verbum, sed longæ significationis, cum ardoribus sempiternis! quanta, quàm infinita debet esse illa Maiestas, in quam momentaneus, nec satis expressus contemptus, supplicii tam diris vindicatur & sempiternis?*

Apoc. 20.  
Isaïæ 14.  
Apoc. 14.  
[Isaï 55].

## ARTICVLVS IX.

*Comparatio Cuniculorum nostrorum militarium  
cum terræ motu.*

**M**agna omnino affinitas est Cuniculorum istorum cum terræ motu, qui Rhectes seu Effractor appellatur: ut ars hunc videatur traxisse in exemplum. Ut enim tormentis nostris Iouem fulminantem, ita Neptunum, aut Plutonem terræ quassatorem


Ee pulue-



pulvere cuniculario imitatur. *Huius tam atrocis inuenti auctor fuit*, inquit Cardanus lib.2. Subtil. *Franciscus Georgius Senensis. docuit hic Hispanos arcem Lucullianam iuxta Neapolim, quam Galli tuebantur, nunc Onum vocatam, euertere: ade eius sacrâ, cum Galli qui intus erant, etiam in mare ex monte translatâ. Guicciardinus tamen lib.6. inuentionem tribuit Petro Nauarro Cantabro. & Iouius de Nauarro sibi familiariter cognito affirmat famam toto Orbe (cum antè miles tantùm esset gregarius) consecutum, in excauandis cuniculis, per quos immisissis tormētarij pulueris fomentis, adèò terribiles intus flammæ excitare didicisse, vt obstructis spiramentis, violentiâ oblectantis intus flamma, non mœnia modò, sed impositæ etiam rupes exscinderentur. Et deinde: Expugnatâ apud Neapolim Oui arce, stupendo suo artificio vsque adèò mirus extitit, vt Galli eius portentosa machinationis metu, reliquis prasidijs faciliè excederent, cum abripi in sublime propugnacula Megaris insula scopulis imposita, & furentibus flammis cuncta tremere, hiscerèque & perfringi cum ruinâ multorum mortalium prospexissent. Vanuc. Biringucius Senensis, qui etiam sæculi lapsi initio vixit, conterraneum suum, Franciscum Georgium repertorem, sed Nauarrum in arce Oui sumpsisse primum experimentum affirmat, supposito in tribus partibus pulvere: negatque vllum postea cuniculum saltasse felicius.*

Receptaculum pulueris, quod in capite seu fine cuniculi est, quatuor orgyatum, siue quatuor & viginti pedum altitudinis, duodecim verò pedum latitudinis, fieri suadet Biringucci. Cuniculi vena, siue via quâ ad pulueris cauum peruenitur, tortuosa & aliquot amfractibus sinuata esse debet, ne lapides & cémentum, quibus obstruitur, flamma pulueris excutiat; atque ita se per cuniculum, non per verticem & molem superstantem, exoncret. Illac enim sine dubio se eiicit, quâ facillimè potest. Itaque vix omnes alix cum curâ sepiendæ & firmandæ sunt, vt per incumbentem molem erumpere cogas. Funis autem ignarius sulphure illitus, à loco pulueris ad orificium cuniculi inter cémentum deducitur, per quem ignis serpat vsque ad puluerem. puluis verò sumitur tenuissimus, vt totus ferè simul flammam rapiat. Sic enim violentior est, & maiorem stragem dabit. Sed rudem eius speciem, si placet, subiicio oculis.





*A* est concauitas capax pulueris, cui moles excutienda superstat. vbi ignis ad finem funiculi in *G* peruenerit, puluis in flammam momento p̄nē rarefactus, claustra sua ad exitum molitur & tentat. igitur lapides & cæmentum obstructi cuniculi, à *G* in *B* angulo recto repelluntur, sed terra inter *B* & *E* interiecta impetum retundit. Itaque parseius in *C* declinat. vbi iterum hebetatus, & tertio in *D* tandem in *E* planē frangitur & expirat. vnde flamma angustiarum & moræ impatiens, per *H* quando aliorum non potest, viam effringit. Sicuti autem spiritus terræ motor molem aliquādo valido primū conatu attollit, deinde fatiscens incolumem deponit: ita sepē in cuniculis vsu venit. Exemplum iterum à Petro Nauarro petimus. Is cum Bononiam à Gallis defensam oppugnaret, actō sub mœnibus cuniculo, magnam eorum partem, cum imposito etiam Sacello sic eleuauit, vt plateæ vr̄bis per hiatum obsidentibus conspicuæ essent. sed flammā nil vltra valente, ingens illa moles aliquamdiu pendula, molli relapsu tandem in vestigia sua & apertum foramen ita recidit, vt numquam enota videri posset. vnde res diuino miraculo tributa fuit. Similis planē effectus terræ motus anni 1116. in flumine Pado. hæc enim Chronicon Hirfang. in Notis Reu<sup>ti</sup> & Amplissimi D. Io. Chapeauilli Canonici & Vicarij Leodiensis, ad caput 18. Agidij Aureæ Vallis. Horrendus, inquit, terra motus per totum p̄nē Orbem terrarum factus est. quo ciuitates, castella, villa, cum hominibus absorpta sunt, montes scissi, flumina deglutiente terrā exsiccata. Padus, vñus de quatuor Europa maioribus fluminis, & terrā eleuatus in modum

Gulicard.  
lib. 10.

*fornicis, ut inter terram & aquam via pateret transeuntibus. unde extare extremus dies credebatur. Et de Mosâ etiam nostro, ad Chronicon Sigeberti Robertus narrat, eodem tempore iuxta Abbatiam qua Susula dicitur, quasi penderet in aëre, fundum deseruisse.*

Verum in concavitate pari, pulveris cunicularij vires longè maiores, & plura moliuntur, magisq̃ue ferociunt, quàm spiritus terræ motor. vnde ars hîc non tantum Naturam imitata est, sed etiam superavit. Ratio est, quodd spiritus cavitatem influens, & replens, multis partibus sit rarior pulvere: ideoq̃ue licet motu, vel ab aliâ causâ, in igneam etiam raritatem intumescat, pauciores sunt partes eius quæ talibus angustiis capi nequeunt, quàm pulveris in flammam tantò se maiorem dissoluti. Cape id paullo enucleatiùs.

Pulvis eiusdem ferè densitatis est cum terrâ, spiritus terræ mouens raritatis fortasse paris cum aëre. Terra, Aristotelis opinione, decuplo quàm aqua densior est, hæc decuplo quàm aër, aër decuplo quàm ignis. Hinc sequitur, terram siue puluerem pyrium millecuplâ densitate superare ignem & flammam: cum tamen aër & spiritus motor decuplâ tantum excedant. Igitur quando spiritus ignescet, in decuplo ampliorem tantum locum se spargere tentabit; pulvis verò latius, & ad millecuplum. vnde claustra sua magis indignabitur, tundetq̃ue fortiùs. Adde iam, proportionem illam pulveris ad flammam nimis magnam esse. Snellius enim affirmat se comperisse, granum vnum pulveris reddere flammam centies vicies quiniè millies se ampliorem.

Ceterum tamen terræ motus, aut quia spiritus profundior est, aut pluribus locis suppositus, latius, quàm cuniculi, terrorem spargit: estq̃ue (licet fortè non erumpat) succussatione illâ nocentior, quâ plurimorum ædificiorum compages laxat, aut impellit etiam in ruinam. Hoc autem in cuniculis est inprimis æruum. Homines qui cum superpositâ mole in altum volant, citiùs ferè, quàm terream illam aut lapideam molem, quæ maiorem cepit impetum, deseri, anteq̃ue relabi. sic enim fit, vt qui fortè incolumes recidunt, à superueniente terrâ viui sepeliantur. Ita nuper, dum mœnia ciuitatis Mosæ-Traiectinæ à Vigilantissimo Gubernatore, & armis inclyto illo Heroë, Illustrissimo D. Claudio de Lanoy, Domino de la Mottry, in meliorem belli vsum reformatur, effossus est aliquis Centurio an Tribunus, cataphractus, clypeo sinistræ inserto, ceterisq̃ue armis munitus, pedibus insistens, ac veluti in præliarem statum compositis, torque denique aureo & fulgente insignis. qui an-

nos 46. ab illo scilicet 1579. quando ciuitas ab Excellentiss. Principe Parmensi Alexandro Farnesio expugnata, sic cuniculo conditus & sepultus steterat.

Verum non in terrâ iam solum, sed in mari etiam (tam in sui perniciem ingeniosa est mortalitas) repertus quodammodò cuniculorum vsus: nec vt hostem, sed se interimant, ne veniant in eius potestatem. in quos proinde regeri potest, quod olim in Fannium Martiali:

*Hostem cum fugeret, se Fannius ipse peremit.*

*Hoc peto: Non furor est, ne moriari, mori?*

Hoc tamen mortis paullominus quàm Saguntinæ genus in Oceano nostro iam frequens. vbi ingentes nauium moles, ardentium vrbium imagine, se in nubes eiaculari (utinam quos vehunt in cælum eiciant!) videbis.

Simili ferè artificio igniaræ naues ab obsessis Antuerpiensibus fabricatæ, quarum fulmine admirabilem illum Principis Parmensis supra Scaldim pontem disicerent. Naues enim ingentibus & sepulchralibus lapidibus inëdificabant, puluere deinde implebant, & nullo gubernante demittebant secundo Scaldis æstu. vbi ad pontem defluxissent, ignis per fomitem serpens puluerem incidebat: ibique tanto impetu naues, lapides, ceteraque missilia differebat, vt ingentem illam pontis machinationem tot trabibus, pontonibus, catenisque decumanis deuinctam firmatamque vnica nauicula dissiparet, plurimosque in vtrâque ripâ mortales sterneret, contereretque. Innumeri enim nouitatis ignari ad ripas confluxerant, studio videndi ridendique naues marino æstu, nullo alio rectore delabentes. Mirabilem etiam stragem à puluere passa vrbs Mechliniensis anno 1546. profesto D. Laurentij. fulmen enim altissimam quamdam turrim, in quâ 700. circiter erant cadi tormentarij pulueris, percussit. vbi turris momento temporis radicitus abrepta, partem murorum oppidi, & totum pænè ipsum dilacerauit, plurimosque mortales exanimauit. fluuium ipsum, qui iuxta fluebat, ebibit, piscesque tostos aut vstulatos per agros dispersit. *Porta dissiliens*, (ait Corn. Gemma, qui tunc adolescens in Ludo ibi litterario agebat) *tanta fuit eruptio, vt stragem latissimam dederit, dissiectis adificiis pluribus 300. oppressis hominibus supra 500.*

Lib. 1.  
Cosmo-  
crit. c. 1.

Granatorum etiam artificium propiùs ad cuniculos, quàm tormenta nostra ænea, venit. dissiliunt enim instar ferè cuniculorum.

Pilæ metallicæ sunt, palmaris diametri, inquit à Porta ( nostræ iam tamen maiores, & pedalis, aut amplius sunt : ) quæ clauo ferreo transiguntur, vt ipse describit . alliganturque ferrea fila, quæ singula 300. taxillos ferreos insertos habent. ideoque Granata vocantur: quia scilicet, missilibus quibus inferciuntur, malorum Granatorum similitudinem exprimunt . Hæ pilæ optimo puluere tormentario replentur : quæ vbi per canaliculum immissum ignem acceperint, in mille dissiliunt partes, omniaque ventris missilia tam valido ictu iaculantur, vt in tabulas & muros palmum subintrent, & ducentos sæpè simul saucient. Audiuius nuper narrantem vrbis Bredanzæ incolam : vidisse se cum horrore, hac obsidione anni 1625. vnicum Granatum à nostris in urbem coniectum, talibus furis agitatum, vt ferè sit incredibile dictu . Tanto enim impetu ruptum aiebat, vt integram domum funditus cum parietibus, trabibus, tabulatis, tecto, diffregerit, comminuerit, diffraueritque.

Ante Ostendam denique ratio reperta, pulueris Granatorum sic medicandi, vt eo afflati in vertiginem darentur aut epilepsiam.



LIBERTI FROMONDI  
 METEOROLOGICORVM  
 LIBER QVINTVS:  
 De Meteoris aqueis.

CAPVT I.

*De Mari.*



VI A vapor, aqueorum meteororum materia est, & è mari ceterisque aquarum conflugibus hauritur, de his antè, Aristotelis exemplo, dicam. priùs tamen de mari, vt patente minorum aquarum.

Aquæ verò generaliter, aut sub terrâ latent, aut in superficie eius sunt. Illæ aut per occultas venas discurrunt, vel in abyſſo magnâ (vt S. Scriptura Genes. 7. & 49. vocat; Plato verò in Phædone Barathrum, Poëtæ Tartarum appellant) desident & stagnant. Similiter quæ in terræ superficie, in fluentes & stagnantes diuiduntur. Fluentes sunt, quæ canali suo totæ & continenti agmine elabuntur. vt flumina, riuuli. Stagnantes, quæ sic alueo se continēt, vt non ita totæ effluant. Hæ vel fontes, vel putei, vel lacus, vel paludes, vel mare sunt. Fons à puteo, solâ profunditate & distantia à superficie terræ differt. aquâ enim puteanâ ex profundiori hauriri debet. *Lacus*, inquit M. Varro, *est lacuna magna, ubi aqua contineri potest*. Sed hæc definitio est continentis. Pro contento verò, Est aqua magna stagnans, quæ ceterarum origo non est. Hoc addo, ad arcendum mare à definitione. aliàs enim mare pro ingenti quodam lacu potest haberi: nisi locutionis insolentia prohiberet. *Palus*, eodem Varrone auctore, *est paululum aqua in altitudinem, & palam latius diffusa*. Maior ergo laci, quàm paludis profunditas esse debet.

Mare finiri solet, communis aquarum congregatio, origo cetera-

Libro 4.  
 de Lingua  
 Latinâ.

terarum. quæ definitio est integri & vnici maris in toto Mundo. Nam mare Mediterraneum v.g. quæ pars est illius totius integralis, non est ceterarum aquarum origo. Mare Galilææ, & Caspium, lacus potius, quàm maria sunt. nisi Hebræo more, qui maiusculam quamcumque aquam mare appellant.

Sed nōne igitur, inquires, mare aliud Adriaticum est, aliud Tyrrenum, &c? Ita. sed per synecdochen, quā totum vsurpatur pro parte. Sic Poëta etiam hiemem, frigidum annum vocat. Sophista hūc nuper quidam flagitabat excludi pisces à definitione maris: vrgebatque non oportere excludi; quia continerentur definito. Sed aliud est, contineri vt in loco; aliud, vt in eo, quod ipsi per prædicationem tribui potest. Fretum est mare coëuntibus littorum quibusdam ceruicibus compressum. Tale Britannicum, Herculeum, Magellanicum.

## ARTICVLVS I.

*Quæ origo, & quanta magnitudo maris.*

**P**ythagorici mare Saturni lacrymas, alij terræ vrinam, Anaxagoras & Empedocles sudorem, ideoque falsum, dixerunt. Nec longè id hodie spernit Io. Keplerus, qui terram, magnum quoddam animal ab ignibus subterraneis æstuans credit, & marino sudore diffuens. Sed nugæ istæ fabulares sunt.

Mare igitur, cum ceterā omni aquā & Mundo nascente, terræ vndique circumfusum, creatum est. Tertio verò Mundi die, ad vitam & commoditatem animalium, pars terræ resecta, suusque mari, quò se reciperet, cauatus alueus, cauati fluminum canales, tumulis, collibus, montibus plurifariam excitatis.

De magnitudine superficiæ maris, nondum satis liquet. Quidam, inquit lib. 2. q. 1. Thimon, putant, vt in paruo Mundo homine, facies solū & manus nudatæ sunt, ceteris partibus additis intra vestem: ita in magno Mundo, ampliorem longè lateque, tractum aquis contegi, emicantibus hinc inde sparsim terrarum insularum aut continentium particulis. Sed falluntur. fallitur & Scaliger Exercit. 38. qui vnicam tertiam telluris partem nudam, reliquas duas docet obrutas aquis. Propius veritatem est, quod curiosè dimensus Piccolomeneus, plus aliquanto terræ nudatum, quàm suppressum mari, lacubus, fluminibus. Nimis tamen exerrat Auditor ille Apocryphus libri 4. Esdræ, cap. 6. *Tertio die*, inquit Creatori,

tori, imperasti aquis congregari in septimâ parte terræ: sex verò partes siccasti, & conseruasti, ut ex his sint coram te ministrantia seminata à Deo & culta. Itaque verisimillimum est, quod affirmat Bodinus, tantam ferè maris, quantam terræ esse superficiem. De Orbe noto loquimur: nam aquæne an terra sub vtroque Polo lateat, nondum comperimus.

De profunditate maris, antiquorum Geometrarum sententia fuit, teste Plutarcho, parem esse altitudini montium. Ideo fortasse, quia existimarunt montes à Deo exaggeratos ex parte illâ terræ, quam effodit excauando maris alueo. Sed difficulter hoc esse potest: quia, vt Libro primo ostendi, montes non pauci 4. milliaria Italica habent perpendiculi, cum tamen maxima Oceani profunditas ad dimidium milliare non perueniat, *vt mihi asseruerunt*, inquit Baptista Benedictus Epistolâ ad Horatium Mutum, *Hispani multis, & Lusitani præstantissimi nauta, tum Venetiis, tum Parma in Aulâ Serenissimæ quondam Principis. inter quos Venetiis fuit Illustris Rodericus Guzmanus, D. Franciscus Lopez, D. Garzias de Seniliâ, multiq; alij.* In gurgitibus tamen quibusdam altitudo ad totum milliare, & vltra decurrit. alibi etiam nullâ bolide reperiri valet fundus. quod nuperâ nauigatione Indicâ, circa plerasque insulas maris Pacifici, experti sunt Hollandi. Imò lib. 1. Olaus tantam circa pleraque Nortvvegicæ montosâ littora altitudinem Oceani esse scribit, vt funibus, quantis maxima naui impleri valet, non attingatur fundus. vnde etiam certum non est, an profundissimi gurgites, altissimorum montium non adæquent perpendiculum. Montes tamen vniuersi derafi, & in mare abiecti, non replerent totum alueum, cum superficies aluei æqualis propemodum sit superficiæ terræ montosæ simul & non montosæ.

Concludo igitur, terram longè videri maiorem aquâ. quod ita potest ostendi: Pone, quidquid aquarum vides in superficie, habere profunditatem parem cum terrâ, & ad centrum vsque decurrere: tunc solum aquâ mole vtrumque Elementum erit, cum ita superficiebus eorum statuamus paritatem. quoties ergo iam aqua minor est, quæ comparatione semidiametri terræ est tam brevis & vadosa? Nihilominus incomperta est vastitas & altitudo subterraneæ abyssi. Nam quidam putei metallici in Germaniâ (vt in Bermanno Agricola docet) ad 700. orgyas (mensura est sex pedum) sicci perueniunt; alij immensum abbi, in pari altitudine, aquarum Barathrum inueniunt. Deinde omnes lapides & metal-



12, imò etiam Inferorum & Plutonis regnum, in terræ molem compingimus. Hoc tamen cauum igne & sulphure, non terrâ, est oppletum: diametrumque eius, vnus Belgici milliarij, Eruditissimus Lessius lib. 13. de Moribus diuinis cap. 24. statuit. longè tamen ampliorem Franciscus Ribera cap. 14. Apocal. vbi his verbis, *Et exiuit sanguis de lacu* (iræ Dei, id est inferno) *vsque ad frenos equorum, per stadia mille sexcenta*, putat significari longitudinem diametri concavitatis inferorum circa centrum terræ: quæ sit 1600. stadiorum, id est 200. milliarium Italicorum. Sed nimis improba tamen est, inquit Lessius, hæc vastitas: nam diameter vnus leucæ cubicè multiplicata, sphaeram efficiet, quæ capiendis octingentis millibus millionum corporum damnatorum (dando cuique pedes in quadro) abundissimè sufficiat, *Cùm tamen, inquit, certum videatur, factâ subductione, non futuros centies mille millones damnandorum*. Sed tamen imaginemur, quidquid aquarum in terræ visceribus est, retrahi in mare, & obruere vndique terram; ascendet fortasse aliquantò altius, quàm in diluuiio illo generali, quando 15. cubitis superfudit se verticibus altissimorum montium. Infletur itaq; ad 10. imò 100. imò 500. milliaria supra terram; complanentur deinde omnes montes, repleanturque terrâ omnes aluei & cauitates subterraneæ abyssi, reddaturque terræ facies quam habuit ante tertium Mundi diem; tota semidiameter globi aquei & terrei simul erit circiter 3500. mill. Italicorum. cum igitur aquæ profunditati 500. milliaria dederimus, in terrestri semidiametro 3000. remanebunt. vnde terra erit adhuc quàm aqua duplo ferè maior: habebitque se ad eam vt 12. ad 7. vt ex proportionem semidiametrorum & sphaerarum Benedictus ostendit. Si autem terram aquæ quantitatem, quæ in toto Vniuerso esse putatur, æstimeamus, credit quinquies millecuplo facilè à terrâ superari. Detrahenda terræ tamen cauitas infernalis; quæ modica est ad spectu ceteræ molis. lapides verò & metalla, terræ relinquenda sunt; vt ossa suo corpori.

## ARTICVLVS II.

*An terra & mari idem sit centrum.*

**N**Egare videtur D. Thomas 1. par. quæst. 69. art. 1. ad 2. Ambrosius Catharinus, Paullus Burgensis, Bodinus, & alij. Docent enim, mare altius esse terrâ, & efficere quemdam in dorso eius

eius veluti gibbum. Si quæras, cur gibbus iste seu tumor aquarum in subiecta littora non se effundat, obruatque terram: aiunt retineri diuinâ manu. Hoc enim significari videtur Ierem. cap. 5. *Posui arenam terminum mari, præceptum sempiternum, quod non præteribis: & commouebuntur, & non poterunt: & intumescunt fluctus eius, & non transibunt illud.* Et Prouerb. cap. 8. *Legem ponebat aquis, ne transirent fines suos.* Iobi cap. 38. *Et dixi (mari) Usque huc venies, & non procedes amplius, & hic confringes tumentes fluctus tuos.*

Deinde, Rex Ægypti Ptolomæus, maris rubri alueum in Nilum deducere aggressus, deterritus est à Mathematicis inundationis metu, excelsiore tribus cubitis Rubro mari comperto, quam terrâ Ægypti. simili terrore Demetrius Rex, Iulius, Caligula, Nero, Cæsares, Corinthiacum Isthmum destiterunt velle perfodere. Ad quam altitudinem Ægxi & Ionij maris alludere mihi videtur Poëta celsus:

— *quæq; obiacet alto*

*Isthmos, & à terrâ maria inclinata repellit.*

Stat.  
Theb. 4.

Nuper etiam Hispani cogitauerunt de incidendo Isthmo Americano inter Panamam & *Nombre de Dios*. Distantia enim illa 7. leucarum inter Oceanum nostrum & mare Pacificum, plus negotij, transportandis mercibus per circuitum 18. leucarum inter montes, facessit, quam reliquum maritimum iter, quo 2300. leucarum navigatione, peruenitur in Peru. Sed Ptolomæi, & Demetrii, ceterorumque exemplo, & periculo inundationis totius Americæ, consilium abiecerunt.

Tertiò: Aqua effusa in puluerem, item nocturni rores in guttarum globulos se colligunt, quorum peculiare centrum est, & diuersum à terræ centro. Igitur & mare tale centrum affectat: cum eadem natura sit totius & partis.

Quartò: Numquam fontes per altissimorum etiam montium vertices emicarent, inquit Bodinus, nisi terra immersa esset aquæ altiori. quia locus vnde fons exsilit, non potest excelsior esse primâ origine aquæ.

Quintò: Ideo montes vbique ferè littorum, mari obiecti sunt, vt ipsum defenderent, ne obrueret terram depressiorem.

Planè tamen verum est, terram eminere supra mare, & vtrumque elementum corrotundari in vnum & singularem globum. Ideo enim mari excavatus est alueus, vt veluti in vitæ cauo, & depressiore terrâ littorali, contineretur. Deinde, flumina palàm hu-

miliora sunt ripis; igitur & mare littoribus. Tertiò, quò longius mare à terrà recederet, eò profundius foret: quia ibi altissimum punctum aquei gibbi esset. quod tamen est compertæ vanitatis. Quartò, non par esset eleuatio Poli sub eodem parallelo, in littore maris, & alto mari. Maior enim cerneretur eleuatio è vertice illo aquei tumoris in medio mari. Quintò, mare flumina intra suos alueos repelleret. Sextò, venti gibbum illum maris flatu effunderent & complanarent. Septimò, naues soluentes è portu, contra clium aquæ obluçtari oporteret, & magno molimine adscendere: in portum verò, nullo flatu aut æstu secundo, lapsu pronissimo defluerent. quod ridet nautæ.

Denique demonstrat pulchrè, vtrumque elementum in eadem sphærâ & centrum conspirare, Archimedes, & Petrus Aliacus Cardinalis & Dominus Cameracensis cap. 1. Sphæræ, quæst. 5. quia experimur guttas pluuiæ decidere in terram ad angulos rectos: ergo petunt directè & affectant terræ centrum. Item, aquam in loca decliuiora & terræ centro propinquiora naturaliter defluererecernimus: igitur cacumen tumoris illius marini, grauitate suà etiam à se effundet, lateraque supprimer, vt diffundant se in globosam & vndique aquali interuallo à centro terræ distantem superficiem. Pulcherrimè itaque & verissimè Plinius ait: *Totas omnig, ex parte aquas vergere in centrum, ideoq, non decidere, quoniam in interiora nitantur. Quod ita formasse artifex Natura credi debet: vt cum terra arida & sicca constare per se ac sine humore non posset, nec rursus stare aqua nisi sustinente terrâ, mutuo implexu iungerentur: hac sinus pendente, illâ verò permeante totam, intrâ, extrâ, suprâ, venis vt vinculis discurrentibus, atque etiam in summis iugis erumpente.*

Iam ergo videndum, quid aduersæ opinioni reponamus. Atque imprimis Scriptura sacra planè est à nobis, quæ Psal. 23. ait, Deum firmasse terram super aquas. & Psal. 106. *qui descendunt*, inquit, *mare in manibus*. Igitur altior est terra, è quâ in mare descendimus. Scripturæ etiam initio productæ, pro nobis loquuntur. nam significant Deum excauasse mari alueum, & terram circumiecisse vndique eminentiorè; ne si aqua altior foret, terræ se superfunderet. De illis qui ob altitudinem maris, non ausi perfodere Isthmos, dic à Geometris fuisse deceptos: vel certè, cur cæpto desisterent, aliam habuisse rationem. Ægyptienum metuerunt aquam Nili (aiunt quidam apud Plinium) infuso mari corrumpere. Hispanos

verò

Lib. 2.  
cap. 65.

Lib. 6.  
cap. 29.

verò deterruerunt maximi, durissimi, & omni ferro impenetrabiles illi montes, quos Deus fluctibus vtriusque maris opposuit, vt Ios. Acosta narrat oculatus testis. Esse etiam potest, vt partes aliquę Regionum mediterraneę, reuerà mari depressiores sint, & periclitentur admissio longius Neptuno. præsertim Ægyptus, Hollandia, Zelandia, quę marino limo putantur primùm increuisse, & postea induruisse. vnde etiam manu, & aggere artificiali oportet ibi fluctus submouere: quia Deus olim ibi littus non constituerat, sed quod sub aquis erat, assurrexit paulatim cumulante limo, & mari depulso, in libertatem se vindicauit. Indicant id marinx conchæ, quę ex mediterraneis Ægypti effodiuntur.

Ad tertium, Fracastorius cap. 9. de Antipat. & alij passim, docent guttas colligi in globos, quia metuunt inimicam siccitatem, seque rotundando, vnicum quasi punctum ferendum ei obiiiciunt. Deinde partes sic plures melius & æqualiter ab aliis adiuantur in agendo: cum extremę omnes pariter recedant à centro. quę enim in angulos excurrunt, minüs opem centralium sentire possunt. Sed tamen mirum est, cur venter guttę vtriusque pendulus, non effluat, eumque sua grauitas non exoneret. Respondet fortè Poëta vetus & amœnissimus in Peruigilio Venetis:

*Gutta præcepit orbe paruo sustinet casus suos.*

Ita est, quia orbis paruus, ideo casum sustinet. hoc est, grauitas ventriculi modicę protuberantis, nõ sat virium habet, vt partium mediarum vnionem rumpat. hinc quò guttula minor, eò rotundior est: & si plenitudinem ei addas, tandem eo vsque inflabis, donec se distrumpat. aquę enim maiusculę non ita se erigunt, vt globentur: tumidior namq; ventris aqualiculus faciliè prolabitur, & viscera ipsi effundit. Itaq; argumentum à guttā ad titulam aquę, nihil concludit: quomodo igitur mare totū hinc corrotundare contendis?

Ad quartum Bodini, infrà de origine fontium respondebimus. Maior quippe maris altitudo fontes in iuga montium non exprimit, aliàs omnium, vnde fontes scaturiunt, montium cavitates oporteret aquis redundare.

Quintum solū ostendit, Deum scopulos, promontoria, montes obieciße fluctibus, qui ventis & tempestate propulsi assiliunt, & terram molliorem, etli altiore, proluerent, aut detererēt paulatim. aliqua tamen etiam maritima sunt sine litoralibus scopulis, vt totum Belgij latus à freto Britannico ad Daniam, & vltra: quod Oceanum æstuariis accipit, aut arcet aggeribus. Nec diffi-

teor, etiam valles multas, & loca quædam humiliora in mediterraneis, superficiem centro terræ propinquiorem habere, quàm mare. Ideo enim Hollandi quandoque Principi suo minantur, ultimarum desperatione, perfossis aggeribus Neptunum dominum accipere, & inscens nauibus, cum aris & focis ad Garamantas & Indos, extra Soliscælique vias, enauigare. Nec planè fallitur antiquus ille Thomas Bricot lib. 2. Meteor. *Recitat Buridanns*, inquit, *se audiuissè à pluribus Scholaribus de Zelandiâ, quòd maxima pars patriæ eorum est multò bassior mari: & ideo oportet continuè artificialiter laborare contra mare ad expensas patriæ, faciendo ripam obstantem mari.* Hinc meritò Belgium *Neder-lands*, & *Pays bas*, appellatum. Paucae tamen regiones tales, & tam suppressæ. & ecce campi Venetorum, & Ferrarienses, & ora Apuliæ, montibus & aggeribus contra Adriam carent, vt testis mihi Scaliger, & tamen inundationum securi sunt.

Sed cur ergo, inquires, nautæ è mari littora se videre depressiora, imò faciliùs in portum relabi, quàm in altum prouehi, affirmant? Conimbricenses, & passim, respondent, littora è longinquo apparere nigriora, quàm vndas maris, virides aut albidas: nigra verò deprimi & recessisse videntur. Sed quid facimus Angliæ littoribus, cretatis & candicanubus, quæ Caleto, per 50. millia passuum, cernimus tam humilia, vt quis iudicet lintea esse suspensa ad sepe? Addendum igitur, distantiam inprimis minuere excelsitatem montium littoralium. deinde tumor maris interiectus vel totos celat, vel eorum partem. Ob similem telluris curuaturam, nubes ventis infra horizontem propulsas, descendere existimamus, cum tamen agantur in circulum. ex propinquo autem litus manifestâ & verâ specie, superficie maris altius est; etsi sæpè non ipsâ nauis: ideoque dicimus descendere, aut exscendere (verbo T. Liviò familiari) in litus è nauis.

Verùm nonne igitur nauis è portu vehens, scandere perpetuò, leni saltem cliuo, per aquæ tumorem videtur? Ita nautæ & ratio Optica affirmant. & sic etiam appareret, licet maris superficies esset complanata. In templorum enim pauimentis, & amœnâ istâ viâ Heuerlensi prope nostrum hoc Louanium, ita à Magno Lipsio prædicatâ, extrema semper planities altior, & paulatim asurgere apparet molli cliuo: quia remotiora altioribus radiis, & cælo vicinioribus, cernuntur. Sic ergo maiori ratione, summum & vltimum punctum aquei tumoris in mari, excelssimum iudicamus:

mus: & cære fortè mare longè à littore recedens vocamus altum. Igitur (instabis) littus quoque eleuatus, & per lineam altiore[m] è longinquo, in oculos se ingeret. Dico futurum verum, nisi terra littoralis & mediterranea acriora sint mari. pars tamen littoris quæ è superficie maris emicat (caussas iam antè dixi) necessar[io] demissiore[m], & magis suppressam habet speciem.

Nauis verò in portu onustior apparet, gressumque difficiliorem molitur in altum: quia aqua circa portus min[us] profunda est, inquit Problem. sect. 23. Aristoteles, ideoque onere oppressa magis cedit: maior autem in alto profunditas pondus facilius sustinet leuatque vt ventis, æstu, remis expeditè hinc illuc agi possit. & ab hac profunditate verosimilius mare illud *alti*, vt & *profundi*, nomen accepit. Impetum ergo primum in aqua vadosa difficulter & morosè initio naus capic; concitato verò & per profundum collecto, celerius in portum refluit. Iam qualitates maris explicemus.

### ARTICVLVS III.

#### *De Salsedine maris.*

**M**Are à salsedine, salum; & ab amarore, mare appellatum putatur: saporem enim ex falso & amaro, vt Aristoteles Problem. sect. 23. notat, permixtum habet. Non omne porrò mare perinde falsum aut amarum est. Haustum Caspij dulcem esse, Alexander Magnus, teste Plinio, prodidit, & M. Varro talem perlatum Pompeio iuxta rem geren[ti] Mithridatico bello: magnitudine ac multitudine haud dubiè influentium amnium victo sale. Ab eadem caus[s]a Pontus Euxinus nitescit, eoque animalia adaquantur, stringiturque gelu: adeò vt anno 756. sub Imperio Copronymi, centum miliarium glacies plaustra tulerit, altitudine (quod p[re]nè incredibile) triginta cubitorum aqua congelatà ad ipsam alvei fundum. Gyllius etiam semel & iterum, dum Byzantij ageret, Bosporum Thracium incrustatum vidit. Id autem dulcedinis signum est; cum salissimum illud mare, sit incongelabile. Oceani tamen vltimi Septentrionalis glaciem, ætate etiam Solstitiali, sex pedum crassitudine, nuper inuenerunt Hollandi. Sed Zonarum frigentium Oceanus minus salis habet, crescitque sensum amaritudo, quò propius ad torridam accedis. deinde immensum illud & pertinax Polorum frigus, in aquam, cogi aliàs contumacem, valere potest.

Sed

Sed de causâ marinæ falsedinis magno dissensu rixantur Philosophi.

Empedocles mare falsum dixit, quia terræ sudor sit. sed licet pro Poëtâ (rem enim Naturæ carmine Græco scripsit, ut Latino Lucretius) id fortè satis sit, inquit Aristoteles, non pro Philosopho, qui metaphoras veritatem infuscantes deuitare debet. reuerà enim mare sudor non est.

Itaque Aristoteles pensiculans animalium vrinæ & sudores, item aquam per cineres aut calcem colatam, spiritu multo feruente & adusto, humori crudo se permiscente, falsugine infici, argumentum ad mare traxit. Item humor operculis adhærescens, per quem sæpè fumus transit, salein respere solet, inquit Meurerus.

Mare igitur falsum est, mente Aristotelis, duabus de causis. Et quia terrestres adustæque exhalationes in ipsum recidunt, seque illi confundunt; & quia Sol summam eius superficiem continuò populans, tenuissimum & dulcissimum in vapores, relicto crassiori & amarulento, extrahit. Vnde Ægyptios olim tam Philosophos  
 Lib. 8. q. 5. fuisse, scribit in Symposi. Plutarchus, ut nocte semper, antequam Sol exoriens leuissimum & optimum vaporaret, aquam è Nilo ad totius diei potum soliti essent haurire. Hinc autem duo sequuntur. Primò, mare autumnò, quando scilicet plurimæ exhalationes in mare recidunt (æstate enim feruidâ absumuntur à Sole, hieme non educuntur) salissimum esse. Secundò, summum aquæ marinæ tergum amarius esse fundo. Primum Aristoteles, & ex eo Plinius, asserit: Lemnius tamen, doctus ille & experiens Zelandus, ab æstate maxime saliri mare dicit. Nec, credo, Aristoteles negaret posse id euenire, quando Sol exhalationes non satis dispergere valeret, vel earum maior adustio copiam autymnialium ampliorem compensat. quò enim halitus torridior, & magis ambustus est, eò falsedinem insigniorem facit. Nam ideo sub torrida mare salius.

De secundo, ingentem video inter expertos etiam (ut videri volunt) rixam. *Pro comperso veroq, habetur*, inquit Exercit. 5. 1. Scaliger, *in fundo maris aquas esse dulces, superficiem non dulcem: quia dulce est in leui, leue autem à Sole absumitur.* asseritque deinde, vrinatores vitreis vasculis aquam è fundo extulisse. Sed vide, ut eludit Patricius. Scaliger, inquit, *vir fuit sanè acutus, sed qui pro Aristotele contra manifestam veritatem etiam peierare lubens sustinuerit.* additque id cum ex Aristotele potius, quàm vllò experimento didicisse. Ipse verò contrariâ experientiâ, mare Creticum in fundo,

pati



pari falfugine cum fuperficie ( demiffio per fummam malaciam vafe,cuius operculum fane in aquis aperiretur) præfente Philippo Mocenico,inueniffe fe tradit. Et profectò fi maris fundus dulcis, cur aliquando fiti emoriuntur in Oceano (vt Tantalus in mediis aquis dulcibus) nautæ? Iam enim modum hauriendi didicimus à Patricio. Deinde,aqua falfa grauior eft , fine dubio, dulci: igitur leges æquilibrij fequitur,defluitque,alterâ fuperfandète. fic enim Aristoteles Problem.fect.25. aquam Ponti fummam dulcem affirmat,falfo fundo. Idem in Afcanio lacu videre licet,& Achilleo, fonte Miletenfî,apud Athonæum lib.2. Salenim ,tefte Bodino, propenfior eft quàm terra, pondusque eius ad ipfam fe habet, vt 106.ad 92. vnde partem aquæ permixtam fale neceffe eft in fundum fubfidere. atque hanc etiam cauflam reddit Aristoteles, cur mare iuxta littora vadofum,minus falſedinis habeat:quia aqua falſa,tamquam grauior , in gurgites & profunditates à littoribus defluit.

Dum hæc ergo aliaque Aristotelis loca expendo, hic videtur eius intimus ſenſus:Summum mare,quia inſolatum & percoctum magis,eſſe falſius, quamdiu aqua illa in ſuperficie manet: verùm grauitate propenſiori,ſtatim eam in fundum delabi; ideoque plurimum ibi futurum ſalis, niſi perpetua maris agitatio omnia fuſum deorſum permifceret. ſicque D.Thomam in 2.d.14.q.2. ar. 1. interpretor,vbi diſertè mari aſſerit dulcedinem in fundo. Et profectò confeſſa eſt ſatis potentia Solis in gignendo ſale, inſuſo in ſalinas mari,aquaque in eum excoctâ duratâque,vt in Africâ,Hiſpaniâ,Galliâ,ſætitari ſolet. Burdigalenses verò & Burgundi fontes falſos igne ad ſalem perducunt. & de vicinis noſtris lib. 13. Annal. Tacitus, *Indulgentiâ numinum*, inquit, *illo in anne* ( Hermunduros Cartosque interfluente) *illisque filius ſalem provenire, non ut alias apud gentes eluue maris aſcente undâ, ſed ſuper ardentem arborum ſtrum ſuſâ, contrariis inter ſe elementis, igne atque aquis con-*  
*cretum.*

Sol igitur terga maris inurens, ſalire etiam ipſa poteſt. Sed quam materiam incoquit? non enim ſimplicem aquam coagulare in ſalem valet. Terreſtrem exhalationem, putat Ariſtoteles. ſed vnde illa in mare venit? certè enim Solis radius ad fundum maris non penetrat,vt inde per mediam aquæ profunditatem in ſuperficiem, eam extrahat. Itaque ex inſularum terreno, lociſque mediterraneis educi oportet, ac deinde frigore aëris redenſatam deſluere

molliter, aut cum impetu & vento præcipitari in mare. Verùm sic non nisi post multorum annorum tempus potuit mare saliri, cùm tamen plurimi piscium marinorum durare non valeant extra falsam.

Dico igitur Primò: Tertiò Mundi die, cùm Deus aridam nudauit, mareque alueo suo infudit, addita ei falsedo, ad piscium vitam, & contra aquæ aliàs stagnantis, putredinem. factum autem id mixturâ infinitarum prænè exhalationum, quas Deus è terrâ, alumine, nitro, bitumine, subitò eliciuit, & in aquas sparsit. Probatur: quia veluti nudatio terræ animantibus terrestribus; ita illud Salaciæ debebatur, & filiis eius, marinis piscibus, quibus vita inuita, aut nulla est, extra salem.

Dico Secundò: Exhalationes quas Sol è terrestribus resoluit, sufficere non videntur ad conseruandam tam diu, & in pari semper gradu, contra tot fluuiorum diluentium incursum, vaporumque repluentium infusionem, maris falsedinem. Probatur; quia magnam partem dulcium vaporum, qui eo extrahuntur, recipit, & plurimas exhalationes tam calefactione Solis, quàm exoneratione aquarum & fundi sui falsissimi in apertas & hiantes venas, quæ emulgent ipsum & educunt in subterraneam abyssum, amittit. exhalationes verò aliæ, quæ cum ventis aut aliter in ipsum relabuntur, non videntur esse copiosæ, cùm terra maiorem earum partem recipiat: deinde, quod caput est, ventosæ exhalationes nõ sunt tam aduixæ, quàm cineres, quibus comparari solent, vt tam insigniter inficere aquas marinas valeant. cur enim aliàs tot perennes lacus, quos pro magnitudine suâ & proportionem, tot quot in mare, venti & halitus incidunt, falsedinem non sentirent? cur Oceanus Septentrionalis medio anno quo nox ei perpetua incubat, perseuerat in sapore, cùm tot niues & flumina in ipsum liquecant, frigeantque tam longâ Solis absentia terrestres omnes exhalationes? Dices, quia flumina incurrentia sale suo vincit, tamquam fortior, non vincitur. Bellè enim Seneca lib. de Prouidentia cap. 2. *Quemadmodum tot amnes, tantum supernè deiectionum inbrium, tanta medicamentorum vis fontium, non mutant saporem maris, nec remittunt quidem: ita aduersarum impetus rerum viri fortis non vertit. animus. Manet in statu; & quidquid enenit, in suum colorem trahit.* Magnificè hæc quidem: sed falsum vtrumque, & de Sapiente, & de mari. Nullus enim, ne ipse quidem Zeno, tam firmus & defixus, quem incurrentia mala non inclinent; & si non euertant, conturbant tamē

men statum. veluti meracissimum etiam vinum diluunt tandem & castrant sæpius infusæ lymphæ: ita tam abundi & vndique influentes in mare amnes, saporem eius remittent, nisi largiter aliunde dispendium sarcitur. Licet etenim salugo euincat dulcedinem; non tamen sine pugnâ, in quâ vulnus etiam accipit & detrimentum. Sic etiam calor in nobis naturalis alimentum domat & conficit; sed ita vt hebetetur etiam ipse paulatim, & debilitetur in senectutem..

Quidam ergo cernentes, exhalationes supernè in mare relabentes non satis falsamenti habere, ad flumina recurrunt; dicuntque, limum mari inuectum, partem falsedinis facere. Sed frustra. si enim limus saliret, lutum etiam apud nos esset falsum. aliud foret, si fundum aut ripas falsas flumina abluerent; quod pleraque non faciunt. nam aliàs ipsi salem etiam resipere.

Hoc etiam meritò Aristotelem turbare potest: quòd exhalationes è terrâ eleuatæ, & vaporibus nubium confusæ, aut per eos in supremam regionem se transcribantes, pluuias, niues, aut grandines nullâ falsedine inficiant. Rarissimum enim est, & in miraculis à Plinio positum, *Ter accidisse in Bosphoro, vt imbres falsi deciderent, necarentq. frumenta: toties & Nilirigua pluuias amara fecisse, magnâ pestilentia Aegypti.* Neque hilum proficit Scaliger: *A nimbibus, inquit, subsalsas aquas aliquando fuisse demissas, non solum auditione accepimus, sed etiam tum lectione, tum sensus captu compertum habemus.* Id enim insolens; cum numquam non tamen terreni halitus nubibus permisceantur: & id hæud dubiè, non simplicis terræ, sed sulphuræ, aluminosæ, aut bituminosæ, exhalationis miscellâ factum: quod etiam Scaliger non diffitetur. Si igitur ordinariæ exhalationes, quæ in vapore nubium extinguuntur, & deinde in mare recidunt, imbres passim non tingunt vllò sapore; vix scio, quomodo tantum in marinas aquas valeant.

Dico ergo Tertid: Aut sub maris fundo fontes vel montes falsi sunt, vt lib. 2. Subtil. credit Cardanus; aut (quod magis censeo) ignes in sulphure, nitro, alumine, bitumine ibi ardentes (quos ex insulis flammiumis, & aliter Lib. 1. & 4. asseruimus) hunc saporem, ex falso & amarulento mixtum, concinnant. halitus enim per mare transpirant, qui in ipso extincti amaro perfundunt. Probat, quia mare in falsedine suâ retineri, ad finem Mundi, debuit: nulla verò alia causa certior & plenior potest assignari. Deinde, fontes, & lacus salii, similem falsedinis causam habent. vt v.g. Ma-

Lib. 3.  
cap. 4.

Exerc. 31.

re mortuum, quod Scriptura sacra Numer. 34. Iosue 12. & 15. vocat falsissimum, à bitumine ibi copiosissimo saporem illum contrahit; veluti etiam densitatem, similem & maiorem marinâ, quâ pleraque iniecta sustentat, & in superficiem expuit. Galenus enim affirmat, aquam lacus Asphalti, seu Mortui maris, tantò, ob inculcatam copiam bituminis, marinâ vulgari spissiore esse, quantò hæc superat fluuialem. Et licet flos bituminis supernatet, non tamen grauior eius & limosa pars, vt docet experientissimus Agricola. nam aliàs aquæ Asphalti circa fundum densitatem tam concretam non haberent. Deinde, alumen & nitrum merguntur, non natant. hæc autem sub mari & in gurgitibus esse videntur, saporemque suum vnâ cum bitumine aquis marinis vulgant. Nam nitrum adeò subsalsum est, vt Egyptij, qui Nilum in nitrarias immissum Sole in nitrum decoquunt, eo vice salis vtantur. Aqua deinde marina pinguis & viscida est, mixturamque bituminis palam refert: vti etiam pleraque purgamenta maris, vt halcyonium & succinum, quod Agricola ostendit ex candido bitumine concreuisse.

In summâ igitur statuamus, bitumen, nitrum, alumen mari subesse. & hinc etiam causam promanens tam varix colorationis aquarum. Oceanus enim Flandricus subuירidis, Hispanicus cæruleus, & paulò vtrâ subrufus est. bitumen autem, omnis præne coloris reperitur.

Sed in quo præcisè subiecto ponimus falsedinem? In ipso halitu maximè, aquis confuso & humectato. sapor enim ex mixturâ calidi, humidi, & sicci resultat, in harum qualitatum subiecto. Iam verò aqua non tam illas qualitates habet, quàm ipsa exhalatio. Hinc lana è naui in mare dependens, exclusâ densiori & falsâ exhalatione, dulcem & sincerum succum bibit, exque eâ ad potum exprimitur. Similiter per tenues vasis cerei meatus aqua potui idonea transsudat, non secuto, per angustias nimis arctas & conniuentes, sale. substantia tamen etiam aquæ, etsi remissiùs, simili sapore tingitur. recipit enim ab exhalatione, & à se partim, talem primarum qualitatum temperiem, vnde resultat illa amaritudo. temperies tamen citò euanesceat absente exhalatione, & vnâ sapor.

Verùm danda iam aliqua ratio, quæ non in expedito videtur, cur æstate & sub Torridâ mare salius, si salsura è fundo venit. Dic, Solem aliquid etiam calore suo huc asferre, tergoque maris biruminosos spiritus aliosque incoquendo, falsedinem intendere. hoc enim,

enim, vt minimùm, vincunt, quæ antè produximus pro Aristotele. Arenim contineretur etiam formaliter, vt loquimur, sal in marinâ? Ita putat Bodinus: quia Sole vaporante leuissimam eius partem, in salinis sal reliquum manet. Sed facile defendi potest, materiam solam salis in marinâ esse, & inde ipsam, tam cocturâ Solis, quàm suppositi fundo ignis, conformari. Materia ista, spiritus ardenti bitumine, nitro, alumine, & id genus, exhalantes sunt, & aquâ commixti. Cadauera etiam piscium infinita, aut eorum excrementa, aliquid (vel fallor) in salitram conferunt.

## ARTICVLVS IV.

*Cetera aquæ marine qualitates, & effectus.*

**M**Are pinguem à bitumine, aliisque succis, ac densam habet liquam. vnde ardet quodammodo in igne, minusque extinguendis incendiis idonea est, inquit Aristoteles. Illustre nuper huius rei exemplum legere memini in Dione; dum in famosâ lib. 10. lâ pugnâ nauali Adriacâ, milites Antoniani situlis paruis, & vt in trepidatione, semiplenis, ignem nauium à Cæsarianis iniectum, marinâ restinguere conantur: magis enim flammabant, & pabulo hoc irritabant incendium. Docet idem Plinius, marinas aquas Lib. 1. tardius gelari, celerius accendi. Cur verò tam contumaciter mare cap. 103. congelascat, non est promptum dicere. Mouit hanc quæstionem apud Agell. lib. 17. cap. 8. Noct. Taurus Philosophus, sed non dissoluit. Fortè, quia bituminis & alij calorigici spiritus è fundo per mare diffusi, hieme magis feruent, & in eo, ab antiperistasi frigoris superioris aëris, continentur. Aristoteles enim, Plinius, & experientia affirmât, mare hiberno tempore, quàm æstiuo, magis effervesce. Vel certè, vim occultam glaciationi (vt acetum, quod maximè frigidum est, & tamen incongelabile) resistentem habet.

Densitatem marinæ probant onera nauium, quæ maiora & facilius à mari sustentantur, nec immerguntur tam altè. Hinc nauis quæ sine periculo enauigauit mare, in flumine succumbit, aliquando & submergitur. De densitate maris Adriatici iuxta Venetias, lib. 2. de Ortu subter. Agricola. *Cum essem Venetijs, inquit, fortè scapha in triremem impexit, & Monachum excussit. mare, quia mistum, vt cetera salsa, hominem non recepit, sed eousque fluitauit, dum proximâ scaphâ exciperetur.*

Scribit etiam Volaterranus, Hieronymum, Florentinum quem-

dani decoctorem, à creditore, colligatis manibus, ex Antiatum turri in mare præcipitatum, & totâ nocte aquis sustentatum manè in littus euasisse: ac deinde contra creditorem facti habuisse quæstionem.

Siautem marina densior est fontanâ ac fluminali, grauiorem etiam esse necesse est: grauitas enim, densitatis est perpetua comes.

Sed mirum est, quomodo corpus tot diuersissimarum rerum miscelâ corruptum, tam claram & digestam seruet perspicuitatem. ad maximam enim profunditatem sæpè sese in oculos effert fundus maris, decipitque ignatos natantes, dum ob refractionem, superficiei valdè admotum credunt. sed se immergentes vt aliquid ex fundo rapiant, mirantur tantam altitudinem esse, cogunturque non raro reuerti, quia animam tam diu continere, donec eum attingant, non possunt. Ob hanc densitatem & vnâ tralucentem perspicuitatem, pulchrè Poëtæ mare, vitreum marmor appellant. Et Bodinus lib. 2. Theat. Cùm procul à littore, inquit, nauigamus, nauis videtur vitreum lapidem fulcare. Curtius etiam lib. 3. vitreas vndas Maris repræsentans, *Color eius, ait, placido mari similis*. Et hinc ecce nouum argumentum mihi succurrit, vt credam, non ab exhalationibus terrestribus adustis, limosis & opacis, existere eius falsedinem; sed à bituminosis & nitrosis, probè digestis, qualibus etiam glaciatur & coalescit succinum.

Mireris etiam, aquam marinam in vase seruata adedò citò putrescere, cùm mare totum non sentiat putredinem. Argenterius in Artem Galeni c. 89. id refert in continuam agitationem, quâ se purgat ab excrementis; vt proinde aër & spiritus inclusus facilem inueniat exitum. halitus etiam semper recentes & noui è fundo suspirantes multùm arcere valent putredinem.

Aërem porò marinum, & inde Belgicum totum, maximè insalubrem & noxum lib. 17. c. 96. de Variet. existimat Cardanus. Vbi enim se per Belgium peregrinatum dixit, & vidisse mœnibus ædibusque formosissimas Brugas; fluminibus, hortis, spatio viarum, ceteroque omni cultu speciosissimum Gandauum; famosum studijs, amœnumque hortis & rure nostrum Louanium; patriam Vesalijsui, situ ædibusque iucundam Bruxellam; platearum amplitudine munditieque ac ædificiorum elegantia hilarem Mechliniam; & super omnia, miraculum Orbis, *in quo, quidquid opum, inquit, vterque mundus ultra citraque, æquinoctialem habet, Antuerpiam: tamen omnibus his in ciuitatibus, ait, tria cùm sint san-*  
sum



tum elementa, omnia desunt. propinquitates enim maris, & montium distantia facit, ut nullibi gentium aqua sis deterior: aer insalubris, ratione satis aperta, cum dulcibus aquis salsa immisceantur: locus vero humilis & Occidenti expositus: calum quoque frigidum atque nubilosum: terra cœnum, neque enim aliter tot alendis hominibus sufficeret. Terra quod minus nullum deesse possit elementum non facit: cum mare eâ in parte supra illam tantum extollatur, ut nisi per aggeres, quin efflueret, obstaretur, iam tota sub undis perisset. Quod rerum deuenimus miseri Belgæ, qui etiam extra elementa iam viuimus? Terra nostra, non terra, sed cœnum; aqua, non aqua, sed muria & falsamentum; aer, non aer, sed nebula & vapor; ignis, minime ignis, sed glacies & frigus merum. hoc enim, credo, elementum est, quod palam deesse nobis affirmat. Verum nescio quid aurum nostrorum tuo hinc videris Cardane; certe hoc solum nostrum tale iam est, in quo Germani, Poloni, Galli, Hispani, & Itali etiam tui salubritatem & delicias inueniunt. Terra à se & industriâ colonorum tam ferax, ut grauissimas bellorum ciuiliū impensas diutius tolerauerit, quàm vlla Gallia, vlla possit Italia. Reticulum est de aquis: omnium nationum deterrimas esse. non vidit, credo, tot fontibus irriguam Bruxellam; non Spadanos, & toto illo Ducatu Limburgensi, vbique ferè rupium colliumque emicantes, saluberrimi haustus, quod etiam ex Italiâ & omni ferè Europâ affluunt, latices. Verum tamen est, communem aquam duriorē, nec aded Sole percoctam, ut in Italiâ: sed ideo nec crudam bibimus, sed ignibus remollitam in cereuisiam. De aëre etiam non valde conquerimur. hieme asperior, quàm in Italiâ est, sed æstate longè tolerantior. circa littora Oceani solum pronus (& id tantum nobis mediterraneis, & inasuetis) in noxam. nam vapore multo crassescit, & etiam aspergine salis inficitur. nam, ut Lucretius,

Lib. 6.

*Denique in os falsi venit humor sæpè saporis,*

*Cum mare versamur propter.*

De igne nostro; ad soles æstiuos, siluas, cef pites, & carbones Montenses, Leodienfes, appello. Sed mittamus Cardanum.

Inter effectus maris, insignis est illa nausea, quâ insolentes nauigationis vomunt, & in ventriculum demissa remetiuntur. Id autem partim à marino halitu tepente venit (vnde etiam aqua tepida hausta, pronocat vomitum) partim agitatione: & hinc omnes etiam nautæ, in magnâ & iactabundâ tempestate stomachum

NON



non continent. Bodinus tamen tam durum se fuisse scribit, vt nihil vmquam se mouerit, etiamsi septies in Oceano, & medijs turbinibus, vbi alij sanguinem etiam vomebant, nauigauerit. credo, cum in Angliam procatum, pro Principe suo, Hercule, Duce Alençonio, ad Reginam Elizabetham itabat, quando pro Bodino solebat eum Regina Magistrum Ioannem Badinum appellare. Iactationem etiam ad vomitum conferre inde potest ostendi: quodd debiliores ventriculi, agitatione etiam currus, non raro se exonerent.

Ob halicuum etiam marinorum calorem siccitatemque euenit, inquit Aristoteles, vt in mari nauigantes edaciores fiant. tam enim vomitu, quam propria illa sua qualitate, cibi appetentiam exacuunt.

Aqua marina contra morsum rabidi canis, ait Lempius, bibitur. item, ad purganda corpora, bilemque atram, aut sanguinem concretum, ab alterutra parte reddendum, vt lib. 3. c. 6. docet Plinius. quidam etiam in quartanis dederunt. Vt autem sine iniuria stomachi sumi possit, asseruari, donec vetustate deponat virus, præcipiunt. Aliqui tepesactam clysteribus infundunt, torminaque & choleram sic sedant. Difficilius etiam refrigescunt marina calefacti. lendes & tetra capitis animalia, pecorumque scabies, hac curantur, liuentia ad colorem reducuntur, ferroque celerimè rubigo exteritur. Et ne tam amplo & salutari remedio mediterranea destituerentur, inuenta est ratio, ait Plin. lib. 3. c. 6. quâ sibi quisque aquam maris faceret. Sextarius enim salis cum quatuor aquæ sextariis, salissimi maris vim & naturam implet. Scio etiam, qui in periculo & accessione pestis, huius marinæ artificialis haustu malum depulerint. Inter effectus etiam maris, halcyoneum, è spumis, aut lanugine quadam marinâ concretum, item absinthium, quod aliqui seriphium vocant, aliaque infinita eius excrementa, numerari debent.

Mari etiam passim tribuitur vis quædam se purgandi, quâ cadauera & res naufragas in litus eructat. hinc Exodi 14. Israelitz statim à submersione Ægyptiorum, cadauera eorum viderunt in litore maris Rubri. An autem in mari virtus expultrix sit, vt in magnete quodam qui ferrum non trahit, sed respuit, dubitari potest. Non videtur tamen: quia sine vlllo discrimine omnia non nimis grauia, vt tabulas etiam nauium, & merces demersas, expuit. Æstus igitur tantum, fluctusque, naufraga versando propulsandoque,

doque, tandem ad litus appellit, ibique destituit: quia maiori impetu vnda in litus venit, quàm redeat; ideoque sæpè reuhere non valet quod deposuit. hinc etiam altissimo mari, longissime-que à littoribus, depressa reuomi non faciliè quisquam videt. Eadem est causa, cur flumen aut mare exundans littora & vicina oblimet: quia, inquam, impetu limum eructat, quem refluxus imbecillior ablueret, & reducere in alueum non potest. Ventus enim, aut vis alia externa valida & vincens renisum grauitatis, fluctum exspertgit, ac superfundit; qui deinde solo & spontaneo grauitatis relapsu, aut resoltu à littore, qui icu directo tardior semper & fractior esse solet, redit.

Mare denique herbas innatantes, exhalatione aquis temperatâ, alicubi alit, vagâ ac fluctuante, nec vilo fundo conceptâ radice. A qualitatibus maris, pedem amolior ad eius motus. Varij sunt, sed primò

## ARTICVLVS V.

### *De motu æquationis maris.*

**M**aris motus, alius spontaneus & à naturâ est, alius à vi externâ impellente, aut trahente. A naturâ est motus deorsum, quo propriâ grauitate ad loca humihora & viciniore centro defluit. talis est motus, quo secundùm Aristotelem & omnes præ- ne etiam recentiores (præter vnum Valesium, c. 50. Philosophiæ sacræ) mare prono alueo à Septentrione ad Meridiem delabitur: vocaturque hic motus, æquationis; quia eo fine fit, vt superficies aquæ vndique coæquetur, & pari interuallo distet à centro grauitatis.

Motus ab externo mouente tres solent enumerari. Motus raptus ab Ortũ in Occasum, libratio à littore vno in aduersum litus, & æstus, siue reciprocatio illa quotidiana, congruens periodis Lunæ. Fluctuatio enim quâ hæc illæ ventis sine lege impellitur, insuper haberi & negligi solet.

De æquatione etiam, est lis & controuersia. Valesius putat, mare non defluere in Austrum; sed ideo pronius in illam partem à Septentrione nauigari, quia venti Boreales, frigidi & densi, facilius in aërem feruidum & tenuem Zonæ torridæ inclinant, illacque effluunt, quàm Austri aëra Septentrionis spissum & resistentem perterebrent. Hinc ergo fiet, vt naues è Flandriâ secundo

Hh maris

maris defluxu in Hispanias delabi videantur, quia Boream frequentius à puppi adspirantem habent.

Sed non longè euadit Valesius, reprehendi statim potest, & trahi in mediam difficultatem. Nam non tantum secundo statu, sed etiam aduerso, mare in Meridiem inclinat, ætusque in illam partem faciliores sunt & concitiores. Ratio est, quia fundus maris in Septemtrione alior est, ut ego Aristotelem lib. 2. Meteor. cap. 3. interpretor, quidquid Vicomercatus renitatur. Strato enim apud Strabonem lib. 1. & alij testantur, plurimum arenæ in Mæotim & Pontum Euxinum à fluminibus inuehi: ideoque fundum vadosum, nec aquam capere quæ influit, sed deorsum in Propontidem & Ægæum refundere. Hinc Aristoteles Mediterraneum affirmat profundius Ægæo & Ponto; imò Oceano, qui extra Herculis columnas, quasi limus per fretum Herculeum ei inuectus fundum eius eleuet, gurgitesque omnes repleat. Verum tamen res non ita habet. Oceanus enim Atlanticus, & circa insulas Flandricas, altissimus, ac fundi plurisariam inexplorati est. Incertum etiam est, quod Strato contendit: Mæotim fluminibus tumentem effregisse Bosphorum Cimmerium, & miscuisse se Ponto: Pontum deinde, viâ vi etiam factâ, per Bosphorum Thracicum in Propontidem, ac tandem effractis Helleponti angustijs, Ægæum irrupisse. Lapidei enim illi, & rupibus incisi canales, satis affirmant, se artifice Dei manu, & cum Mundo ipso factos esse. uti & de freto Herculeo verisimile. nec enim auscultandû Eratostheni, qui Troiano bello Hispaniam ab Africâ diuisam fuisse negat: cum antè Hercules illac ad Hesperidum, in Oceano Atlantico, insulas enauigauerit; & probabile sit, Menelaum longâ illâ octo annorum peregrinatione,eductâ Mediterraneo in Oceanum classem, Africam circumnavigasse.

Credunt autem quidam, fundum maris Septemtrionalem, fluminum se inuehentium limo & arenis attolli. Scribit enim Polybius, ab hac causâ in Mæoti suo tempore septem solas aquæ vlnas superfuisse. Sed causâ dubia est; quia Petrus Gyllius, diligens litorum illorum inspector & scriptor, eandem hodie profunditatem perseverare ait. nisi affirmemus, arenas, quas flumina exonerant, in Euxinum & Propontidem defluere.

Si autem nolis fundum Septemtrionis pauldè elatiorem, & elementi deuexitate in Meridiem & Zonam torridam declinare causâ defluxûs in Meridiem erit multitudo fluminum, & nivium,

ceterarumque aquarum, quę vberius in Zonis frigidis pro ueniunt coactę rigore cęli. Addunt aliqui, Solem sub Torridā Oceanum sic depopulari, vt lacunam in eo faciat, aquis ab utroque Polo defluentibus supplendam, vt æqualiter centro Mundi circumfundatur superficies maris.

Admiracionem etiam meretur, quod in Enchirid. lib. 4. cap. 8. narrat Bartholinus Philosophus & Medicus Danus, mare Balthicum, cui Oceanus inter Daniam & Noruegiam se infundit, non solum à Septentrione in Austrum, sed vice versā aliquando ab Austro in Septentrionem defluere vnde nautę nostrates, inquit, tempus vnum *Norden vasser*, alterum *Suden vasser* appellant. Id autem fieri ideo existimat, quia nunc Oceanus à Septentrione in Meridiem, fluminibus Noruegię, Fintharchię, Islandię, Gronlandię, &c. maximis & rapidissimis incitatus, Balthicum influit, nunc contrā Balthicum infinitis à Germaniā, Liuoniā, Lithuaniam, Osiā, Churlandiā, Finlandiā, &c. aquis auctum & intumescens, postquam aliquamdiu in æquilibrio, sustentato Oceani fluxu, dubium pependit, tandem se superfundit, & totā mole victor Oceanum in alueum suum retrō agit. Quo tempore etiam necesse est, totum Oceanum Deucalionem, & Flandricum (etsi in tantā vastitate id fortē non sentiatur) paullo incitatus delabi in Meridiem. Aquę enim Balthicę Oceano confusę, molem exaggerant, quam succumbere oportet & defluere à Septentrione.

Itaque hic vides, non tantum à Maxotide in Mediterraneum mare à Septentrione deuolui, sed etiam Oceanum Deucalionem abire simili motu in Torridam: caussamque vnā eandemque præcipuam esse, incurfus fluminum à Septentrione, alueique ab eo Mundi axe deuexitatem. hanc enim etiam inter caussas retulit Bartholinus illarum Regionum incolę: ridetque Telesium, qui odio Aristotelis affirmat, *Terram Borealem nusquam excelsam, nullā distinctam montibus, vniuersamque humillimam.*

## ARTICVLVS VI.

### *De Libratione, & raptu maris.*

**L**ibrationem vocant motum, quo mare perpetuò à littore vno in oppositum alternis vacillat. Est ergo velut oscillatio quædam, similis ferè illi, quā lances æquo pondere se atollunt deprimuntque. Causa eius, incurrentia vtriusque flumina sunt, venti,

& repulſus ab vno littore in aduerſum. vnde tantum in fretis & anguſtiis hæc libratioprehenditur. Omnes etiam qui in inſulis & maritimis habitant, fatentur, in ſummâ etiam malaciâ, nulloque vel tenuiſſimo ſtatu, mare tamen perpetuò noctu diuque aſſilire & flagellare littora. Cauſſa non videtur in promptu. An fortasſe, quia vnâ parte maris motâ, ceteras omnes, etiam in longinquo, vibrari & ſollicitari neceſſe eſt? Ita enim docet Philoſophus Problem. ſect. 23. Non enim eſt aqua ſimilis aëri, qui miniſimo ferè impulſu contrahi & denſari poteſt: ipſa enim quia craſſior & denſior, magis etiam contumax, vnde pars vna fluctu impulſa, aliam deinde loco ſummouet, & hæc iterum conſequentem, & ita catenatim: vt vnâ parte baculi motâ & cedente loco, alteram etiam exire eſt neceſſe. Itaque motus in diſſito, & vbi venti aliquid turbarum cient, procul inde & in tranquillum reſerri ac peruenire poteſt, niſi motus alius ei veniat obuiam, qui hebetet aut repellat in contrarium.

De motu rapius ab Ortum in Occaſum, licet Card. Contarenus, & plerique eum fortiter aſſerant, eſt tamen quod dubitem, ſiquidem de Oceani motu ſit queſtio. Nam palam eſt, Mediterraneum ab Ortum verſus Fretum Herculeum in Occaſum ferri. Colligunt id nautæ celeriori navigatione. Ocyus enim, ſecundo & æquæ valente ſtatu, Alexandriâ in Hiſpaniam reditur, quàm ex Hiſpaniâ eò nauigetur. Cauſſa eſt continuus, & inſtar flumine agminis, Maxotidis, Euxini, Propontidis, in Ægæum & Mediterraneum deſluxus, vt Gyllius teſtis oculatus ſcribit. moles igitur iſta aquarum in littora Africæ decumbit, & inde repulſa, quia directâ ſuſum & aduerſus fluxum redire non valet, oblique verſus Adriaticum, Siciliam, Sardiniam, Italiam, Gallias, & Hiſpanias ſe in Occaſum retorquet. Vnde etiam neceſſe fuit dari mari Mediterraneo exitum in Oceanum per Herculei anguſtias, ne aquæ à Septemtrione aſſuentes, Africam, aut Europæ littus ſubmergerent. Pars tamen aquarum freto non euoluitur, ſed à littoribus Hiſpaniæ, iterum ad Africam reſleſtitur: atque ita magna Mediterranei pars quaſi circulatim ab Ortum per Septemtrionem in Occaſum, & deinde in Meridiem contorquetur. ſimilemque in Adriaticum eſt cernere: aſcendit enim per littora Illyrici & Dalmatiæ Venetias uſque, ac deinde in Italiam recumbit, & ſecundum Apuliæ littora reſluit in Ortum.

Simili motu credunt plurimi, Oceanum Indicum raptaſi continud

tinuò ab Ortu ad Occasum: putantque raptu primi mobilis id fieri. ideo etiam motum raptus appellauit. Sed vnde hic motus intelligitur? Quia, inquiunt, ex Hispaniâ in Occidentem & Americam nauigantes, intra singularem mensem cursum absolunt, cum tribus aut quatuor, contra renisum aquarum, vix redire valeant. Sic Lusitani, superato Bonæ spei Promontorio, difficulter & morose in Moluccas & Ortum eluctantur, cum tamen facili & præcipiti lapsu reuertantur in Occidentem. Vnde Exercit. 52. Scaliger, *Sub octauo parallelo, inquit, Australi iacet insula Maidegascar, cum ingens, tum opulenta. ad quam 20. diebus circiter ex Moabar Indie perueniunt mercatores: atque ij aquali ventorum vi reditum comparare nequeunt celeriore, quam qui, tribus mensibus perficiatur.* Igitur Oceanus ab Ortu in Occasum, in Zonâ torridâ vltque ad Tropicos, vbi raptus primi mobilis est concirator, circuire terram cum cælo videtur.

Verum neque effectum admitto, neque si faciam, placet talis causa. cælum enim tantam aquarum molem permouere non potest, licet totum aërem à Luna ad superficiem maris raptaret secum in orbem. mollis enim & fluxus aër aquarum superficiem molli & lubrico lapsu destringeret, non et inijceret manus, & traheret in sequelam. Adde iam, raptum primi mobilis non peruenire (quod Lib. 1. ostendimus) ad nubes & mediam aëris regionem. Itaque ad influentiam occultam cæli aut siderum Torridæ impendentium, quæ Oceanum proximè, non sollicitato aëre intermedio, in orbem deducat, id est, ad nugas, erit recurrendum. Tolerabile namque id esset, si aliqua certa cæli pars, aut stella ducentem se illi motui præberet; veluti Luna manifestè ætus gubernat. Sed nihil simile apparet. Igitur vel totum cæli inter duos Tropicos spatium, influentiam istam possidet, vel ipsa in cerebro tantum imaginantium est; quod existimamus.

Sed nec etiam Oceani perpetuum ab Ortu in Occasum sub Torridâ, aut alibi, fluxum damus. facilius enim ab Ortu quam Occasu nauigationis causa, non est, quam Columbus & primi illi Indiarum repertoires confirmarunt, Oceani in Occidentem raptus; sed Subsolanorum ibi toto anno molles & vix vmqûa interpolati flatus. Hoc enim à posterioribus nautis, curæ huius & veritatis diligentioribus, didicimus. idem disertè affirmat Ios. Acosta lib. 3. Histor. Indic. colligoque manifestè ex Diario nautico Hollandorum, nauigationis in lauas & Orientem anno 1595.

Hinc igitur classis Indica, cum ex Hispanijs in Americam navigat, rectissimo cursu ad Insulas Canarias siue Fortunatas, ut brevissimâ lineâ Tropicum Canceri & Torridam intret, contendit: quia statim in limine excipiunt eam ab Ortu adspirantes Subsolani, qui continuo & lenissimo flatu in Occasum & Americam exhibitant. Unde ab eâ re vastissimum illud Oceani inter Canarias & Insulam S. Dominici æquor, à placiditate *Golfo de las Damas*, *Mare Domicellarum*, appellantur. Cum verò eadem classis repetit Hispaniam, viam inquit planè contrariam. nam quamdiu potest, in Occidentem versus Nouam Hispaniam, ut tantisper saltem fruatur beneficio Subsolanorum, vela obliquat, exitque demum Torridam & Tropicum Canceri iuxta Hauaiam. Ibi statim à 27. gradu elevationis Poli ad 37. regnant & afflant ab Occasu Fauonii, qui vela in Hispaniam implent. circa verò quadragesimum elevationis gradum, omnes venti suis vicibus spirant, tantâ inconstantia in mari, quàm in terrâ, ut docet lib. 3. c. 7. Histor. Indic. Iosephus Acosta.

Verùm quæ causâ esse potest, quæ Subsolanos in Oceano intra Torridam adedò pertinaces facit? Iosephus Acosta credit flatum istos non exhalationes ventosas, sed aërem infimæ regionis raptu cæli circumuectatum. Probari potest, quia natura ventorum instabilis est, nec tam diu (saltem non circa totum annum) contumax in eandem partem. Deinde, Auctor idem narrat, in locis mediterraneis Torridæ variare flatum, nec eandem esse Subsolanorum constantiam, quæ est in mari. quod accidit, inquit, propter montes, quibus aër infimæ regionis circumactus occurrit, repellitur enim ab ijs versus Ortum, aut hæc illæc dispergitur: quod in patenti Oceano non vsu venit, ubi montes nulli.

Assentiri tamen nequeo, raptum cæli ad terram vsque peruenire. Aër enim infimæ regionis, etiam extra Tropicos, etiam paultò fortasse segnius, sentiret hunc motum: nubesque (nullo saltem insigni vento flante) semper raptu illo agi cerneremus in Occasum. Deinde, cum eorum confessione, similes auræ tenuis & molliter adspirantis sint Subsolani Torridæ; causâ inuestiganda erit, cur exhalationibus ventosis non aliquando retrò in Ortum agantur, cum tam facili obnifu vinci & repelli possint. In cuius inuentione perinde erit laborandum, atque in reperiendâ aliâ causâ, diuersâ à cælesti motu, quæ Subsolanorum exhalationes tantâ pertinaciâ effundat ab Ortu.

Itaque



Itaque Subfolani isti, legitimi venti, non aër infimæ regionis actus in orbem, sunt. Causa eorum obscura est, eiusque inuentio à situ & qualitate earum Regionum pendet. veluti etiam causa Fauoniorum, qui toto serè etiam anno ( etsi paullò frequentius, quàm Subfolani Torridæ, interpellentur ) à 27. eleuationis Poli gradu ad 37. perflant. Vt tamen aliquid etiam dicam, antequam tu vel ego abeamus, ad scientiam locorum & causæ, tam longè extra Europam peregrinatum, venit in mètem rationis quam Problem. sect. 26. reddit Aristoteles, cur Subfolani subauroram & manè soleant adspirare. Quia videlicet aërem infimum nocturno rore grauidum primis radijs rarefacere, & ante se extimulare versus Occasum consuevit. Deinde, terra etiam rorida, & recenti Sole ista, vaporem & exhalationem mixtim in altum respirat, quæ in mediâ regione statim refrigerens, in ventos versus Occidentem defluit, quia aër infimæ regionis ante Solem fugiens, in illam etiam partem, dubiam & pendulam exhalationem deducit.

Eandem causam solennibus illis Torridæ Subfolanis reddamus. Inprimis enim, quia noctes ibi pares toto anno aut supares diebus, largissimo rore diffluunt, vt inter omnes Scriptores constat. nam sâ longum tempus, quo refrigerant reciduntque, habent; plurimamque eorum materiam è terrâ marique Sol diurnus tam præsentî potenti que radio elicit. Igitur manè aër in Occidentem, Solis rarefactione susus, teneros & rorantes Subfolanos, exhalatione & rore, terræ aut aëri circa terram & mare incubanti, natos, & ex alto resistentes, in Occasum secum deflectit, & abducit. Deinde, flatus in eandem partem, toto die continuantur, circumducunturque quodammodò à Sole ab Ortu ad Occasum, quia vna exhalatio alteri præit, eamque ducit. Sol præterea aërem versus Occidentem rarefaciendo pergit, facitque maximâ dissolutione, quâ cum continuò laxat, vt faciliorem & magis præcipitem illæ delapsum exhalatio repetiat. Huc etiam valdè iuuat, quod raro turbines ( nisi in mediterraneis, aut circa Oceani littora ) & magnæ tempestates Zonam torridam incurrant, quæ Subfolanos illos lenes in Ortum refundant, aut ad Polos declinent. Ratio videtur, quòd, & à Sole magna pars terrestris exhalationis nimis, vt in flatus recidere possit, attenuetur; & id quod reliquum est, circa insulas & terram, vnde extractum, perflat, aut saltem non magnis sed lassatis viribus in altum mare perueniat. Hinc præcipua materia Subfolanorum Torridæ, tenuis & marina exhalatio est, mixta  
marino

marino itidem vaporibus, partim etiam ipse aer calore Solis sparsus & effusus abactusque ante eum in Occidentem. Hæ verò causæ omnes simul & vniuersæ, extra illam Zonam locum (si perpendas) non reperiunt, vti nec in mediterraneis ipsius Torridæ, vbi & montes flatibus obstant, & turbidæ è terrestribus exhalationes aerem infestant.

Sed ecce hoc etiam retrahit abeuntem, dum cogito. Non diurni tantum, sed etiam nocturni sunt flatus isti Subsolanorum. Scribit enim Ios. Acoſta lib. 3. cap. 4. & 8. nauem Lymensem anno 1580. spatio duorum mensium, Februarij & Martij, quando Sol pæne imminebat vertici (Lyma namque vrbs capitalis Peruuix 12. gradibus in Austrum declinat ab Equatore) confecisse sub eodem semper parallelo leucas bis mille septingentas in Occidentem, eodem semper clementi & gelido, die nocteque Subsolano à puppi adspirante: nec vllam in toto illo vastissimo maris Pacifici traiectu sensisse tempestatem aut procellam. Pari felicitate & vento Aluarus Mandana ex Peru etiam ad Insulas Salomonis, sub vno parallelo, spatium mille circiter leucarum decucurrit. Quomodo ergo Subsolani, quos Sol per diem ab Ortum ad Occasum circumducit, etiam noctem per spirant? Nescio, aut hoc est: Quia nocturni flatus diurnorum viam sequuntur. versus Occasum enim aer vesperi ob propinquitatem cadentis Solis rarior est, quàm retrò ad Orientem. igitur halitus in regione superiori refrigeratus, & ab aëre occiduo laxiori & facile cedenti ad defluendum illac inuitatur, & ab aëre ortiuo, frigidior, & à Sole longius remoto, seque continuò addensante, eodem etiam exprimitur.

Sed contraho vela, & in nodum colligo quod iam diu sparsi. Nullum scilicet esse Oceani raptum ab Ortum in Occasum, & in ventis Subsolanis, non in ipsâ aquâ esse fluxum, & nauigandi facilitatem à Sole ortiuo in occiduum. Sed nonne tamen Scaliger antè mihi citatus disertè affirmat, *aquali ventorum vi* reditum in Orientem esse difficiliorem & tardior? Facit. sed deponere quidlibet audeam, id non ab vllâ nauatarum experientiâ, sed à se accepisse, quia necesse id videbât, ad concinnandum Oceano illum raptum. nam aliàs venti, nunc aduersi & ressantes, nunc secundi & ferentes, efficere poterant (& res, vt iam antè vidimus, ita habet) illam diuersitatem.

## ARTICVLVS VII.

*Historia marini æstus.*

**H**Oc vnum ex abditissimis Naturæ arcanum est: & quod Aristotelem ita obstupescit, vt in tot de mari Problematibus, & Meteororum libris, ne quidem eius facere sustinuerit mentionem. Tædio enim difficultatis abstinuissè, Vicomercatus & Auctores passim credunt. Nam nesciuissè (quod quidam autumant) an mare æstus ille reciprocos sollicitaret, cras, cū M. Varone, fortasse credam, hodie nihil. Nimis curiosus & omniscius fuit, vt hoc propemodū vnum, & quidem tam insigne, eum laceret. Non adeo procul mari Illyrico Athenæ fuerunt: & classem Alexandri Oceani Indici æstu periclitatam audiuit, ex illis castris, vnde ei pleraque scribebantur, quæ in historiam animalium confarcinauit. Deinde Plutarchus, eum in Solem retulisse æstum scribit. Primum autem historiam æstus, quā verissimè poterit, vt inde nobis certior sit coniectura causæ, dabimus. Sed hunc tamen antè tibi serupulum fortè eximo; Quomodo non compugnent, scēque in eādem aquā compatiuntur, tot differentes, & in diuersa eam distrahentes motus. Dic, veluti in eodem Planetā, raptus primi mobilis, & motus in Zodiaco, corrixantur inter se, nec se tamen iugulant; ita fieri in mari. Iuuant ergo concitantque se mutuo, cū fortè tendunt in eandem partem; retardant verò, cū obluantur in aduersum. Sed ad æstuationis historiam.

In primis, Mæotis, Pontus Euxinus, Propontis, Ægæum, Caspium, nullo, qui sentiri possit, æstu reciprocantur. Hæc olim confessa, hodierno experimento comprobantur. Mæotis enim ipse Pontum, manifesto, Caspium occulto, vt putant, meatu, Pontus in Propontidem & Ægæum, more fluminum delabuntur, numquam sursum refluxo mari. Mediterraneum tamen æstuat: didicique olim à Plinio, vbi ait, multos tranquillo mari nullo velorum impulsu, tertio die ex Italiā Vticam in Africā prouehi, feruente æstu. Fre-  
tum etiam Siculum bis singulo quoque die naturali, alternat æstum, ait lib. 1. Strabo, ad Oceani & Lunæ legem. In orā tamen Italicā, Gallicā, Hispanicā, inquit Scaliger, alijsque, vix nisi obscure  
intelligi potest, euidenti tamen ad litus Africæ clementō decre-  
mentōque. Suā etiam curā aliquid eleuationis depressionisque in  
Massiliensī portu deprehensum ait Scaliger: & de Hispanicā orā,

Exerc. 31.

Ii est

est quod aliquid amplius suspicer. Nam ex obsidione Carthaginis nouæ in Hispaniâ, libro 6. dec. 3. apud Liuium intelligo, Mediterraneum mœnia vrbis inaccessa facere affluente æstu, nudarique recedente, & id perquam opportunum fuisse oppugnantu Scipioni. Adriaticum verò Venetias vsque, satis manifestè, & ad duas orgyas etiam, vt quidam referunt, attollitur, supprimiturque. Iam mari interiori in Oceanum exeamus. Hic quacumque latissimè in Ortum, Occasum, Boream, Austrum patet, rarissimâ exceptione, tumescit, detumescit: etsi non in eandem altitudinem vbique. In toto Septemtrione nostro, Noruegiâ, Daniâ, Hollandiâ, Flandriâ, Angliâ, æstus est cum maximè insignis, adeò vt supra Britanniam oëgenis cubitis intumescere, auctor sit Pythias Massiliensis, inquit Plinius. Vnde hoc meritò & valdè mirum, mare Balthicum, cui se inter Noruegiam & Daniâ infundit Oceanus, ne quidem tantillum æstu, vt scribit Bartholinus Danus, se mouere.

In littore etiam Africæ, à freto Herculeo ad Cancræ Tropicum, exiguus, vt referunt nautæ, est fluxus. vltra verò, iuxta Nigrum fluuium, vulgò *Rio grande*, satis notabilis, & quantus in Lusitaniâ: ad Insulam S. Thomæ, sub ipso Æquatore, qualis Venetiis. In littore Mexicano, Cubæ, & vicinarum insularum, vix se erigit: cum Oceanus Pacificus ad Panamam, ad duas etiam leucas excurrat. Circa Terceras aliquantus est, sed inferior Hispanico. In freto Magellanico sat altus: in quo etiam vtriusque Oceani æstus sibi obuiam veniunt, vt à nautis accepisse, se narrat Ios. Acosta. Denique Oceanus occiduus maiori æstu se inflat, quàm orientalis. adeò, vt regem illum fluuiorum Maragnon, siue Amazonum, in Americâ, cuius ostium latitudinem maris Mediterranei superat, ad 100. leucas supinet, & sursum reflectat. In Indijs orientalibus tamen ad Patalam, quæ nunc Cambaiâ, in ipsius faucibus Indi amnis, maximus est & insolens æstus, qui flumè ad 30. etiam leucas retrò agit, in modum rapidissimi torrentis. quæ res ignara olim Alexandro, subitam & magnam trepidationem classi eius iniecit. describit graphicè lib. 9. Curtius. Iam æstus, inquit, totos circa flumen campos inundauerat, tumulus dumtaxat eminentibus, velut insulis parui: in quos plerique trepidi omisis nauigijs enare cœperunt.

Alibi etiam multis locis flumina retrocedunt versus fontes suos cum marino æstu: vt plurima in Lusitaniâ, Scaldis in Belgio, Bætis in Hispaniâ, Garumna in Aquitaniâ: Tamis in Angliâ etiam ad 50. milliaria repellitur.

Quan-

Quantum verò ad tempus & legem, quam seruant plerique omnes æstus, notat Plinius, alijsque panè à caluo ad caluam omnes, resque in Oceano nostro Flandrico est pro compertissimâ: attollente se supra horizontem Lunari sidere, mare paullatim intumescere, donec peruenerit ad Meridianum cæli fastigium: tunc verò toto ad horizontem vsque occiduum descensu residit. vbi statim iterum inflari incipit, nec cessat, nisi cùm Luna Meridianum & punctum mediæ noctis attigerit. ibi secundò sorbatur & detumescit, quousque sidus ad Ortum se reduxerit. Itaque bis die vno naturali, & quod excurrit, affluunt maria, bis refluant. Luna enim intra 24. horas ad horizontem, vnde exorta, se reuhere non potest, cùm interea temporis 13. circiter gradibus motu proprio in Ortum reciprocauerit, qui adiiciendi 24. istis horis. sex igitur paullo amplius horas turgescunt, desiduntque totidem. Hæc regula communis, quam paucissimæ infringunt exceptiones. Tres tamen sunt. Primò, Scaliger Exercit. 52. asseuerat, Garumnæ Oceano Aquitanico septem horis intumescere, cùm quinque tantum detumescat.

Secundò, Oceanus iuxta fluuium Nigrum in Guineâ Africæ, medio inter Æquatorem & Tropicum Cancrispatio, quatuor horis instar rapidi torrentis affluit, octo refluit, Aloysio Cadamusto fido mihi teste.

Tertiò, famosus ille inter Aulidem & insulam Eubœam Euripus dicitur septies die naturali reciprocare. Liuius tamen lib. 8. dec. 3. *Fretum Euripi, inquit, non septies die, sicut fama fert, temporibus statim reciprocatur: sed temerè in modum venti nunc hic nunc illuc verso mari, velut monte præcipiti deuolutus torrens, rapitur.*

Sed contrà audiamus etiam de eodem Pet. Gyllium, in illis locis non ita pridem peregrinum. *Equidem in Chalcidem cùm venissem, ait, Liuij sententiam probare non posceram, cùm nullo flante vento certis temporibus contemplerer modò ferri ab Ortus Solis, modò ab Occasû, tanto impetu, ut ventos contrarios & plena nauigia contrà nauigantis secum asportares: molassj, multas ab eo versari vidi aliquot horas ab Ortus ad Occasum Solis. Cùm autem ipse à moletrinaris, qui ex molarum motu accessum & recessum omnium maxime animaduertere habent necesse, percunctatus essem, quoribus & quos horas nunc hic nunc illuc conuerterentur mola, responderunt communiter, intra 24. horas cursum quater mutari solitum esse: sex horis ab unâ parte accedere, totidem ab alterâ recedere. Cùm autem*

adiungere inciperent, esse quadam tempora, cum has certas vices non obseruaret, & ipse nimium attento vultu & animo excipiens illorum sermonem, & rei veritatem scire cupiens, quamnam essent illa tempora, inquirere aggressus, deprehensus à quibusdam Corycæis, & repente correptus, ut explorator, aliquamdiu in custodiâ retentus sum. Malè sit illis Corycæis nebulonibus. ego iam scientiam istam deuoraueram, quam è faucibus eripuerunt.

Molitorum tamen istorum in Euripo testimonio liquet, quater solum die naturali, non septies, (nisi fortè quandoque, quod Gyllius ex ipsis, nimis auidè, & extento collo, audire cupiebat) redire motus: ideoque bis fluere, totiesque refluxere, secundum Oceani leges. Aristotelem in Euripo perijsse, Iustinus Martyr, S. Gregor. Nazianzenus, Procopius affirmant; cum Chalcidem, quæ Euripo alluitur, Athenis clam profugisset, impietatis ab Eurymedonte Hierophantâ accersitus, ut inquit Laërtius. Ibi enim Euripi reciprocationem admirans, nec causam eius satis capiens, insilijt post hæc verba, inquit. Εἰπὶ δὴ Ἀριστοτέλης ὅτι εἴλετο εὐελαπτο, εὐελαπτο ἔχεται ἢ Ἀριστοτέλει. Quandoquidem Aristoteles non cepit Euripum, Euripus capiat Aristotelem. Sed non credo Principem nostrum tam fuisse vesanum. vti nec Hermippo, qui scripsit, anno ætatis septuagesimo Chalcide bibisse aconitum. magis Apollodoro, qui anno tertio & sexagesimo, climactere, ac naturali morbo, & ut alij, debilitate (à studijs & meditatione, ut opinor) stomachi defecisse: quo etiam tempore Demosthenes in Calabria discessit.

Aliquando etiam à causis naturalibus, aut diuinis, accidunt insolentes æstus. ut inter prodigia anni 1550. sub Edouardo Angliæ Rege puero, refert lib. 2. de Schismate Anglicano Sanderus, ad xvi. Cal. Ianuarias, Tamesim iuxta Londinum ter intra nouem horas fluxisse ac refluxisse. Hoc etiam in risum accipe. In mari Erythraeo, ait Exercit. 52. Scaliger, tantus est æstus, ut osiores Sacrarum litterarum temerè mentiti sint, Moysen in sicco transmississe, natum refluxionis occasionem. Quod tamen, inquit, fieri non potuit: propterea quod ad Sues usque (est oppidum) quod intimo in recessu iacet, mare operis litus illud; neque vinqquam regrediens ita nudat, ut inferiores partes, quæ transferunt Hebræi, suâ decessione aperiat. Locum enim traiecit, milliariibus Italicis fere 5. à summo litore distat, ut ex Adrichomio nostro colligi potest. Deinde Exodi 14. impressè asseritur, vnam pro muro transeuntibus fuisse à dextris & sinistris. vbi miraculum diuinum, sine effugio, apparet.

## ARTICVLVS VIII.

*Sententie aliquot belliores, de caussâ efficiente  
marini aestus, reiectæ.*

**Q**uod ubique clamare solet, nos nihil scire: maximè conuenit huic disquisitioni, quæ tractat maris motum, clamat Exercit. 52. Iul. Scalger. & reuerà in abditissimo Democriti puteo hæc veritas, si quæ alia, latet. Quam tamen Philosophi omni æuo variè conati extrahere. & belliores aliquot probabilioresque deducemus in pompam. Plato & Stoici, hodieque Io. Keplerus Mathematicus Cæsarius lib. 4. c. 7. Harmonicæ, terram ingens animal esse credit, quod immanibus pulmonum folliibus marinas aquas per interual- la visceribus inspiret respiretque. Additque præter alia, quibus terræ animam adstruit (& quæ in libris de Animâ, Deo dan- te, refellemus) Scaldim nostrum apud Antuerpiam, antequam, ait, frequentia illa mercatorum Urbem desereret, vno toto die æstum stitisse, quia scilicet animus eam deliquio & spiritus defecit. Fortè etiam anno illo 1550. iussuerat, cum Oceanus Britannicus ad Tamesim, nouem horarum spatio, ter reciprocauit. Et miraculum illud Scaldis, inquit Keplerus, *non mediocriter Antuerpiam exterruit.*

Verùm, terram fabulosam tantum esse animal, alibi ostende- mus. De deliquio Scaldis, olim in oculo illo Urbium, & compen- dio Orbis, Antuerpiæ habitauimus, annis 1607. 1608. 1609. in Illustri, Religiosissimo iuxta ac Eruditissimo S. Michælis, Canonicorum Præmonstratensium Monasterio, Philosophiam professus; nec ego, aut alius, credo, fando aliquid similis monstri umquam accepit. Clarissimo etiam Medico Thomæ Fieno, mirabiliù, omnium qui sub cælo sunt, curiosissimo Antuerpiano ciui, rem proposui; qui nil, præter risum, reposuit. Exundationes tamen Scaldis & Oceani atroces, Flandri, Zelandi, Hollandi, Brabantii sæpè experti sumus: vt anno 1521. Sanctorum Omnium festo; anno 1564. 1582. & nouissimè 1624. circa Festum Epiphaniæ; liquatis subitâ & ingenti eluione niuib. *Nostrâ, & patrum memoriâ*, ait lib. 2. Theat. Bodinus, *Bataui Oceanus centum amplius millia ingerum dis- sipatis aggeribus eripuit.* Nam 70. circiter pagos obruit, quorum adhuc aliquæ turres emicant ex undis. Et Lemnius lib. 2. cap. 41. de Occult. dicit, suâ, id est, aurore nostrorum memoriâ, Oceanum



minimo temporis intervallo quartum hibernis mensibus, in immenſam altitudinem extumuiſſe, miſerandâ Belgij clade. Vides ergo, ut animal illud Keplerianum, ſpiritum non ſuſtinere, ſed nimis liberaliter in nos effundere ſoleat.

Altera ſententia eruditiffimi cuiuſdam Mathematici, nuper hîc Louanij, nunc verò Romæ, eſt, qui æſtuare mare exiſtimat, quia Angelus aliquis terræ motor ( dubitat ſub quo zenith ) globum terræ attollit ſupra centrum aliquot cubitis, totidemque infra deprimit, certis & modularis interuallis. cùm terra in altum leuatur, ſiccantur aliquouſque vada; quia aqua in oppoſitum hemiſphærium, tamquam ad loca iam depreſſiora, & centro grauitatis propinquiora, deſluit: cùm verò deprimitur, mare hîc tumer, quia ex altero hemiſphærio ad nos affluit.

Verùm hæc imaginatio aliquantò plus ingenij habet, quàm probabilitatis.

Primò, Quia nulla ſic ratio ſolida reddi poteſt, cur non ſemper æſtus ſint æquales. cùm tamen conſtet, plenilunio & nouilunio abundiores eſſe, ſicciores in quadraturis.

Secundò, Cur cum Lunâ ſex horis pleraque maria ſurgunt, totidemque reſorbentur? An quia Angelus vocando & relaxando aquas cum Lunâ conſentit? nugæ. Tertiò, Poſe, ſi placet, Angelum iſtum aquarium Amſtelrodami in mediâ Hollandiâ. cùm terram eleuabit, non tantum Oceanus Deucalionæus in Galliam & Luſitaniam deſluet; ſed Scaldis etiam totus Cameracum uſque & ultra, item Moſa relabetur verſus ſuos fontes. aut ſaltem, ſi eleuatio non ſit tanta ut alueum in fontes proſum efficiat, curſum tamen frænabit, aut retardabit. Scio, eſſugium eſſe in loco & horizonte, per cuius axem Angelus iſte centrum terræ adducendo reducendoque librat. Statuamus igitur eum in Palæſtinâ Ieroſoly- mis (huc enim doctiſſimus ille Vir inclinatus) ſed tunc ecce in Iordane, Nilo, Tigri, Euphrate, Mæotide etiam & Euxino, æſtum adærtere licebit. & vniuerſim omnes aquæ etiam dulces, lacubus ſolum, qui alueo non egrediuntur, excipais, reciprocationem & æſtum perſentifcent. Alia congeri poſſunt, quæ iam longitudinis verens ſubterhabeo.

Tertia ſententia etiam in Angelos cauſſam æſtus reiſcit: qui tamen non terram librando, ſed ipſum immediatè aquæ elementum fundendo reuocandoque, reciprocationem faciat. Sic nuper hîc cenſebat Eruditiffimus P. Leonardus Leſſius, multoſque hodie pronos

pronos video, quibus non vacat diu in hanc rem speculari, & eerebrum impendere. Probant tamen, quia Apoc. 16. Angelus quidam nominatur aquarum; ideo, verosimili coniecturâ, quia ei à Deo data prouincia est æstu reciprocandi mare. cur enim non tam mari assignati spiritales motores, quàm cælis?

Sed argumentum nimis imbecille est, vt rem tantam sustinere possit. Legenti enim cogitatè locum Apocalypsis, Angelus aquarum statim intelligitur ille, *qui effudit phialam suam super flumina, & super fontes aquarum.* Vnde à curâ illâ inficiendi aquas, extremo illo tempore, non ab officio mouendi & regendi, videtur nomen accepisse. quod etiam inde adfirmatur; quia de Angelo singulari loquitur: cùm tamen vnicus non sit, qui vniuersa flumina, fontesque gubernet. Imò Angelus iste aquarius distinguitur ab alio Angelo maris (hic enim secundus est, ille tertius) *qui effudit phialam suam in mare.* Huic ergo potiùs incumbet munus. mouendi maris. Sed iterum, cùm vnicus sit, maris Angelus appellatur, non quia mare æstu ducit ex officio ac reducit (tot enim, & tam dissita Oceani membra vnus Angelus reciprocare simul non potest) sed quia cura penes ipsum erit, corrumpendi aquas maris. Non reuocato tamen, Angelos quosdam fluminibus & mari esse præfides: verùm ij non efficiunt naturales eorum per alueos motus; sed insolentes quasdam, ad stragem mortalium, inundationes, admirabilesque alios præter ordinem Naturæ effectus; vt motum aquarum Ioan. 5. Probatix piscinæ, &c. vt Lib. 4. circa causam ventorum efficien-tem diximus.

Si enim Angelis aurigantibus regitur æstus maris, cur aquæ etiam dulces non sollicitantur? cur Rhenus & Mosâ ad scaturigines suas, perinde ac quidam alij, non refunduntur? certè enim manifestam hîc vtilitatem prospicio: & magnis laboribus defungantur homines, ac miseri illi caballi, qui naues ex Hollandiâ Mosæ-Traiectum & Leodium, aduerso & oblucente flumine, pertrahunt. Cur deinde Angeli aquarij secundum Lunæ periodos urnas suas effundunt? Vt nautæ è cælo signum æstus & navigationis haberent, respondebam olim. Sed cur potiùs non aspicunt Solem, fidus omnium notissimum? sic enim vtilitas signi ad plures spargeretur. Denique, nemo non statim videt, asylum hoc ignorantix esse: quò sine ratione, ac cum iniuriâ Dei & Naturæ, confugiunt. Imò verò cum magnâ in Deum, inquires, pietate, qui Angelicam etiam huc vsque marium demittit. Nego tamen. quia dum effectus

effectus istos in tam confessæ potentix causas rejiciunt, detrahunt admirationem: & non paullo profundius in sapientiâ diuinâ potentiaque oblituescam, quæ causis etiam istis corporeis dare poterit tam admirabilis effectus virtutem.

De motu calorum, diuersa longè ratio est, vt Lib. 4. circa causam motricem ventorum est explicatum. nec ibi indicia aliis causis habemus, quæ hic palàm se ostentant. Et hinc etiam satis refelluntur, qui solum Deum, sine vilo causæ secundæ cœtu, æstum creare existimant.

Quarta opinio Philosophorum Saracenorum est, nec aspernatur Mirandulæ Princeps lib. aduersus Astrol. 3. cap. 15. Putant mare vnum in littus excurrere, vt alteri se naturali appetitu coniungat. melius enim & tutius aduersus contraria se protegent, si confluerint, viresque confuderint in vnum. Verùm, si tantus foret in aquis coniunctionis amor, & duo vicini lacus intumescerent, & medio quo interpolantur terræ spatio se superfundere conarentur. Et cetera quæ iam diximus, hanc opinionem satis tespuunt.

Quintus exeat Rogerius Bacon, qui in Epistolâ ad Clementem V. gloriatur, se causæ marini æstus vnicum & primum repertorem. Lunâ, inquit, præcipuè & partim Sole rarefcit, & spiritu multo inflatur mare; quo exspirante & consumpto, denuò conflacescit. Consumitur autem maris spiritus, cum Luna ad Meridianum venit, qui radio perpendiculari, & angulis rectis, qui fortissimi sunt, superficiem aquæ pertundit. In ascensu verò, cum radius obliquè incideret, ad resoluendas & commouendas, non absumendas exhalationes, valebat.

Sed quantumcumque placeat sibi Bacon, mihi satis displicet. Cum enim Luna à fastigio cæli ad Occasum defluit, pari angulo & obliuatione mare despicit, atque dum in primo cæli quadrante clium inter Ortum & Meridianum ascendit: cur ergo etiam tunc spiritus inflantes non resouit? Deinde, quis credat, meridianæ Lunæ radium, qui non altè infra aquæ superficiem penetrat (Solis quippe radius, tantò fortior, vix ad 15. cubitos peruenit) rot & tam celeriter spiritus absumere, cum extra plenilunium vix ac ne vix calorem, aut vim aliam rarefacientem experiamur, quæ insigniter tactum afficiat. Et denique, quomodo spiritus illos hic dispellit, ubi oppositum cæli verticem & Antipodum Meridianum tenet?

Sextus igitur amplius non paullo ingenij habet, Thomas Lydiatus, Anglus, & Baconis conterraneus. Is nobis sub fundo maris,

vt ollà quadam ingenti, vastos bituminis ardentis ignes accendit, quorum exhalatione mare subinde ampullatur & tumescit. Ita enim facilis erit caussa, cur sola falsà exsistent: quia nempe idem bituminis spiritus, qui falsedinem (vt nos quoque antè censuimus) etiam æstum facit. Dissoluetur deinde sic non difficulter Gordius & inexplicabilis ille nodus: quâ ratione Luna ex altero hemisphærio mare nostrum æstu attollit, quia scilicet altissimi quidam in mari gurgites sunt pleni ardenti bitumine, qui terram totam (licet non per medium, & diametrum) ad Antipodes vsque perforant; per quos vnda de hemisphærio in hemisphærium perpetuò com meat & rebullit. Nec fabulosos esse tales sine fundo gurgites, ex lib. 1. Rerum Septemtr. Olai ostendi potest, vbi plurima loca Oceani Noruegici, circa cautes præsertim & scopulos, fundi, per infinitas propemodum funium spiras, inexplorandi esse scribit. & de quâdam ibi voragine, quam *Moslastrom* appellat, Mare, inquit, *ibi intra cavernas accedente fluxu inflatur, & effluxu restatur, quanto maximo impetu deferuntur torrentes vel rapidi fluctus. Navigatur hoc mare periculosissimo euentu, quia iniquo tempore nauticantes subito rapiuntur in voragines circulares.* Verosimile igitur, hanc, aliasque multas Charybdes terram in aduersum hemisphærium percutere.

Sed licet vultu admodum probabili hæc sententia statim occurrat, inspecta tamen non est similis suæ fronti.

Primò, Quia valdè efferverescere aquam oporteat, & tactum præne adurere, si ardente spiritu ita rarefiat & turgescat olla enim, nisi longè ultra teporem incalescat, non altè inflatur & ebullit. nemo tamen insigniorem marinæ calorem æstu tumente, quàm sicco, percipit. nec fluxus ille, idcirco æstus appellatur, quasi mare in eo reuerà æstuet & ferueat; sed metaphoricè solum, & quia surgit & ebullit, vt olla suppositis ignibus solet.

Secundò, Naues pleno & inflatissimo æstu altiùs, pari onere, deprimerentur; quia in aquâ rariori æqualis grauitas magis succumbit: inde enim est, vt naus in mari, quod est aquæ densioris, non tam profundè, quàm in flumine, descendat.

Tertiò, Totum Oceanum, in orbem circumquaque perforatum vsque in aduersam terræ partem, non in Septemtrione tantum & raris quibusdam gurgitibus, esse oportet. Nam in quocumque paralleli sui puncto centrum Lunæ consistat, mare semper in opposito hemisphærio ebullit & æstuat. Neque foramen vnum in mari

Noruegico v. g. fufficit ad implendum æstu totum Oceanum nostrum vsque ad Hispanias, dum Luna ab Occasu ad punctum medix noctis scandit. si namque tota aqua ab inferiori hemisphærio per foramen illud mari nostro infundi debet, prius in Noruegiâ, quàm Hollandiâ, Flandriâ, Britannîâ, intumescet æstus, paullatimque tumor, & sat longo pòst tempore ad littora nostra perveniet: quod tamen compertissimum vanitatis; quia Noruegicus, Hollandicus, Britannicus-Oceanus sub eâdem longitudine & Meridiano simul assurgit.

Denique, Periodica ista constantia æstûs satis impressè asserit, se non in incendio aliquo incerto, & sibi sæpè, quâ magnitudine quâ feruore, dissimili, causam habere. Ignem enim quicumque sub montibus aut mari, pro affluxu aut penuriâ materiæ ac pabuli, plenius aut malignius aluntur: apparebitque, sine dubio, similis inconstantia in æstu. Vt quid etiam surgente Lunâ reuiuiscere incipiunt illi ignes, & spiritum spargere quo vndas attollant, ac deinde consopiri statim, ubi sidus à Meridiano in Occasum descendit, idque certâ semper & immobili lege? Quia Luna, reponit Lydia-tus, incendia calore suo exsuscitat. Nam licet bitumen flagret in aquis, ab externâ tamen causâ accèdi oportet, aut mole aquarum semisopitum recreari. Sed profectò magis id à Sole, quàm Lunâ, ἡλίου ἀδωνεί, *Sole quodam imbecilli*, ut vocat Theophrastes, fiet. & deinde radij Lunæ aut Solis non trajiciuntur ad fundum vsque maris: nedum est, ut calorem tantum importent, qui bitumen, etiam altissimorum gurgitum fundo parietibus illitum, flammæ.

Ex his denique non valdè æstimari potest lib. 2. q. 2. Meteor. Thimon, qui Solem aquarum rarefactione euocare æstus credit. Sol enim nec tantum valet, ac sub Torridâ magis abundaret æstus, nec cum Lunâ, sed Sole maximè congrueret eius periodus. quæ omnia experimentum longè respuit.

Andreas Cæsalpinus tandem, veteri Seleuci Mathematici paradoxo agmen claudat. Maris æstum, terræ motûs Pythagorici & Copernicani effectum sentit. Sed non potest, licet Solem stare, & terræ motum istum diurnum in orbem, & fabulosum, pro vero demus. Nam, vel mare æquo passu, ab Occasu in Ortum, cum terrâ, spatio 24. horarum, circulum circa terræ centrum absoluit (& ita ab hac causâ nullus æstus apparebit;) vel si assequi terræ motum non valeat (quia fortè lubricus & instabilis liquor parum cum terrâ impetum capere non potest) in Occasum tantum refluat,

fluat, perpetuusque in illam partem inclinabit. quia scilicet motus terræ circa centrum, ab Occasu in Ortum semper incedit. Deinde non solum mare, sed vniuersa flumina & lacus, in Occidentem retrò fluent; quia à motu terræ relinquentur, qui celerior in Orientem eos præuertet.

## ARTICVLVS IX.

*Luna, princeps causâ marini æstus. Sol tamen etiam  
in partem aliquam trahit.*

**S**lex effectû, de causâ coniectatio valere potest, tam compertum videtur, æstus effici & gubernari à Lunari sidere, quàm calorem ab ignibus effundi, aut lumen à Sole. Vnde enim Solis illuminationem intelligimus? quia, haud dubiè, quoties surgit, lumine omnia perfundi oculis cernimus. Ita quoque, cum Lunâ ascendente mare in fermento esse & intumescere sensim incipit, eaque lex constans est, & inuiolabilis, vt omnium nautarum & curiosorum fide constat. Ideo etiam est, vt singulis diebus vnâ ferè horâ seriùs assurgat æstus; quia Luna motu proprio reciprocatur in Ortus, & vnâ etiam fermè horâ tardiùs, quàm præcedenti die, ad horizontem venit. Nec valdè refert, quòd rarissimis quibusdam exemplis, & fortasse vanis, quidam nitantur aduersus hanc legem. sufficit enim vt pleraque maria, & totus noster Oceanus, eam sequantur: & exceptiones quæ in fretis quibusdâ, & alibi euenire possunt, in locorum iniquitatem, & impedimenta cetera, rejicere debemus. Nec etiam, quamuis altè, contra infinitos alios clamantem, Picum Mirandulæ Principem lib. 3. cap. 15. aduersus Astrol. audimus. *Non respondent, quæ respondere sit necesse. vt cum aucta lumine Luna, cum velocior cursu, cum propinquior terra, cum declinans ad Aquilonem à viâ Solis, cum in Signis Aquilonaribus posita, tunc vberiores fiant maris accessus. contra, tenuiores, cum se aliter habet.* Hæc enim partim falsa sunt: aliorum, cur non ita accidunt, rationem postea ostendemus. Verissimè etenim de Prouid. cap. 1. Zeno Romanus: *Vndæ ad horam ac diem subeunt, ampliores minoresve, prout illas Lunare sidus elicit, ad cuius arbitrium Oceanus exundat.*

Alios sine numero & sine subterhabeo. D. Thomæ sententia est, 1. p. q. 105. a. 6. alibi que \*D. Ambrosij lib. 4. Hexæmer. cap. 7. D. Basilij Hexæmer. Homil. 6. quæ Diarijs & Ephemeridibus omnibus nauticis satis affirmatur. Vt enim ex Thesaurο marino Lucæ



Aurigarij Hollandi, Claudio Dureto, alijsque, & experientiâ ipsâ liquet; præterquam quodd singulis diebus, vt antè monui, ferè vnâ horâ siue 48. minutis, æstus tardiùs, ob recessum proprium Lunæ in Zodiaco, inflare se incipit, ab interlunio etiam, siue Lunæ cum Sole coniunctione, paullatim minuitur ad primam quadraturam, siue semilunij tempus, septimo circiter ab interlunio, die, quando sicciſſimus, aut nullus est fluxus: ideoque nautæ mare mortuum, Veneti *acqua stanca*, tunc appellant. Ab hac quadraturâ ad plenilunium, sensim increbescunt rursum & implentur æstus, aded vt plenissimus incidat in decimum quartum, & ipsum diem oppositionis. Hinc iterum ad vltimam quadraturam quotidie perpetuè relanguescunt. Vbi iterum inanes, & pænè nulli sunt: quod circa 21. à coniunctione diem euenit. Vnde natum prouerbiu Venetis:

*Da vent' vno à venti due,  
L'acqua non vâ ne sù ne giu.*

A quo tempore pedetentim denuò se promouent, vsque ad interlunium & coniunctionem. Ex quâ lege & periodo discimus, interlunio & plenilunio altissimos fieri æstus: cum hoc tamen discrimine, quodd, omnium nautarum testimonio, plenâ Lunâ sint aliquantò pleniores, quàm siccâ & silente, id est, in coniunctione. Vnde merito plenilunio & interlunio, mare viuum, in vtrâque quadraturâ, mortuum vocare solent.

Qui huius etiam rei diligentiores fuerunt, totum cæli ambitum ab Ortui ad Occasum in octo puncta diuiserunt, quatuor scilicet fluxus, & totidem refluxus: quorum bina fortia, alia duo, debilia appellant. Quod vt capias, totum cælum, & parallelum quem Luna motu primi mobilis spatio 24. horarum & 48. circiter minutorum circumcurrit, in quatuor quadrantes secare oportet. Primus arcus ab horizonte Ortui ad Meridianum & cæli culmen tendi debet: alter à Meridiano ad horizontem Occiduum decurrit: tertius, hinc ad punctum mediæ noctis: quartus, inde ad Ortum redit. Singuli autem arcus continet 90. gradus: cum sint 4. segmenta æqualia totius ambitus cæli, qui gradus 360. habet. Cum autem Luna per primum arcum ab horizonte ad Meridianum ascendit, intumescit æstus. & initio quidè parum se mouet, deinde medio inter horizontem & Meridianum spatio, ac in puncto quod 45. gradibus ab vtroque circulo distat, vehementiùs, vsque dum Luna ad Meridiani culmen enisa fuerit, vbi stat fluxus. Hinc igitur



igitur punctum, in quo parallelus Lunæ horizontem intersecat, vocant punctum debile fluxus; alterum verò, forte, quod 45. gradibus ab horizonte, & eulmine nostri hemisphærij distat: quia scilicet cum Luna eò peruenit, robustior longè & incitator fit æstus. Lunâ deinde à Meridiano paulatim in Occasum, per secundum cæli quadrantem, delabente, detumescit molliter in principio æstus (ideoque hoc meridiei punctum, vocant punctum debile refluxus:) sed celeritate manifestâ torrentior fit, vbi Luna ad medium inter Meridianum & horizontem punctum descenderit; quod eâ re appellant punctum forte refluxus. Vbi autem Luna Occasum attingit, cessat refluxus; rursusque mare secundo æstu erigere se incipit, duratque incrementum, donec tertium cæli quadrantem, usque ad Antipodum Meridianum, sidus decurrerit. & inde ad Ortum nostrum, toto scilicet ultimo quadrante, secundo supprimitur & tumorem ponit. Et puncta fortia ac debilia in nocturno illo paralleli arcu statuenda sunt similia diurnis.

Vnde puncta fluxus debilia sunt, Ortus & Occasus: fortia verò, punctum medium inter Ortum & Meridiem, & medium inter Occasum & punctum mediæ noctis: id est, puncta media duorum illorum cæli quadrantum, in quibus mare fluit. Puncta debilia refluxus sunt, punctum Meridiei, & mediæ noctis: fortia, punctum medium inter Occasum & Meridiem, & inter Ortum & punctum mediæ noctis: id est, puncta media duorum quadrantum, quos cum Luna pererrat, æstus detumescit. Præter autem varietatem illam duplicem fluxus & refluxus, quotidianam scilicet, & mensuram, quam iam enarrauimus, est & tertia, annua, quam Ptolemaeus lib. 3. apud Strabonem à Gaditanis se accepisse dicit. Non enim circa totum annum sunt pares æstus. Verum quippe illud Taciti Annal. lib. 1. *Sidere æquinoctij maximè Oceanum tumescere.* id est, cum Sol initio Autumnus & Veris Æquinoctialem ambit. circa Tropicos verò mitescunt æstus; siue potius, circa æstiuum solstitium: nam hieme totâ, & quoties abundans aquæ, æstus quoque tunc nobis abundiores. Quamquam Plinius lib. 2. c. 97. affirmatè dicat, *Æquinoctijs maximè tumentes, & autumnali amplius, quàm verno: inanes verò brumâ, & magis solstitio.* de solstitio facile dederim; de brumâ, propior sum abnuenti. Lunâ *Aquiloniâ;* etiam inquit, *& à terris longius recedente, mitiores sunt æstus, quàm cum in Austros digressa, propiore nisu vim suam exercet.* Cui pronius non paulò credo, quàm Gemmæ nostro, in Astrolabio suo c. 91.

docenti, Lunam in Apogæo, vel etiam in superiori Eccentrici portione, plus facere ad concutandos maris impetus, ob motus triplices minime differentes: scilicet Epicycli, Apogæi medij, atque orbium qui augem Eccentrici deferunt. omnes enim mouentur contra Signorum seriem: id est, ab Occitu in Occasum. Addit tamen deinde, cum vultu propiore terras perlustrat, in infimâ videlicet parte Eccentrici & Epicycli, ad exaugendam aquarum molem, potentiorum esse, licet in mouendis fluxibus nonnihil iuris amittat. Sed reuerâ, si propior, & ad mota terris, in aquarum incrementa valet, etiam in fluxum & æstus validior tunc erit. cum præferim aquarum molem magis inflando, quàm nouâ partium aliquarum generatione, augere videatur.

Ex quibus refellitur, quod initio obiecit nobis Princeps Mirandulanus. Nam Luna propinquior terris (nisi quid aliud vim eius eludat) æstus abundiores facit. quod diserte paullò antè conficebatur Plinius: licet tamen fortasse incrementum non tam euidentem discerniculo in oculos incurrat. Transgressa etiam eclipticam, ad partes Zodiaci Aquilonares, etsi radio directiore maria nostra feriat, non intendit tamen insigniter æstus; quia tunc circa Eccentrici Apogæum longius refugit à terris: limes enim eius Boreus eleuatur est Austrino. Deinde, visilla magnetica, quam Luna in mare iaculatur, non est fortè instar luminis, quod reunditur & reflectitur à corpore opaco, & reflexione ad angulos rectiores se magis multiplicat (quomodo Sol in Signis Borealibus, cum à vertice nostro propius abest, affluentius nos illuminat & calefacit): sed opaca iuxtà ac transparentia, rara, densa, sine discrimine penetrabilis & irretortâ permeat: vt latius statim diducemus. Quod etiam in semilunijs magis, quàm nouilunijs, langueant æstus, cum tamen illo tempore Luna auctior sit lumine in facie imminente terris, non ideo ostenditur ab eâ non moueri æstus, sed Solem in coniunctione influentiam eius adiuuare. quod etiam pro comperto habemus: quandoquidem pro vario Solis aspectu intendat aut relaxet vehementiam fluxûs. item interlunio, cum in eodem cœtu est vtrumque sidus, tumidissimus (si plenilunium tamen excipias, quando paullò adhuc altius turget) est æstus. Sed omnia hæc explicatiora fient sequentibus.

## ARTICVLVS X.

*Quâ virtute Luna æstus moueat.*

**L**Vmine, inquit aliqui, omnem, præter lumen, influentiam alstrorum occultam respuentes. Sed defendi id vix potest, quia interlunio, cum Luna in parte obuersa terris, sicca est & illunis, grandes tamen æstus attollit.

Dico tamen Primò: Lumen æstus stimulat, & in maius extollit. Pater, quia plenilunio abundantissimi sunt, quando facies sideris terræ impendens lumine turgēt; item interlunio, cum lux solaris, Lunæ adest, & summam saltem aquæ cutem diducit, inflat, & ad æstum præparat. Nihil etiam compertius est, quàm medullas animalium & omnium plantarum, plenitudine Lunæ turgescere. Vnde etiam qui capite inoperto ad Lunam ambulant, humores cerebri commoueri sentiunt, & meninges cum dolore intendi. Sed esse tamen in lumine principem vim motricem, & ex æstu tempore interlunij iam probaui, & ex Oceano Torridæ ostendi potest, qui & à Sole & à Lunâ maximè luminatur & calefcit, & tamen infra Deucalionem & Hollandicum nostrum æstuat. Deinde, Sole, Lunâ, & omnibus sideribus nubilo conditis, pares, atque serene, fiunt æstus. igitur non siderum lumine, quod tunc tenuiter & malignè per nubium obstacula in mare se transfundit.

Dico Secundò: Vis ista Lunaris, per rarefactionem, mare non attollit. Ita videtur, contra Laurentianos Colonienfes Albertistas, in Cômmentariis anno 1491. editis, Valesium lib. Sacræ Philosc. §2. Baconē, Contarenum, & sine fine alios. Prob. tamē, quia in primis, æstu feruente naues altius in aquam rarefactam deprimerentur, submergerenturque plurimæ; vbi præsertim ad duas tréve orgyas æstus intumesceat. Sic enim anno 1531. in magno illo Lusitanicæ terræ motu, mare ibi multo & feruente spiritu tumidum & rarefcens, multarum nauium oneri succubuit, hausitque in profundum. Nam vt onus in aquâ natet, oportet leuius esse aquâ paris cum eo dimensionis, vt de humido vehentibus docet Archimedes. Aqua verò antè densior & grauior pondere nauis, rarefactione discerpta & explicata, leuior efficitur; & id eò magis, quòd raritas est amplior & dissolutior. amplam autem satis esse oportet, vbi ad duas orgyas, id est duodecim pedes, aut altius æstu pleno mare ascendit. Secundò, raritas, vel motu locali violento corpus densum dissipante,

pante, vel caloricâ alteratione (nec enim aliam causam experimur hic) efficitur. Priori modo Lunâ mare non rarefacit, igitur posteriori. sed hic etiam refellitur: quia Sole, magis califico, quàm Lunâ, regerentur & tumerent æstus. Deinde, ratio nulla solida esset, cur aqua marina salinis infusa, vel vase hausta, & radiis Lunariis exposita, non æstaret. calefieri enim, aut intepefcere faciliùs longè, quàm torum mare, potest. Æstate etiam, quàm hieme, altius ebullirent æstus.

Dico Tertio: Nec etiam mare subiectum, tumore quodam, vi magneticâ, Luna suspendit. Sentire tamen id lib. 2. c. 97. cû Lunare sidus vocat, *ancillans trahensq; audio haustu maria*, videtur Plinius: consentiuntque, præter alios innumeros, Ludou. Coronellus lib. 7. Physic. Lemnius lib. 2. c. 41. de Occult. Tartaretus lib. 2. Meteor. Scaliger Exercit. § 2. & in 2. d. 14. q. 3. ex Albumazare optime explicat Scotus. Hæc olim opinio mihi etiam displicita non est, nunc non valdè placet. Sunt enim quædam quæ me auerunt.

Primò, Si altissimè sub Lunæ centro mare tumet, & in cumulum istum aquarum vndique, ab Ortus, Occasu, Aquilone, Austro, contrahuntur vndæ, ergo Oceanus noster omni æstu versus Zonam torridam, & mare Lunæ directè subiectum, confluet, quia illuc à fidere illo ancillante seu trahente aduocatur; nec vñquam littora Septem subiecta trioni implebit.

Secundò, In Torridâ & locis vicinis quos supermeat Lunare sidus, inflatissimi erunt æstus; cû ibi sit vertex montis illius aquei, qui pari cum Lunâ passu Orbem circumambulat. Secus tamen est: & Flandricus noster Oceanus non paulò tumidiùs, quàm Americanus, exæstuat.

Tertio, Vix nautas in Oceano nauigantes fallere poterit hic aquarum tam altus tumor & gibbus.

Quartò, Cardinalis Contarenus, vniuersos eiusdem maris portus, ad quos simul Luna spectare potest, vno tempore compleri affirmat. & Iosephus Acolta à fido nautâ accepisse dicit, maris Pacifici & Oceani Orientalis æstus sibi in freto Magellanico occurrere. quod manifestè vincit, vtrumque pelagus eodem momento intumescere. Nam si Luna exoriens Oceanum v. g. Moluccarum, aut Madagascar, in tumorem aqueum contraheret, vndas ex freto Magellanico & mari Pacifico versus Ortum alliceret, & vtriusque maris æstus in eandem Mundi partem, id est, in Ortum, inclineret, nec vnus alteri obuiam procederet.

Quid

Quid ergo nos amplectimur, postquam alios omnes rejecimus? Deereui penè nihil, & complicare manus. Arcasum enim Naturæ magnum est marinus æstus: de quo facilius quam causam respuat, non quam admittat, videre possis.

Diu tamen fluctuatus, in hanc imaginationem ferè delabor.

Primo, Vim illam Lunæ, citra insignem rarefactionem, spiritus in fundo maris demersos euocare in superficiem. hi enim sunt qui aquam inflant, & hæc illæ diffugientes discerpunt. Prob. quia hæc viâ incommoda rarefactionis euitantur, nec difficulter intelligitur, quomodo duo eiusdem maris portus, quorum vnus ad Ortum, alter ad Occasum, vno eodemque fluxu compleantur. Deinde, Contarenius Adriatici æstus a fundo ebullantem dicit se deprehendisse: quia medium mare iam intumescere incipit, sicco adhuc Venetorum portu, & inde tumor in littora & portus decumbit. Signum igitur est, non totam aquam vnâ inflari, sed illam primum quæ, spiritibus fundum grauitate suâ & madore, quæ onerantur, obsidentibus, superest & inëumbit. Nam si vniuersa aluei aqua simul turgesceret, illa quæ littora allambit, non ferius quàm quæ medium aluei tenet, insurgeret. Sic etiam vtrumque fluctum illum tranquillo, qui me semper iactauit: cur aqua è mari hausta vim etiam Lunæ non perinde sentiret, atque refusa in alueum. quia (iam inquam) spiritu illo multò ac confertè qui è fundo sursum ebullit, non sustentatur, & tollitur in altum, cum in vase eam tenemus.

Hinc confectum est, non aquam maris præcipuè, sed spiritum illum (ita voco, quia substantia quædam naturâ suâ fortasse aridior est, et si humore nequaquam leuior, & aquam quodammodo animat) à Lunâ sollicitari, & in ærem attrahi, aut expelli. Et inde rationem sumo, cur flumina & insulsi lacus, aut maria quædam non æstuent: quia scilicet spiritu isto motore copioso destituuntur, aut certè fluminum & aquæ dulcis affluentia, virtus aut qualitas illa hebetatur vel extinguatur, quæ se in obsequium Lunæ spiritus mouet, aut ab eâ mouetur. Et hinc multitudine fluminum diluta maria, vt Caspium, Euxinum, Balthicum, sunt sine fluxu.

Quod deinde Oceanus Aquitanicus septem horarum æstu Garumnæ influit, recipitque se quinque solis horis in alueum, causa penes copiam spirituum, aut tarditatem quæ se difficulter, & serò aquæ expedit & in æris libertatem veniunt, haberi debet.

bet, aquarum etiam inter scopulos huc illuc, ex allusione, reciprocatio, deuexitas, & inæqualitas fundi; denique venti quibusdam locis solennes & ferè perpetui, ac flumina incurrentia, hanc & similem aliam, vt in Euripo, Guineâ Africanâ, irregularitatem facere, aut adiuuare possunt. De ventis, Flandri nostri suo sæpè malo experiuntur, quantum Circij & Cauri incitent Oceani fluxum, & in continentem vrgeant, ac propellant.

Sed cuius substantiæ sunt, inquiet qui omnia volet scire, spiritus illi motores maris? Aliquis putet è bitumine esse: quia marinum bitumen, nuper decernebamus præcipuam causam falsædinis, maria autem nulla, nisi insigniter falsa, æstuant. & huc etiam me nonnihil impellit, quod legere his diebus memini apud Andream Libauium, magnetem allicere ad se ferrum spiritu quodam bituminoso, cuius aliqua vena tam magneti quàm ferro temperata est. Videtur ergo spiritus bituminis appetitum aliquem & pronitatem habere ad sequendum vim illam ancillantem & tractoriam. Hoc tamen me retinet, quòd Asphaltites siue Mare mortuum, bitumine stans & plenissimum, æstum tamen non sentit. Oportet ergo aliter temperatum esse bitumen, vt ad Lunam se moueat, nam aliàs sincerum omne bitumen æstuar. Nec, si quæ in magnete & ferro bituminæ venæ sunt, reuerà retinent adhuc substantiam & formam substantialem bituminis; sed materiam tantùm & aliquas eius qualitates, quibus superinducta est forma ferri aut magnetis. Hoc etiam fortasse aliquid nos adiuuabit. Scribit alicubi Svvingerus, oleum quoddam vitrioli esse, quod tumescit cum Lunâ & detumescit. quid si igitur similis substantiæ, aut qualitatis, id est, vitriolatæ, vt loquuntur nostri Chymici, spiritum marini alvei fundus obtineat?

Quidquid sit, spiritum tamen esse, vix iam ampliùs mihi in dubio; cumque esse, qui à Lunari sidere præcipuè sollicitetur. Sol tamen calore suo, quo aquam molliter fundit, & halitum illum marinum irritat, in parte adiuuat. rarior enim paulò & mobilior redditur isto tepore. Et inde est, vt interlunijs, quando Sol in eodem cum Lunâ coetu est, incrementa sumant æstus. vt etiam plenilunijs, quando sidus integro & tumente orbe maria despicit. ex alijs enim effectibus certum est, lumen tunc potentissimum esse, quandoquidem arborum & animalium medullas, conchylia, & infinita alia humore turgescere faciat. Vis enim eius in aliquantum humoris, & præsertim spirituum raritatem, non dissipatio-

nem,

nem, valet. In quadraturis autem siccissimi sunt æstus: quia nec Sol Lunam satis iuuat, cum ab eâ distet 90. gradibus (tunc enim oriente Lunâ Sol meridianus est; aut contrâ, ortiuo Sole ipsa iam medium cæli culmen attingit, æstumque primi quadrantis finiuit) nec adhuc sat luminis adepta est, ut totos impleat æstus.

## ARTICVLVS XI.

*Que virtus occidente Lunâ æstus apud nos faciat.*

**H**ÆC vna ex quæstionibus est, quibus maximum ludibrium debet humanus intellectus. Vicomercatus, & vniuersi ferè agmine huc eunt, ut dicant, radios Lunæ ab opposito cæli fornice reuerberari in nostrum mare. & hætenus etiam tota Scoti subtilitas stetit. *Videtur, inquit, quod radij Luna non possint penetrare terram: & ideo videtur, quod eundem effectum, quem causant per radios incidentes, dum esset in quartâ Orientali supra terram, eundem causas tunc per radios suos reflexos à Firmamento, dum est in quartâ Occidentali sub terrâ.* Scot. in 1. d. 14 4. 2.

A Firmamento autem? Spatium est nimis immane & immensum. Deinde, cum Luna toties globo tetrestri minor sit, non totum eius hemisphærium illustrat. Vnde quod radij terram distinguunt longius protrahuntur, eò latius à se abeunt & diuariantur: & proinde si à cælo, ut speculo quodam, reflectantur, non in mare nostrum recident, sed retrò in Antipodes nostros, ubi tunc lucet Luna. Tertiò, cum cælorum Orbes diaphani sint, difficulter radium, præsertim per tantum interualli, retorquere valent. Quartò, retorqueant sanè: imbecilli tamen erunt & ferè nulli æstus à radio longissimâ illâ reflexione debilitato & euanescente. quod non experimur. Itaque olim, cum solidos Planetarum Orbes, & Eccentricos Ptolemæi retinetem, sic me expediebam: Punctum Antiselenæ, siue partem Eccentrici Lunæ, quæ ei per diametrum semper opponitur, simili virtute, spirituum marinorum motrice imbutam credebam: neque dum fidem istam abijcerem, nisi Cometarum motus mihi fregissent quidquid ibi fuit Eccentricorum. Sic enim occidenti Lunæ vicaria ista Antiselenæ surgebat ab Ortui, & mare virtute suâ attollebat. ipsa verò occidente, redibat ad Ortum Luna, excipiebatque mare iam relapsum & destitutum ab Antiselenæ. sicque in oppositis quartis se semper gyrandò, mouendi ac inflandi marinos æstus sibi inuicem lampada tradebant.



Sed quid facimus iam, si nulli sunt in cælis Orbes Eccentrici? Fingimusne Antifelenen, & Planetam aliquem inuisibilem, qui ex aduerso semper, licet Orbe nullo terram ambiente deuiatus, adspiciat Lunam? Tot sunt enim iam in æthere palantes noui Planeta, Medicej, Borbonij; cur non & quosdam, fortassis Austracos, adijcimus, qui cum Lunâ mare, aut fortè etiam cum Sole regant Orbem terrarum? Quare igitur, inquires, non lucent? Quia forsitan materiam opacitate respuentem, aut pellucido transmittentem sine reflexione radium Solis, habent. Aut si id displicet, quantum peccabimus, si annulum solum aliquem circa totum Orbem terræ concinnemus, in cuius parte, Lunæ oppositâ, fixa sit illa Antifelene? Talis enim Cometarum supra Lunam ascensum non impediet, cum annulus vnus totum hunc Mundum vndique concludere non possit, relinquatque interualla per quæ detur in superiora transitus.

Duo igitur astra (& quis scit, an etiam plura?) ceu totidem gemmas, Lunam in Antilunam, siue Antifelenen, gestabit iste annulus. Sed hæc à somnio tuo & imaginatione sunt, inquires. Et nonne etiam Eccentricos & Epicyclos, ex ascensu & descensu Planetarum, Ptolemæus somniauit? quàm sæpè & ferè vbique, ex effectibus causâs somniamus! Si aliter æstus marinus expediri, nisi per talia somnia, non potest, cur \* Atlantem esse iubes, & vetas somniare? Et ecce tibi aliud argumentum, quod satis ferè impressè Antifelenen istam affirmat. In plenilunio, non tantum prius æstus, quem Luna oriens vi magneticâ & lumine suo præsentî inflat, est abundantissimus & maximè insignis; sed etiam secundus, qui assurgere incipit Lunâ plenâ occidente, Antifelene verò cum Sole exorientè. Quam autem causâm abundantia ista habet? Non Lunæ plenitudinè, quia lux post occasum, influentiam tractoriam Lunæ hic iuuare non potest; cùm radius luminosus per terræ opacitatem transdigi vsque ad maris fundum infernè nequeat. Ergo Soli cum Antifelene surgenti tribuere oportet, sic enim etiam Sol interlunio, Lunæ silenti, & lumine in facie terris obuersâ defectæ coniunctus, æstum plenum & abundantem facit. Verum, sine illâ etiam Antifelene, alium huic nodo vnguem admoveamus.

Quid si influentiam Lunæ occidentis per totam terræ diametrum penetrare affirmemus? Nam lumen quidem per opacum trajci non potest; sed magnetica vis potest: cùm, si magnetem sub mensâ moueas & agites, cultri qui in superficie iacent, sequantur

\*Atlantes  
Africae  
populi  
necesse  
gaudent  
somnia.

tur & subsistant. Similis ergo Lunæ virtus, nullo terræ obstaculo offensa & hebetata, ex altero hemisphærio ad maris fundum peruenire quidni potest?

Sed vide quàm multa turbent hanc sententiam, quæ à nobis vtrumque componenda erunt.

Primò: Æstus nocturni quadrantis, siue qui à Lunæ statim occasu incipit, imbecillior & siccior semper erit; quia totà terræ diametro Luna à mari longius distat, quàm quando per quadrantem diurnum ad Meridianum nostrum scandit. agens verò quò longius à patiente distitum est, eò languidius in ipsum agit. Respondeo tamen, diametrum terræ, in tantà Lunæ & terræ intercapedine, non esse tam insignis lōgitudinis, vt euidentis discrimen inter vnum & alterum æstum faciat. Quod similitudine hac ostendi potest. Luna cum perigæa est, seu proxima terris, vnâ & quinquaginta terræ semidiamentris, ex sententiâ Copernici, à superficie maris distat; apogæa verò, siue cum longissimè à terrâ refugit, septem & sexaginta semidiamentris: id est, sublimior est, quàm aliàs, octo terræ diamentris. Nec tamen ista distantie varietas euidenter se in æstu ostendit. Mathematicè tamen rem æstimando, discrimen aliquod esse oportet. Deinde, spiritus fortasse illi æstuum motores, ex altissimis gurgitibus & ipsâ abyssio subterraneâ euocantur; nec totà terræ diametro longius absunt à Lunâ Antipodes, quàm mare nostrum, illuciente.

Hanc profunditatem principij marini æstus admirabili comparatione significat Illuminatissimus ille Thaulerus Serm. 2. de S. Ioanne, vbi cum fundo animæ, in quo Deum nostrum delitescere dicit & reperiri, componit. *Ad hunc fundum, inquit, vel mille miliarium vires attingere nequeunt. Quæ verò latitudo in hoc sese fundo manifestet, imaginis, & formæ, & modi experta est: & neque hic, neque illic habes. sed immensa quadam abyssus est, quæ fertur in semetipsâ absque fundo: velut fluxus maris, qui modo in ima merguntur, ita vt nulla quasi illic aqua fuisse videatur: post horulam verò magno cum impetu prorumpunt, quasi omnia sorbere velint. Sic & hic fundus in quamdam tendis abyssum: in ipsâ, propriè est habitatio Dei, multò veriùs, quàm vel in calo, vel in omnibus creaturis.*

Secundò: Vis illa Lunæ magnetica trahit, non repellit motores spiritus: igitur post occasum in gurgites & abyssum potius eos reuocabit, in flabitque subiectum sibi apud Antipodas mare, nostrum verò resorbebit nūdatis yadis, aut suppressâ vbique aqua-

rum altitudine. Argumentum hoc, fateor, me acriter vnt. Et video rarefactionem aquæ & spirituum futuram hic commodissimam. raritas enim rem aliquam quoquouersus in orbem laxat & dispergit. Verùm nullam insignem rarefactionem, nisi à calore hic experimur. calor verò Lunæ aut Solis ad quindecim cubitorum profunditatem intra superficiem maris non penetrat. In hac enim altitudine, piscatores vnionum iuxta Panamam, mare illud, maxime tamen æstuosum, gelidissimum se experiri affirmant. & alia iam antè contra istam rarefactionem ostendimus. Quid igitur facimus? Scio quosdam esse magnetes qui ferrum non alliciant, sed respiciant: quid si talem virtutem Lunæ adferamus? sic enim spiritus maris nostri, cum ipsa apud Antipodes est, reuomet & in altum reiciet. Sed ecce dum de æstu illo nocturni quadrantis sollicitus sum, diurnum omni iam causâ destituo. Nam si repellit spiritus & mare Luna, igitur assurgens supra horizontem non inflabit, sed siccabit æstum compulso intra gurgites & abyssum spiritus.

Itaque, si vis Lunæ ancillans, ut loquitur eleganter Plinius, siue tractoria est, censeo retinendam esse Antiselenen, ex rationibus iam antè adductis. Vel si quadrantis nocturni æstum etiam à Lunâ iam occidente & demersâ esse maius, dicito virtutem eius non esse propriè tractoriam, sed instigantem & impellentem spirituum, ac humoris quicorum qualitatem bibit. Lunâ igitur exoriente, fundo maris, & parietibus gurgitum & cauernarum illiduntur magnâ vi motores spiritus, resiliuntque in altum, & quoquouersus disperguntur vsque ad maris superficiem.

Et huius ecce rei insignem imaginem in Lucretio, dum fortè librum eius sextum aperio. Loquitur de magnete ferri inimico & abactore, qui ramenta seu scobem ferri in æneo vase suppositus exagitat, & in furorem ac æstum agit.

*Fis quoque, ut à lapide hoc ferri natura recedas*

*Interdum, fugere atque sequi consues a vicissim.*

*Exultare etiam Samothracia ferrea vidi,*

*Et ramenta simul ferri furere intus ahenis*

*In scaphijs, lapis hic magnes cum subditus esset.*

Hanc porrò ramentorum turbationem & ebullitionem *æstum* appellat: bellè, & pro æstu nostro maris.

Sed cur, Lunâ à culmine cæli per secundum quadrantem delabente, residunt maria, quandoquidem sidus non longius absit, nec alio radiorum coniectu adspiciat, quàm ubi scanderet prini quadrantis

drantis clium? Præter hoc nihil habeo: Quia plūmī spiritus agitatione illā in aërem expulsi sunt, qui mare antea ettollebant, aut certè laxiūs per aquam & sparsim vagantur. Deinde, tumor vbi ad summum venit, supprimi debet, quando causā quæ enim inflabat, aut suspendebat, debilior efficitur. Directus autem radiorum Lunæ, siue influentiæ illius marinæ, coniectus robustior est, vbi superficiem maris angulis rectis fodit, & spiritus fortasse tunc directè fundo impacti, confertius & altius in superficiem rebulliunt.

Non est etiam insigne & evidens discerniculum tumoris inter æstum diurni & nocturni quadrantis, in plenilunijs: quia etlū lumen sideris infra horizontem depressi illuminare mare, nostrum nequeat; aqua tamen ex lumine & tepore, quem iam antè immediatè à præsentia Lunæ accepit, mobilitatem aliquam & raritatem, quā spiritui impulsori magis obediat, retinuit.

Verū, cur non æstum nocturni quadrantis, iniquis, in marini alvei deuexitatem, an aliam figurationem, cum Contareno reijcis? Quia, inquam, nullus video, quā ratione mare, quod defluente in occalum Lunā se forbuit, iterum à figurā alvei reuocari & retumescere possit. Nam clius aut pronitas fundi, tardare, aut celare, ac præcipitare æstus valet; alia tamen debet esse causā principalis, quæ ipsos faciat.

Sed hoc etiam Contarenum valdè perplexum habuit; Vnde æstus aquas illas reperirent, quibus se ad tantam alvei plenitudinem inlant. ideo enim confugit ipse ad rarefactionem. Sed non fuit necesse. Nam ex abyſso subterraneā partim, aut ex cuniculis occultis veniunt, quibus maria inter se aquas communicant. sic multi Oceanum Deucalionem in Adriam latentibus venis influere credunt. Cetera quæ de æstu difficilia, in occultam (& nonne centies alibi faciendum est?) influentiæ istius Lunaris indolem conijcienda sunt. & fatendum: *Mirabilia opera Altissimi, & gloriosa & absconſa.* & pio illi Regi acclamandum: *Quam magnificata* Psal 123. *sunt opera tua Domine, omnia in sapientiā fecisti.*

## CAPVT II.

## De Fontibus.

**D**ISTINGVENDA hæc vocabula & res; fons, flumen, fluuius, amnis, riuus, torrens. Fons est aqua iugi fluxu e terra manans. aut certè, si fontes etiam comprehendere voles, qui in riuos non effugiunt, sed instar puteorum, aquas suas resorbent; Fons est aqua è superficie terræ iugiter ebullans. Flumen & fluuius synonyma sunt, & à fluxu nomen habent. Flumen enim est aqua maiuscula, perenniter alueo defluens. Amnis, inquit M. Varro, est flumen quod aliquid circuit. Nam ab ambitu dicitur Amnis. Amnes igitur sunt omnes mæandri, qui

Ouid.  
Met. 1.

*In mare deducunt fessas erroribus undas.*

Flumen à riuo magnitudo discernit, ait Vlpianus, aut circumcolentium æstimatio. Re enim verâ, definita magnitudo statui non potest, quam flumen flagitet. & apud quosdam riuus appellatur, qui alibi, vbi aquæ penuria maior, nomen ferre possent fluminis. Nulla verò aqua mihi dignitatem istam mereri videtur, quam homo passim saltu, nullo baculi adminiculo, transmittere valet.

Riuus ergo est aqua tenuior è fonte in alueum infusa, & iugiter decurrens. Pro alueo igitur riuum continente accepit riuum Vlpianus, cum finit, *Locum per longitudinem depressum, quod aqua decurrit.* Similiter M. Varro fontem pro loco scaturiginis, vbi inquit, *Fontem esse, unde funditur è terrâ aqua viua.* Vbi aqua viua, dicitur talis à motu continuo, vt Mercurius argentum viuum.

Ceterum multi riuus in vnum corriuati mensuram implent iusti fluminis.

Ouid. de  
Remed.

*Flumina magna vides paruis de fontibus orta.*

*Plurima collectis multiplicantur aquis.*

Riuum enim est, vt fons in totum statim flumen erumpat.

Flumen & riuum à torrente separat perennitas.

Ouid. de  
Remed.

*Flumine perpetuo torrens solet alius ire:*

*Sed tamen hac brevis est, illa perennis aqua.*

Torrentem definit Festus, *Fluuium subitis imbris concitatum, qui siccitatibus exarescit.* Torrens enim à torrêdo deductum, quod propriè significat, siccare. vnde Veteres aridum, torrum, & torridum

dum vocabant; & nos etiamnum, æstatem siccam, torridam. Quia verò torrentes ex aquâ cælesti, aut niuibus, Statius vocat

— *Nubigenas è montibus amnes.*

Græci verò χειμάρρως, ποταμός, *hiberna flumina*: quia hieme maximè liquatis niuibus, aut pluuijs, quæ tunc plures & pertinaciores, colliguntur.

Ex dictis intelligi potest, fontem, flumen, &c. constare aquâ, vt materiâ; eruptione verò è venâ subterraneâ, aut lapsu per alucum, tamquam formâ.

## ARTICVLVS I.

### *Vnde materia fontium.*

**F**lumina & riuï palàm fontibus eliquantur: occultior, & in abdito est fontium materia. Quidam sub terrâ cauitates amplissimas, quibus pluuiæ & niuæ aquæ toto anno colligantur, constituunt; & inde haurire fontes existimant. Sed refellit Aristoteles, quia tantum aquæ circa totum annum, terræ venis effunditur, quantus est totus terræ globus: igitur terram ad summam sue cutem excavatam, & aquis plenam esse oporteat, vt tot fontium & fluminum perennitati sufficere possit. Verùm, quia vis argumenti huius euitari potest, si statuas, aquam quæ toto anno effluit, non simul contineri venis subterraneis; sed parte vnâ in scaturigines fontium effusâ, supplementum à pluuijs nouis aut niuibus venire: addi potest è Senecâ altera ratio; Quòd aqua cælestis intra primam terræ crustam consumatur, nec in inferiora descendat. *Na mego, inquit, sibi vinearum diligens fossor affirmo, nullam esse pluuiam tam magnam, qua terram vltra decem pedes in altitudinem madefacias.* Deinde, quædam flumina erumpunt saxis & montibus, quibus parum conferre valent pluuiæ, quæ per nudas rupes deferuntur, nec terræ mollitiem, aut rimas inueniunt, in quas se insinuant. Et tales nihilominus toto anno aliqui, pleni & abundantes ire solent. vt de Langiâ Nemæ syluæ fluuiio, lib. 4. Statius:

— *Langia perennes*

*Seruât aquas. solet & rapidi sub limine Cancrï*

*Semper, & Icarij quamuis iuba fulgeret aëtri,*

*Ire tamen.*

Non videtur tamen hæc æstimasse P. Leon. Lessius lib. 1. de Pro-  
uidentiâ. *Flumina, inquit, ex niue & imbris, qui in mediterranciâ*

& montosis locis decidunt, colliguntur & perpetuantur. additque, per saxorum commissuras ad radices montium, & in scaturigines fontium peruenire. Vnde, ait, *si duobus vel tribus annis nihil vel pluuia vel niuis caderet, necesse esset omnia flumina, & omnes penè fontes inopiâ materia deficere.* & ego profectò siccitatibus perpetuis torridæ illius ætatis anni 1619. plurimos fontes aduerti exaruisse, aut tenuissimo & sitienti latice profluxisse.

Sed rem hanc dubiam facit Georg. Agricola, rei metallicæ diligentissimus Scriptor. Nam rimæ saxorum montanorum, plerumque vix octauam, inquit, digiti partem latæ sunt, raræ etiam commissuræ sunt, venulæque rariores, quæ centum sæpè pedibus à se distant. quomodo ergo tantum aquæ illac montium aluis infundi potest? Deinde, maior pars vaporum in mare repluit, antequam venti in terram abduxerint: & quæ in terram cadit, ab eâ, bonâ etiam in parte, sorbetur in alicuram plantarum; tantumque in cauitates subterraneas effundit, quod supra desiderium cecidit, nec poris combibere valet. Denique Eccles. cap. 1. disertè: *Omnia flumina intrant in mare, & mare non redundat: ad locum unde exeunt flumina reuertuntur, ut iterum fluant.* Si autem flumina ex mari: igitur & fontes inde hauriunt; quia per fontium scatēbras, flumina in alueos se euoluunt. Scio respondendum: fontes ac flumina mari exire, quia vapores & aquæ niuales ac cælestes è mari calore Solis extrahuntur, quæ postea in fontium & fluminum materiam refluunt & reliquantur. At tamen Scriptura magis indicat quemdam aquarum per venas subterraneas circuitum, quo è mari in fontium scaturigines veniant, & inde reuoluantur in mare, ut eodè iterum redeant. Genesis etiam c. 49. Iacob benedicit filio Ioseph *benedictionibus cali desuper*, (fundentis scilicet tēporibus suis pluuiam) *benedictionibus abyssi inuentis deorsum.* id est fontibus fluminibusque subministrantis materiam, ad irrigandam terram. quod repetitur Deuteron. cap. 33. distinguiturque manifestè duplex irrigatio, quarum vna supernè è nubibus, altera infernè ex subterraneâ abyssò venit. Innuit etiam ille Apocryphus, rogans, *quanta sunt habitationes in corde maris, aut quanta vena sunt in principio abyssi, aut quanta vena sunt super firmamentum?* Homerus quoque Iliad. φ. expressè in Oceano omnium fontium fluminumque originem ponit. Quod Plato in hunc sensum explicat: Oceanum venis quibusdam in barathrum, seu Tartarum, & abyssum subterraneam combibi: quæ deinde agitatione quadam

aut



aut reciproco tumore se in fontium scaturigines superfundat.

Aristoteli nihil horum placuit, sed aquam fontium ex aëre subterraneo, frigido, stagnante, & suffocato immediatè gigni. Quem tamen deserunt plerique Peripatetici, imò Iul. Scaliger etiam, qui rarissimè, aut numquam alibi solet. His præstructis,

Dico Primò: Pluuiæ & niuales aquæ plurimum conferunt fontium abundantix & perennitati. Satis id euincunt, quæ antè ostendimus. Et hæc etiam ratio est, cur arboribus vestiti montes pluribus venis scaturiant, aut vberioribus, quàm inuestes illæ & nudæ cautes; quia scilicet arbores vmbis suis defendunt aquam imbrium & niuem, ne Sole vaporatæ (quod in locis campestribus & apertis euenit) in altum rehalentur, antequam in caua montium per poros & venas destillent: vt scitè lib. 8. cap. 1. notauit Vitruuius.

Dico Secundò: Subterranea abyssus sola multos fontes alit, & plerisque omnibus aliis suppeditat aliquam materix partem. Id antè ferè satis firmauimus. & inde fit probabile, quòd vbique sub terrâ venæ vberes siccissimis etiam locis inueniantur, in altitudine non decem tantùm aut centum pedum, quòd fortè cælestis & collecticius humor peruenit; sed etiam orgyarum quingentarum, vt in Bermanno testatur Agricola.

Ex hac ergo aquarum ibi abundantia parabilem fontium materiam habemus: & vnà optimam rationem, cur illa abyssus, aut mare, non redundet; quia videlicet, mare venis transcolatur in abyssum, abyssus verò in fontes se partim exonerat. Vnde eleganter Rupertus lib. 2. de Trinit. cap. 24. & 29. Abyssum hepatis animalium comparat, vnde per venas & tubulos se sanguis per totum corpus dispergit. imò affirmat hunc esse fontem, ex quo fluxerunt quatuor flumina Paradisi: qui etiam matrix est, & mamma, in-  
Gen. c. a.

quit, ceterorum omnium. Ostendam quoque Articulo sequenti, Aristotelem ab hac mente vix latum vnguam abesse. Sed ingens difficultas & rixa est.

## ARTICVLVS II.

*Quæ causa aquam fontium in scaturigines pellat. Malè à Bodino, Conimbricensibus, Scaligero, Valesio assignatam.*

Svppono, omnem aquam naturâ grauem, & sponte suâ sursum per aërem se rariorem non scandere. Hinc sequitur, quod Aristoteles, & experientia aquilegum docet, fontes numquam altius è

terrâ spontali impetu emicare, quàm sit origo, vnde aqua primùm cœpit defluere. vt si in verticem montis deducere aquam velis, montem alterum paris aut excelsioris altitudinis, & in cacumine eius fontem reperire oportet; quem deinde tubo demisso, & in verticem alterius montis reflexo, infundas. sic enim tubus totus implebitur, & aqua per mediam vallem eousque ascendet (modò tubum tam longum habeat) donec superficiem suam in eodem circulo terræ centrum ambiente, cum superficie scaturiginis, componat. quia, vt Epist. ad Paullum Capram docet Bapt. Benedictus, aqua vna premit alteram, & tantum sursum eleuat, quantum ipsa est eleuata. Hinc vanitatis mihi suspectus Stasicrates ille Alexandri Mathematicus, qui gloriabatur se ex monte Atho statuat deformaturum, quæ sinistrâ oppidum decem millium hominum sustentaret, dextrâ fluuium ingentem in mare effunderet. difficulter enim flumen istud in altitudinem illam attraxisset.

Plutar. in  
Alexand.

Hoc igitur dari volo: aquam ex subterraneâ abyssu, non nisi à vi externâ in ora fontium attolli. aliàs enim fieret quod in Prouerbio est, & Aristoteles Platoni obijcit, *ἀπὸ τοῦ ὕδατος, sursum flumina*. Sed quænam illa vis est? Poëtæ Nymphas vris haurire, & effundere in scatebras fabulantur.

Iouian.

*Ceruleæ per stagna agitant liquentia Nympha,  
Alternisq; implent undantes voribus urnas,  
Alternisq; simul effundunt.*

Et video, quibus Angeli fortè haustores, abactis Nymphis, substitui non displicebit. Sed quæso, humaniùs paullo philosophemur.

Io. Bodinus lib. 2. Theatri, putat terram intra mare, vt naue m, vi deprimi: fontesq; emicare, vt aqua per rimas è fundo naus, aut per cribrum vi adauctum, sursum ebullit. Sed fundus huius opinionis falsus est: nempe mare gibbo altiori esse quàm terram. Item, non tantùm in montibus & vallibus, sed è plano etiam sæpissimè, aquà vi terræ tergum dirumpente, exsiliunt fontes. Denique, omnes terræ specus redundarent aquà, & tota terra vndique scatebris diffunderet; veluti sanguine corpus, abruptis & apertis vndique venis.

Conimbricenses Tract. 9. cap. 5. Meteor. credunt aquam corporum cælestium influxu in scaturigines attrahi: & adiuuari insuper vi quadam tractoriâ ipsius terræ, quæ more spongiæ humorem sursum prolecat. Idem Philosophi Parmenses in Thesibus quas nuper legebâ. & accedit Lud. Molina in Opere 6. dierum disp. 11.

ad

ad 8. affertque similitudinem panni, qui aquæ partim immersus, humorem altiùs euocat extra aquæ superficiem.

De astris illis aquariis, inprimis non placent: quia hoc est imbecillitatem fateri, statim tam procul & vsque in cælum fugere. Deinde, cum eadem astra per totum eundem terræ parallelum circumferantur, vbique in illo tractu vim illam attractricem ostendunt; quod est falsum. Cur etiam aquæ situlam sub dium expositam stellæ illæ aquariolæ non exhauriant?

Vis etiam magnetica aquam emulgens & sursum inuitans, per fugam difficultatis, & sine magno (apud me equidem) colore, asseritur aut allinitur orificijs fontium.

Primò, quia sic numquam venæ in cælum exsilirent, sed aqua vbi ad summum labrum peruenisset, aut ibi vi illà magneticà adhereret, veluti fixa & gelata, aut in venam suam resorberetur.

Secundò, cum vbique montium, collium, & terrarum nasci possint fontes, vel vbique sine delectu, vel nusquam statuendæ sunt vires illæ aquarum ancillantes & magneticæ.

Tertiò, manifesto experimento deprehendi possent. Nec enim tantùm ex aluo suâ & cavitatibus cacumen montis attraheret aquam; sed foris etiam per superficiem eius, è subiecto flumine aut lacu, subiret humor.

Quartò, vbi semel tota semita, quâ humor ab abyssò subterraneâ ad scaturigines ascendit, imaduisset, non ampliùs attraheretur illac aqua. ita enim in calce, pane, panno, (ad quorum experientiam nos vocant) videmus humorem non vltra scandere, vbi pori saturati, & siccitas expulsa fuerit.

Sed tamen, nec vim magneticam in calce, & id genus siccis & porosis (quidquid alij donent) concedimus. Viginti ampliùs sententiæ inter se rixantur (quas alibi diffundemus) quâ vi aqua per pannum, calcem, panem, partim immersum, subeat in partem siccam & suspensam extra humorem: vt videas quàm in minutis etiam istis, ne superbia nos inflet, ingenia humana inueniant ludibrium. Quidquid sit, non placet tamen à siccitate per vim attractoriam humorem, id est hostem, sursum euocari, in propriam necem. Obiter verò & in transcurso hoc, censeo tenuiores partes humoris suapte leuitate insinuare se in poros. Vnde euidentior est ascensus, vbi aqua calida est & fumans: itè in vino, & humoribus vaporulentis, quàm in aquâ. In pannum enim frigidum, aquam algidam, expertus sum ne hilum quidem per totum diem subisset.

In panem verò nostrum biscoctum, quo secundis mensis utimur, raptim satis aliquousque scandit vinum: sed spiritus vini præsertim id faciunt. nam spiritali aliquo humore statim & facile panem istum resolui patet, quia illicè flaccescere solet flante Austro. Spiritus autem illi partim sponte vino exhalantur, partim modico tepore, quo panis in vinum agit, resoluuntur. constat enim, vinum etiam gelidissimum, postquam à pane, etiam à forno aut ab igne non recenti, combibitum est, intelescere. Sed vnde vires illæ panis? Dic, sicca ista & porosa, spiritus quosdam calorigicos, ubi plures confluerint ab humore compulsi, continere. quod in viuâ calce euidentissimum: in ceteris, & paucitate & virium imbecillitate non ita se produnt.

Iul. Scaliger Exercit. 46. viam aliam est muginatus. Ut aqua putei, à lapide aut rotundâ tabulâ, quæ æqualis sit cum putei latitudine diametri, compressa, in altum per tubos exsilit: ita, putat, aqua subterranea ab aquâ maris aut alio pondere supernè pressa, eliditur & emicat in ora fontium. Miror ingenium Scaligeri potuisse hîc acquiescere. Aqua enim illa putealis exsilit per tubos ei immerfos, quia maximâ vi supernè à ponderosissimo lapide in puteum demisso premitur, nec alius, nisi per tubos apertos, exitus ei datur. Quid autem perpetuò sic lacus subterraneos premit? Si enim saxum fortè aliquod ingens in gurgitem cadat, aquam simul & semel in altum elidet: sed quis iterum eleuabit, ut denuò recidat, ut aquam sæpiùs & toto anno in scaturigines expellat? Mare verò, si humilioris orificijs plurimorum fontium est, ut nobiscum Scaliger supponit, numquam tam graui pondere in abyssum subterraneam decumbit, ut in altiore, quàm eius superficies est, locum exprimat. maximè cum non totâ mole ei proximè incumbat, sed per longos sæpè & tortuosos meatus tantum se infundat.

Hinc Valesius cap. 63. Philos. sacræ, ad æstus & fluctus maris recurrendum existimat. Fontes igitur ei scatent aquâ abyssi, quam æstus quotidiani, & fluctus tempestatum, qui sidera tangere & extingueræ pænè videntur, eousque attollunt. Sed iterum frustrâ. Nam æstus ad decem solos aut quindecim pedes, non ad altitudinem montium, ubi scaturiunt fontes, intumescit. tempestates autem & decumani illi fluctus non sunt tam solennes, ut fluxum diu pari semper abundantia continuare valeant. Itaque ubi tempestas & turbatio erit in mari, fontes statim vberius profluent, flaccescent verò cum fluxu & venam tenuabunt, si non siccent.

Deinde,

Deinde, vbi mare minimè tempestuosum, quale Pacificum, nulli in Regionibus circà, excelsis locis latices exsiliunt.

In re igitur tam perplexâ, & vbi tot & tanti Philosophi perdidertunt acumen, non mirum, Lipsium etiam nostrum lib. 2. c. 16. Physiol. aberrasse. Censet enim, superficiem maris iuga montium, vnde se exspargunt fontes, adæquare.

Finiamus hunc Artic. cum Plinio & Vitruuio. Volunt (& cum ijs D. Basil. Homil. 4. in Hexaëmerum, vt iam video) aquâ abyssi, spiritu in iuga montium adigi. Et patère inde existimat Vitruuius, quia si latius circa venam sodiatur, aqua residit, & refluit deorsum in naturale libramentum; vt aqua in ollâ tumorem ponit, sublato operculo, & diffugiente qui eam inflabat spiritu. Verùm, spiritum istum confertum & vehementem esse oporteat, qui tam altè aquam succollet, & tam vbertim impleat fontium venas: vt proinde afflatum eius facile percipere sit, si quis scaturiginibus apponat manum. quod tamen vanitatis est compertissimum. Deinde, vt spiritus tanto impetu aquam sursum afflaret, necesse foret, subterraneam venam esse tubum aliquem vndique clausum, & aquâ plenum, vt scilicet ventus infernè inspiratus, non aliorum effugere posset, quàm aquam ante se agendo, & expuendo sursum. Tales autem subterraneæ venæ nullæ sunt, aut rarissimæ. Tertio, quæ causa spiritum illum eleuat, & tantâ vi in venas adigit? Et (quod caput est) vnde illi tanta constantia, vt toto etiam anno per eandem semper venam sine interpolatione spiret? status enim tam pertinaces esse non solent, & sæpissimè interpellantur. Respondere oportebit, lebetes quosdam & lacus supra scaturigines fontium esse, in quos per interualla inspirentur & attollantur aquæ, quarum defluxu perpetuentur fontes, etiam cùm cessat spiritus ille, haustor ex abyssò. Verùm, tales nullos lebetes, altiores fontium orificijs, inueniunt metallarij, vt testis mihi Agricola. Cur autem effossâ latius humo, resorbeat se vena, facile ex sequenti Artic. intelligitur.

Sed hoc pænè omiseram. Fortasse quis existimet aquam ex abyssò in venas subire metu vacui. Sed caue hoc etiam credas. Non enim potest esse vacui periculum, vbi tanta venarum laxitas est; nec ita plenæ, quin plurimum vbique aëris admittant. ipse etiam aër per omnes terræ poros, velut in spongiam insinuatus, & in omnem vacui occasionem paratus, liberat aquam ab illâ se mouendi, ad depellendum vacuum, sollicitudine. Vnde licet arte  
creari

creari possit tale periculum vacui, vt aqua per tubum vndique conclusum ascendat, exsucto aëre: id tamen exemplum in venis subterraneis locum inuenire vix & ne vix potest; quia nec est qui exsugat aërem; &, si sit, alius per parietes venarum facile ei succedet, qui rimosi sunt, & vbique respirant.

### ARTICVLVS III.

*Vera caussa quæ aquam fontanam deducit ad scaturiginem.*

**D**ico Primò: Aquæ pluuiæ plerumque grauitate suâ in ora fontium influunt. Sunt enim altiores, quia supernè in hiantes saxorum rimas insinuatæ, visceribus montium colliguntur, & inde pondere suo ad radices defluunt, vbi frequentius scaturigines ebulliunt. Idem est in aquis niuium, quæ canis montium capitibus in viscera liquantur & destillant.

Dico Secundò: Aquæ altera portio, quæ non è cælo, sed ex abyssò & humili in ora fontium venit, subit per vaporationem. Prob. quia nullam aliam viam fecimus reliquam. Secundò, experimento metallariorum, qui supra capita fontium, nil nisi rosidos lapides, & terram vapore humectam reperiunt.

Tertiò, Aquileges signû venæ sublatentis habent, si manè vaporem tenuem è terrâ scandentem viderint. què lib. 8. c. 1. deprehendi docet Vitruuius, mento ante ortû Solis æstate (Augustum mensem ceteris præfert Palladius) in terram procumbente, oculisquæ ad Orientem versis, & superficiem terræ aspectu radentibus. vbi vapores tremulos & colludentes aspexerint, ibi fodiunt. Similiter tussilago, & aliæ quædam herbæ, quarum radices vaporem illum auidè bibunt, indicium latentium aquarum præbent. Cùm igitur fumos istos vaporulentos iugiter ex aquis subterraneis scandentes habeamus, quidni iuxta terræ superficiem, & in capitibus montium, statuimus frigore redensari, & refluere in origines fontium? Et hinc ecce optima se mihi suggerit ratio, quare hieme nec niuali nec imbriferâ, fontes aquam tamen largiûs, quàm æstate (nisi valdè pluuia sit) vomant. Plures enim à spiritibus tepentibus & inclusis terræ per hibernum frigus, vapores ex abyssò, & alijs aquis subterraneis, gignuntur; qui venas proinde fontium vberiores faciunt.

Quartò, Thermarum, & fontium tepentium aquæ à subterraneis ignibus vaporantur, vt Artic. proximo ostendam: igitur verisimile est, ex ijsdem fumis refrigeratis, & excusso longis per venarum

rum anfractus erroribus feruore, ceteros fontes lymphas suas colligere. Et hæc intima caussa videtur, cur montes præcipue sint scaturiginosi. quia, inquam, sæpissimè ignes suppositos habent; etiam si ob profunditatem, vel exiguitatem, à nobis non intelligatur. Mons igitur instar capitis Alembici in distillationibus Chymicorum est, in quo vapores à lento supposito igne in altum expulsi, refrigerantur, & tam ab internâ formâ aquæ, quàm rigore ambientium factorum, ad naturalem densitatem se reducunt: guttatim quidem primò, sed plures per modum imbris in vnum torrentem confluentes, & prolixiore circuitu incrementa colligentes, plenâ tandem venâ ebullant. Ex quo liquet, fontium generationem imbribus planè esse affinem. vt non immeritò (huc, nisi mentior, alludens) dixerit Poëta ille animosus,

..... *summis cognatos nubibus amnes.*

Stat.  
Theb. 1.

Vel etiam si hæc imago allubescit: quod in homine, lacrymæ & catarrhi, frigore cerebri, in cranio densati & replentes sunt, id in montibus fontanæ aquæ. caput ergo mons est, oculique, fontium scaturigines & orificia: iuxta illud Ieremiæ cap. 9. *Quis dabit capiti meo aquam, & oculis meis fontem lacrymarum?* Lacrymæ tamen falsæ, fontes plerique dulces sunt; quia illæ per loca algentia & angustissimos terræ poros non transcolantur, nec longis ambagibus in oculos è capite defluunt, vt fontes in scaturiginem solent. Hæc enim caussa aquis fontanis falsedinē ponit, si quam fortè initio (quod tamen rarum) habuerūt. eadem etiam longâ agitatione spiritus excutit, qui faciebant ei teporem. Quandoque tamen euenit, vt statim, & recentes adhuc ab ignibus, gelidæ tamen aquæ ebulliant: vt in Aquitanîâ & Pyrenæis, vbi tenui discernente intervallo frigidæ iuxta calidas emicant, teste lib. 3. 1. cap. 2. Plinio. Verosimile est, vtrasque ab eodem vicino subterraneo igne vaporari: sed calidæ laxiorem fortasse venâ inuenerunt, frigidæ arctiorem, & earum feruor per adstrictos & coniucentes poros colatus, strangulatur antequam in lucē erumpant, & extinguitur.

Ex his etiam sumitur ratio, quare fontes quandoque exarescant. Vel scilicet, quia vena collabente terrâ obstruitur, auertiturque, aut retroagitur humor; vel quia siccat, sine nouo supplemento, aqua, vnde ascendit vapor, aut igniculus vaporans suffocatur. Hinc enim, quia calidi fontes ignem in materiâ multâ ardentem habent, nec subterranei lacus in quos agit, facillè deficiunt, magis perennes & quodammodo æterni sunt. Rarissimè quippe, ait

Nn lib.



lib. de Thermis cap. 2. Fallopius, fontium calidi siccantur, extat-  
que, inquit, à 2000. annis memoria Aponitanæ aquæ. de istis certè  
à 1600. paullominus annis, lib. 7. Lucanus:

— *Aponus terris ubi sumifer exit,  
Atque Antenorei dispergitur unda Timani.*

Fatetur etiam Gœbelius, Thermas Annæbergenses in Misniâ  
pati semper vbertate venæ, æstate, hieme, à tot iam annis pro-  
fluere.

In hanc etiam de origine fontium opinionem faciliè deduci po-  
test Aristoteles, cum subterraneum aëra in fontium latices cogi  
affirmat. Vaporem enim sæpè aërem vocat: & reuerà totus hic  
circa & intra terram aër, continuus ferè quidam vapor est; cum  
totius elementi aëris sit quoddam sedimentum, & in ipsum om-  
nes superiorum regionum humores paullisper grauati decum-  
bant. Ac quàm minimo pænè frigore statim auelcat, patet ex su-  
perficie exteriori vitrorum, quæ infuso vino aut aquâ gelidâ, subitò  
rorat, & veluti pinguedine quâdam illinitur, aëre scilicet ambien-  
te, frigore liquoris infusi, in rorem coacto. Non enim doctissimo  
Mercuriali accredo, qui liquorem transsudare credit: cum multis  
experimentis mihi constet, vitra minimè porosa esse, aut non tam  
laxè, vt momento transmittant tam densum humorem.

Non tamen existimo, solum aërem subterraneum sufficere per-  
ennitati tot fontium & fluminum: quia breui tempore totum  
pænè elementum aëris oporteret in cauernas subterraneas deflue-  
re, vt perpetuò conuertatur in aquam toties aëre densiorem. De-  
inde, Scriptura sacra, è mari, non ex aëre, generari fontes & flumi-  
na significat: quia scilicet mare venis terræ illapsum, ignibus de-  
inde & spiritibus illis viscera magnæ Matris calefactantibus, &  
quassantibus quandoque, in capita montium vaporatur. Certè  
enim vaporationem hanc necessariò interponendam, iam antè, aut  
fallor, ostendi. nec aliùs modi mihi in mentem venit, dum altitu-  
dinem locorum, vnde emicant viui latices, contemplor. Ecce, vt  
alia infinita insuper habeam, fons Marfyæ amnis *ex summo montis  
cacumine excurrit*, ait lib. 3. Curtius. In Oceano iuxta Scotiam sum-  
mum excelssissimi scopuli culmen aquam dulcem largissimè vo-  
mit, magno, inquit, Naturæ miraculo. In supremâ etiam altissi-  
morum montium Peruvianorum planitie frequentissimi lacus  
sunt, non ex niuib. collectitij, vt Ioseph. Acosta lib. 3. c. 16. osten-  
dit, sed naturali, & toto anno æquali abundantia, infernè eos alen-

te venâ. & vt intelligas, ignium (qui sub illis montibus satis certis cum crateribus plurifariam se in auras exspuant) effectus esse; quidam eorum sunt calidi.

Quispiam tamen pertinax, qui in aëre subterraneo sat esse materiz in fontes, sine aquarum vaporatione, defendere perseveraret, exemplo hoc, quod nuper in Cardano cum voluptate & admiratione legebam, iuuari potest. Anno 1481. quidam æger in Italiâ, Lib. V. riet. 3. cap. 44. vrinx libras singulo quoque die 36. reddebat, cum in cibum potumque simul non plus 7. libris insumeret. Vnde vrina 29. libris superabat. idque sic factum spatio 60. dierum. quo tempore colliguntur libræ vrinx 1740. vltra cibi potusque substantiam; cum tamen totum ægri corpus vix 150. libras pondere æquaret. *Quæsum fuit à Io. Marsiano, inquit, vnde id contingere posset? respondit, aërem qui in arterijs vbique contineretur, in substantiam aquæ conuerteri, eaq; cietâ, alium succedentem similiter in aquam conuerteri; atque ita multiplicari.* Verumtamen licet similis conuersio subterranei aëris iuuare possit generationem fontium, non tamen implere; vt antè satis probatum.

## ARTICVLVS IV.

*Vnde calidi fontes qualitatem illam habent?*

**F**ontes aut puri sunt, & nullo sapore infecti, aut medicati: qui scilicet peregrinâ aliquâ qualitate, & sapore præsertim, adulerantur. Inter medicatos, calidi maximè insignes sunt. Vocantur etiam à plerisque, metallici; quia metallum aliquod vt plurimum, ait Fallopius, respiciunt. quidam tamen communi frigidorum, aut nullo sapore sunt, vt thermæ in agro Lucensi & Pisano. quidam etiam tam grato, vt quis præijs, ait lib. 8. cap. 3. Vitruulus, non desideret fontem Camœnarum extra portam Capenam vel Martiam viâ Prænestinâ, quem Plinius clarissimum vocat toto orbe fontem.

Quidam credunt, radijs solaribus aquam subterraneam feruefieri. sed illi ad istam profunditatem non perueniunt. nec aquas quidem Soli expositas sic calefaciunt.

Alij agitationem ventorum sub terrâ flantium malunt. Sed maior longe tempestas quâ venti marinas exercent & iactant, non creat tantum feruorem. Deinde, vbi sub terrâ silentium erit à ventis, thermæ egelidæ statim aut frigidæ profluent.

Bodinus allifione quâ se ad rupes & angulos subterraneorum cauernarum frangunt. sic enim equifones putealem aquam agitatione, contra equorum tormina, rumpunt & tepefaciunt. Sed isti nil iuuant Bodinum. rarefcere quippe aliquantum istâ diuerbatione potest aqua, & spumare, non ita accendi. Metallarij etiam ingentibus præcipitijs frangi aquas subterraneas, frigidâs tamen, inquit Agricola, experiuntur. Denique sapor & odor satis plerumque indicant materiam ignium quibus incaluerunt.

Dico igitur Primò: Nulla alia caussa probabilior fontes feruefacit, quàm ignis subterraneus. Prob. quia plerique omnes nitrum, bitumen, sulphur olent, & resipiunt, id est, ignium pabulum. Deinde maximè in Regionibus, ubi montes & alia loca flammivoma sunt, ut in Campania, & nouo Orbe, calidi fontes manant. In Persu, ait Ios. Acosta, ita quidam feruent, ut nemo, etiam ex certamine, spatio Salutationis Angelicæ valuerit in ijs continere manum.

Sed ubi ignes isti ardent? sub fundo, & circa canales extrinsecus, an in ipsis aquis, quæ per canales labuntur? Agricola timet lapideos etiam canales breuî corrupendos igne, si hic ijs supponatur: itaque ignes aquis ipsis intra tuborum & meatuum cautatem permisset.

Dico tamen Secundò: Thermæ nullo exotico sapore corruptæ, circumiecto canalibus igne, ut in lebete, aut dracone, videntur calefieri. Veteres enim, ut testis mihi Seneca lib. 3. Nat. c. 24. æreos dracones, pluribus spirarum voluminibus tortuosos consiciebant: quibus aqua supernè infusa, & circumcurrrens, sæpiusque & identidem suppositum ignem per multas spiras ambiens, tepore primum in luminis voluminibus concepto, collectoque deinde in ceteris feruore, calida vomebatur. Canales autem illi subterranei non tam cito ignibus violantur, aut quia materia contra ignes contumax est, aut quia hi tepentes tantum, nec flammâ vorace ardent. aqua etiam ipsa intra tubos, eos in parte tutatur. Si autem aquæ bituminis aut sulphuris ignes lauarent, spiritu ipsorum, aut sapore tingerentur.

Dico Tertiò: Frequentius tamen ignis in ipsis aquis flagrat, & adhæret parietibus canalium. Ita Agricola, Fallopius, & alij. qui materiam eius solum bitumen esse sciunt. quod tantum adest ut ab aquis extinguatur, quin etiam acrius & diutius in ipsis alat flammam. Vnde etiam aqua thermarum in agro Parmensi, ait Fallopius, statim ad se rapit visum ignem, nec potest, nisi ven-

tio aut

to aut panno extingui, idque ob bituminis & naphthæ copiam.

Bartholinus tamen & alij quidam, præcipuam materiam in sulphure, non bitumine, esse constituunt. quia thermæ pleræque omnes sulphur, rariores bitumen sapiunt. Bitumen etiam solam aquarum, quibus innatat, superficiem flammâ suâ lambit, non ardet intra aquam.

Falsum etiam videtur, quod sumit Agricola, solum bitumen in aquis seruare flammant. Nam lignes artificiales è sulphure passim concinnantur, qui sub aquis viuunt. & Liuius Dec. 4. lib. 9. *Maronæ*, inquit, *Baccharum habitu crinibus passu, cum ardentibus facibus decurrisse ad Tiberim, demissasq; in aquam faces, quia vinum sulphur cum calce inesset, integrâ flammâ extulisse.* Et licet aquis extingueretur, ardere tamen in fornibus cuniculorum quibus allinitur, extra aquæ contactum, posset, & inde eam præterlabentem vaporare.

Seneca verò non tantum ardere sulphur in aquis, sed aquâ affusâ accendi ut calcem, existimat. quem tamen experientiâ suâ refellit Fallopius. *Sulphur, ait, in aquam proiectum, siue aqua sit calida* Lib. de Thermis *siue frigida, non effervesceat. hoc expertus sum sapius in venâ sulphuris* cap. 4. *in agro Volaterrano, & alibi, in quocumque sulphure, vino, & non vino.*

Anselmus Boëtius tamen lib. 2. cap. 293. de Gemmis, affirmat, *oleum sulphuris verum, si aqua misceatur frigida, tam calidum in vitro reddi ut id manu vix teneri possis.* Vnde oleum istud non nihil à naturâ sulphuris oportet abiuisse.

Verum, unde tantum subterranei sulphuris & bituminis, quod alendis vno loco per tot annos ignibus sufficiat? Respondet Fallopius, sulphur & bitumen perpetuò regenerari. nam constat, ait, quatuor annorum spatio, locum sulphure effuso, terrâ repletum, iterum ad naturam sulphuris reuerti: idque satis expertum esse in agro Mutinensi. Carbones etiam Leodiensium, & metalla etiam, licet tardius, regenerantur. De ferro certè in Iluâ siue Ætholiâ, maris Mediterranei inter Corsicam & Italix continentem insulâ, lib. 5. auctor est Strabo. & etiamnum hodie effoditur ibi copiosum, magnò Ducum Florentiæ prouentu. credunt autem Metallarij, mille tantum annorum circuitu terram in ferrum reduari. Salem etiam fossilem apud Indos regni dixit olim Clitarchus, & Agricola Parium marmor. Plin. lib. 36. cap. 15. *Inter plurima alia Italix miracula, ipsa marmora in lapicidinis crescere auctor est Pappius Fabianus.* *Natura rerum peritissimus. Exemptores quoque as-*

*firmant compleri sponte illa montium ulcera. Quæ si vera sunt, spes est, numquam defuturam luxuriam.* Diu autem in eodem loco aut propinquo adhærent thermarum ignes: quia absumpto aut liquato sulphure vel bitumine, aliud affluit in locum præcedentis, sequiturque, vt in lampade, alimentum flammam. Ignis etiam illi malignè (vt inter aquas & contraria debilitantia) ardent, ideoque pabulum suum non citò & voraciter absumunt. & hinc pluribus Regionibus fontes calent, vbi nulli tamen crateres igniuomi sunt. Verumtamen alio etiam modo, sine igne Sennertus fontes nobis calefacit. Spiritus enim vitrioli & oleum vel sal tartari, item aqua fortis & tartarum, denique butyrum antimonij & spiritus nitri, et si frigida, confusa tamen ad feruorem se adducunt. Quid si ergo in venis aquarum permisceantur?

## ARTICVLVS V.

*Vnde frigidi medicati qualitatem illam traxerunt?*

**C**onsentiunt omnes, fontium istorum aquas, venas metallicas, aut salem, alumen, nitrum, sulphur, bitumen, & id genus fossilia perlabi. id enim ex colore, odore, sapore intelligi satis potest. Dupliciter autem aqua ab ijs quæ præteruehitur infici & tingi solet: spiritaliter, aut corporaliter, vt loquuntur Chymici. spiritalem tantùm tincturam rapit, quando spiritus metalli aut mineræ sic ei se permiscet, vt ramenta aut succum nullum deradat, & secum deuoluat. corporalis verò tinctura erit, si mineræ substantiam secum trahat.

Inter fontes medicatos famosissimi sunt aciduli illi, quales Spadani nostri, quos natura in calculi & omnium obstructionum remedia fluere iussit, aliæque beneficia, quæ apud Clarissimum Medicum Henricum ab Heer Tongrensem legere in Spadanis eius potes. Talis olim fons ille Tongrorum, de quo lib. 3. 1. c. 2. Plinius: *Tongri ciuitas Gallia fontem habet insignem plurimis bullis stellantem, ferruginei saporis, quod ipsum non nisi in fine potius intelligitur. purgat hic corpora, tertianas febres discutit, calculorumq; vitia.* Hic autem aut exaruit, aut trahi ad Spadam nostram potest, quam fortè olim ager aut ditio Tongrorum complexa fuit. Acidulas autem istas chalcantho siue vitriolo abundare censet Bartholinus. Verumtamen non vnica venam, sed plurium confluentem plerumque continent, vt ostendit noster Henricus ab Heer: & Spadanus

danus Geronster præter alia, sulphur, odore, & alui (quod etiam experti fumus) citatione euidenti prodit.

Multi etiam medicatorum, etiam frigidi scaturiant, initio tamen caluerunt, & longo meatu fetuorem ac spiritum exhalarunt. Hinc Fallopius existimat Aquirianam, quæ ex Italiâ in Germaniam & Galliam passim defertur, ac per centum etiam annos incorrupta perseverat, in origine calidissimam fuisse, & ignem perfectissimam hanc & pænè indissolubilem mixturam fecisse.

Fontes qui auri aut argenti venas lauant, ramenta & scobem metalli sui fluminibus etiam sæpè inuehunt. Sic auriferi olim Pæctolus in Lyciâ, Hermus in minori Asiâ, Tagus in Lusitaniâ. In Tago tamen nihil hodie auri reperiri intelligo: sed corallorum ibi tantum esse piscationem. In Indijs Occidentalibus, ut in Hispaniolâ, Ballouentâ, Cubâ, in Regno Chilli, Quito, Granatz, &c. sincerissimi auri arenulæ in pluribus fluminibus inueniuntur; sed propter difficultatem separationis parum inde redit ad Hispaniarum Regem.

Fontium etiam & fluminum color, à metallo & minerâ quam lauant, aut terrâ venit, quam admordent. Sic in Umbriâ.

*Sulphureâ Nar albus aquâ.*

alibi à cretâ, lactei quidam fluunt. quandoque etiam non aquæ, sed fundi est iste color. Talis non vno loco apparet Danubius: & Andreas Corsalus Florentinus narrat, Oceanum inter Mozambicum & Indiam Orientalem lactescere, quia cretacei fundi rapit speciem. sic quoque Peneus in alueo virorem simulat, cum exhaustus splendorem habeat argenteum. Quidam etiam atramento se infuscant, ut Ganges in Indiâ, Galefus in Italiâ, sed Allera in Germaniâ, & quidam in Hispaniâ Nouâ, omnium atramentosissimi & nigerrimi sunt. Est in Regno Perûano tam ruber & miniatus, ut mero sanguine dicas profluere. Rhenus subuirdis, Mœnus & Tiberis ab arenis flauis, Mosa meus argenteas undas declinat paullisper in cæruleum.

## CAPVT III.

*De Fluminibus.*

## ARTICVLVS I.

*De fluminum alueis.*

FLUMINA è fontibus & riuis vnum alueum capaciorum influentibus oriri, antè diximus, & essentiam eorum in aquâ, & iugi illo per alueum defluxu consistere.

De hoc ergo fluxu, tamquam ipsorum formâ, & alueis, per quos incedit, aut præcipitat, item de quibusdam alijs proprietatibus, aliquid paullo explicatiùs enartandum. Alueos fluminum tertio Mundi die excavauit, & ad fluxum in mare inclinauit eorum deuexitatem Omnipotens manus. quod certissimum est in alueis quatuor illorum fluminum Paradisi. Sed pluri mi etiam alij in reliquâ parte Orbis eiusdem Artificis sunt, præsertim qui inter montes & lapideas ripas decurrunt. Montes enim ab initio statim creationis rerum excitatos, duratosque, vt essent veluti ossa magnæ matris Telluris, satis innuit Sapientia Prouer. 8. *Necdum montes graui mole confiterant: ante colles ego parturiebar. adhuc terram non feceras, & flumina, & cardines Orbis terra.* Ridiculum enim est quod asseuerant nostri Athei, vniuersos montes fortuitò hîc aut ibi à spiritu subterraneo in auras subuectos esse. rarissimi enim alicuius molis colles sunt, quos spiritus ille terræ motor excutit: & stultum id credere de Atho, Olympo, Atlante, Alpibus, & duplici illâ catenâ montium Peruanorum, czlo pænè minantium, quæ per 500. leucarum spatium à Septemtrione in Austrum, perpetuis iugis decurrit. Verissimè igitur ad Dominum suum Psaltes diuinus: *Ascendunt montes, & descendunt campi in locum quem fundasti eis.* & minimè fabulosè ille fabulosus:

Psal. 103.

Ouid. 1.  
Met.

*Addidit & fontes, & stagna immensa, lacusq;  
Fluminaq; obliquis cinxit declinia ripis.  
Iussit & extendi campos, subsidere valles,  
Fronde tegi siluas, lapidosos surgere montes.*

In mare autem maxima fluuiorum pars se refundit, vt irrigatis per longos & ambitiosos errores, quas lauant, Regionibus, quod super-  
est



est aquarum, mari, seu fonti suo, reponant, vt pro tot emulgentibus sub terrâ venis, & nubibus deinde, abundantia semper ei suppetat.

Licet autem plurimos alueos Deus initio concinnauerit; aquæ tamen etiam, in molli præsertim terreno, multos sibi ipsæ inarauerunt, non paucos denique humana industria fecit. & Aristoteles lib. 1. c. 14. Meteor. septē ostia Nili manu facta videri, excepto solo Canopico affirmat. Drusus Cæsar cōtra incursiones Hollandorum, Rhenum in Iselam (quo hodie suam tutantur Velaniam) deduxit. Corbulo Romanorum in Germaniâ sub Claudio Dux, *ne miles otium exueret, inter Mosam Rhenumq̃, trium & viginti millium spatio, fossam produxit, quâ incerta Oceani vetarentur.* Tæc.  
lib. 11.  
Annal.

Ceterum plurimorum fluminum aluei in Aquilone aut Austrum vndas suas exonerant; in Orientem tam pauci, vt dicere ausit Poëta iste Hispanus:

*Quâ colitur Ganges, toto qui solus in Orbe  
Ostia nascenti contraria soluere Phæbo  
Audet, & aduersum fluctus impellit in Eurum.*

Lucan.  
Lib. 2.

Verum Danubius etiam & Padus in Ortum se detorquent: Tagus in Lusitaniam, & Africæ Niger in Occasum. imò Ganges magis defluit in Meridiem, quàm Solem ortiuum.

Certamen autem est de principatu inter alueos fluuiorum. Aristoteles noster Indo videtur dare palmam, quia alicubi amplitudine 50. stadiorum siue 6. amplius mill. Italicorum se dilatat. Arrianus tamen Gangem ei præfert. Virgilius Eridanum seu Padum fluuiorum regem nominat. Diodorus Siculus Nilum potius coronat. Sed controuerſiam fluuius Amazonum siue Maragnon in Americâ diremit, qui latitudinem ad 70. etiam leucas diffundit, mare veriùs, quàm fluuius. Suppar deinde ei fluuius argenteus, vulgò *Rio de la plata*, quem non adæquent Nilus, Euphrates, Ganges, confusis in vnum alueum & communicatis aquis. Proximus est in eadē Americâ fluuius S. Magdalenæ, qui tâto impetu Oceanum inuehitur, vt intra decimam leucam, sale victo & vndis, dulcedinem & fluxum seruet, duarum leucarum aquæ latitudine.

Rapiditas fluuiorum ex aluei deuexitate præcipuè oritur. quantò verò fontes oporteat esse altiores ostijs, video non conuenire inter Geometras. Cardanus lib. 1. Variet. cap. 6. dicit antiquos in aquæductibus sesquipedem in centenos pedes constituisse. *sed nostra*, inquit, *asate, subtiliore ratione, sed ad irrigandum solum oppor-*

*tunâ, in singula spatia pedum 600. solum pollicem vnum declinamus. ut ergo aqua rapidius decurrat, & naues facilè deducere valeat, maiorem inclinationem alueus habebit.*

Si ad Mathesin res ista vocetur, incile aquæ ductus (ita Iuris periti vocant locum, vnde incipit incidi canalis) in millenos passus, vno pede altius emissario esse oportet. Atque ita consequenter, fluminum aluei post millenos quosque passus, ut aqua molliter defluat, deurgere ad vnum pedem debebunt. Ratio huius mensuræ est; quia linea recta Orbem terræ contingens, post 1000. passus ab illo puncto contactus, doctrate pedis, siue 9. vncijs, id est tribus quartis, à subiectâ terræ circumferentiâ distat, si totum ambitum terrestrem 5400. miliaribus Germanicis circumscribas. Aquam igitur, aut pilam, in fine istius lineæ si statuamus, decurret per eam vsque ad punctum quo terram contingit: idque paulò pronius faciet, si in fine ad totum pedem à terrâ eleuaueris. Hinc sequitur, finem aluei in longissimis illis fluminibus longè centro terræ propinquiores, quàm fontes eorum esse, etiam si per singulum milliarem alueus ad vnicum solum pedem descendat. Ut licet Nilus lineâ rectissimâ per circulum terræ maximum à Tropico Capricorni ad ostium Canopicum, id est per 54. gradus siue 3440. miliaria Italica, in Mediterraneum mollissimo lapsu aquas suas deduceret; initium tamen aluei, quod circa Tropicum Capricorni, non procul Promontorio Bonæ spei est, 3440. (quis credat?) pedibus eleuatius à centro terræ, quàm fundus ostij Canopici iuxta Alexandriam, foret. Fluij autem rapidiores ad 3. 4. 5. aut plures pedes ad centrum terræ per singula miliaria declinant. Si verò ad 6. pedes, cursus tam rapidus & torrens erit, ut regendis in eo nauibus fiat incommodus, inquit ad c. 6. lib. 8. Vitruuij, Daniel Barbarus.

Ridiculum etiam est, quod lib. 1. cap. 6. Variet. docere videtur Cardanus: Imam fluuiorum superficiem quæ fundum tangit, inclinationem tantum habere, non verò summiâ, quæ aërem stringit. Sic enim perpetuò, quò longius à Teaturigine recederent, fluminum profunditas intumesceret, & altitudo breui spatio eleuationem fontis superaret.

Sed verumne est illud, quò altius est flumen, eò rapidius esse? Experienciâ id constat, si deuexitas aluei eadem sit, aut par. Nam hibernis torrentibus inflata incitant magis naues, & velocius deferunt quicquid natat in superficie. Causa est in abundantia aquarum, quæ magis se premunt & inuicem præcipitant. Ita etiam liquor

quor è pleno vase , detracto epistomio , emicat longius , & maiori impetu.

Quò magis etiam flumina à centro terræ distant , hoc celerius , pari impulsu , circa terram gyrauntur ; quia circulum maiorem circumcurrunt ; vt circumferentia rotæ rapidius in orbem se agit , quàm modiolus , qui excipit axem.

Ex dictis iam patet , causam efficientem defluxûs fluminum , esse propriam aquæ grauitatem , quæ per aluei deuexitatem centrum quærit , & ad propinquissimam , quàm potest , loca defluit. vnda etiam succedanea antecedentem sæpè vrget ; & hæc deinde illam , ratione & iure continuitatis , blanditer trahit & vellicat.

## ARTICVLVS II.

*Quæ de causâ Nilus , Niger , Melas , Argentens ,  
alijsque fluuij sic exundant ?*

Q Væstio de Nili inundatione omnium antiquorû ingenia exerceuit. Sesostris & Philadelphus Ægypti Reges , Canibyses Periarum , Alexander Macedonum , quoddam in vltimam Æthiopiam miserunt , vt Nili fontes , & incrementi illius quotannis statim causas , vestigarent. qui omnes incerti redierunt. Nouissimè Nero Cæsar , ait lib. Nat. 6. cap. 8. Seneca , vt aliarum virtutum (ô si scias , qualis breuî futurus ! ) ita veritatis in primis amantissimus Centuriones duos misit. qui , vt idem se ab ijs audiuisse narrat , ad immensas tandem paludes peruenierunt , quarum nec incolæ exitum sciebant. Iul. Cæsar etiam apud Lucanum lib. 10. super cœna illa Cleopatrz post cæsum Pompeium , ex Achoreo , sacerdote Ægyptio , de Nili incrementis , tam ab alijs curis securus est , in illo rerum æstu , vt multa quæreret. Sed scire legem exundationis antè oportet , quàm causam inuestigemus.

Primò ; vt narrat Leo Afer , & qui hodie colunt Ægyptum , circa 17. Iunij diem , id est 27. nostro iam stilo , incipit intumescere , statim scilicet post solstitium. durat verò incrementum ad quadragesimum diem , secundum Strabonem , totidemque decrementum : totaque periodus ambit dies octoginta ; etsi Herodotus extendat ad centum. Legem verò aliquando non seruasse constat ; vt decimo & vndecimo Regni Cleopatrz anno , alueo se contulit. quo interpretati , nec vanè , significatam Imperij Antonij & Cleopatrz defectionem. Sub Theodosio etiam aliquamdiu stetit :

quod ideo factum calumniati sunt Gentiles, quia Imperator ei vetuisset ampliùs sacrificari. Sed ecce statim abundissime se superfudit, & fertilitate insigni egregiè pensauit antecedentium annorum sterilitatem. Verùm ne sic quidem compressa calumnia: & publicitùs in theatris cum risu clamabant, *senem Nilum quidquid iam aquarum habuisset eminxisse.*

Poriò tam spatiolà est inundatio, vt valles & campi lateant, opidaque cum collibus quibus inædificantur, more Cycladum insularum extent; nèc vllum in Ægypti mediterraneis, nisi per nauigia, sit commercium.

Ad modum autem incrementi, anni sequentis fertilitas respondet. In 12. cubitis, ait lib. 5. cap. 9. Plinius, *famem sentit, in 13. etiamnum esurit, 14. cubita hilaritatem afferunt, 15. securitatem, 16. delicias. Maximum incrementum ad hoc aui fuit cubitorum 18. Claudio Principe, minimum Pharsalico bello, veluti necem Magni, prodigio quodam, flumine auersante.*

Nec longè abludunt quæ scitibit Leo Afer, qui Ægyptum oculis, & habitatione Africam vsurpauit; conuersusque à Mahumete ad Christum, à Leone X. Pont. Max. nomen in Baptismo accepit: Scriptor, vt mihi videtur, non infidus.

His præstruëtis, Thales, Plinius & Alexander, in Etesijs causam inundationis ponunt; qui à Septentrione reflantes contra cursum fluminis, aquas sustinent, quæ ab alijs à tergo affluentibus pressæ, ripis se superfundunt.

Sed non magnæ operæ est refellere. Etesiz enim venti lenes sunt, qui aquæ cursum sic frænare non valent: nec ipsæ & tam statis anni temporibus, vt Libro 4. vidimus, semper spirant.

Senecio etiam ille Achoreus lib. 10. apud Lucanum perperam docet Cæsarem, Nilum influentiâ Mercurij intumescere, vt Lung Oceanum. Nec enim Nili periodus Mercurium adspicit, vt æstus marini Lunam.

Fracastorius rem istam in Epist. ad Io. Bapt. Rhamnusi cum cutâ tractauit, & credit à torrentibus pluuiarum, quas Sol circa Tropicum Canceri leuat, Nilo infusis fieri hoc incrementum. Verùm imbres isti in Æthiopiam recidunt, 600. milliariibus à Cairo Ægypti, vt fatetur ipse Fracastorius: cum tamen eodem tempore ad Cairum Nilus sentire incipiat inflationem, nec aqua per tantum interuallum, in momento quasi, trajici possit in Ægyptum. Vidit hoc Fracastorius, & respondet, octo aut decem diebus, torrenti aluco,

alueo, facile cōfque defluere. Sed est incredibile. Nam sic millia-  
ria 60. quolibet die tranfuolaret, etiamſi rectiſſimâ lineâ decurre-  
ret. Alteram igitur reſponſionem tentat. ſcilicet, vt lapis in aquam  
deiectus, eam in circulos impellit, & intumeſcere facit; ita torren-  
tes Æthiopici Nilum in Ægyptum vſque propellunt, antequam  
ipſi eò perueniant. Sed in vanum. Non enim ideo flumen ſe ſic  
inſabit, ſed impulſum celerius tantum alueo ſe euoluet. Deinde,  
aqua Nili turbida ſatis indicat, incrementum eſſe à torrentibus &  
aquis aduentitijs ſe illi permifcentibus.

Dico Primò: Magna pars incrementi Nili ex tabe niuis Atlan-  
tis montis venit, quam Sol ab Æquatore ad Cancrum rediens, &  
vires ſuas canis illis montium, qui Tropico, aut circà, ſubiacent,  
verticibus admoens, fundit. Hoc mihi Poëta ſignificare viſus:

*Sic ubi ſe magnis reſluus ſuppreſſit in antris  
Nilus, & Eoa liquentia pabula brumæ  
Ore premis; fumant deſerta gurgite valles,  
Et patriſ vndeſi ſonitus expectat hinc  
Ægyptos, donec Pharijs alimenta rogatus  
Donec agri, magnumq; inducat meſſibus annum.*

Stev.  
Theb. 4

Liquentia enim pabula brumæ ſunt tabes niuium. Fallitur enim  
vehementer Fracaſtorius, qui Atlantem niualem eſſe negat. Nam  
Leo Afer rantum niuium vnâ etiam nocte circà ſæpè defluere, vt  
arbores & domos tantum non ſepeliat, ſeq̃ue propemodum, cum  
iter illac faceret, ab ijs ſuffocatum affirmat. Vnde lib. 75. Dion di-  
cere audeat, ſibi pro comperto eſſe, Nilum hac aquâ niuali auctum  
ſuperfundit. quod, inquit, veteribus Græcis ignarum fuit. Iuba et-  
iam vtriuſque Mauritaniz Rex, litteris tamen, quàm Regnis, non  
paullò clarior, vt ait Plinius, aſſerit, prout in Mauritiâ niues im-  
breſq̃ue ceciderint, ita Nilum increſcere. Niger etiam Africæ iti-  
dem fluuius, Hispanis hodie *Rio grande*, qui medio inter Tropi-  
cum Cancræ & Æquatorem interuallo in Oceanum Atlanticum  
ſe euomit, eodem tempore & lege, quâ Nilus, exundat. tantâ verò  
rapiditate mare tunc incurrit, vt intra quadrageſimum milliare,  
ruborem aquarum, & limum retineat. Fontes autem in radici-  
bus niualium iſtorum Africæ montium habet. quamquam non  
nemo ſit, qui Nili ramum eſſe coniectet, quia Crocodilos, & Hip-  
popotamos, ceteraq̃ue quæ in Nilo, videant in ipſo præternauigan-  
tes. Verùm nuperrimæ Orbis delineationes manifeſtum diſcerni-  
culum interponunt inter alueum Nili, & Nigri fontes.

Dico Secundò: Non solæ niues Atlanticæ, sed pluuiæ etiam, quæ circa Tropicum Capricorni & Nili fontes, Martio, Aprili, Maio, recidunt, inflant Nilum. Hæc Aristotelis sententia est. indicatque Homerus, cui Odyss. 4. Nilus *Διπντὴς ποταμὸς, fluens à Ioue*, id est, aquâ cælesti, *flumini*. Prob. quia Franciscus Aluarez, olim per Abyssinorum Regna peregrinus, scribit lacus quosdam in vltimâ partē Æthiopiâ vidisse pluuijs vernalibus tumidos, solitos superfundi; Nilumque illis in locis, longè ultra Atlantem, istis aquis inturgescere. Iosephus Acolta lib. 2. c. 4. Histor. Indicæ, circa Tropicum Capricorni, & ultra vsque ad Promontorium Bonæ spei, affirmat, vbi Sol Arietem intrauit, imbres largiter depluere: prout etiam in Regno Chilli Americano, quod eandem latitudinem & poli eleuationem cum Promontorio Bonæ spei habet, vsu venit. Ratio est, quia tunc apud eos autumnus, & imbrium tempus incipit, quando ver nobis. Omnia enim contraria ipsis eueniunt; quia ultra Capricornum colunt, & hiemem habent, quando nos æstatem, & Sol Cancro se adinouit: autumnatque ibi, cum vernat Europæis. Etiam si autem pluuiæ per Martium aut Aprilem ibi cadant, tardè tamen, & Iunio solùm mense, tot circuitibus fessum, & insulis hebetatum, agmen aquarum in Ægyptum peruenit. Ex his patet, paludes illas, quas sub quarto parallelo, Antidiameraoës, inter Æquatorem Tropicum Capricorni statuit Ptolomæus, non esse (quod putat) primos Nili fontes: quos nouissimæ Hollandorum Tabulæ, extra Capricorni circulum, cum Lunæ montibus, in ipsam partē Africæ cuspidem rejciunt.

Ceterùm, vnde cumque irruant, certum est ex limo quem vehit, torrentibus incitari, vt cetera flumina, & intumescere Nilum. ideo enim oblimatione istâ campos quibus aliquamdiu & altus insedit, secundat. & in Scripturâ sacrâ, turbidus aliquoties appellatur. Ios. 13. *A flumio turbido, qui irrigat Aegyptum.* & Ierem. 2. *Quid tibi vis in viâ Aegypti, vt bibas aquam turbidam?* Vbi tamen arenæ & limus in sedimentum defluxit, limpida & suauissima est, quia percocta Zonæ torridæ caloribus, inquit Diodorus Siculus. ideoque Ægyptij vsitantur in potu. & in conuiuio Cæsaris & Cleopatrarum lego lib. 10. apud Lucanum;

— manibusq; ministras

*Niliacas crystallus aquas.*

Tam magnæ autem & delicatæ manus limpidissimâ aquâ solent ablui. Imò in tantâ gratiâ & dignatione apud eos erant Nili aquæ,

vt Ptolemæus Philadelphus, Polybio teste, ad filiam Bœtencen, Antiocho Regi Syriæ collocatam, vt solam eam biberet, solitus sit missitare. Melas etiam Bœotix fluuius, teste in Syllâ Plutarcho, annuo cremento Nilum imitatur, haud dubiè ex causis similibus.

Argenteus deinde, vulgò *Rio de la plata*, in Americâ, aquâ etiam cælesti, & montium Peruanorum tabescentibus niuibus inflatus, semel quotannis, tribus mensibus ripas indignatus, mediterranea submergit: quo tempore accolæ scaphis, & partim natatu, quo, ritu piscium ferme, valent, vitam tolerant.

### ARTICVLVS III.

*Quenam aquarum in vsu laudatissima.*

**S**aluberrimam aquam breuiter & scitè definit Plinius, *quæ aëri Lib. 1. 1. simillima est.* id est, pellucida, levis, insipida, inodora. talis enim <sup>cap. 3.</sup> maximè sincera & impermixta erit. exhalationum quippe & ceterorum opacorum mixtura claritatem illam interpellat. leuitas autem ex raritate nascitur, & cum turbidâ opacitate consistere etiam potest. aqua enim cælestis, levis est, quia ex vapore nubium leui, & paulò antè in aëre pendulo, subitò & perfunctoriè condensata; & tamè vnâ, ab exhalationibus quas vapor implicat, & secum deuoluit, se turbat, & lucem suam confundit. Hinc licet aquæ pluuiæ leuitate & tenuitate suâ multùm laudentur, exquæ magis, quæ inter fulmen & tonitru ceciderunt, quas in dulcedinem aliquam percoctas, bruta audissimè bibunt, celeriter tamen, ob exhalationum permixtionem, putrescunt, & aliquantam inde noxam trahunt.

Vnde etiam grandinum, quæ ex guttis pluuiælibus coagulantur, aquam, ab eadem exhalationum miscelâ, pestilentissimam Plinius vocat. Spiritus enim illi qui humori nubium se confundunt, non solum ex terrâ, sed varijs etiam mixtis, & plantis aliquando venenatis, in altum extrahuntur, vt Lib. 2. diximus, circa materiam fulminum.

Hinc errant etiam quidam apud Athenarum lib. 2. qui niualem aquam saluberrimam contendunt. Hippocrates enim, Aristoteles, & Plinius, vt inquinatissimam damnant: & reuerà terrestre illud, quod in eâ subsidit, satis indicat insinceritatem. Nec verum est, quod aiunt, frigore, quo gelatur vapor nubis in niuem, exprimi halitum.



halitum, sed includitur potius, & in eisdem floccos cum vapore alligatur. Vnde Agellius lib. 19. cap. 5. cum in illâ plurimorum hæresi esset, bibendi niualet, scribit se ad meliorem sententiam reductum à Peripatetico quodâ, & auctoritate Aristotelis assueverantis *ὅτι χιόνος καὶ χερσάλλων ὕδατα φάουλα εἶναι, aquas è niue & glacie vitiosas esse.* Non malè igitur Nero Princeps, cetera ferè pessimus, inuenit artem decoquendi, vitroque in niues demissam refrigerandi aquam: vt sic voluptas frigoris, sine vitijs niuium, contingeret. coactura enim halitus expellit, & rarefactione aquam laxat ac tenuat, vt citius & penetrabilius externum niuis frigus accipiat.

De noxâ aquæ glacialis, non videtur perinde certum. Nam glacies ex summâ & leuissimâ parte aquæ coagulatur: purissimâ etiam, vt apparet, quia terrestre quodcumque & sæcutinum succumbit in fundum. Fortè tamen ideo Aristoteles condemnat, quia exhalationes perpetuò ex aëre in terram & aquam subsidentes, circa supremam aquarum cutem hærent, seq̃ue ei confundunt. Hinc etiam intelligitur, fontium illos esse deteriores, qui labris suis, & riuorum quos influunt alueolis aliquid allinunt, aut musco inuestiunt. hæc enim alicuius impuritatis, etiam si oculis statim non sentiatur, indicia sunt.

Porro raritas & tenuitas aquæ non vnâ ratione exploratur. Hippocrates eam quæ igni promptè obedit, celeriterque postea depōnit feruorem, tenuem & laudabilem dicit. Quæ enim corpulentiores sunt, frigus pertinaciùs retinent; sed vbi semel etiam incaluerunt, seignius ad naturalem rigorem, calore contumaciter in densitate illâ hærente, redeunt. Palladius ad incolarum adspicit valetudinem. Si sanis pulmonibus & thorace, renibus, & vesicâ sunt, salubrem iudicat aquam, quæ per illa corpora traicitur. Talis igitur nostra Spadana: nam in eo pago multi seneciones integrâ valetudine decrepiti, sicci etiam, & adstrictâ, & calligatissimâ corpulentia planè lignei visuntur.

Si viscera etiam & hypochondria citò deserat, tenuitatis est signum. Nam tenue penetrabilius est: & Aristoteles affirmat idèd in mare demersos tardiùs, quàm in flumine, suffocari, quia fluminis tenuior est marinâ, ocylusque in omnes corporis sinus & angulos se insinuat.

Quæ etiam valdè rara est, speciem corporis submersi, vt v. g. lapidis, aut baculi, minimè inflat & refringit; sed eiusdem molis & figuræ

figuræ apparet, quâ in aëre. Talem aquam se inter Paduam & Vincentiam, in loco, qui Cubalus dicitur, vidisse asserit Vitello lib. 10. theor. 42. Fluuij deinde qui onera navium non ferunt, vt Silas in Indiâ, insigni, sine dubio, raritate sunt. Vti etiam Borysthenes, cuius aquæ alteri fluuiio Hypani supernatant.

Pondere denique, densitatis & tenuitatis discrimen deprehenditur. Sic Pirene, fons ille Musis sacer, omnium qui in Græciâ, leuissimus & tenuissimus repertus ab Athenæo. Cotyle Attica Eulei fluminis drachmam vnâ minus olim, quàm aqua Tygris aut Euphratis, pendebat: & ob hanc dotem, Parthorum Reges Euleum & Choaspem bibebant, eosque, quamuis in longinqua, plaustris comitabantur. Snellius noster lib. 2. cap. 5. Eratosthenis asserit, aquam pluuialem grauiorem esse distillatâ in cubo pedali, duabus vncijs & granis sexcentis duodecim: putealem verò propensiores pluuiâ, vncijs septem & granis trecentis septuaginta. Aqua etiam post brumam, grauior à diligentioribus reperta est: vbi scilicet spiritus illos subterraneos in se extinxit, & inde crassamentum sibi fecit. Vnde per clepsýdras olim defluens, hiemales horas paullò longiores reddebat æstiuis, exitu tunc ob crassitiem tardiore.

Ceterum, flumina rapidiora, & scopulis multis, aut insulis asiliencia, magis frangunt & laudabiliores reddunt suas aquas: ideoque Auicenna præfert ciuitates & loca quæ talibus alluuntur: imò Plato libro de Legib. vetat ciuem suum in vrbe pernoctare, in quâ aut leges exulant, aut nullus fluuius currens. illud enim animum, inquit, hoc corrumpit valetudinem. Renuat fortassis igitur Insulis Flandrorum hospitari, vbi fluuius, qui Contracum non fluit, sed repit testudineo gradu, pigerrimus est, ac ob minimam alvei inclinationem, pænè stagnans; qualisque omnino Ticinus in Italiâ apud Poëtam Consularem:

*Vix credas labi, ripis tam mistis opacis,  
Argutos inter volucrum certamina cantus,  
Somniferam ducis lucenti gurgise lympham.*

Sil lib. 1.

Alueus igitur magis præceps fodiendus, vt torrentior sit vnda, & exercitio tenuetur.

## ARTICVLVS IV.

*Quid censemus de varijs miraculis aquarum, quæ à Scripto-  
ribus passim aut sparsim iactantur?*

**X** Anthum annem irrufare, Cratim & Celsiphum fontes candorem, Penium nigritiam pecori facere, affirmant multi. & de Clitumno, in agro Falisco Propertius:

*Quæ formosa suo Clitumnus flumina luco  
Integit, & nuceos abluit unda bones.*

Quidni autem cum Theophrasto accredamus? qualitas enim aquæ per corpus nostrum infusa mouere temperiem valet. nonne etiam senectus, nonne ingens vnus etiam noctis sollicitudo & animi anxietas, multis canitiem extemporalem fecit?

Sic quoque fons vnus in Bœotiâ memoriam, alter obliuionem, violato cerebri temperamento, adducere potest. Nam & quemdam aquâ melissæ vino albo infusâ, & per distillationem iterum extractâ, memoriam cortexisse, lib. 2. Subtil. Cardanus est auctor. In Ciliciâ esse fontem, qui sensum bibentibus acuat, in Cæâ insulâ, qui hebetet, doctissimus Romanorum M. Varro dicit. nec habeo, cur refellam. tantundem enim facit vinum modicè, aut largius sumptum. Nec hoc magis mirum: Clitorium in Arcadiâ, vini creare fastidium. audi illum ingeniosum:

*Clitorio quicumque sissem de fonte lenauit,  
Vina fugis, gaudesq; meris abstemius undis.*

Ouid. 15.  
Metam.

Oua etiam noctuarum eodem valere narrant. A visco quodam stomachi parietibus aut orificio adhærente credo fieri hanc nauseam. sic etiam qui multis ouis se semel aut iterum inferciunt, eorum in posterum amittunt appetentiam.

Sed quid de quintâ essentiâ Cardani, siue aquâ illâ distillatitiâ, quâ ætherem vocat, vitæque corporis, & vitam in longissimum tempus producit, existimamus? In Bonicâ etiam insulâ, nō procul ab Hispaniolâ noui Orbis, fons è vertice montis salit, qui senes ad iuuentutem reuocet, etsi canitiem non aboleat, nec impleat rugas. Cuius rei, inquit Cardanus, præter persuerantem famam, locuples testis Petrus Martyr Angerius Mediolanensis, Regis Hispaniarum olim à secretis, in suis Orbis nuper inuenti Decadibus. Et cōfirmari potest, succo fructus arboris vitæ Paradisi, qui ex sententiâ D. Thomæ, & magis acceptâ, vim naturalem habuit corrigendi vergentem iam

lib. 1.  
Subul.

in

in senium ætatem, & humidum, vt vocant, radicale instaurandi. Quidni igitur humor aliquis sit, è terrâ, naturali fonte scaturiens, aut Chyuiçâ & distillariâ arte præparatus, qui partibus fortè quibusdam heterogenijs constet, quarum aliquæ vi purgandi, & recrementa humorum quæ partibus singulis animalium allinuntur, & calorem naturalem suffocant, abstergendi, polleant; aliæ verò optimo succo præditæ, in substantiam viuentis, sine ferè pugnâ, facessant, humidumque radicale largiter instaurent?

Verùm, etsi non facilis sit refutatio naturalis talis succi; non credo tamen adhuc repertum. nam cur aliàs Cardanus tam citò finitus est, si ætherium illum succum habuit, qui ad nostram hanc eum ætatem, & per tot annorum circulos circumducere potuit? succi ergo hæc lenis cogniti, excellentia solùm quædam medicamenta, aut alimenta sunt, quæ lapsantem, aut delapsam valetudinem restituere aliquoties, non in perpetuum (etiam si sæpè repetantur) valent. senectutem etiam tardant, & aliquamdiu sustinent, numquam ad carceres iuuenturis, vt iterùm decurrat, reuocant. Illud etiam satis credibile, Lyncesti fluminis Macædoniæ aquam, temulentos facere. Naso lib. 15. Metamorph.

*Hinc fluit effectû dispar Lyncestius amnis,  
Quem quicumque parum moderato gurgite traxit,  
Non aliter titubat, quàm si mera vna bibisset.*

Hanc autem ab acore quodam, acidulam vocari asserit Plinius. Plin. lib. 2. Vnde in parte, acidulæ nostræ Spadanæ est similis. quam etiam <sup>cap. 103.</sup> expertus sum largiùs potam cerebrum paullisper tentare, & inuitare somnos. Minus tamen longè, quàm Lyncestus, qui spiritalior, & halitu aliquo minerali plenius fumat.

Fontes plurifariam esse, quorum aqua in riuum effusa stet statim & lapidescat, compertum etiam est. In Peru, calidum quemdam vidit Ios. Acoſta, qui breuè in rupem se durat: vnde ferro exciduntur lapides idonei etiam ædificijs, & simillimi, quantum conijcio, flauentibus illis & mollibus nostris Mosæ-Traiectinis. Aquam etiam Stygis in lapidem coagulari multi tradunt, & mor- <sup>Sen. lib. 3.</sup> tiferam esse, quia alligat viscera. Plinius tamen frigidissimam, & <sup>cap. 25.</sup> omnia vasa petrodere, præter muli vngulam, idque ab Aristotele nostro repertum, & sic venenum illud ab Antipatro datum Alexandro affirmat, magnâ, inquit, Philosophi infamiâ. An igitur alumni sui necem machinatus cum Antipatro Aristoteles? Non credo Plini. Curtius certè de Antipatro tantùm, & filio Iollâ fa-

mam sparsam fatetur, de Aristotele, silentium. Credidit tamen Cæsar Caracalla: qui, quod Alexander videri vellet, Aristotelis libros abolere statuerat, quia is propinati Alexandro veneni videretur auctor. Plutarchus etiam in Alexandro scribit, à quibusdam suspectatum Aristotelem: sed magis in eos inclinat, qui negant toxico interijisse, quia corpus exanimum multis diebus, nullo balsamo aut odoribus conditum, feruido & torrenti cælo, sine tabe, liuore, & ullis veneni indicijs permanfit.

Illam autem vim Stygiam, omnia vasa perrodentem, non in valdè miris Agricola ponit, & aquam metallicorum, quâ argentum ab auro fecernunt, parum aut nihil acrimoniâ abesse dicit. Ad conciliandum verò aquæ frigus intolerans, plurimum confert profunditas venæ, deinde Mercurij siue hydrargyri, aut etiam natri mixtura. Nitrum enim ex utroque contrario spiritu, calido & frigido, sed isto vberius, contextum docet Bartholinus. Vnde si aquæ hæc admisceas, promptissimè totam refrigerat. idem ergo fieri credendum etiam in subterraneis.

Fontes autem qui lapidescunt, plurimum gypsi ac tenacis luti vehere certum est, vnde lapidibus materia.

Sunt quoque, qui iniecta in lapides mutant. Talis vis Anieni, Italix fluuii. in quo, cadauer à latrone demersum, & radicibus arboris implicitum, lapideum repertum ferunt. item nuces & amygdala in eum decidua, lapidescere vulgò notum est; appellarique à propinquo Tibure, bellaria Tiburtina. Nec opus plura exempla aggerare, quæ à Plinio & alijs satis celebrata. hoc tamen etiam addam. Albertus Magnus ætate suâ prope Lubecam extractum è mari ramum, cum intexto nido pullisquæ purpurei coloris scribit, quæ omnia in lapidem diriguerant. Aquæ igitur istæ aut reuera saxificæ sunt, & iniectorum temperiem mutant, aut gypso solum modò incrustant.

Hoc etiam iam nimis est vulgare, Asphaltum, siue mare mortuum in Iudæâ, onera pleraque immersa respuere. periculum in hominibus Vespasianus & Traianus Cæsares fecere: qui pedibus manibusque colligatis iniecti, fluitabant innoxij. miraculi causa, vè alibi diximus, est in densitate permixti bituminis.

Cyzici etiam fons quidam Cupidinis appellatur, à quo amantes (ô salutarem Meridionalibus, & omni genti amasæ fontem!) frigerari, & amorè ponere, credidit Mutianus. & quid ni etiam faciamus? certè frigore, aut aliter consumendo genituras, id fortasse potuit.

tuit. Hoc tamen merum fabulamentum est, in Andro insulâ, fontem Liberi patris Nonis Ianuarijs semper vini sapore fluere. nisi tamen Genij cuiuspiam mali artificium id fuit. Istud autem naturales causas propius accedit; in Dodone fontem Iouis esse gelidum, qui cum faces immerfas extinguat, extinctas tamen accendat, si statim admoueantur. Nam spiritus sulphurei, quos exhalat, in facem recens extinctam & adhuc fumantem incidentes, flammari facillè valent, & rursus facem animare. Alia præterpropter innumera congeri possunt: sed abstineo, ne paritas ista Philosophis nostris, & quicumque morosioris palati, fastidium faciat. Tales enim ferè in antænitates illas historiarum despuere solent. sed hæc, si placet, saltuatim, aut omnino non attingant; & ignoscant, quia non ipsis solis & vnicè scribo.

Oserabo etiam nauseabundos istos hoc auctario. Scriptura sacra sapissimè gratiam illâ quæ animas sanctificat, appellat aquam. *Qui sitit, veniat; & qui vult, accipiat aquam & ita gratis*: Apoc. 22. Hinc S. Petrus epist. 2. c. 2. impios vocat *fontes sine aquâ*: quia gratiâ carent, cuius capacem naturam habent. sed super omnia fulchrè & disertissimè Christus Dominus Ioan. 4. ad Samaritanam: *Qui biberit ex aquâ quam ego dabo ei, non sitiet in æternum: sed aqua quam ego dabo ei, fiet in eo fons aquæ salientis in vitam æternam.* Fons enim gratiæ salit in vitam æternam: quia per actus quos aut effundit, aut quibus dignitatem suam affundit, visionem Dei, & vitam æternam promereimur. In multis autem analogia est inter gratiam diuinam, & aquam. hæc sordes corporis, illa animi eluit: hæc æstum ventriculi, illa iræ, libidinis, & ceterarum perturbationum mitigat, aut extinguit: hæc arentes fauces, illa sitientia animæ desideria humectat, & mollic. Tria verd ista, à totidem aquæ qualitatibus proueniunt. abluit enim, quia cum densitate fluida est; frigerat, quia algida; humectat, quia humecta. In substantiâ etiam aquæ, gratiam analogiam inuenit. illa enim terræ infusa & permixta, salutarem succum in omnium plantarum venas & fructus transfundit: gratia, animæ infusa, & in eodem subiecto habitibus supernaturalibus confusa, per eos in actus supernaturales, ceu quosdam spirituales fructus, influit. Merito igitur S. Theresia, ut in libello quodam eius legere nuper memini, aquam omnibus elementis in amore prætulit, & omnes diuinos in animam illapsus, per fontes, riuulos, & tubulos semper explicauit. Petamus nos, & cum Samaritanâ dicamus, *Domine, dâ nobis hanc aquam, ut non si-*

Ioan. 4.

Lib. 7.  
Confess.  
cap. 9.

Math. 11.

1. Cor. 2.

*riamus.* Omnis enim Philosophia nostra, & vniuersæ scientiæ humanæ, imò diuinæ, flaccidæ, marcidæ, exsuccæ, & atentes sunt, nisi in hunc gratiæ & charitatis humorem radices demittant. aut, si virè in quibusdam & florère videantur, plenitudinem illam & decorem instante vanitatis vento mentiuntur. scientia namque, diuini amoris & gratiæ succo vacua, turgida & inflata est, nosque similes sibi facit. *Procurasti*, clamat D. Augustinus ad Deum, *mibi per quemdam hominem immanissimo typho turgidum, quosdam Platoniorum libros ex linguâ Gracâ in Latinam versos.* Tales plerique omnes Platonici, Peripatetici, & cuiusvis farinæ ac sectæ Philosophi, veræ Religionis & gratiæ exortes. in oculis suis valti, grandes, & cothurnati. Felices nos, qui in tempora ista postuma incidimus, & habemus Christum, qui tot verbis & factis tumorem nostrum premit, exprimitque ventos, & cogitationes, in quibus maiores nostri euanuerunt in altum, vnde relapsi præcipientes in infernum. quos ne sequamur, miscenda Philosophiæ nostræ, & sæpè inculcanda hæc Magistri lectio est: *Discite à me, quia mitis sum, & humilis corde.* Corde, air, non externo solum cultu: quomodo olim Cynici per summam superbiam, summisionem animi, & rerum humanarum contemptum profitebantur. Audiamus etiam discipulum istum Magistro consonantem: *Non indicauit me scire aliquid inter vos, nisi Iesum Christum, & hunc crucifixum.*

Cur non etiam nos tanto, illo nescientiores, idem adiudicamus? Sed mirum, quàm difficulter superba nostra ignorantia in hoc iudicium & confessionem adduci possit.

## CAPVT IV.

### *De Rore, pruinâ, melle, mannâ.*



ENITA aquarum, vnde meteora aquea materiam sumunt, tractatione, ipsa iam ingredimur. Initium à rore &c. facimus, quia in infimâ regione, & loco generationis, propinquissima sunt terris. Setuabimus enim hîc, quod antè in igneis: ab imâ aëris regione scantim ad superiores perueniemus.



## ARTICVLVS I.

*Quæ causa roris.*

**M**ateria roris, vapor est; forma, mollis ille ex vicino aëre in terram relapsus. Causa efficiens à multis nocturna astra putantur. Poëta vetus, & amœnissimus in Peruigilio Veneris:

*Humor ille, quem serenâ astra rorant noctibus,*

*Manè virgines papillas soluis humenti peplo.*

Sic Luna, roris mater, & roscida, à Poëtâ Georg. 3. appellatur. Verum licet Luna, tempore molli vapores educendo, aut aërem laxando, vt guttulae facilius in vnum confluant, & se degrauent, rorationem adiuuare possit: causa tamen efficiens præcipua, est nocturnum frigus, & forma substantialis vaporis, quæ ad frigus & densitatem, ac postremò ad grauitatem, materiam suam reducit.

Relabi autem rorem ex propinquo, inde liquet, quia comperitur, altiores montes parcissimè irrorari; & humiles plantas, quàm altissimarum arborum folia, plenius inebriari. Causa est, quòd humilibus maior aëris profunditas superster, vnde ros decidit. & hinc etiam calcei ambulantium in sicco, roscidâ nocte, amplius quàm caput, humectantur. Refluunt tamen etiam rores in colles & montes, qui non excelssimi: vt in montem Gelboë, 2. Regum c. 1. & in montē Sion, Psal. 132. Ex toto igitur à terrâ ad nubes interuallo relabuntur rores, in altitudine viginti graduum ab horizonte, vt lib. de Cometâ anni 1585. credit Rothmannus; quia per tantam eleuationem, sidera nocte surgentia, aut cadentia, euidentem refractionem patiuntur, multiplicatis intra totum illud spatium infinitis rorantium guttularum vaporibus.

Tempus ergo rorationis est nocturnum. quando scilicet vapor à Sole educus, & ab ipso occaso destitutus, refrigerat se ac redensit, fitque iam aëre illo grauior, in quo antea leuior natabat. Hinc sub auroram, cum plurimum noctis exiuit, plures generantur, & magis frigent rores; & in Zonâ torridâ, vbi noctes toto anno duodecim circiter horarum sunt, nocturnus aër à longâ & gelidissimâ roratione frigidissimus est, vt de Africâ Francisc. Aluarez, de Americâ, Ios. Acosta, experti testantur. Et hæc causa est, præter ceteras, quæ zonam illam temperat, & præsentiam diurni Solis lenit.

Non abstinco etiam, quin bellatulam aliam rationem Io. Bapt. Benediçii, Epistolâ ad Adr. Panetium, huc addam, quâ ostendit,

cur

cur aër sub auroram gelidior & densior, quàm reliquâ parte noctis. Hoc enim frigus & densatio extremam partem noctis magis rorifluum efficit. Duo autem supponit, quæ vera sunt. Primum, umbram terræ, siue noctem, iaci semper in partem Soli aduersam. Deinde, aërem inumbratum condensari; & eò arctius, quò Sol vicinum umbræ aërem magis calefacit & tenuat: nisi radij multi & conferti reflectantur in umbram. Ita flagrantissimâ ætate, umbras arborum gelidiores experimur. nec ex ultimo id solum ita videri, ex comparatione ardentioris circumstantis æstus: sed reuerà plus frigoris (vndecumque veniat) in aëre umbrâ perfuso tunc esse. Ratio est, quia ob rarefactionem vicini aëris quem Sol illustrat, ait Benedictus, aër alter in umbrâ se contrahit; quia aliquæ aëris illustrati partes, rarefactione in umbram propelluntur, & vnâ cum ceteris ibi colliguntur in vnum nodum. quò autem maior & diffusior est rarefactio, eò plures partes incurrunt in umbram, & à reliquis ibi refrigeratæ constringuntur.

Sed à quâ causâ, aër inumbratus, subito sic refrigeratur? *Quia, inquit Benedictus, naturaliter calor sequitur rarum, rarum calorem, & frigus densum, ac densum frigus, ut unicuique sana mentis patet.* Sed nullus Philosophus, qui paullò altius introspicit, hîc acquiescet. Alibi profundius nos in hanc rem demitteamus. Dico iam in transcurso; aut aërem naturâ esse frigidum, aut hunc terræ circumfusum, vaporibus plurimis mixtum & intextum esse, qui à radio calefaciente & diffundente liberati, ad frigus & nonnullam densitatem, per antiperistasin se reducant.

Hoc constituto, probat Benedictus, aërem ante auroram magis densari & frigescere, quia à mediâ nocte, pyramis umbræ terræ, perpetuò recedit ab Oriente, & retorquet se versum Occasum, sic ut radius Solis manè radat & destringat aëris nostri umbram. quia igitur tunc infima regio quæ nobis impendit, & vnde in nos refluunt rores, propinquior est radio surgentis Solis, quàm mediâ & concubiâ nocte, ideo densius cogitur, & se, ac vnâ vapores, ad rationem magis refrigerat. Vespertino verò crepusculo, quia umbræ terræ Solem versus Occidentem sequitur, aër noster perpetuò à margine umbræ, versus axem seu medium eius, elongatur.

Omni tempore anni gigni possunt rores; sed facilius & affuentius autumno & vere. quia & vapores in materiam tunc suppetunt, & Sol nimio ardore non consumit. In nube etiam & flatu, ait, ex Aristotele nostro, ut pleraque solet, Plinius, non cadunt ro-

res.

res. Ventus enim paullo violentior materiam, ne coëat, dispergit; in nubilo autem, vel non attrahitur vapor rorifluus, vel certè non rorat, sed pluit.

Inter ventos, mollis Auster rores prouocat; quia aërem ad guttularum confluxum laxat, & tepore insuper vapores elicit. Contrà tamen euenit in Ponto, Africæ minoris Regione, inquit Aristoteles: quia Auster ed lassus, & excusso, longo volatu, tepore peruenit. Vnde nec calore vapores prouocat, nec antiperistasi insignis frigoris. Aquilo verò, ibi cùm Regio Septemtrionalis sit, gelidissimus per antiperistasin, exhalationes diurno Sole calefactas sic in vnum compellit, vt vapores circa terram, aut in eius poris hærentes, intepestant, & ascendant in materiam roris. Quod non solum in Ponto, sed omni Aquilonari Regione, vbi par Aquilonis & Austri qualitas, verum esse debet. Ex suprà enarratis definies rorem: vaporem tenuem, in infimâ aëris regione, vi nocturni frigoris densatum, minutissimis guttulis in terram relapsum.

## ARTICVLVS II.

### *Effectus Roris.*

**M**El, & manna, effectus roris sunt, vt causæ materialis, vt statim dicemus. erucæ etiam, ac aranei, & infinita insecta, à rore materiam sumere putantur. cùm enim hic multas siccas exhalationes permixtas habeat, tepore Solis materiam vtramque percoquente, facillè dispositione concipit ad generationem imperfecti animalis.

Conchas etiam marinas, oscitatione rorem sorbere, & eo concipigique in ipsis margaritas, multi docent post Plinium. Sed egregiè confutat Anselmus Boëtius lib. 2. cap. 37. de Gemmis. qui apertis plurimis gemmantibus conchis, deprehendisse se scribit, vniones eodem, quo testa, animalis succo, concrefcere. Cuius rei magnum indicium est, quod vbi margaritæ fusæ sunt, aut alio colore tinctæ, interior conchæ testa sit concolor.

Ros etiam ouibus & capris aliquam noxam affert. aluum enim ijs citat, & auget bilem, aufertque aliquando vitam. vnde prudentes opiliones non summo manè per roseida educunt gregem, sed diem aduultum exspectant, donec Sol rorem resorbuerit.

Ambulatione quoque sub arboribus rorifluus quandoque contrahitur scabies aut lepra, vt ex Plutarcho docet Mercurialis.

quia scilicet ros morficat & scarificat cutem, tam propter exhalationes admixtas, quàm quoddam superficiebus foliorum arborum, quas colligat, deradit. Nimis tamen superstitiosè delicati sunt, qui statim occidente Sole,

Virg.  
Georg. 3.

— *cum frigidus aëra Vesper*

*Temperat, & saltus refecti iam roscida Luna,*  
sub tecta recurrunt, clauduntque curiose fenestras: quas etiam manè non nisi serò aperiunt, domique se continent, metuentes roris relapsum. minimis enim istis, duranda cutis & valetudo est; vt respuere maiora pericula valeat, quæ passim totâ vitâ incurrunt.

Rores etiam corpulentiam consumunt. Hinc alicubi feminae crassulæ rore se lauant, aut etiam bibunt, ad gracilitatem. Vnde Theocritus in Thyrside, de vitulâ macrâ:

— *Μὰ ὀψωνὰς ὀνίχεται, ὄσπρὸ τίτνης;*  
*Rorène vivit, more cicadæ?*

Observant deinde venatores, odorem ferarum obtundi nimîâ roratione. vnde plenilunio, cum maximè rores multiplicantur, difficulter canes olfactu feras affectantur.

Species quædam rubiginis, & vitium morbus, roratio appellatur: quâ acini, priusquam crescant, in callum decoquuntur. Id autem accidit, cum deflorescentibus vitibus ros impluerit, non aqueus & fecundus, sed aridus, & permixtus noxiâ multâ exhalatione. Hæc etiam, siccato vapore, instat farinæ, arborum folia respersit, adurit, & necat. Mannam rustici nostri vocant, lupulumque salictarium maximè hæc lues infestat. & ab hac causâ, proventus eius incertissimus est, maximè variante pretio.

Rubigo verò, siue robigo, in frugibus, & præsertim frumentaceis (legumina enim minus eam sentiunt) est putrefactio quædam: cum exceptus spicâ ros aut pluvia non defluit, sed Sole ibi calefactus putrescit. Propter robiginem Robigalia sacra, ad eam auertendam, Numa olim Romæ instituit: celebrabanturque tempore Plinij VII. Kal. Maij, quando seges maximè obnoxia robigini. Floralia verò deinde instituta ex oraculis Sibyllinis, IV. Kal. Maij, vt feliciter omnia deflorescerent. In locum autem Robigalium & Floralium, Ecclesia Catholica dies Rogationum & Supplicationes illas amburbias & ambaruales die S. Marci, & tribus ante Ascensionem Domini diebus, substituit.

## ARTICVLVS III.

*Pruina causſæ, & effectus.*

**P**ruina ſic, inquit eleganter & ſcitè Apuleius, ſi mollitia roris matutini frigoris incanuit. Aut potiùs ſic finiſi debet: Vapor in infimâ regione, priuſquam in rorem conuertatur, congelatus. Ita ergo ad rorem, vt nix ad pluuiam, ſe habet. Cauſſa materialis, eſt vapor; formalis, congelatio: per quam à rore differt. Efficiens, eſt hibernũ, aut autumnale frigus. Duobus enim illis ſolũ anni temporibus, & cælo gelanſe prouenit. Aliquando tamen etiam vere, imò æſtate: certâ ſegetum lacteſcentium aut florentium pernicio. Ita anno 1607. & nupero 1625. pruína ſoſtitalis, natantes in lacte ſuo ſpicas pluſſariã in Belgio aduſſit.

Reſpergitur autem pruína per herbas inſtar raræ cuiuſdam niuis. ſtatim etiam arboribus dependet: quia multæ vaporis & exhalationis ſiccioris mixtim guttulæ, in longum & catenatim ſuccenturiatæ ac nexæ, frigore ſic concreſcunt; vt pyramides illæ glaciales dependulæ è ſuggrundijs teſtorum.

*Stiriacq; impexis induruit horrida barbis.*

Virgil.

Pruina verò hæc capillata, nebulaſi frequentiffimè comitem habet: quia exhalatione multâ tenebricoſâ & nebulofâ opus ad eius generationem.

Finis & effectus principales (nam ſemper effectus aliquis, eſt cauſſa finalis meteororum) pruína, eſt contractio ſpiramentorum terræ, vt circa plantarum radices, & in viſceribus eius contineatur ſpiritus, caloris veliculum.

## ARTICVLVS IV.

*De filiis illis, quæ D. Virginis appellantur.*

**P**ruinæ capillari affinia quodammodò ſunt fila, quæ autumnò maximè per agros, inſtar telarum aranearum, volante, multiq; in Belgio filæ Diuæ Virginis vocant. De quibus nil vniquam me legiſſe memini.

Falluntur autem, qui retia araneorum vento abrupta & atrepta credunt. Non enim tot hîc ſunt agreſtes aranei, nec eorum fila tantæ longitudinis & craſſitiei ſunt. & quod caput eſt, vix valido vêtò araneorum retia (in agris enim retiarj ferè, non textores, qua-

les in domibus habemus, aranei sunt) tenuitate filorum impetum fallente, & per intervalla transcribente, diffusi valent. fila tamen illa Virginea, tranquillo tantum nascuntur & volant, sine valente villo flatu. Itaque ex vapore percocto, & terrestribus ac viscosis exhalationibus temperato, concresecunt. Temperatura autem similis est humori illi & excrementitio visco, quod aranei filatim è visceribus, aut, ut Aristoteles credit, è superficie corporis, in retia aut telam perpetuam deducunt.

Vere etiam tantum & autumnus gignuntur, quia calorem temperatum & siccitatem postulant. Autumnus tamen maximè; quia aer tunc exhalationes siccas æstatis reliquas adhuc habet, quæ necessariæ ad huius meteori temperiem.

## ARTICVLVS V.

### De Melle.

**P**linius lib. 11. cap. 12. inclinatur ut affirmet, mel cæli sudorem aut quamdam siderum saliuam esse. queriturque ac dolet plurimum fordium contrahere, & taminari, tam longo, à cælo ad terram, delapsu. Sed si hoc esset, non æstate magis quàm hieme decideret. multos etiam annos in viâ consumeret, tam lento in terram defluxu. Denique sidera non saluant, nec vaporibus aluntur, quod credit Plinius.

Nascitur ergo apud nos mel, & instar roris è vicino aëre delabitur. Dubitat tamen Seneca Epist. 84. inueniantne ipsum in floribus apes, an succum tantum quemdam, quem spiritus sui proprietate, ut loquitur, & adhibito quodam veluti fermento, in melleam substantiam densent & coagulent. quod postremum placuisse videtur Erasmo in Dialogo, Ciceronianus. *Non statim mel est quod adferunt*, inquit: *singulis ore visceribusq; suis liquorem, ac in ipsas transformatum, rursus ex sese gignunt*. Sed tamen liquorem, & succum illum dulcè, siue specie à melle apum iam elaborato differat, (quod satis probabile est) siue non, mel in Meteorologicis appellamus.

Materia eius, vulgè exhalatio terrestris putatur aqueo vaporibus permixta, & una fermentata. Sed magis probem, exhalationes siccas, plantarum simul admisceri, & ab istis esse præcipuam dulcedinem. Nam certum est, halitum florum & plantarum, in quas humor ille decubuit, incitare aut hebetare suauitatem mellis. Nec de nihilo Poëta:

Eclog. 3.

*Mellifer electus exercitus obstrepsit herbis.*

Her-

Herbas enim reuerà eligunt: quia non omnes parem dotem affundunt melli. ex floribus autem odoriferis, & iucundi spiritûs, qualis thymus, mel laudatissimû: ideoque talibus delectantur apes,

—— & *olentia nacta*

Ouid.

*Pascua, per flores, & thyma summa volant.*

Contrà, herbæ venenatæ spiritu pestilenti mel inficiunt, vt auctor Plinius, & Dioscorides. & præsertim flos aconiti, & napelli cucullatus, vt affirmat Amatus in Dioscoridem. apes etiam Sardinie amarum colligunt ex abûchio. Signa mellis venenati sunt: si non densetur, & protinus moueat sternutamenta. tale etiam ponderosius est innoxio. Ex his faciliè intelligitur, cur non vbique mel sit eiusdem dotis. quia scilicet non vbique flores sunt vnus halitus. vapor etiam in Regionibus calidioribus melius digeritur, & ideo Hispanicum præstat Belgico. In Russia tamen, Regione Aquilonari, excellentissimum nascitur: quia æstiu dies longiores sunt, & radij solares, etsi obliqui, spatio tamen ad percoquendum valent. Aliquam etiam laudis partem ferre oportet qualitati herbarum: apibus deinde. Nam ideo in Peruanâ Regione mel prauum & dilutum gignitur, inquit Cardanus, quia apiculæ tantum sunt muscis simillimæ. Tali fortasse victauit S. Io. Baptista in eremo. Inter mella, Dioscorides, Cardanus, & Medici passim rutilum præferunt: sed Amatus asserit, candidum hodie palmam habere, si à calore nactum sit istum colorem. quale Olysiponense & Ethiopicum, quod niuibz nihil cedit de candore. In totâ Italiâ præstat, quod ex Cepheleniâ, maris Ionij insulâ, aduehitur. quod dulcius saccharo expertum se, Cardanus dicit. Triplex autem est genus mellis: Anthinum, siue vernum; quod legitur à primis floribus. Horzum, siue æstiuum, sic dictum à tempestiuitate præcipuâ: colligitur enim post solstitium, per dies serè 30. Syrio ardente. Tertium, vocatur ericzum, siue autumnale, ericâ florescente, omnium minimæ laudis.

Mel vim exsiccandi, & caloricam in secundo gradu (id est in quarto, apud nos Philosophos) obtinet: & pituitosis putatur perquam vtile. à calidâ verò complexionē vertitur in bilem. à putredine etiam præferuat. Græci Medici dabant olim ebrijs panem melle illitum contra ebrietatem, dum irent cubitum; quia frangit vini vires: quod mirum, cum mulsū, siue hydromeli nostrum, tam potenter inebriet. Veteres hydromeli ex melle & aquâ pluuiâ, aut niuali purâ, temperabant. Aristum primum omnium apud

Pluraz.

Sympof.

lib. 3. q. 7.



Thraces docuisse artem miscendi mel vino ad œnomeli, auctor mihi Plinius.

Cantipratanus Belga ait, circa solstitium tantum in Belgio, & modicâ quantitate mel defluere: noxiumque ouibus ac capris; ideoque opiliones tunc cauere, ne citò manè, antequam Sol roscida & mella vaporauerit, educant greges. Plenilunio plurimum mellis gignitur, sed vbertas roris ipsum facit dilutius.

Lib. 11.  
cap. 8.

Quousque ad mellificationem auolent ex alueari apes, incertum videtur. *Operantur*, ait Plinius, *intra sexaginta passus*. addit tamen, *subinde consumptis in proxima floribus, speculatores ad pabula vltiora mittunt*. Bodinus verò ad 14. etiam miliaria euagari credit, id est, eius sententiâ, ad longitudinem semidiametri horizon-  
tis visibilis, huc quousque; oculus nolter videre valet in superficie terræ.

Hoc etiam à multis celebratum, vinum optimum esse in medio, oleum in summo, mel in imo. Ratio est, inquit lib. 17. Subtil. ex Macrobio & Plutarcho Cardanus: quia vinum summum ab aëre circumfluo, infimum à fœce patitur. supremum autem in oleo pingui-  
ssimum, quia leuissimum, est. mel verò imum, quia grauissimum & densissimum, præcipuam dulcedinem habet. Hinc non immeritò Alexion apud Plutar. lib. 7. q. 3. Sympof. ridet Hesiodum, qui suadet strenuè è vino bibendum, dum vas aut plenum, aut fere vacuum est; parcendum verò, cum ad dimidium decreuit. quid enim stultius, inquit, quàm optimo abstinere, donec exspiret & euanescat?

Ladanum non diuersum à melle meteorum, sed species eius est. In Cypro præcipuè nascitur, villisque ac barbis caprarum, pastibus matutinis, adhæret, dum rorulenta est Cyprus. Sed tandem aduertere, hæc, & id genus alia quæ in meteoris habentur, reuerà tamen non esse: si mel, manna, &c. formam substantialem corporis mixti (quod est vero simile). non elementi habent. con-  
crescunt tamen ex vapore, ut ros, & legitima alia meteororum aqueorum.

## ARTICVLVS VI.

### De Mannâ.

**M**Anna apud Græcos & Latinos veteres, micæ quædam thuris sunt. Plinius lib. 12. cap. 14. *Micæ concussæ* (in vindemiâ thuris) *elisas, mannam vocamus*. Hinc meritò vbique Galenus de  
mannâ,

mannâ, vt medicamento adstringente, mentionem facit: cùm meteorologica nostra manna, inter laxantia sit. An verò Galeno cognita fuerit, dubitationem habet. Affirmat Amatus: & esse quod, non mannam, sed *αἰεόμαλι* & *δεσοόμαλι* *mel ærium & rosicidum*, appellat. aitq̃ue in monte Libano copiosum nasci, ac pellibus per terram expansis, arboribus decussum excipi. Vix autem differt manna à melle, nisi corpulentia & concretionē. vnde etiam quandoque in granula quædam se colligit: quæ si minora sint, granata; si maiora, mastichina manna appellatur. Est ergo manna succus dulcis, pinguior & densior melle, ex rore & exhalatione percoctus, & in infima æris regione, nocturno frigore concretus. Meurerus existimat, specie à melle, non solo accidente, distingui: quia manna purgat bilem, mel auget. Sed mel crudum, vt Amatus docet, tantumdem valet, aluumq̃ue subducit: licet calida corpora id vertant in bilem. In Syriâ & Indijs vberimus mannæ prouentus. Cardanus tamen in Calabriâ laudatissimam nasci affirmat; Amatus etiam in Lusitaniâ, Meurerus in Germaniâ: imò Læpnius in lib. de S. Scripturæ plantis, narrat se tranquillo manē hic Louanij inuenisse, circa exitum veris, in mœnibus.

Dubitant S. Scripturæ Interpretes, An manna, quæ 40. annis Israhælitis in deserto pluit, eiusdem speciei fuerit cum vulgari meteorologicâ. Francisc. Valesius lib. de Sacra Philof. c. 37. affirmat. Repugnant tamen alij: quia corpora, inquiunt, nimis laxa & fluxa fuissent, tam longo veluti pharmaci laxantis vsu. Deinde, Num. cap. 11. faciebant ex mannâ tortulas saporis quasi panis oleati. quod in mannam nostram non competit. Sed alia pro Valesio reponi xquē & probabilius possunt: quòd sapor ordinarius fuerit Exod. 16. quasi similæ permixtæ melli, quòd albi coloris, quòd euanesceret incalescente die, quòd figurâ seminis coriandri. Nam hæc vniuersa mannæ nostræ, præsertim Polonicæ, satis assident. *Vidi ego grana* (mannæ, quæ serenis Iunij & Iulij noctibus in Poloniâ cadit) inquit Cornel. à Lapide Comment. in Exod. *suntq̃, in? armilij, sed longiora & rubicunda: pulstess, inde confectus gustavi. sapor est, qualis est pulvis ex panico.* Nec valdè mouere debent, quæ alij contrà reijciunt. nam certum est, multa accidisse supernaturaliter mannæ Hebræorum, quæ assumi non possunt ad arguendam speciei diuersitatem: vt quòd 40. annis depluerit abundissimè, quòd non ampliùs in sportulâ suâ inueniret qui plus quàm qui minus collegisset, quòd saporem ad arbitrium sumentis verteret, vt Sa-

pienitæ

pietiz 16. legimus: carnes enim in eâ gustabat, qui vellet, aut si mallet, pisces, &c. Sic igitur potuit & esse eiusdem speciei cum nostrâ, & solidam tamen, non fluxam & marcentem alituram præbere. Vocatur autem Psal. 77. panis Angelorum: quia matutinum rorem & halitus colligebant Angeli, & inde mannam pinfebant, ac fermentabant, actiua passiuus componendo.

Lib. 1. de  
Incendio  
amoris.

Figura etiam Eucharistiz nostræ fuit, quæ verè panis Angelorum, & omne delectamentum in se continet. Non pluit amplius, sterili hoc sæculo, apud Sacramentarios nostros, cælestis hæc manna: nec cæci & miseri intelligunt, quanto & quàm inenarrabili bono careant. *Quam mira dulcedo*, inquit D. Laurent. Iustinianus, *& stupenda incunditas, ut quem non meremur nominare, possumus mastificare!* Sed *manna absconditum* est, nec omnes voluptatem illam exfugere sciunt, etiam qui sumunt. Sacramentarij blandiantur sibi quantum velint: nullum sub cælo eos maius infortunium incidere potuit, quàm non agnoscere tantum benignissimi Creatoris beneficium. *Venite Fratres mei Catholici, exulemus nos Domino, in-bilemus Deo saluari nostro.* Effundamus in altaria nostra, & coram illo corda nostra. Res ab initio Ecclesiæ disputatissima, certissima est: in hanc Fidem intellectum sine hæsitacione præcipitemus; in amorem, quàm possumus profusissimum, voluntatem abijciamus. Miraculum sine dubio, omni stupore dignum est, quomodo diuinum illud corpus, sub tenui superficie sic delitescat, & tam altè, ut sic dicam, defossum sit, ut nullius oculi, nullius intellectus acies ad ipsum penetrare valeat. Sed alia opera Dei, quæso, mecum considera: dispeream, si vllius etiam minimæ rei fundum reperiās. Certè dum cogito hunc totum Mundum nusquam antea fuisse, & tamen iam esse factum; dum in plantis & animalibus, conformationis artificium; dum arenulæ vnius è partibus infinitis compositionem: & vno verbo, dum omnia vniuersim circumspicio, nescio quò præcipuè defigere debeam admirationem. Sed comprimo calamum, plura in partem istam tam beatam blandamque scripturientem.

Sed non teneo tamen, quin etiam hoc adijciat, quod Te, Illustr. & Reuerendissime Tornacensium Præsul, Maximiliane Villane, magno animi sensu, nuper audiui narrantem. Sacramentarij rideant aut ringantur, silentio perire res tanta non debet.

Redibas olim, ante Episcopales istas Insulas, ex Italiâ: & dum Diuioni, quæ Vrbs est Ducatus Burgundici capitalis, aliquantulum

lum hæsitās, inaudisti fortè, Sacramentum ibi postero die populo ostendendum, in quo visibili se specie quorundam oculis Christus Dominus ingereret. Et dum dubitas, placeat etiam visere, an D. Ludouici Francorum Regis exemplum, qui oculos olim à simili spectaculo auertit, ne experientia, Fidei carperet meritorium: iuisti tamen, sed alià mente: Vt hinc aliorum infirmitati peteres & subijceres aliquod fulcimentum. Et ecce, dum oculos acrius paulisper in sacram Hostiam defigis, ceteris se quidquam, præter orbiculum illum candoris, cernere negantibus, Tu puerorum omnium, quotquot vmquam cælum tulit, formosissimum, purpureâ & talari tunicâ decoriter amictum, rosâ & renidenti facie hilarum, defluentibus per lacteam ceruicem sufflaentium crinium globis amabilem, ætate & magnitudine duodecim circiter annorum, vides. Et dum stas subito oculorum & animi raptu aliquamdiu attonitus, & inenarrabili simul voluptatis effusione ecstasticus, puerilis illa species in imaginem Dominicæ Resurrectionis, & virum sepulchrali speluncâ emicantem, repentè se figurauit: & sensim deinde euauit.

• Similitudo nœmortiam mihi suscitât diuini illius Viri, Thomæ Cantipratenfis, qui Levvis S. Petri prope Bruxellam nostram ortus, primùm Canonicus Regularis S. Augustini in Illustri Cantipratenfi iuxta Cameracum Abbatia, deinde Ordinis S. Dominici, Louanij Supprior, & sacrarum Litterarum Lector, denique Cameracensis Suffraganeus, in toto Belgio circa annum Christi 1260. eruditione & sanctitate clarus fuit. Is Libro Apum 2.c.40. interfuisse se Duaci, in Templo S. Amati, simili spectaculo scribit. Historia longiuscula est: sed cui rei melius atramentum & chartam impendemus?

Videant nobiscum hæretici nostri, & rideant, si ita peruicacix collibitum, nos infiniti illius Numinis bonitatem admiremur, cui deliciae sunt, esse cum filiis hominum.

Postquam Auctor narrauit Miraculi exordium, *Hec, inquit, cum audissem famâ vulgante, veni in oppidum Duacense. accessi ad Decanum Ecclesiæ S. Amati, cui optimè notus eram. petij videre Miraculum. annuens ille, præcepit ut fieret. aperta est theca, concurrat populus; maxq; ubi pyxis reuoluitur, clamant omnes: Ecce iam video, ecce conspicio Saluatorem. Stabam ego attonitus, nihil videns, nisi tantùm speciem panis albisimi: nihil quidem cōscius mihi, quare sacrosanctum Corpus cum ceteris non viderem. Nec diu mecum ista voluebam, cum*

ecce vidi faciem, in mensuram aetatis plenitudinē Christi, spineam habentem in capite coronam, & duas guttas sanguinis de fronte ex utraque parte nasi per faciem descendentes. Mox igitur genibus flexis, cum lacrymis adoravi. Surgens autem, nec coronam in capite, nec sanguinem vidi: sed faciem hominis super omnem effigiem honoratam, conuersam ad dexteram, ita ut vix dexter oculus videri posset. Nasus erat admodum longus, directus valdē, supercilia arcuata, oculos simplicissimos & demissos habebat, casariam longam super humeros descendentem, barbam in tonsam, & sub mento curuatam, exterminatamq; sub rictu iocundissimi oris. ex utraque parte menti, nudas propē à pilis habebat valliculas, ut in iuuenibus apparere solet, qui à puero barbam nutrierunt. frontem latam, macilentas genas, & collum longum, cum capite parum inflexum. Hoc schema, hic decor benignissima faciei. Eam autem diuersi diuersimodē sub vnius hora spatio videre solebant. Alij in cruce extensum, alij quasi ad Iudicium venientem, plerique, & hoc ex magnā parte, sub pueri formā viderunt.

Dicent alij quod volent; ego impudentes eos, qui tam sincero narratori non credent.

## ARTICVLVS VII.

### *De Saccharo.*

**S**accharum vox Arabica est. res Veteribus etiam cognita, recensetque Dioscorides inter species mellis: sed nesciuerunt coquere, ut hodie facimus. Est autem succus quidam dulcis, quem Indi, & alibi exprimunt ex arundinibus.

Lucan. l. 3.

*Quig; bibunt tenerā dulces ab arundine succos.*

Cocturam tamen etiam non ignaram iis fuisse, censet noster Lipsius Epist. Senecæ 84. duciturque Papinij versu:

*Et quas percoquit Ebusia cannas.*

Rudimentum tamen hodiernæ coctionis fuisse credo, quam satis nuperam, docet Amatus. Quidam Antiquorum, saccharum salem Indicum appellant: quia pars succi, calore Solis euocata, concreuit in superficie arundinum, specie resinæ, & splendentis salis.

Materia sacchari hodie copiosissima Antuerpiam & in Belgium, ex insulâ S. Thomæ, Canariis, & Maderâ aduehitur. In insulâ S. Thomæ, sub ipso Æquatore, molunt cannas, & quod superat expresso succo, obiciunt porcis, qui inde in tam miram ténitudinem pinguescunt, ut carnes de bonitate cum capis Hispanicis cec-

certent, denturque vulgò ægris, & ventriculis inualidis, ad facilem concocturam.

Saccharum gignit sitim, spiritusque calidos ac lucentes continet. vnde si cultrum ei affrices (quod sæpè sum expertus) in tenebris, lucem velut igneam excuties, ictu nullo ferè irritò & frustrante. Albius minùs calorificum esse, censet Amatus. Saccharum autem reverà meteorum non est, quia corpus perfectè mixtum. imò verius est, non è vapore aut rore in cannas deciduo gigni; sed esse humorem alimentarium, radice è terrà attractum, ac veluti arundinum sanguinem.

## CAPVT V.

*De nube, & niue.*

**M**ATERIA nubis est vapor, multà exhalatione contaminatus, vt ex aquæ pluuiæ, & nivalis impuritate liquet. Forma, est concretio & densatio in mediâ, aut circiter, æris regione.

Materia verò niuis est nubes, Forma, congelatio. Refrigerescit autem vapor & exhalatio à formâ istorum halituum substantiali, vel frigore æris, à vapore aliquo præcedente refrigerati; vel denique, quia ipse fortasse aër naturâ suâ frigidus & frigorificus est. Congelatio verò niuis, à gelidâ & siccâ venti alicuius nubem perstringentis, exhalatione est. Libro enim tertio docuimus, omnem congelationem & gelu à talibus ventis alligari & crescere.

De altitudine nubium à terrâ, respice ad Cap. 1. Libri primi, vbi quantitatem regionum æris definimus. Libro etiam 2. cap. 3. a. 11. ostendimus, ex distantiâ moræ inter fulmen visum & tonitru, colligi posse interuallum nubis fulminatricis à terræ superficie. Nubem sic definies: Vapor exhalationi mixtus, circiter mediam æris regionem, frigore citra congelationem densatus, & hærens.

## ARTICVLVS I.

*Quæ causa nubes in mediâ æris regione suspendat.*

**A**Sole, vi quadam magneticâ suspendi, Antonius Berga, & Scalliger Exercit. 79. credunt. Sed perperam: quia sic nocte vni-



uersæ nubes reciderent in terram, desertæ à Sole occidente. Sol enim apud Antipodes lucens, nequit hemisphærij nostri nubes in aëre sustentare. Meurerus non dissoluit, sed vnico ictu abscindit difficultatem, dicitque à Deo sustineri. Sed Deus tales effectus non solet sine causis secundis producere. Secundam autem inquirimus, quæ cum ipso *ligat aquas in nubibus.*

Iob. 16.

Dico Primò: Non aliter nubes suspenduntur à Sole, quàm quia ab ipso rarefit humor, & leuitatem ad scandendum, & in sublimi consistendum, accipit. Patet ex dictis, & iam dicendis.

Dico Secundò: Equilibrij leges, quibus grauiora in medio liquido succumbunt leuioribus, tenent nubes in aëre. Probatur exemplo omnium quæ aquâ vehuntur. Lignum enim, & vniuersa quæ natant, ideo non merguntur, quia æquale, aut minùs ponderis obtinent, quàm humidum paris extensionis, in quo sustentantur. Nam hinc est, vt calculus exiguus defluat in aquæ fundum, non trabs ingens, in finitò pznè illo propensior: quia calculus, inquam, grauior est aquâ illâ cuius præcisè locum occupat, trabs non item. Si enim aquæ molem trabi parem, cum ipsâ in trutinâ appendas, aqua sine dubio præponderabit. Idem eueniet, si humores inæqualis ponderis, vt v.g. vinum & aquam, in vnum confundas: grauior enim semper subidet. Si alibi vbique natura seruat hanc legem, nubes & aër ab eâ exlex non erit.

Sed nubes densiores aëre sunt, vt docent Plinius, Thimon, Scalliger, & plerique ferè, vt video, omnes. igitur & grauiores ipso eodem erunt: cum grauitas respondeat, & sequatur densitatis modum. Probat Plinius lib. 2. c. 42. quia Solem nobis obnubunt, conspicuum tamen vrinantibus per quamlibet aquarum altitudinem.

Verùm eodem argumento conficeret, esse ponderosiores torâ etiam profunditate maris. quod palàm à vero longè dissidet. Igitur in re qualibet opacitas à densitate valdè distinguenda est, vt Io. Bapt. Benedictus Epist. ad Venerium scitè docet. Vitra enim, crySTALLI, margaritæ, adamantes, densissimi sunt, nec tamen opaci. contrâ, pîanices, suber, & plurima genera lignorum rariora sunt, cum opacitate. grauitas autem non opacitatem sequitur, sed densitatem. Nubes ergo plus opacitatis & caliginis, quàm aër infimæ regionis, habent, minus densitatis & grauitatis. Ratio est, quia aër inferior vaporibus densioribus, sed pellucidis, pinguescit, siue, vt eleganter Aristoteles, *Διὰ τὸ ἀτμίξαι τὴν ἀναδυμίαν ἔχει τῆς γῆς.* *Propter euaporationem, & quia exhalationes terræ accipit.* Quidquid enim

enim



enim in nubibus rorulentum est, molliter redensatum, aut continuum, aut guttatim diuisum, in aërem subiectum, victo æquilibrio, leniter defluit. alia verò vaporum pars rarior, & tenuiori quodammodò filo contexta, caliginosis terræ & corporum mixtorum fumis permixta, stat in sublimi pendula. Vnde opacitas nubium præcipua non in puro aquæ vapore, sed exhalationibus corporum grauium opacorum consistit. quod ex nebulâ intelligi potest, quæ est sterilis & fumosa nubis portio. hæc enim ad nos vsque delapsa, etiam è vicino insignem opacitatem & caliginem ostendit. Nubes autem quò longius ab oculo absistit, eò opacior & tenebrosior apparet.

Tota hæc doctrina per refractiones siderum confirmari potest. Nam ideo orientium & occidentium astrorum refractiones ampliores & insigniores sunt; quia radij, cùm sidus iuxta horizontem est, per longiorem infimæ regionis aëris tractum, qui aëre mediæ regionis densior est, transit. Vnde Tycho, aërem superficiem terræ ambientem, sextuplo densiorem esse colligit illo, qui 30. gradibus à terrâ eleuatur; vbi siderum omnium refractiones euanescere solêt. Sicuti ergo rectè colligimus aquam densiorem aëre, quia res ex fundo aquæ conspecta, speciem sui dilatat, & vt Optici loquuntur, frangit: ita idem argumentum ad aërem infimæ & mediæ regionis transferre possumus. Cùm enim summus solaris disci limbus horizontem stringit, in aëre etiam quàm potest defæcatissimo, refractionem esse 34. scrupulorum Tycho animaduertit. id est, limbus ille tot scrupulis apparet eminere supra horizontis lineam. Diuersis etiam anni temporibus refractiones ampliantur, aut restringuntur. hieme enim maiores sunt, & quandocumque aër inferior rorulentus magis est; æstate, & sereno ac sicco, minores.

Idem etiam vapores infimæ regioni intertexti, & eam degrauantes, faciunt vt nullum, præter Solem & Lunam, sidus ferè vnuquam à perspicacissimis etiam cernatur ad ipsam horizontis limbum; sed demum post aliquantam eleuationem.

Finio igitur ac iterum inculco, nubes opaciores, sed rariiores tamen & leuiiores esse nostrate in quo respiramus aëre: ideoque in sublimi natate & suspendi, ceu lignum in aquâ se grauiori. Hinc quò tenuior & rarior est nubium vapor, eò altius in cælum scandit, & quousque aërem paris secum ponderis inuenit. Et inde etiam est, vt plures sæpè nubium ordines & suggestus cernamus. leuiiores enim stationem sublimiorem quàm alix pigriores obtinent.

Vnde etiam manè citius ab aurorâ afflantur, & vesperi seriùs retinent crepusculum.

In hanc denique meam sententiam deduco pedibus manibûque, ut iam video, nostrum Aristotelem. Nam lib. 2. cap. ult. Meteor. dicit contra Empedoclem (aliud tamen agens) absurdum esse, pluuiam, niuem, grandinem, in nube consistere, antequam excidant: quia scilicet nihil grauius & propensius stare valét & quiescere in medio rariore. Igitur nec nubes ibi penderent, si densiores & ponderosiores forent aëre qui infrâ est. Hæc audiens, minuet fortasse admirationem suam Plinius lib. 3. cap. 1. *Quid esse, inquit, mirabilius potest aquis in celo stantibus? At illæ, cœn parum sit in tantam pervenire altitudinem, rapiunt eò secum piscium examina. sæpè etiam lapides subuehunt, portantes aliena pondera.* Posterioribus verbis alludit, nili fallor, ad lapides & pisces pluuios, quos nimis, ut puto, simpliciter, è mari aut fluminibus cum vapore in altum subire existimat.

## ARTICVLVS II.

*Figura nubium circularis est. aduersus Cardanum.*

**C**ardanus lib. 17. Subtil. nubes in utrâque superficie planas esse contendit. In primis, quia earum dorsum complanatum cernitur ex altissimis montibus. Secundò, etiam inferior superficies æquali semper à terrâ interuallo abesse videtur in terræ superficie ambulantis. Tertiò, quia nubium agmen lineâ rectâ agitur, & exhibilatur ventorum flabris.

Certum tamen videtur, nubes æqualis ponderis in eodem circulo componi circa terram, si tamen aër, in quo vna & altera pendet, sit vniformis densitatis. Ratio est, quia nisi densitate dispares sunt, per medium vniforme, æquè altè scandunt à terræ superficie. hæc autem circularis & rotunda est; igitur & nubium circa eam catena debet esse talis. Sæpè tamen nubibus interlucet aër, stantque vtrîmque veluti alti quidam nubium montes, nec in hiatus illum inter eas medium defluunt, ut rimam sarciant, & impleant circulum; quia haud dubiè aër qui rimam replet, æquæ densitatis & grauitatis est cum adstantibus vtrîmque æquali à terrâ distantia nubibus.

Ad Primum Cardani respondeo, Conuexam nubium superficiem è monte videri planam, ob curuaturæ amplitudinem. sic enim

enim etiam terræ aut maris dorsum planum & sine gibbo apparet, licet reverà gibberum sit, & assurgat in tumorem.

Secundum à nobis pugnat, & nescio quid Cardano venerit in mentem. Si enim orbiculari motu, terræ globo inambulantibus, ubique nubes æquali altitudine, capitibus imminet: igitur in orbem etiam dispositæ sunt. Nam si transversim in rectum decurrerent, aliæ sine dubio aliis excelsiores forent: nisi terræ superficies, in quâ ambulatio instituitur, simili schemate complanetur.

Tertium etiam, falsum sumit. Ventj enim non in rectum, sed in orbem nubes agunt. Si enim linea, per quam spirant, esset recta & parallela horizontis plano, quod longius à vertice nostro abducerentur nubes, eò altius perpetuò ascenderent: cum tamen deuergere potius & ad horizontem inclinare appareant, quando verò ab horizonte ad verticem expelluntur, scandere quidem videntur, sed reverà non faciunt. sic enim etiam sidera attolli dicimus, & deinde deprimi in Occasum, licet pari semper à terrâ distantia circumagantur. Ratio est, quòd cælum stringere terram, aut mare, in circulo terrestri infra quem nihil, propter globi curvaturam, aspicere possumus, videatur.

Et inde est, ut Poëtæ Auroram & Solem fingant è mari surgere.

*Oceanum interea surgens Aurora reliquit.*

Aenid. 4.

& alius:

*Iam premis astra dies humilisq, ex aqore Titan  
Rorantes euoluit equos. —*

Stat. A-  
ch. II. 1.

Pari modo recidere vesperi in pelagus videtur:

*Præcipitem Oceani rubro lauit aqore currum.*

Georg. 3.

& ille adhuc magis mendax, de Solis equis:

*Flammiferum condunt fumanti gurgite currum.*

Sil lib 1.

Hic etiam ex Anaxagoræ disciplinâ, qui Solem, ferrum candens existimavit, stridorem extincti in aquâ addit:

*Condiderat iam Solis equos Tartesia Calpe,  
Stridebatq, freto Titan insignis Ibero.*

Auson.

Nubes autem vltima, quam veluti tangentem terræ circulum, in quo visus noster deficit, cernimus, non impendit illi circulo, sed longè satis vltra est. Cardanus enim lib. 17. Subtil. docet, lineam, quæ ab oculo per punctum contactûs tumoris terræ, ad nubem quæ puncto illi attingua apparet, protenditur, sexagies longiorem esse distantia nubis visæ à terrâ. Unde, si nubes duobus passuum millibus à terræ superficie absit, oculus 120. millibus passuum dissitam nubem,

nubem, quasi horisonti terrestri tamen incubantem, aspiciet. Quia verò nubes humore grauida & pluens, plerumque non ultra 500. passus à terrà diuiditur; eam, stillicidiaque ipsius, non nisi intervallo triginta millium passuum, siue decem leucarum Belgicarum, videre possumus. quod enim ultra est, infra terræ curuaturam (nisi à subiecto terræ puncto sit eleuatus 500. passibus) cadit.

Hinc, quia alibi experimento & narratione nostrorum nautarum, diximus, punctum terræ aut maris vltimum, quod à nobis videri potest, sex circiter Belgicis leucis distitum esse ab oculo aspicientis, quatuor leucis ultra illud punctum nubem depluentem cernere valebimus. Id est, si colliculi omnes, & terræ verrucæ inreriectæ deplanentur, & in circulum telluris redigantur; Louanio nubem, in verticem Regiæ vrbiū, formosissimæ nostræ Antuerpiæ, & ultra, se exonerantem videbimus.

Ista ramen Cardani doctrina aliquantum à vero delirat. Rem enim 500. passibus supra superficiem tranquilli & strati maris in aëre suspensam, ex distantia ferè 60. milliaria Italica, siue 20. Belgicorum, spectabilem ab oculo narante & mari contiguo, ex regulis Tangentium docemur. Nubes ergo pluuiosæ & humore curgidæ, quæ 500. passibus à tellure auelluntur, ultra vigesima milliæ Belgicæ, & in vicinos Hollandos reciduas, veluti horisontis nostri limbum coronantes, oculo in pedes hominis eleuato, Louanij cernere valeamus.

Quomodo igitur, inquires, Libro 4. visibilem horisontem in rra sextum milliæ Belgicæ finiri decreuimus, si nubes illas horisontales etiam ultra vigesimum iam reiciamus?

Sed de horisonte in superficie telluris, non in nubibus circumscripto, sermo ibi fuit: cuius semidiameter sex solum milliaria Belgicorum nobis facta, maior etiam iusto videri potest. Nam oculus sex pedibus (quanra est ferè altitudo iusti hominis) à superficie terræ eleuatus, & nihil extrinsecus refractione medijs adiutus, non ultra tria milliaria Italica, siue singulare Belgicum, per glaberiman etiam telluris curuaturam, mittere aspectum valet. Linea enim recta conuexam terræ superficiem tangens, in tercio milliari Italico à puncto contactus, sex circiter pedibus à superficie terreni globi discedit. Sed hac præcisione Mathematica Libro 4. in definiendâ semidiametro horisontis visibilis, vti non sumus; sed Physicâ potiùs, nauticâ & rudi Mineruâ: quæ docet, oculum supra staturam

staturam hominis, in nauem sublatum, vela nauium extra vndas eminula, & refractione insuper infimi & vapidī aëris eleuata, ab octauo decimo Italico milliari, siue Belgico sexto, cernere.

## ARTICVLVS III.

*De niue, & causis eius.*

**A**Vtôr Libri de Mundo, & Plinius lib. 17. cap. 2. niuem, *aquarum celestium spumam* esse credunt. Nubes enim mutuâ collisione spumare aiunt, & subito deinde rigore spumam istam in niuium floccos gelari. Sed falluntur. Sine etenim vllō flatu, & nubiū conflictu, sæpè niues generâtur. Non est igitur necesse, spumam feriantem niuem, sed sola nubis congelatio facit illum candorem.

Breuissimè ergo & scitissimè ab Aristotele nix definitur, Nubes congelata. Vnde materia niuis transiens, est nubes: forma, gelu quo stat & stringitur: efficiens, acere frigus: finis, stirpium salubritas. Nam *quid dixit hiemes serenas optandas, non pro arboribus vota fecit*, ait lib. 17. cap. 2. Plinius. vnde experientes agricolæ hiemes potiùs gelidas & niuales habent in votis. exinaniuntur etenim plantæ nimio tepore hiemis, languoremque in posterum sibi pariunt festinatâ germinatione. Etsi autem communia arborum frugumque vota sint, niues diutinas sedere; si nimis tamen pertinaces sunt, nimio frigore nocent, & ex matribus vbertatis, noueræ fiunt, vt loquuntur nostri Germani.

Dubitatio hæc, cur ex nube, priusquam in niuem rigescat, non generetur semper pluuia, Vicomercatum exagitat. Maius enim frigus ad stringendam niuem, quàm molliter coëundam pluuiam, est necessarium. Cùm igitur non congeletur nubes in momento, oportet antè per gradum frigoris transire, qui sufficit ad pluuiæ generationem, quàm ad vltiorem & intensiorem perueniatur, quo nubes obrigescit in niuem. Respondet, fortasse non eandem esse nubem, niuium & pluuiæ secundam. nubes enim, ait, sicciore est materia niuis, humectiore pluuiæ. Sed tam perfunctorio conatu euadere non potest. Nam omnis nubes humorem pluuium continet; aliàs enim mera esset exhalatio. Deinde, nix ipsa in aquam tabescit. Denique expertum est, ex eadē nube, in montibus nungere, plueri in vallibus: quod accidit, quia nix longiori per tepentem infimæ regionis aëra delapsu, liquefcit in pluuiam, antequam ad terram veniat.

Nodum itaque aliter, & sic dissoluo. Exhalationes siccz, per omnes vaporis nubilosi venas sparſæ, à subito & improbo frigore corpiūtur & exſtinguuntur (& hinc nulla, aut pauciſſima fulmina, per antiperiſtaſin frigoris, in nube niuali gignuntur) & cum vapore aqueo in eandem niuis, vt ſic loquar, telam & contextum alligantur. Cauſſa huius vltior, ac magis intima eſt; quoddã idẽ vaporis minutiſſimi pulueres & atomi, interiectis exhalationis particulis vbique interpolati, in guttas grandiuſculas ſe colligere ſtatim nequeant, vt pluuia ante niuem proveniat. Ad hæc, aër etiam ipſe medię regionis denſus ac veluti rigens, guttularum confluxum diſtinet & impedit. oportet autem ſtillicidia ad certam plenitudinem peruenire, vt in formam pluuiæ refluere valeant. Eadem ferè cauſſa eſt, cur vapor, rigente hieme, ore humano exſpiratus, in niuem illam barbarum citiùs, quàm in pluuiam concreſcat: idque ſi frigus maius & improbius fuerit. ſi enim paullo mollius, tunc antè vapor in rorem vertitur, & deinde in pruinam duriorẽ aut ſtiriam glaciale obrigeſcit; qualem non rarò in barbis ruſticorum noſtrorum, hieme ad forum confluentium, cernimus.

Dubitationem etiam habet, cur nix, quàm pruinã, mollior ſit, cum frigore aſperiori concreſcat. Nix enim in mediã regione algentiſſimã, pruinã in infimã, & quidem vapore molliſſimo, qui materia roſis, coagulatur. Vicomereatus cenſet, materiam pruinæ plus ſiccæ exhalationum continere, quàm nubem; materiam niuis, ideoque aridiorem & aſperiorẽ eſſe, licet tenuior ſit. Verum licet id non omnino abiiciam; inſpice tamen pruinam, multas particulas vaporis iam ante concretionem, ad naturam aquæ rediſſe, & poſtea glaciata iudicabis; indeque eſſe præcipuam eius duritiem. pruinã quippe ex minutiſſimã & farinulentã glacie componitur, infinitaque minima ſpecula continet, quibus Solem & lucem refleſcit. Cuius rei etiam hoc indicium accedit, quod in pruinã sæpè viæ perpetuã glaciẽ laminã loricatã & gypſatã viſantur, vt calcari, niſi lapſabundo veſtigio, non poſſint. Et hæc etiam videtur cauſſa, cur pruinã nouellas germinationes, magis quàm nix, adurat. glacies enim pertinacius niue adhæret; vt nec Sole ſtatim tabeſcere, nec ventis diſſili queat.

Tempus niuale, hiems eſt. & licet aliis anni tempeſtatibus nubes vento aliquo gelante concreſcere valeant, diſſoluitur tamen faciliſſimè in pluuiam antequam terram tangat, minimo infimæ regionis tepore.

Deci-



Decidit autem per floccos, siue particulas lanarum floccis similes: quia etsi tota & continua nubes frigore dirigerit, frangit se tamen in lapsu, quia floccatim, vt pluuia guttatim, facilius aërem diuidit. Alludit Pſaltes: *Qui das niuem sicut lanam.*

Pſal. 147.

Venti niuales sunt, qui etiam in gelu frigore & siccitate valent. Aquilonares, & qui ad Ortum vergunt. Flocculi tamen his flatibus, minores & magis farinulenti sunt; pleniores verò Austro, Fauonio, & quicumque plus humoris vehunt.

Montes, & omnia loca altiora, niuosa magis sunt; vt in Arduenna nostrâ, & toto Limburgenſi Ducatu experimur. Ratio non penes niualem influentiam aliquam cælestem ibi dominantem quaeri debet; sed quia mediæ regionis aëris propinquiora magis frigent, & niues, quæ longiori lapsu in aquam diffuunt, integras adhuc excipiunt, & retinent diutius.

## ARTICVLVS IV.

*Effectus niuis.*

**P**Rincipalis, est incolumitas frugum. Spiritum enim terræ, plantis vitalem, nix continet, & supprimit, vt circa radices hæreat. & ipsa etiam multo haliu salutare turget, quem cum humore blando & tenui, terræ venis inspirat. Existimo etiam, niues nucum auellandarum fauere prouentui, & hinc copiam nucum, signum minime mendax esse fertilitatis aruorum; vt hoc anno 1626. & aliàs sæpè experti sumus. Virgilius 1. Georg.

*Contemplator item, cum se nux plurima siluis  
Induet in florem, & ramos curuabit olentes:  
Si superant sætus, pariter frumenta sequentur,  
Magnâq; cum magno veniet tritura calore.  
At si luxuriâ foliorum exuberat umbra:  
Nequidquam pingues paleæ teret area culmos.*

Tempestas igitur quæ Cæleri, eadem auellanis est amica. Nix, quia mirificè algida, adhibita olim ad frigeranda vina à deliscatis. Inuenimus quomodo stiparemus niuem, conqueritur lib 4. Nat. c. 13. Romanus Sapiens, vt ea æstatem euinceret, & contra anni feruorem defenderetur loci frigore. Seruabant autem, vti & glaciem, inter paleas in subterraneis. Chares Mitylenæus, qui res Alexandri scripsit, narrat, Alexandrum in Indiâ triginta fossas iussisse excuari, repletiq; niue, superiectis quercuum ramis, niuemq; ita diu-



tissimè integram & sine tabe perdurasse. Romæ autem olim, rerum potente luxuriâ, niuis & glaciæ erant officinæ. Pergit in querelasille Sapiens: *Ardentes boletos, & raptim condimento suo mer-  
saros, demittunt panem fumantes, quos deinde restinguant niuatâ potio-  
nibus. Videbis, inquam, quosdam graciles, & pallido focaliq; circum-  
datos, pallentes & agros, non sorbere solùm niuem, sed etiam esse, &  
frusta eius in scyphos suos deicere, ne inter ipsam bibendi moram te-  
pescans. Sitim istam esse putas? febris est.*

Esu etiam niuis, candidos Alpium lepotes credidit Plinius. Non solùm autem lepores, sed & perdices albas se in Alpibus comedisse, Scaliger scripsit. imò & hirundinem, quæ tamen hic aut in Italiâ non hibernat, vidisse candidissimam. Deniq; in Scythiâ, Norvvegiâ, & niuosis Septemtrionis locis, aquilæ, falcones, accipittes, milui, vulpes, vrsi, corui, candidi inueniuntur, vt Aristoteles & Scaliger testantur. Sed ex esitatione niuis esse illum colorem non existimo, sed phantasîâ & imaginatione matrum. Nam sic etiam pauones generari albos, multi tradunt. si, inquam, locus vbi ouis incubat, albo totus inducatur. iugis enim illa albi imaginatio simili colore aspergit fœtum.

Conimbricenses aliique credunt, crystallum montanam niue liquatâ, & deinde glaciatâ, constare. quia nullibi, ait Plinius, nisi vbi maximè hibernæ niues rigent, repetitur. Negat tamen Agricola, & noster Boëtius: quibus magis accedo. quæ enim frigore concresecunt, igne liquefcere solent. crystallus verò cremata, calcem solùm ac salem ostendit, humore nullo effluente, vt etiam aduertit Fallopius.

Imminente niue, rigor aëris remollefcit; quia spiritus aliquis adhuc tepens, constrictu nubes deorsum exprimitur. post lapsam etiam niuem, frigus hebetari, manifesto experimento discimus. causa etiam est in spiritu illo, qui inflat, & præcipuè in albat niuem. hic enim niuali tempestate diffuit & spargitur per totum aëtem. Lux etiam fortasse illa niuis affundere valet aliquid languidi saltem & fracti teporis. Et ab hoc etiam est, vt iacente niue vestigia ferarum odoratoria sint, vt Theophrastus & venatores nostri ad fatentur.

Hoc quoque effectus niuis accenferi potest; defluxu eius sic sonos obsurdescere, vt vix è proximo colloquentes se intelligant. Ratio est, quia species soni non longè per floccorum decidentium interualla potest meare; cùm alij statim flocci occurrant, qui interpellant, & quocumque deflexerit, semper offendat, & impingat in alios.

alios. Sic nuper in bellis nostris, quidam palorum contextus inuenti contra moschetorum ictus. ita enim compositi & catenati sunt, vt si glans per primorum interualla transeat, in alium offendet; & si declinet, etiam alter se illi obiciat. sicque impetus toties hebetatus, tandem frangitur, & ante vulnus exspirat.

Denique mirum est, & tamen etiam in me aliquando expertum, bulimiâ non raro corripitur, qui diutulè ambulant in niue. Ita olim M. Bruto euénit, cum à Durâ Apolloniam iter faceret niali die. sic enim subito defecit, vt misso quopiam milite, panem ab iis coactus sit petere (nam panis vnicum bulimiâ laborantibus remedium est) ab iis, qui contra eum in portis excubabant. & humanitatem istam, captâ postea Apolloniâ, egregiè rependit clementiâ in ciues insigni.

Agellius lib. 16. cap. 3. bulimiam, seu bulimum, cum fame caninâ confundit. secutusque Theod. Gaza, versione septimi Problematis Aristotelis Sectionis octauæ. Verum apud Hippocratem, Galenum, Auicennam, aliud esse βύλιμον à fame caninâ, quæ ὀρεξίς κυνική appellatur, egregiè demonstrat Iul. Gualtavianus in illo Aristotelis Problemate. Est enim bulimia porius deliquium quoddam virium, quàm canina illa voracitas, quæ ex atrâ bile, vel acidâ pituitâ os ventriculi occupante nascitur, vt docet Ant. Musa. Plutarchus lib. 6. q. 8. Sympol. credit, halitus niuium per poros agitatione itineris & calore dehiantes, in corpus se penetrare, meatusque largius aperire, sic vt calor naturalis multus & confertim expiret, viresque corporis destituant: vnde sudor tenuis & rorans toto corpore oboriri solet. & confirmatur, quod equi ac asini, fici & poma diu cum fatigue portantes, huic malo sint obnoxij: spiritu scilicet etiam istorum fructuum, quem plurimum exhalant, in poros se sufficiente.

Hæc non prorsus contemno. præcipua tamen deliquij causa videtur esse in ventriculo, & reliqua membra per sympathiam cum eo malè affici. hic enim, meo proprio experimento, conuellitur, contorquetur, & irritatur ad vomitum. vnde præsentissima medela est in acri & profundâ tussi, quâ ventriculus & pulmo spiritus niuales, respiratione attractos, vel aliter se insinuantes, excutiat. Itaque halitus ventriculum inflantes & morsicantes, mihi nunc videntur princeps causa bulimix. panis verò spiritu contrario, benefico & salutari, laborantem ventriculum solatur & recreat. Nec aliter capiendum existimo, quod aiunt quidam, Democritum tri-

duo, solo panis recentis odore pastum, & vitam tolerasse. Non enim ex illo halitu alimentum, quod toti corpori sufficeret, rapere potuit; sed solatio tantum inani ferè ventriculum fallebat.

De albedine, an candore niuis, multa hic altercari animus fuit. magna enim reuerà dubitatio est, an alba sit, albore scilicet illo, quem vulgò à candore lucis distinguimus. sed totam hanc rem in Libros de Animâ differre placuit. Hoc certum est, spiritum quo turgescit, causam inprimis esse illius candoris. nam vetustate, & halitu evanescente, rufescit.

De locis niuosis, Bodinus negat sub Æquatore ningere, Fracastorius in Æthiopiâ, dum Sol est in Cancro, ideoque à tabe niuium contendit non inflari in principio æstatis Nilum. Sed uterque manifestâ experienciâ refellitur. nam iuga montium, à viciniâ medix regionis algentia, per omnem Torridam toto anno canitiem retinent. Plinius tamen, niues in alto mari numquam decidere affirmat. An quia halitus marinus tepens ante delapsum eas liquat?

## CAPVT VI.

### *De pluuiâ.*

#### ARTICVLVS I.

##### *Quid pluuiâ, & quoduplex.*



DEFINITVR à Philosopho, nubes in aquam conuersa, & guttatim decidens. Materia igitur eius transiens, nubes est: forma, lapsus per guttas & stillicidia. Conuersio autem illa nubis, non est substantialis: vapor enim nubis formam aquæ habet, & eam pluuiæ tradit. Mutatio igitur accidentaria est, à calore vaporis ad frigus. ex quo alia consequitur, mutatio à raritate ad densitatem; ac deinde resultat grauitas, quâ aëri, in quo vapor pendet, præponderat; & denique delapsus. isque in stillicidia idè dispersus, quia pronius sic & mobilius aëra diuidit. Celerius autem per æstatem, quàm hiemem, defluunt guttæ; quia aër tunc fluxior & dissolutior, nec hibernâ illâ densitate cadentibus resistens. Rectâ etiam, nisi ventus aut alia causâ à lineâ expellat, centrum terræ petunt. Si enim lineæ pluuiæ parallelæ essent, multæ guttæ non in terram, sed

sed in oppositum hemisphaerium reciderent: contra pluuiarum finem, qui irrigare terram. Quod ergo guttæ, terræ magis propinquæ, eò propius inuicem admoventur, & densius cadunt. Sed quomodo verum, quod VVesenbecius noster lib. 8. Digest. de Seruit. vrbani. præd. ait, Si ius auertendi stillicidij in aream vicini habes, licet stillicidium altius tollere, quia *quod ex alto cadit, leuius cadit; & interdum nec directè peruenit ad locum seruientem?* quo pacto leuius cadit, quod vires acquirit cadendo? Vere tamen dixit. Nam aqua canali defluens, in exitu densior & continua est, spargiturque deinde & comminuitur longiori lapsu, minori que impetu & dissipato terram plaudit. si tamen per maximam altitudinem cadendum esset, redirent ad se & iungerentur guttæ.

Guttæ rotundantur, inquit Albertus, vt tutius contra ambientem aëra se protegant: vel quia angulos, si qui sint extantes, detergit ac defricat aër. oblongiores tamen paullò, credo, sursumque fastigiatæ sunt: quia pars vaporis grauior in guttæ basim defluit, spiritu in superiora se recipiente. Nimis ergo ridiculus est apud Aristoph. Strepsiades Socratis ille discipulus, qui credit guttis rotundis pluere; quia Iupiter *διὰ κορυφῆς ὕψους, per cribrum meum.*

Necesse autem est, vt superficies nubis latior sit, quàm defluens guttarum agmen; contrahitur enim vapor nubis in pluuiam: quæ ubi cadere incipit, latissima est, & paullatim restringitur, quò propius accedit ad terram. Hinc intelliges, ceteris paribus, pluuiam illam densiorem esse, quæ venit ex nube excelsiori. quod etiam verum de grandine.

Pluuiæ tres accidentariæ species sunt, stillicidium, imber, & nimbus. Stillicidium non fumo pro loco in quem guttæ è tecto destillant; sed (quod multi faciunt) pro pluuiâ minutissimâ, quam alij vocant puluerulentam, diciturque Græcis *ψευδς*. sic Poëta vetustus:

*Stillicidi casus lapidem cauat. —*

quidam etiam simpliciter appellant guttam. Imber, est pluuiæ plenioribus guttis decidens; Græcis *ὄμβρος*. Nimbus verò grandibus & decumanis guttis proruit.

Stillicidia sæpè hieme, imbres autumno & vere, nimbi æstate maximè degrossantur. Frigus quippe mediæ regionis hieme improbum alligat aërem, ne guttulæ vaporis plures faciliè confluant in vnam grandio rem. quod per ver & autumnum lenius est, finitque magis diduci & laxari aëra ad guttularum concursum. æstate, quia dissoluit calore inferior aër, vaporesque & exhalationes plus feruo-

feruoris nubibus inferunt, ideo plenissimè in omnes guttas confluant vndique greges stillicidiorum. Nimbi, ex nigerrimis & propinquissimis nubibus depluunt: quia humore tam largo & denso grauatæ, altè in aërem etiam sæpè infimæ regionis decumbunt, vbi eius deinde antiperistasi in aquam & pluuiam constringuntur.

Ceterum, dies quidam, apud Belgas, pluuiarum atrii & infames sunt: & præcipuè quartus Iulij, quem S. Martini bullientis aut pluuij appellant. Si enim eo pluat, sex septimanas sequentes, inquirunt, imbres tenent. Sed annus hic 1626. & alij plures ostenderunt vanitatem. Fabula tamen mixturam aliquam habet veri. Si enim venti Occidentales, Belgis maximè humidi & imbricitores, initio Canicularium aut Iulij flare occipiant, satis pertinaces (quod duobus proximis annis nimium experti sumus) esse solent, & pluuias in medium sæpè Augusti extendunt. Similis ferè causa, diem sancti Marci fecit vitibus calamitosum: non quasi ipse singularis ac peculiaris sit innoxâ; sed quia circa finem Aprilis, intempestiuæ quædam pruina, velut vltimæ hiemis reliquiæ, quandoque con crescent, quæ tenera vitium germina adurunt. Nec denique caret omnino ratione vulgaris versus de Virginis Purificatione:

*Si Sol splenderit Mariâ purificante,*

*Maius erit frigus post Festum, quàm fuis ante.*

Splendent enim, & maximè serenantur apud nos dies, Boreâ aut Caciâ flante. qui si longiusculè Februarium incurrant, acerrimo gelu omnia incrustant: cum gelidi & sicci sint (præsertim Cæcias, & qui à Boreâ deurgunt ad Solem ortiuum) & ætatis præteritæ tepentes omnes reliquias, hiberno & longo frigore extinctas inueniant. Hinc extrema nobis hiems hiemantissima & rigidissima sæpè est: solemusque vulgari adagio iactare, Februarium instar scorpij, extremâ caudâ acerrimè pungere.

## ARTICVLVS II.

*Quàm altè aqua pluuiæ penetret in terram.*

**R**esoluit statim & intrepidè Seneca lib. 3. cap. 7. Nat. Ego tibi vinearum diligens fossor affirmo, nullam pluuiam esse tam magnam, quæ terram ultra decem pedes in altitudinem madefaciat. Et video Auctores passim magno assensu in experientiam eius ire. Id  
verò

verò capiendum de terrâ, quæ nec venas nimîâ raritate hiantes, nec nimis obstinatè coniuuantes & clausas habet. Per rimas etiam & commissuras montium, longè altiùs, & in ipsam terræ abyssum decidere pluuiæ possunt. De terrâ igitur continuâ, & præsertim arabili, intelligendum. Nec ampliùs, aut fallor, voluit Cardanus lib. 2. cap. 11. Variet. vbi pro decem Senecæ pedibus, reponit totidem passus. Nam Typographi, aut memoriæ eius est error, respexit enim haud dubiè ad Senecam. decem autem pedes, duo tantùm Geometrici passus sunt.

Hoc etiam bellum est, & meretur scientiam: arborum procerarum radices, vim caloricam Solis, & aquæ pluuiæ descensum in terram, ferè congruere; & omnes extendi deorsum ad denùm pedum siue duorum passuum profunditatem. Vnde autem hæc congruentia, difficilis fortasse est explicatio. Accipe tamen quod venit in mentem. Prima mensuræ huius origo videtur esse ab aquâ cælesti. hæc enim pondere suo primùm terræ poros ac venas aperuit ad tantam altitudinem, vt ex proprio experimento sensit antè Senecam, & alij consentiunt. exhalationes præterea & spiritus quos pluuiæ in nubibus concepit, tenuitate suâ iuuant, suntque humori pro vehiculo ad penetrandum, & diducendos terræ meatus. hinc enim aqua niualis, quia spiritu multo turgida, tam lubrico & penetrabili illapsu ed se insinuat, quod aqua vulgaris sequi non potest.

Pluuiam deinde secutæ sunt arborum altissimarum passim radices. Nam vt trunci sui & tot ramorum pondus aptè librent firmarentque, satis altè oportuit insigi. nec tamen infra limites descensus pluuialis: quia aliàs (nisi casu aliquo humor alius profundior subsit) extremi radicum mucrones non reperient succum quem trahant. Igitur radices se potius vndique in orbem spargunt, nec longè à terræ superficie recedunt, quærentes aquæ cælestis alimentum. Arbores namque *mittere radices ad humorem* dicuntur Ierem. 17. Deinde, cùm medulla & axis trunci plerumque in centrum terræ rectà despiciant, tam profundis radicibus non indigent, vt se ibi stabiliant. Vnde etiam maximarum arborum radices, quæ mediâ illâ trunci base enascuntur, sunt ferè valdè exiles. è lateribus autem crassissimæ obliquis, vt plurimùm, & perplexis cuniculis effunduntur. nempe istæ, quæ contra statum, & ramorum hæc illâc dependentium onus, arboris statum tueri & retinere debent. Ad quem finem, descensus earum infra decem pedes à superficie terræ, plerumque necessarius non est. Fabulosa igitur, aut hyperboli-



ca Virgiliana illa quercus est, quæ

Aenci. 4.

—quantum vertice ad auras

*Aetherias, tantum radice in tartarat tendis.*

Ego certè ante villam paternam, ingentem & ramosissimam quercum, ab abauo meo plantatam, ventis illis anni 1606. qui omnia prædè in Belgio strauerunt, radicitus euerfam aspexi: & demiratus sum, exilibus & paucà terrà obrutis radicibus, tam immanem molem potuisse tot annos sustineri. terni enim viri expansis brachiis vix truncum fuissent amplexi.

Verùm quid platano istà facimus, quæ, Theophrasto teste lib. 1. cap. 11. de Plantis, Athenis olim in Lyceo reperta ad 33. cubitos radices demississe? Nam Fallopius lib. de Thermis cap. 4. de descensu radicis per lineam rectam intelligit. quia, inquit, pro miraculo non fuisset (quod tamen affirmat Theophrastus) radicem effusam in obliquum ad 33. pedes. Sed Theophrastus non 33. pedes, sed cubitos, id est pedes 49½ scripsit: quæ longitudo etiam obliqua admirationem habet, in nouellà præsertim platano, qualem fuisse dicit. Et sic tacitè Theophrastum mihi interpretari videtur Marcus Varro lib. 1. cap. 37. Rei rusticæ. *Alia, inquit, radices angustius diffundunt, ut cupressi; alia latius, ut platani, & affert platani illam Lycel, quam dicit radices trium & triginta cubitorum egisse.* egit ergo, sed in latum, non in profundum. Scio tamen etiam, quid de loto illà, quæ Romæ in Vulcanali, dicat Plinius: *radices eius in forum vsque Caesaris per stationes municipiorum penetrasse.* Sed miraculum id fuit. & cogita vrbi Romæ arborem illam fuisse coæuam, ut idem testatur, id est 820. annorum. tot enim circiter ab vrbe conditâ ad Vespasianum effluerunt, sub quo Plinius. Calor etiam Solis non aliùs decem pedibus in terræ tergum, & quousque aqua pluuialis, & arborum radices, penetrat: quia eousque terræ pori ferè laxius dehiscunt, ut aër ibi illatebratus, aut lumen Solis, aut saltem calorem eius in summo terræ tergo herentis, faciliùs accipiat, & circumiacentium venarum, in quibus continetur, parietibus communicet. Laxantur autem pori in illà altitudine, ab aquà cælesti, quæ vsque eò se transcribat. Sed refellit nos, ut iam video, lib. 16. cap. 31. Plinius: *Quidam, ait, non aliùs descendere radices, quàm Solis calor sepe faciat, idq; naturâ loci tenuioris crassiorisve, dixere. quod falsum arbitror. Apud Auctores certè inuenitur abietis (pinum Theophrastus lib. 2. cap. 7. de Plantis, ex quo sine dubio Plinius sumpsit, pro abiete habet) planta, cùm transferretur,*

L. 16.  
cap. 34.



retur, octo cubitorum in altitudine; nec totam refossam, sed abruptam. Verum adfatemur etiam, aliis quandoque aliquarum arborum radices agi: præsertim, quæ aprico & humenti solo gaudent, qualis abies. Excipi etiam specialiter abies debet, quæ vnicâ ad ima descendente radice firmatur: quam ideo profundiorē esse oportuit. Nec Plinii ratiocinium hilum ampliùs cuiqueit.

## ARTICVLVS III.

*De pluuiâ prodigiosis.*

PRÆTER species pluuiæ illas ordinarias, aliæ quædam prodigiosæ vocantur: non quia semper aliquid portendant & significant, à Deo præter rerum ordinem cælo præcipitæ; sed quia aliquando sic est, aut quia vulgus ita existimat. Ex his aliæ sunt sanguinæ, aliæ lacteæ, aliæ carneæ, aliæ lanæ, ferreæ, lateritiæ, lapideæ, &c. Sanguinæ vocabuntur, si aqua rubricata decidat. quæ tinctura à minio, vel rubricâ, quæ cum vapore eleuatur, esse potest. sic etiam in Armeniâ, ab halitu minij permixto, rubras niues aliquândo decidere, narrat Iliad. 2. Eustathius. Sanguinei imbres, omnium prodigiosorum frequentissimi sunt, ut apud Liuium & Iul. Obsequentem videre potes. Sic pluit Romæ, Dionis etiam fide, ante necem. Neronis. in VVestphaliâ anno 1543. Louanij anno 1568. ipso Pentecostes die, si Gemmæ nostro credimus. Sed ad annum 1571. cum audiamus. *In disione Embdeni, quæ den Dam vocatur in Friesland Orientalibus, nocte sanguinem pluit, copiâ tantâ, ut ad 5. vel 6. miliarium spatium herba & vestes expositæ in apricum, ex albo colore penitus in purpureum sint mutatæ. multi ad rei memoriam plenos cyathos afferuarunt: frustra quibusdam ad eadem boum, aliasq; causas physicas, referre volentibus.*

Lib. 1.  
cap. 2.  
Cosmocr.

In Sueuiâ anno 1534. pluuia vestes rubris crucibus inficiebat. quod factum, quia fila vestium decussantur in crucis formam, inquit Cardanus. Sed hoc nimisquam friget. Non enim sola aliqua particula vestis, sed tota est sic contexta. Deinde, si sanguinem in vestimentum effundamus, non illic diffundetur in figuram crucis. Aliquid ergo diuinus, & maioris monstri fuit. quod ex crucibus illis Germanicis & Belgicis, quæ anno 1501. passim depluerunt in vestes, etiam cistis inclusas. imò corpora etiam ipsa, & cutem hominum signabant: durauitque toto triennio hoc prodigium. secu-

ta verò anno statim 1502. dirissima lues. Pepla verò femina-  
rum maximè obnoxia erant huic sanguineæ picturæ.

Rem diligenter & cum curâ examinavit Serenissimus Leodien-  
sium tunc Princeps Ioannes Horneus. qui de quâdam Leodienfi  
puellâ, annorum 22. cuius pepla perpetuò mutata, statim tamen  
iterum sanguinabant, ita scripsit ad Maximilianum I. Cæsarem:  
*Ad Diuum Seruatium* (iuerat enim Mosæ-Traiectum ad Iubilæum)  
*confessa est magno Theologo. Iussa post hac iuit in chorum, & propter*  
*reliquias deducta est in adituarium, allato ei ibidem peplo nitido. ro-*  
*gata est illud capiti implicare, ne cum tanto horrore per plateas incede-*  
*ret. quod ut capiti admonuit, erupit mox ex ipsius pepli parte anteriori*  
*sanguinis tanta copia, ut confestim in extremam usque simbriam, ad*  
*unius digiti longitudinem, & propè duorum latitudinem, destlueret.*  
*Vnde conspicientes aded sunt attoniti, ut è Canonicis unus protinus*  
*caderet. At illâ inde discedente, visa est publicè in peplo recenti ad sca-*  
*pulam dextram, magna vi sanguinis, in figuram quasi crucis se porri-*  
*gens atq; amplificans.* Hæc Antistes Horneus apud Suffridum Petri.

Quæ circa Passionis Dominicæ & Paschæ tempus peracta, vt,  
opinor, ad crucis suæ, & Sanguinis pro nobis effusi, respectum & co-  
gitationem moueret, quem tam contemptum habemus, & toties  
per scelera nostra quodammodo iterum effundimus.

Ante magnas etiam cædes, olim quoq; non inusitatum, præmitti  
è cælo pluuiâ sanguinis. Indicat Homer. Iliad. λ. vbi de Ioue:

— *καὶ δ' ὁ ὐβρόν ἦκεν ἱέρος*  
*Αἵματι μυδαλίας ἐξ αἰθέρος, ὥς' ἑμελλὰ*  
*Πολλὰς ἰφθίμους κεφαλὰς αἰεὶ περὶ ἅψιν.*

— *ab alto demisit rores*  
*Sanguine madentes ex athere, quia eras*  
*Multa generosa capita Orco demissurus.*

Plutarchus verò in Mario affirmat, à magnis præliis, & effuso largi-  
ter sanguine, aliquanto pòst tempore solitos præcipitari cælo pro-  
fufos imbres: factumq; post pugnam illam Cimbricam, in quâ  
Marius tot millium Cimbrorum in campis Massiliensium strag-  
gem fecit, de sanguineis tamen stillicidus nihil asserit. vapores  
enim sanguine & ceterâ corporum humanorum tabe resoluti, hu-  
more nubium diluti, ruborem suum, vanescente temperamento &  
opacitate, amittere possunt.

Lacteus pluuiæ color, à cretacæ exhalatione est.

Carnes decidere cum imbre, si tanx etiam perfectè conforma-  
te,

ta, quidni possunt? De ranis autem statim. Carnibus pluuisse L. Volumnio & Seruio Sulpicio Coss. narrat Plinius: nec carnes eas diu postea perputuisse. siccitate fortasse nimia, & aspersione salis aut nitrosæ exhalationis.

Lana si pluit, vento fortè excussa montibus, vbi inter vepres solitæ oues pasci. Ferrum in Persiâ cecidisse, auctor mihi Auicenna, & propè Lurgeam massam etiam 50. librarum. Sed hoc ridiculum: *Arabes nostri, inquit, ferunt enses Alemannicos, qui optimi sunt, ex isto ferro caelesti fieri.* quasi totos hîc dies ferro, ad tot armandos exercitus, pluat. A Plutone, non à Ioue, bone vir, ferrum Belgæ & Germani petimus. Argenteam etiam pluuiam sub. Imp. Seuero, Romæ in forum Augusti defluxisse Dion scribit. O pluuiam salutarem, & supparem illi, quâ Iupiter ad Danaën suam penetravit, sed nimis hîc infrequentem inquires. Sed auaritiam tuam effruescentem infusâ hac frigidâ confutabo. *Rore illo argenteo, addit Dion, nummos aliquot areos obliui. mansit color tres dies; quarto, quidquid oblitum fuerat, euauuit.*

Lapidatum de cælo Romæ, aut in Italiâ, singulis pænè annis Liuius ad fastidium repetit. Anno etiam 1510. in Lombardiâ lapides durissimos, colore ferrugineos, odore sulphureos præcipitalle, vnumquæ 120. librarum Regi Galliarum ostensum, narrat Cardanus. Lib. 14.  
cap. 72.  
Varic. Ergo credamus. & posse in nubium fornacibus tam citò eiusmodi corpora mixta, ex vapore, & exhalatione eum fermentante, concoqui, quàm asparagi, vt dicebat Augustus. Vnde inter fulminandum, præsertim ab improbâ, subtili, & penetrante flammâ, lateres illi confici solent & sulphurei lapides. Statim tamen ac materia densari incipit, necesse est delabi, & celerrimo naturæ opere absolui in ipso casu. Nam quodd Cardanus saxa sua Lombardica, duas totas horas in nubibus pendula, donec deformarentur, adhæsisse miratur & clamat, surdis canit. consistere quippe nequiuertunt in aëre, tantò se rariore.

Auicenna vitulum etiam quemdam pluuialem in Scholis nostris celebrauit. Sed credere, Philosophi, credula nimis sumus natio. Vituli, animalia tam perfecta, non possunt tam subitò, quàm è terrâ fungi, in nubibus figurari. Vitulus ille tam cælestis, & diffamatus, turbine fortassis aliquo è monte pascuo abreptus fuit. vt de pileo suo, cum Apenninum transiret, refert Cardanus. Is, inquit, flatu, velut sagitta scorpione, excussus, si in villas quæ ad montis radices erant, cum pluuiâ cecidisset, rustici iurassent pluuisse pileis.

## ARTICVLVS IV.

*De ranarum pluuiâ.*

**O**Pinio de ranarum pluuiis apud omnes irroborauit. Sed pleræque quæ cælo decidisse putantur, è latebris ad dulcedinem cælestis humoris profiliunt. Nam aliàs omnes exanimes aut semiuivas aspiceremus, tectis aut terræ illis ex tam alto loco. Durus tamen & contumax aduersus tot Auctores sum, si pernegem in nubibus quandoque generari. Vt ergo alia mixta, sic gyrynuli ranarum, perfunctoriè saltem, ex vapore & exhalatione (Cardanus etiam oua & semen ranarum è paludibus cum vapore, ardore Solis eleuatum addit) possunt in aëre concreescere. Scaliger certè Exercit. 191. Mirabellum Aquitanix oppidum, suo tempore ranis pluuiialibus repletum fuisse; & M. Varro omnes ciuitatis cuiusdam, itidem in Galliâ, incolas expulsos, affirmat. Verùm alij credunt, non in nubibus, sed in terræ superficie, è puluere certo, aquæ cælesti commixto, & fermentato, ranunculos coagulari. Scaliger Exercit. 191. *Nos complutam terram solâ aquâ, sine ranis, gyrynulûs* (id est, ranunculis imperfectis, oculis tantum & caudâ insignibus, ut alicubi explicat Plinius) *tamen post semihoram, scatere totam vidimus.* Addit etiam Io. Maria Ginochius, Doctor olim Patavinus, se mense Iulio aquæ cælestis guttam pulueri illapsam vidisse, quæ illicò (vt in ferream illam progeniem dentes Cadmi) in ranæ formam se induerit. Imò Gabriel Fallopius, vir, vt mihi videtur, minimè malus, lib. de Fossil. cap. 9. *Vidi, inquit, cecidisse guttas aquæ magnas in puluerem, & statim abortas esse ranulas.* Quid contra tam perfrictos testes facimus? malo credulus, quàm rixosus esse. Imò dum ego conscientiam meam excutio, propè sum, vt idem anno elapso 1625. ad portas Tornacenses expertum me affirmem. rem autem tunc amicis, qui aderant, ostendi, vt mirarentur mecum. Deciduo enim in aridissimum puluerem repentino imbre, tantus subitò ranunculorum, per siccum saltantium, exercitus exstitit, vt vndique nihil pænè aliud cerneretur. omnes etiam vnusmodæ magnitudinis, & coloris erant. nec profectò apparebat, è quibus latibulisti tot myriades, tam repenti in arentem, qualem oderunt, terram emicuisent. Dicamus igitur, vt ex luto Nili mures ita effigiantur, vt absolutâ primore corporis parte, nouissima effigies etiam num terrena visatur, sic ex spiritu & humore aquæ cælestis pulueri

ueri alicui, non omni sine delectu, sed certo, temperatis, gyri-  
nulos, imò ranunculos perfecti operis, posse exemplo conformari.  
Sic enim etiam greges murium in Belgio quandoque procreari do-  
cet piissimus & eruditissimus Vir, Thomas Cantipratanus, lib. 16.  
de Naturâ rerum, qui nequedum publicam vidit lucem.

## ARTICVLVS V.

*De Diluuiis.*

**T**Ria ab origine Mundi diluua famosissima sunt. Generale  
Noachi, circa annum Mundi 1656. Genesis 7. Duo Prouin-  
cialia. Primum Ogygis, quo Achaia inundata est sub illo Rege,  
cum apud Argiuos imperitaret Inachus. accidit autem circiter an-  
num 140. ante Urbem conditam, si Orofio credimus: annis verò  
post Noëticum 540. & anno nonagesimo vitæ Iacob, si cum Pere-  
rio calculum ponimus.

Alterum Deucalionis in Thessaliâ, annis, ut putant, 230. Ogy-  
giano posterius. Hoc lib. 1. Metamorph. graphicè describit Natio:  
sic tamen, ut pleraque competant in generale Noëticum, videatur  
quæ è libris Sacris sumpsisse historiam.

Duas causas diluuij vniuersalis affert Moyses, Genes. 7. pluitias  
cælestes, & eruptionem aquarum subterranearum in superficiem.  
*Rupi sunt, inquit, omnes fontes abyssi magna.* & deinde: *Catarrha-  
cta cali aperta sunt.* P. Lessius tamen lib. 13. cap. 6. de Moribus di-  
uinis, has duas causas in vnam confundit; & per *abyssum magnam*,  
aquam etiam nubium, quas catarrhactæ cæli suspendunt, non sub-  
terraneam intelligit. Ratio eius est, quia pleno diluuiio, & omnibus  
submersis, dicuntur *clausi fontes abyssi.* quod de abyssu subterra-  
neâ capi nequit. quia solum initio diluuij, aquæ è subterraneis e-  
rumpere valuerunt; non postea, quâdo nullus aër in earum locum,  
per totam superiacentem ipsarum molem succedere poterat. Ve-  
rùm, abyssum ab aquis pluuiis manifestè distinguere videtur Iacob  
Genes. 49. in benedictione Ioseph. *Omnipotens benedices tibi bene-  
dictionibus cali desuper, benedictionibus abyssi iacentis deorsum.* Id  
est, fertilitate aquarum irriguarum supernè è cælo, & infernè ex  
subterraneâ abyssu, in fontes & flumina se infundente. Ad argu-  
mentum igitur respondeo, Vel partem aquæ subterraneæ vi An-  
gelicâ, aut Diuinâ rarefactam esse, & genitū inde vaporem aut et-  
iam aërem, ingruente vacui periculo. quin imò laxatio illa & rare-  
factio

factio aquæ residuæ in terræ cauernis, ex violentâ ceterarum in superficie terræ expulsiōe, connaturaliter sequebatur, si nullus esset aër qui in sparia derelicta posset affluere. Denique aër, qui per omnes terræ meatus & venas se insinuat, rarefcere fortassis in tantum valuit, vt vniuersas abyssi repletet cavitates. quod non diffculter intelligitur, si continuum partes infinitas contineat.

Sed aliud etiam est, quod nos turbat: quomodo aquæ cælestes & subterraneæ in vnum confusæ, tantam aëris circumferentiam potuerint implere, vt *omnes montes excelsos sub vniuerso calo condiderint, altiores quindecim cubitis*. Nam licet daremus, tantum aquæ abyssō celari & terræ venis, quantum maris & omnium lacuum ac fluminum simul alueus habet: tamen nondum satis habes, vt terræ & aquæ globum, altitudine dimidij Italici miliaris superfundas. Nam profunditas marina, in raris solū quibusdam gurgitibus altitudinem illam excedit.

Vnde igitur cetera materia, quæ ampliore multò ambitu, & ad verticem altissimorum montium, qui vltra 4. miliaria habent pendiculi, orbem terræ exambiat? suppleri certè enim posse è cælo non apparet: cū ibi trium aut quatuor marium abundantia suspensa non sit.

Secundò, vnde pluuia illa 40. dierum cecidit? certè enim non è statione nubium & mediâ regione aëris; cū ista citra excelsissimorum montium cacumina finem habeat, quæ tamen vnda quindecim cubitis superior obruerat.

Tertiò, vnde hausti tot vapores, qui in tam pertinaces & profusos imbres sufficerent? Sol enim nubilo, & pluen te cælo, tam auidè & largiter resorbere non solet. Eugubinus, Oleaster, Bodinus, Lydiatus, ponderi succumbunt, negantq; tantum aquarum posse reperiri, nisi apertis Firmamenti siderei catarrhaëtis & emisariis, vis ingens in Mundum elementarem exciderit. Sed quò deinde, suppresso diluuiō, euauit? Item statim in terram depluit (Scriptura indicat) apertis cæli catarrhaëtis: centum tamen annorum circumactu, aquæ Firmamento sidereo præcipitatæ, nondum peruenient, sine miraculo diuino, ad terram.

Alio igitur vngue nodus hic extricandus est.

Ad Primum dico, immensam præne aquarum abundantiam in abditis venis & abyssō iacere: falsūque, quod contendit Benedictus, cavitates subterraneas esse paris libramenti solū & profunditatis cum fundo maris. altiores sunt, & probabile, tam vbere

ibi



ibi latites à naturâ reconditos, quàm ostentat in mari. Hinc aestimabis. Aqua initio Mundi terram vndique profundâ altitudine, vt pluribus placet, obruebat. quò tota illa tertio die (quando iussa extollere faciem arida) diffugit? In mare partim, scio; sed æqua, aut melior, terræ venis, & abyssi aluo fuit combibita. Deinde, post dies 40. clausi dicuntur fontes abyssi, Genes. cap. 8. Igitur toto illo tempore subterraneæ venæ fluxerant. ac proinde gurgites ibi immanes esse oportet, qui necdum siccati fuerint. Aqua etiam tota aliquantulum fortasse laxata per rarefactionem, vt in ampliorem se diffunderet locum: non ita tamen, vt onus Arcæ sustinendo non esset. Angeli verò aquariorum, qui terræ venas exhauriebant, etiam aquarum molem retinebant, ne eodem reuolueretur. Imbres etiam plurimum amplificasse diluuiouem, statim intelliges.

Ad Secundum ergo Pererius lib. 12. Genes. disput. 9. negat ideo vllius montis verticem ad mediam regionem pertinere; quia scilicet non fuisset, vnde super omnium montium cacumina, in fine 40. dierum, pluuia decidisset. Nec constant, ait, sibi Mathematici, dum affirmant, montes (qui habent, vt summum, 4. milliaria perpendiculari) vltra mediam regionem caput extollere, & tamen summos nubium vapores, qui intra mediam regionem coëscunt, ad 52. milliaria scandere. Sed Mathematicos non intellexit eruditissimus vir. Non enim de nubium & pluuiosis vaporibus mediæ regionis; sed de altissimis exhalationum fumis, qui in circumferentiâ supremæ regionis versantur, quique auroram manè priui sorbent, crepusculum vesperti vltimi respuunt, accipiendi sunt, vt videbis lib. 10. th. 77. apud Vitellonem. Stet igitur, excelsissimorum montium iuga, vt Lib. 1. diximus, attolli supra stationes nubium. depluere tamen in ipsos, etiam cum aquæ diluuii superassent, potuit; quia infimæ & mediæ regionis aër, intumescere vndâ, submoueri paulatim in altum, & cedere locum debuit. & hinc compulso intra elementum ignis (si tale aliquod ibi est) supremæ regionis aëre, huius spatium & sphæram infima ac media regio occupauit: id est, montium etiam altissimorum cacumina iam satis profundè cœperunt despicere, & in ipsa repluere. Sed qui vapores tam diu ab vniuersis vndique cæli punctis recidere potuerunt? Certè enim vbi nubes se semel exonerauerint (quod citò fit, nisi aliunde alias succedaneas flatus adducant) redire serenitas solet, & cælum digeri. Nec Sol etiam alium statim humorem ex aquis vaporabat: quia talibus pluuiis crescere non poterat diluuium; cum tantum in



ipsum refunderetur humor ille, quem ei vaporazione detraxerat Solis calor. Cum S. Augustino itaque lib. 3. cap. 2. Genes. ad litteram, dicito, infimæ ac mediæ regionis aërem, à diuinâ, si aliter non potuit, manu, in aquam pluuiam condensatum. & istos probabiliter cælos esse, quos S. Petrus Epist. 2. cap. vlt. diluuium dicit periisse. Hinc supremæ regionis aëra iterum oportuit in locum pristinum rarefcere, & redire vnde defluebant aquæ. Finito diluuium autem, Sol partem aquarum rursus tenuauit in tantum, qui infimæ & mediæ regionis spatio replendo satis esset, aërem. Denique, cum tota ista inundatio à Deo fuerit, nil verendum tot admittere miracula, quot necessaria ad historię veritatem.

Tertio argumento suprà satis est factum.

De diluuium Ogygis & Deucalionis, diuinam etiam vindictam, causam efficientem habuerunt. aut certè ruptis tempestate aggeribus, inflatisque aquâ cælesti, & repentinâ niuium liquatione fluminibus, vnde se mediterraneis superfudit. Ita huius anni 1626. mense Februario Bxtis in Hispaniâ à similibus causis, & præsertim sex aut septem dierum perpetuâ niue in immensum auctus, incredibilem, vt iam iam audiuius, in Hispalenses & vicina stragem edidit.

## CAPVT VII.

### *De nebula.*

## ARTICVLVS I.

### *Quid nebula?*



**A**RISTOTELES nubis *νεφέλα* seu excrementum vocat. Nubes enim vapore rorido & humecto, ac partim exhalatione aridâ constat. vapor in pluuiam, exhalatio in nebulam sæpè cadit. Lapsus & à grauitate materiæ est, & ab agmine guttarum pluuiarum, quod vnâ implicitam exhalationem detrahit. Hinc loca excelsiora & propinquiora nubibus, in omni pænè imbre, nebulâ infusantur, quia aliquoties semper cum stillicidiis descendit. Huius causæ ignari aurigæ, qui Leodio, Viseto, Mosæ-Traiecto merces in Rheno Palatinatum, per ericetum illud vastum Ducatus Limburgensis, vulgò *Fagne*, vectant, existimât beneficio quodam &

& arte magicâ caliginem in omni pluuiâ ericeto illi affundi. Tantas enim obortri tenebras, ipso etiam meridie, mihi affirmarunt, vt ultra distantiam 15. passuum nihil, aliquando vix equos suos videant. quo argumento, præter alia quæ alibi sparsim dixi, probare soleo, Ducatum Limburgensem, & præsertim istud ericetum, locum esse totius Belgij eminentissimum.

Definiri ergo nebula, siue caligo (hoc enim etiam nomen habet) sic potest: Superflua, aridior, & caliginosa pars nubis, terræ incubans. Materia igitur eius, est exhalatio opaca & tenebrosa; forma, situs in infimo aëre. si enim ascendat altius, in nonien & rationem nubis redibit.

Hinc nebula, vt multa alia, meteorum immobile est: qui situs iste transferri incolumis, & loco dimoueri nequit. Densitas nebulae & pondus indubiè maius est, quàm aëris infimæ regionis, in quem desidit. Tenebræ Ægyptiacæ, quæ inter Pharaonis plagas, tam densæ & palpabilis nebulae fuisse à nonnullis creduntur, vt instar aquei elementi tardarent motum localem.

Sed aliud præterea genus nebulae, & ex aliâ materiâ est. vaporulenta scilicet, quæ propter nimium crassamentum, in imo aëre hæsit, & obnubit terram. Talem sæpe vesperti aut manè præsertim vidimus. apparetque instar aquæ perpetuæ, vicina Louanio prata, & humentia, vnde vapor surgit, inundasse. Si exoriente Sole ascendat, expectanda pluuia; quia materiam eius nubibus infert. si cadat, serenitas erit, nisi cælum graue nubibus fuerit, aut venti aliunde aduehant. Si enim Sol non valet humorem tam tenuem vaporare, imbecillus est, nec poterit aquas maris aut fluminum vicinas, quæ magis defenduntur à naturali suâ densitate.

## ARTICVLVS II.

### *Proprietates quedam nebulae.*

**P**rimò, fugere ante inambulantem, & ponè sequi nebula videtur. Ratio est, quia ex distantia v.g. 20. aut 30. passuum, opacitas nebulae demum incipit sensibilem lucis reflexionem habere. circa nos verò serenitas apparet (etsi alij aliquantulum diffusi, in mediâ caliginè nos aspiciant) quia lumen exhalationi incorporatum, speciem è vicino fortiorem mittit, quæ pupillam oculi, & parietem retinum ita perfundit, vt nulla ab eodem obiecto sensibilis umbrarum specie lucis in fundum oculi veniat: ex distantia verò,

species imbecillior, & transitu per nebulam hebetata, foramen vuez tunicæ, tenebris permixta, quas in retinâ depingit, illabitur. Quæ omnia, & alia plurima, Deo dante, in Libris de Animâ explicabimus.

Sed vnde fieri potest, ut res per nebulam visa, longiùs retraxisse se, quàm reverà fecerit, appareat? Nebula enim, ut antè à me dictû, crassior & propensior est aëre inferiori: cur igitur speciem non refringit, ut vapor solet & aqua? refractionem autem, obiectum oculo admouet, non retrahit. Verùm aridæ & caliginosæ exhalationes, vbi præsertim in minimas atomos dissoluræ & decineratæ sunt, nihil in refractionem valent. hinc enim aridi etiam illi nubium fummi, qui materia nebularum sunt, in mediâ regione, nihil siderum refractiones adiuuant, nec Solis & Lunæ discum insigniter ampliant, ut molles illi & humentes ac pellucidi vaporum rores, qui infimum aërem & horizontem obsident. Imò verò quia opacitate suâ speciem rerundunt & debilitant, caussa sunt, quare phantasia nostra rem abesse longiùs diiudicet, quàm oculus tam debili ac remissa, & veluti longiori intervallo lassatâ specie, cognouit. Ita etiam nocturnis tenebris omnia magis ab oculo distare putantur. Sed ego tamen à meâ experienciâ adiciere hoc possum: Vidiisse aliquando, cum nebula radices & imam partem turris ambiret, exstante in sereno vertice, summam partem terrorum reflexam, & caput à me longiùs abduxisse, proruferante & manifestè propinquantre parte inferiori, quæ erat in nebulâ.

Itaque distinguenda videtur nebulæ materia. Si arida & fumo-fa, qualis illa, de quâ Aristoteles, & nos primo loco diximus; non refringit, sic ut admoueat obiectum visibile. Si humore multo & rorulento grauata sit, (de quali secundo loco egimus) refringere, diffundere, attrahere rei speciem ad nos potest. Talem oportuit fuisse nebulam, apud Liuium Dec. 5. lib. 1. quæ Histrorum aciem Romanis mulrò maiorem, quàm erat, ostendit.

Sic etiam extricare posse videor, quod de exercitu Caroli VIII. Gallorum Regis, per Romam sub Alexandro Sexto, inter noctem, & Romanorum stuporem, Neapolim tendente, Iouius lib. 2. scribit: *Id, inquit, quoque metum stupentibus addebat, quòd viri, equi, vexilla, arma, tot passim funalibus inaequali splendore incertam praebentibus lucem, ampliora ac maiora vero videbantur.* Pingues etenim vapores, non solum aridæ & atraræ illæ fuligines, facibus ac funalibus exhalant, qui militû & agminis speciem diffundere valuerunt.

## CAPVT VIII.

## De Grandine.

## ARTICVLVS VNICVS.

*Quid grando. & eius caussa.*

**G**RANDO, inquit Seneca lib. 4. cap. 3. Nat. est glacies suspensa. Sed definitio rudis est, & nimis laxa. Scitiùs Aristoteles: Est pluuia congelata. Materia ergo proxima transiens, est pluuia. Forma, rigor ille glacialis, qui discriminat à pluuia. Finis, rigatio plantarum, ubi se resoluerit. etsi non rarò à diuinà vindictà assumatur ad lapidandas fruges. Fallitur ergo ille ingeniosus, cum credit

*— niuibz quoque mole rotatis*

Ouid. 9.  
Metam.

*Adstringi, & spissâ glomerari grandine corpus.*

Non enim è niuium focculis, sed pluuię guttis, glomerantur grandinis globuli.

De caussa efficiente Anaxagoras & Aristoteles litigant. Ille à frigore medię regionis, vt niuem, hic ab antiperistasi caloris infimę regionis, condescere mauult. Primò, quia in montium, qui infimam regionem excedunt, iuga vix vlla vmquam grando cadit. nec satis fortasse pro Philosopho ille canit,

*Quàm multâ fiet grandine canus Athos.*

Ouid. in  
Ibina.

Secundò, Grando illa angulosa prope terram, coagulum inter casum capit. si namque ex tam alto ruina esset, motu & longâ gyratione angulos deterisisset.

Tertiò, Sæpè nullo præeunte sonitu maxima grando ad terram venit. sonuissent verò antè collisi inter se globuli, si induruisent in sublimi.

Quartò, Antiperistasis imi aëris sola caussa est, cur æstas frequentius grandine, quàm hiems, lapidetur.

Dico Primò: Quandoque grando frigore medię regionis congelascit. Talis plerumque est minuta illa & fungosa, hiberna grando. Probat, quia nullus tantus in aëre tunc calor est, cuius antiperistasi possit gelari grando. Quia verò guttulę vixdum ante glaciationem perfectè ad densitatem aquę redierant, multoque

exhalationum spiritu turgidulæ sunt, idè orbiculi leues & fungosi, minimùmquæ à materia niuis aut pruinæ distant.

Dico Secundò: Quando lapidosa & consummata duritiei, antiperistali caloris infimi aëris, vt plurimùm, coagulatur. Id egregiè adserunt Aristotelis rationes. Sic autem expediri potest, in id, vel fallor, debet, isthæc antiperistasis. Gutta spiritu nubium tumentes, vbi aërem tepidum inciderint, diducuntur paulisper, & se laxando, effluxum spiritibus calentibus aperiunt. quibus magnâ parte liberatus humor, subitò, quantum valet, ad frigus se reuocat. Sed quare congelat? nam forma substantialis aquæ materiam suam fluere, quàm obrigescere in glaciem, mauult. Credo id fieri propter siccitatem reliquorum spirituum, qui non exspirantur illâ antiperistasi, sed remanent à frigore extincti & deprehensi in grandine. Nam certum est, multam exhalationem vnâ cum humore in grâdinem stringi. idè enim ita alber, & fungosior rariorque est, ac opacior, quàm glacies alligata ex aquâ vulgari. Porro inter sidera Arcturus maximè grandinosus creditur. Plinius lib. 2. cap. 39. *Arcturi sidus non ferè sine procellosâ grandine emergit. oritur autem*, vt ait c. 47. *undecim diebus ante æquinotium autumnii*. An verò id per influentiam sideris, an quia exortus in illam anni tempestatem incidit, quæ ob temperiem, quam à Sole præcipuè accipit, eueniat, in Libris de Cælo, si Deus vitam superstitem fecerit, dicemus. Grandinis magnitudo incerta est, & pro modo guttarum, quibus coaluit. Anno 1565. die 24. Iulij, Louanij ceciderunt crassitudine ouali, narrat noster Gemma. Rotunda ferè est, quia labendo, in orbem se terit, vel quia gutta etiam est talis. triangularem tamen etiam, & pyramidalem (quæ fortè figura est cadentis guttæ, quia spiritus eius sursum in conum se recipit) non rarò vidi. Portentosa etiam quandoque in eâ formæ visuntur, vt capita humana, porcina, calamistra etiam, & instrumenta varij luxûs feminarum, aut effeminatorum. Hac nobis admonitione aurem vellicat benignus Pater, qui ceteras omnes creaturas vertit in nostrum bonum, & salutem. Paleæ & quisquiliæ grandinibus aliquando deprehensæ & intextæ videntur, quas ventus leuauit, & in guttas pluuias impegit, differendo per aërem. Quidam quoque litteras in iis legunt. sed frequenter, puto, vti pueri figuras quasdam inanes in parietibus, aut castella in nubibus sibi fingunt. Ego quandoque grandines omnes glacialibus veluti loculamentis inclusas aspexi. globuli centrales albescentes & fungosi erant, vt planè coniectarem frigore mediæ regionis diriguisse.

riguisse. orbis verò satis densus eos ambiens, diaphanus & durior erat; vt materiam perfectè aqueam & pluuialem in casu grandini primæ circumgloineratam, & infimæ regionis antiperistali ei adstrictam, facile diuinasset. Sic ferè tenues quidam calculi primò concrescunt in renibus, & per vteretres delapsi in vesicam, nouo ibi visco se loricant, tunicaeque plures circumuoluunt. & hinc plerique omnes, vt notauit Fernelius, vesicæ calculi, contracti nucleum aliquem in centro ostendunt.

Mirum etiam est, quomodo grando, tantò durior niue, longè tamen celerius, & statim vt in terram cecidit, liquetur. Sed vnà operâ mirare, vnam plumbi libram citius, quàm butyri, calore dissuere. Ratio in plumbo fortassis est, quòd vbi pars vna feruorem ignis concepit, alteram attiguam statim accerrimè adurit; quia calor in eâ, vt materiâ densâ, est maximè actuosus. vnde experimur, vbi plumbum cœpit liquefcere, ceteras ordine partes festinare statim ad resolutionem. Glacies grandinis etiam densior est niue. Deinde plures particulæ siccae & terrenæ exhalationis, vaporum niuis vbique interiectæ, reditum eius ad liquorem magis impediunt. Cùm autem ignis aut calor grandinem vel aliud corpus gelatum regelat, & in liquorem dissoluit; frigus quod partes, ne dissuarent, continebat, tantùm expellit: temperiemque certam, ex quâ liquiditas, ceu qualitas quædam secunda, resultat, inducit. Quid enim aliud philosophemur?

Grando plerumque die, rarò nocte, nisi repente, decidit. quia præsentia Solis, calor in infimo aëre antiperistasin potentiorẽ interdiu facit.

Ceterum calamitatis præcipuus timor est à grandine, vbi in calamiosiam seges stetit. Hoc tamen vnum in malo solatiolum est, quòd vix vquam latè grassetur, sed quosdam solum feriat tractus: longiorque semper, quàm latior, est strages. Causam existimo, quòd æstate præsertim è nimbis, qui breues, & vni sæpè tantum campo impendent, grandines illæ proueniant. In longum spargit eas ventus.

Veteres agricolæ, vt Cato & Plinius referunt, carminibus grandinem & calamitatem agris depellebant. Alij etiam modi sunt apud Palladium: crocodili, aut hyenæ, aut vituli marini pelle per agros circumlatâ, vel cruentâ securi minaciter contra cælum leuatâ, vel noctuâ patentibus pennis suffixâ. Sed hæc magica sunt: nec vlla tam delira anus, quæ sine causâ naturali hæc esse, non videat.

Meri-

Lib. 4.  
cap. 6. Na-  
tur.

Meritò etiam Cleonæos Seneca ridet. *Illud incredibile, inquit, Cleonæis fuisse publicè prepositos χαλαζοφύλακας, Speculatores futuræ grandinis. Hi cum signum dedissent, adesse iam grandinem, quid expectas? ut homines ad penulas discurrerent, aut ad scortea? imò pro se quisque alius agnum immolabat, alius pullum. Proinùs autem illa nubes aliò declinabat, cum aliquid gustassent sanguinis. Alij etiam digitum suum graphio bene acuto pungebant, & hoc sanguine, ne seges vapularet, litabant. Sed vnde exiguo sanguini tantæ vires? ait Seneca. *Quantò expeditius erat dicere, inquit, Mendacium & fabula est?* Potuit tamen verum: sed ex dæmonis nubem declinantis parratione.*





# LIBERTI FROMONDI METEOROLOGICORVM

## LIBER SEXTVS:

### De Meteoris apparentibus.

**M**ETEORA apparentia verè meteora non sunt, nec in partem obiecti horum Librorum propriè veniunt. Non enim corpora imperfectè mixta, sed accidentia tantum sunt: adiectaque legitimis meteoris ab Aristotele, quia eorum more, in exhalatione aut vapore in sublimi sortum habent.

Scientia eorum iucunda, sed in difficili & arduo est; ut quemquam hætenus culmen attigisse omnes negent. præcipuas tamen difficultates Iris amplectitur. & eâ re Euclidem in Opticis & Catoptricis, Ptolemæum in Speculis, manum ab eâ abstinuisse censet Maurolycus. & ipse, vit aliàs in omni genere Matheseos eminentissimus, *Aliquid, ait, experimento consonum vestigando, diuinabo.* & alibi: *De Iride sicut multi scribunt, ita nemo satum demonstrat.* Merito igitur Sirachides: *Vide Arcum, & benedic eum qui fecit illum: valde speciosus est in splendore suo. Gyrauis calum in circuitu gloria sua, manus Excelsi aperuerunt illum.* Opus enim singulare & eximium est diuinæ manûs, ut mirum non sit, humanum oculum non altè in causas eius cernere. Solem tamen aut Lunam, ut peniculorum instrumenta in digitos ad huius arcûs picturam sumit. quia nisi in siderum istorum luce, numquam apparet Iris. Ceterorum enim radij satis roboris non habent, ut oppositam nubem terebrent, & euidenti luce perfundant. idque non ex inopiâ luminis, quod vberius pleraque lunari habent; sed ob nimiam à terrâ distantiam: hinc enim fit, ut radius spatio lassatus, languidus & exspirans ad nubem perueniat. Iris itaque duplex solùm est, Solaris, ac Lunar. Illa tamen maximè insignis, vocaturque per antonomasiam, & sim-

Eccl. 43.

pliciter, Iris. Ab eâ igitur exordium sumemus: cum præsertim omnia ferè, præter caussam efficientem, in Lunarem etiam competant, quæ de Solari enarraturi sumus.

## CAPVT I.

*De Iride Solari.*

## ARTICVLVS I.

*Varie Iridum historia.*

**H**ISTORIOLAS aliquot in ceteræ doctrinæ fundamentum mittere, pro bono duxi: nam lato experimentorum dissensu rem hanc tractare solent Auctores.

Cardan.

Omnes in primis passim Irides cornibus in terram deiectis conspiciamus, negantque vniuersi pænè aliter vniquam euenire. Sed ecce tamen Cardanus lib. 14. cap. 70. Variet. ait se Venetiis anno 1532. die vndecimâ Aprilis vidisse binas Irides, *non cum capitibus descendens, sed Soli oppositis. quarum prima cisò desit, altera in medio cali parua consistit horarum duarum & plus spatio. altera velut corona, altera ut semicirculus plano terra equidistans, præter aliarum morem.* Vnde apparet, non vniuersè verum esse, quod omnes iactant: Iridem numquam toto circulo claudi, nec semicirculari posse cerni amphorem.

Gemma.

Audi etiam nostrum Gemmam lib. 2. cap. 1. Cosmocr. *Septembris anni 1560. die 25. manè arcus celestis insignem speciem vidi, coloris, fulgoris, ac positionis insueta. Stabat enim conuexa parte Solem versus, concava verò versus cuiusdam pareij subobscurum typum, qui quasi ad Circum annuebat. Color puniceus eâ parte quâ Solem insuebatur, sed viridi quâ spectabas Occasum.* Cornua igitur non in terram spectabant, sed auersa ab exoriente Sole directâ in Occidentem intendebantur.

Scio etiam hic virum quemdam eruditum, Iouem lapidem paratum mihi iurare, aspexisse se Iridem supinam, & cornibus infestis in cælum. Hæc tamen, inquit, non è regione, inter oculum & Solem erat (ecce alterum & nouum planè miraculum) sed in eâdem cum Sole Mundi parte, sum mota aliquantulum ad eius latus.

Scalig.

Imò Scaliger Exercit. 80. num. 10. *Duas, inquit, separatas vidi-*  
mus

*mus Irides in nubibus diuersis, alteram ex aduerso, alteram ex obliquo ad latus.*

Licetus etiam lib. 6. cap. 2. de Nouis astris, *Bis iam, inquit, vidi-* Licet.  
*mus Irides in Meridiano ad Austrum, vel propè, cùm Sol esset in Oc-*  
*casu. & linea recta, qua à centro Solis per oculum nostrum extendeba-*  
*tur, non ad centrum Iridis ad Austrum, sed longè ab Australi plagâ tre-*  
*minabatur ad cali partem Orientalem.*

Vitello lib. 10. th. 69. affirmat, se Paduæ quatuor simul Irides circumactò perfectè gyro circulares, non è regione, sed ad latus Solis, distantia decem ab eo graduum, olim conspexisse.

Hollandi quoque, ex illâ ad Zemblam nouam nauigatione, inter cetera admiranda retulerunt, tres Soles visos ad Austrum, sex Iridum discernicula à se inuicem abiunctos. Hæc, & id genus exempla probabilitatem fortè reddent Scaligero, hæcenus ab Opticis tantoperè improbatò, quòd Exercit. 80. num. 7. Cardano affirmasset, se in Vasconiâ quondam admodum ex obliquo Iridem adspexisse. *Ita, inquit, dico, vt radius oculi mei ad alteram coronidem* Scalig.  
*propiorem esset decuplo, exempli gratiâ, breuior, quàm is qui ad remo-*  
*tio rem tendebatur.* Sed non credit Maurolycus. *Benè dixit, inquit,* Maurolyc. in  
*Hieronymus Cardanus, centra Solis, visus, & Iridis esse in eadem rectâ* Problem.  
*lineâ: & iniuste reprehenditur à Iulio quodam Scaligero. Adèò faciliè* Persect.  
*labuntur in hac Philosophiæ parte omnes, qui diuersa proficiuntur.* Olim etiam fuit, cùm Maurolyco magis accederem, sed longè elapso anno me repulit rara quædam & insignitissima Iris, in oculos, non meos vnus, sed Clarissimorum testium, cælo velut demissa, vt plurima me de naturâ admirabilis istius *ἑμφανος* doceret. Rem factam, non fabulam, accipe: & quam oculis nostris numquam Maurolycus extorquebit; excæcet Scaligerum quantum lubet.

Anno 1625. die Aprilis 9. horâ circiter sextâ vespertinâ, Louanij in amœnis illis inter Thenensem & Dieffensem portas mœnibus, cum famâ, scriptis, & eruditione Clarissimis Viris, Medicinæ Professoribus, Thomâ Fieno, & Petro Castellano, molliter & pro more inambulamus, cùm subitus imber, Sole interim in Occasu acriter radiante, nos ibi oppressit. secutaque statim ingentis curuaturæ, & coloratissima omnium quas vmquam memineras, Iris, in quâ dum defixi admiramur, ecce dextrum eius cornu, quod medio fermè Belgico milliari à nobis aberat, siluosisque illis extra portam Dieffensem collibus infixum erat, in subiectam camporum planitiem descendit, & nube densioribus iam pauldò ac plenioribus gut-

tis per interlucentes Solis radios exonerare se properante, breui tempore, per medium ibi fortè quemdam aratorem & equos eius (Iride enim inuolutum & illustrem cernebamur) ad ipsas oppidi fossas, citra 30. passuum distantiam, in nos lineà pæne rectâ venit: cornu interim altero longissimè à nobis, post celebre illud & illustre Canonicorum Præmonstratensium Monasterium Parcense, pertinaciter adhaerente. Res, quamdiu pluuia, sic mansit. rarefcentibus verò deinde paullisper stillicidiis, vicinum cornu per eandem quâ descenderat lineam, traiectâ iterum camporum latitudine, pedetentim in suum se collem recepit. Dum omnia etiam auidissimo & hianti oculo circumspicio, hoc quoque cum admiratione vidi. Secunda Iris (nam gemina erat) inuersis vt solet coloribus, primariam comitabatur, magisque & magis perpetuò se adstringebat, seque ei admouebat, quò propior nobis fieret primaria. similiter in recessu, spatium inter vtramque sensim laxabatur, donec in collem suum se restituit. Cùm proxima oculo nostro esset, vix decem inter vtramque intererant passus; cùm remotissima, distantia faciliè quadrantis Belgici milliaris apparebat. Ex hac igitur historiâ confici videtur, Solis, oculi, & Iridis centra, non in eandem rectam lineam incidisse.

## ARTICVLVS II.

*An Iris reflexione radiorum Solis, an refractione fiat.*

**R**adius luminosus nil est aliud, quàm lineare lumen à corpore luminante in longum emicans. Triplex verò ab Aristotele & Opticis vulgò statuitur: directus, reflexus, & refractus. Directus est, qui lineâ rectâ per medium vniusmodi densitatis effunditur. Reflexus, qui occurso opaci in partem oppositam reuerberatur. Refractus, qui per media diuersæ densitatis traiecitur. Radius quem Sol per liberum & vniuniformem aëra iaculatur, rectus est: qui speculo exceptus, in cælum reflit, reflexus: qui aërem & aquam terebrat, refractus. Rectus, simplex est: reflexus, ex parte quæ opacum incidit, & alterâ quæ in oppositum retrò abit, concinnatur: refractus etiam duas habet partes, quæ in geniculum quoddam, & veluti poplitis flexuram coeunt: penetrat enim hic radius è medio vno in aliud, sed lineâ paullisper deflexâ & exerrante à recto tramite. Non etiam indifferens est, ex vtro medio in alterum deinde perueniat. Si è rariori densius, vt ex aëre aquam intret, fractio versus

radius perpendicularem fiet: id est, radij vndique se addensant circa illum, qui omnium medius est. hic autem, veluti ceterorum Princeps, inclinantibus mutuâ inflexione non respondet; quia inter partes oppositas simul (quod fieri nequit) deberet annuere. rigidus itaque & directus perseverat. Si verò radius è medio densiori in rarius, ut ex aquâ in aërem, emicet, franguntur omnes circumstantes à perpendiculari, & ab eo se auertunt: id est, radij in medio densiori aggregati, & veluti in fascem collecti, per rarius extenuati disperguntur. His utcumque intellectis,

Dico Primò: Radius solaris in vapore rorido, in quo solo appareret Iris, necessariò versus perpendicularem frangitur. Ita Vitello Vitell. lib. 10. theor. 6 §. & sequitur euidenter ex iam præmissis. Radius enim ex aëre rariori in densiores vaporis rores se in sinuat, vnde omnes, præter perpendicularem qui centra guttarum directè perterrebrat, ad ipsum se perpendicularem incuruant. Et hinc, quia non vnicus tantum, qui in primâ nubis superficie occurrit, guttarum est ordo; sed alij innumeri sunt per totam nubis profunditatem dispositi: idèò non vna solum, primo statim nubis ingressu, accidit refraction; sed sine numero frequentantur alia & alia. Vt cogita seriem quamdam & catenam stillicidiorum à fronte nubis, per profundum, vsque ad vltimum eius dorsum. deinde in primâ guttâ radios obliquè incidentes aggregari ad perpendicularem: hinc verò in breue illud aëris inter primam & secundam guttam fretum elapsos dissipari & refugere à perpendiculari. postea in secundam guttam impingere, ac denuò ad perpendicularem reconciliari. vnde iterum expediti, sparguntur in aëre consequenti: donec tertia gutta etiam diffuens colligat in nodum. & ita deinceps vsque ad finem nubis & vltimam guttarum. Si tamen breuissimum fuerit inter vtramque guttam aëris interuallum, nulla fiet à perpendiculari radiorum dispersio: quia aliquanto post primam guttam in ipso aëre in vnum punctum & nodum concurrunt; ut in vitris sphaericis patet, quæ stupam post se incendunt.

Dico Secundò: Radius etiam vaporem illapsus, in oculum vidētis reflectitur. Ratio est, quia sine specie lucis, splendor ille Iridis cerni non potest: species autem lucis est ipse radius luminosus, ut in Libris de Animâ cum Scoto & Opticis demonstraturi sumus. vel potius, quia non ex quolibet situ, sed determinato, ut res in speculis solent, videtur. Sed quid igitur in Iride videmus? Lumēne Solis incorporatum nubi, ut in aurorâ & vespertinis crepusculis vsu

venit, an ipsum Solem tamquam in speculo? Aristoteles hoc affirmare videtur, quia semper *κατὰ ἀνὰκλασιν per reflexionem*, non *κατὰ διάνκλασιν per refractionem*, explicat Iridis generationem. & ita exponit, & acriter propugnat Vicomercatus. Seneca etiam lib. 1. c. 4. *Non dubium, ait, cuiquam relinquitur, quin arcus imago Solis sit malè expressi, ob visum figuramq; speculi*. Et cap. 3. egregiè sententiam Aristotelis enarrat. vbi singula pluviæ cadentis stillicidia, totidem specula esse inquit, reddiq; à singulis imaginem Solis. nec aliud Iridem esse, quàm innumerarum eiusmodi imaginum confusio- nem: quæ idè perturbatæ appareant, quia interualla guttarum, spatio consumuntur & euanescent, ne hinc valeant discerni. Et de- nique affirmatissimè cap. 5. *In eadem, inquit, sententiâ sum, quâ Posidonius, ut arcum iudicem fieri nube formatâ in modum concaui spe- culi & rotundi, cui forma sit partis è pilâ secta*. aitq; deinde, *Solis illam esse effigiem, non similem*. conaturq; detrahère admirationè faciei illius tam abnormis & procul abludentis à vero Solis filo & schemate, in quo nihil ferè simile eius, quod cernimus in Iride, cul- pam enim coniicit in speculi enormitatem. *Non omnia, inquit, spe- cula ad verum respondent. Sunt, quæ videre extimescas: tantâ defor- mitate corruptam faciem visentium reddunt, seruâtâ similitudine in peius. Sunt, quæ cum videris, placere tibi vires tuæ possint: in tantum lacerti crescunt, & totius corporis supra humanam magnitudinem ha- bitus augetur*. Consentienter his etiam Cardanus lib. 4. Subtil. lo- quitur. imò Maurolycus in Problem. Perspect. disertissimè: *Sicut imago rei non colorat speculum, ita colores Iridis non imprimuntur stillicidiis. & sicut imago absque iacturâ speculi, ita & colores absque infectione stillantis aquæ reflectuntur ad oculum*. Veluti ergo in spe- culo non picturâ aliquam humanæ faciei, sed ipsam videmus: ita in nube, nō imago solaris vaporì impressa & inherens, sed Sol ipse ille

*Qui celsa liquidi spacia decurrit poli,*

radio obiectu nubis in oculos repercusso aspicitur.

Demonstrari etiam ex Aristotele, Posidonio, Senecâ, & aliis sic potest. Primò, quia Iris situm cum Sole mutat, sublimis aut humi- lis, prout ille se submisit aut sustulit, inquit Seneca, contrario motu. Secundò, oculus etiam suo motu transferre videtur Iridis sedem. Inambula enim versus alterum cornu, fugiet ante te, consequetur- que ponè alterum à tergo, inueniesq; te semper medium inter vtrumque.

Addit Posidonius: Si color aut lumen in vapore defixum cerne- retur,

Vicom.  
Seneca.

Seneca.

Seneca.

Cardan.

Mauroly.



retur, euidentiùs è propinquo, vt alibi solet, in oculos se ingereret. secus tamen est. nam si in vallem accurras, in quam brachium eius depêdere vides; nil nisi roscidum, sine picturâ aut luce vllâ insigni, aërem circa te circumspecies. Hæc autem omnia signa sunt specularis inspectionis; & oculis nostris, non tincturam vaporis, sed rem quæ extrâ est, imagine à speculo illo repulsâ, occurrere.

Sed vix possum induci vt accedam. Primò, quia quod in speculo adspicimus, tantum intra profunditatem recessisse, quantum à superficie eius distat, apparet: vnde si speculo faciem admoueas, imago tibi obuiâ videtur procedere. Quod ingeniosè Poëta lib. 3. Metamorph. in puero Narcisso, amore sui in fonte conspecti pereunte, expressit.

*Exiguâ prohibemur aquâ. cupis ipse teneri.*

*Nam quoties liquidis porreximus oscula lymphis,*

*Hic toties ad me resupino nititur ore.*

*Posse putes tangi. minimum est quod amantibus obstat.*

*Quisquis es, huc exi. quid me puer vnice fallis?*

Quid.

Contrâ tamen omnino in Iride euenit. nam instar vmbræ, sequentem fugit, sequiturque fugientem. Secundò, illa colorum varietas satis arguit, lumen Solis esse, guttularum vmbris mixtum, & in colorem medium temperatum. Sic enim etiam in aurorâ, in prismatibus, siue triangularibus vitris, in vrinalibus aquâ plenis, in columbarum ceruicibus, varios, vmbrarum & lucis miscelâ, concinnari colores videmus. Scio quid reponat Vicomercatus. *Falsum* Vicom. est, ait, *Solus color in arcu non apparere. apparet enim, etsi non purus: quippe qui in speculo colore infecto, hoc est, in nube nigriori exprimitur.* Sed nimis leue & perfunctorium hoc est, vt statim acquiescam. Nam si vultum aut lucem in atramento aut nigro marmore inspiciam, tenebre scit quidem & infuscatur species; numquam tamen in purpuram aut colorem alium medium facit.

Videor tamen iam Aristotelem, aliosque antè laudatos, in partes nostras panè posse traducere. Nam propè aut planè verum est, & lumen nubi incorporatum, & vnâ Solem in Iride cerni. De lumine nubis, mihi fixum iam & certum. De Sole ostendi potest: quia radius Solis primarius reflexus est, qui Iridem nobis deformat, non aliquis secundarius; vt postea dicam, vbi causas anquiram figuræ illius circularis. radius autem primarius, qui que à speculo per angulum incidentiæ parem resilit, obiectum repræsentare, & ad visionem eius excitare potentiam solet. Verum tamen metuo, ne visus

ita



ita totus in speculando lumine vaporis ( quod , apud me equidem , est species ipsissima lucis solatis ) occupatus sit , vt actionem suam ad Solem vsque , cuius tamen speciem habet , non extendat . Vbi enim species visibilis in aliquâ parte medijs sic conglomeratur , aut miscetur opaco , vt ipsa obiectum sensu comprehensibile concinet , tunc ei fortasse sic adhæret visus , vt ad primum obiectum , quod speciem illam sparsit , exire non possit . quod in Libris de Animâ magis & enucleatius diducemus .

Ex discursu igitur præcedenti patet , Iridem tam refractione radij intra profunditatem vaporis , quàm reflexione ad oculum generari . omniâque in lucem longius extrahentur à dicendis : vbi etiam causas , cur Iris attollente se Sole succumbat , & succumbente se attollat , cur à sequente deprehendi metuat , abeuntem vltro sequi amet , & alia id genus prodemus .

### ARTICVLVS III.

*Cur Iris circularis . aduersus Posidonium , Senecam , Plinium , Scaligerum , Bodinum , & alios .*

Cardan.

**H**I omnes , aliique plures , quorum Philosophia minimam cum Opticis mixturam fecit , in cauitatem nubis figuram istam coniciunt . imò Cardanus etiam , quod impensè mirum , lib. 4. Subtil. Idem facit : Auctorque libri de Mundo . quem ne Aristotelem existimes : nihil enim genij & ingenij eius habet .

Aristot.

Verùm , non magno opere refelluntur . Primò , quia non semper extremus nubis limbus in rotundum compositus est , quoties apparet Iris . ventorum enim flatibus , item vaporis & aëris perpetuo fluctu , in omnem se formam transfiguratur . Deinde , cum à cornu vno Iridis versus alterum incedimus , quandoquidem nobiscum transferri videantur , exciderent statim limbo isto circularis nubis . Secundò , nulla causa erit , cur non etiam triangulares , quadrangulares , & millesimo alio schemate depingantur Irides , si illa est fortuita figura vaporis . nam vapor instar Protei in omnes formas detorqueri potest . Tertiò , Iris artificialis ( cui Aristoteles alteram , similitudine indolis , componere solet ) nata aspersione aquæ in radios Solis , semper in circulum se gyrat , cuiuscumque schematis sit humor quem ore exspargimus .

Alex.  
Vicom.  
Scalig.

Hinc liquet , Alexandrum , Vicomercatum , Scaligerum à vero aberrasse , cum inter cornua Iridis inanem concauitatem fingunt ,  
ideoque ,

ideoque totum illud spatium vacare, nec impleri imagine Solis, quia nullum ibi sit eius speculum. Reverà enim tantum luminis per totam illam semicirculi aream sparsum & inculcatum est, quantum in ipsa Iridis circumferentià cernimus. Vnde id rescire potes? inquires. Ex motu quo alterum cornu, per spatium illud quod inter brachia apparet vacuum, me sequetur, si ad oppositum cornu gradum faciam.

Ammonius, & alij quidam, Iridem circulo circumscribunt; Ammon. quia talis est figura Solis. Sed perperam, quia Sole eclipsi in medià parte defecto, item Luna semiplenà, aliquando apparuit arcus; nec minùs, quàm pleno vtriusque sideris orbe, circularis. Nihil ergo refert, cuiuscumque illuminans sit figura.

Itaque gyrys ille circularis Iridis, nascitur ex æqualitate & similitudine angulorum; quibus radij sideris à nube rotante ad oculum respicientis vndique perueniunt. Hoc enim mecum perpende. Vt radius qui in nubem penetrauit, coloratus & euidenter conspicuus in oculum resiliat, debet certo angulo reflecti: id est, inter radium Solis qui directè in nubem iacitur, & illum qui versus terram retorquetur, certam quamdam distantiam & diuarcationem esse oportet: hoc est, anguli semirecti, vt existimat Maurolycus. vt autem Mauroly. reflexio tali præcisè angulo ad oculum fiat, non à quauis parte roscidæ nubis venire potest. non à iusto superiori, non ab inferiori, sed aliquà quæ determinatum ab oculo intervallum habeat. vnde, vt multæ partes illo siue pari angulo lumen versus oculum reuerberent, debent æquè ab oculo distare, id est, in circulum disponi, cuius centrum sit in oculo, à quo omnes lineæ ad circumferentiam educatæ sint æquales.

Sed aliquot hic satis perplexæ & difficiles triæ nobis extricandæ sunt.

Primò, Stillicidia vaporis, corpora grauià sunt: cur ergo ex illo Iridis arcu non statim excidunt, cum nihil solidi sit, quod ipsa infernè sustineat? Dico excidere, dissoluendumque Iridis contextum, nisi (quod plerumque aliquamdiu sit) supernè alij rores in spatium decidentium defluerent, & in eodem situ, quo præcedentes guttæ, exciperent radium. Hinc sequitur, perpetuò mutari Iridem, etiamsi Solem daremus in eodem gradu immotum permanere. Nam vbi diuersa specula, & aliud aliudque luminis subiectum est, necesse est etiam formam illam toties variari. Visus tamen id non intelligit: quia gutta guttæ tam promptè superuenit, vt non

agmen diuersorum, sed eadem & constans acies appareat stantium stillicidiorum. Sequitur quoque, Irides pertinaciores esse, quæ humilem curuaturam habent, quales depingi solent sublimi Sole. Tales enim maiorem nubis roridæ partem suprâ habent, diutiusq; in circumferentiam illam terræ propiorem depluere ex alto vapores possunt. Vbi etiam intelligis, cur summa Iridis absis facilius rumpatur & euanescat, quàm ima cornua. superior enim nubes rorem sæpè & humorem totum effudit, cum per aërem terræ vicinum, qui brachia arcus sustinet, adhuc defluunt stillicidia. Vides deinde causam, cur Sole pariter lucente, frangatur hæc aut ibi catena luminis, quia scilicet vna pars nubis citius quàm altera exonerare se & siccare deproperat, colorique sustentaculum subtrahit.

Secundò, Difficile est enarratu, cur Sole horizontem tangente, radij nubem incidentes non reflectantur potiùs versus cælum. Ex Euclide enim & experienciâ constat, reflexionem in speculis semper fieri versus angulum obtusiorum. Facile id intelligas, si loco summæ nubis in quâ supremum Iridis gibbum vides, speculum ingens imagineris, quod orientis aut occidentis Solis imaginem excipiat. cum enim Sole illuminante & oculo aspicientis altius futurum sit, haud dubiè radium sursum, non deorsum ad oculum retorquetur: quia angulus, quem radius obliquè incidens, cum superficie speculi facit, acutior & angustior versus terram est; quâ verò spectat cælum, obtunditur & se laxat.

Respondeo, Manifestè hinc euinci, Iridem non generari reflexione imaginis Solis à continuo & perpetuo aliquo speculo; sed ante reflexionem, in infinitis paruis *εὐόπτοις* siue speculis, vt docet Aristoteles, lumen refringi, & veluti in totidem nodos colligi; ac deinde hæc illâc, vt in globis crystallinis aut vitreis aquâ pleniscernimus, per varia superficiiei puncta exspergi. Ex illis autem guttularum radiis quidam cælo reueruntur, alij ad terram & oculum perueniunt. guttæ enim illæ lumine turgentes, vndique, vt dixi, se exonerant, & radiant in orbem.

Sed ecce iam tertiam, & maximam difficultatem. Cur igitur omnis area Iridis, & vniuersi qui in totâ vndique roridâ nube guttarum globuli, non fulgent simili luce, si omnes pleni sunt, & vndique eam spargunt?

Vicom.

Franciscus Vicomercatus, non malus Aristotelis interpres, conatur persuadere, radios à totâ mediâ circuli areâ non reflecti, quia fortiores ceteris sunt, tamquam propiùs distantes à perpendiculari,

ri, quem per centrum oculi imaginamur & centrum Iridis traici. Sed id suspectum vanitatis, imò, nisi fallor, satis compertum, infrà inter tractandos Iridis colores ostendemus. Suppone igitur, quod verum: omnes intra extra ambitum arcus guttas perfusas esse & rumentes sideris luce. Hæc credo difficultas Cardanum, Scaligerum & alios in eas angustias compulit, vt inter brachia Iridis nullam esse nubem, aut nimis reductam & à nobis dissitam crederent. Sed fac aliquando ita esse: quandoque tamen, & sæpius aliter eueniet. an ergo quisquam fando accepit, aream vniquam Iridis simili luce variam vsque ad terram apparuisse? scio numquam factum.

Itaque aliter, & ingeniosè Maurolycus rem hanc componit, et si Maurolyc.  
tamen etiam in fluctu me relinquat. In qualibet guttâ ait refractiones multiplicari, & se inuicem adiuuare, ac deinde lumina conglomeratum vndique dispergi: verùm radium qui angulo semirecto reflectitur, solum idoneum esse qui repræsentet aliquem colorem. qui enim acutissimo angulo repercutitur, quia ferè contra radium directum redit, ab eo obtunditur, & permixtam vmbra exuit, ne appareat in eo color: qui verò obtusissimo angulo à guttâ, etiam propter talis radij debilitatem, non coloratur. Igitur, qui per mediam distantiam inter radium directum & superficiem nubis ad terram redit, aptissimus est, qui rapiat colorem. Satis enim fortis est, & sat longè abiunctus à radio recto incidente, ne ab eo offusceretur, maximè cùm, vt notat, ab octo punctis in superficie concavâ cuiusvis guttæ æquali intervallo dispositis radius directus octies in radium qui angulo illo semirecto reflectitur, repercutiatur, vt necesse sit tot radiis in vnum confluentibus; eademque viâ emicantibus, insigniter roborari.

Sed hæc fortasse, nisi arbitrio oculorum, & proposito è Mathefi schemate, non facilè intelliges. Rem igitur paulò familiariùs è Vitellone tractemus.

Ex vnaquaque vaporis guttulâ tres, cogita, radij ad terram dei- Vitello  
l. 10 th 66  
ciuntur. Vnus per superiorem aërem trans caput tuum cadit, nec demittit se vsque ad oculum spectantis Iridem. Secundus, ante pedes tuos in terram decidit. Tertius, inter vtrumque; medius, oculum incidit. Hic verò, vt sit satis plenus & robustus, debet non quouis, sine discrimine, angulo, sed certo & determinatæ magnitudinis reflecti. Nec tamen adeò validum esse oportet, vt guttularum & vaporis opacitatem vincat: sic enim nullo se colore tingeret. Huc ergo vsque valere debet, vt per obstantem nubis opacita-

tem regredi, denſo ſatis ad oculum excitandum lumine, poſſit, ita tamen vt ſtillicidiorum implexas ſibi & intricatas qualdam vmbras ſecum trahat. vmbrarum enim iſta mixtura neceſſaria eſt, vt lucis candor in ruborem, virorem, aut purpuram declinet. Alij verò radij, qui à guttis mediam circuli aream intexentibus ad oculum repelluntur, non habent iſtam mediocritatem; vt paulò pòſt enarratiùs explicabo.

Sed eſtne angulus reflexionis iſtius perpetuò ſemirectus, vt contendit Maurolycus? Vix exiſtimo. Nam in illà Iride Louanienſi, quam anno 1625. cum Clariſſimis & Erudiſſimis Viris, Thomà Fieno & Petro Caſtellano, vt Articulo primo retuli, conſpeximus, à cornu illo nobis propinquiori, acutiori angulo quàm ſemirecto, quàmque ab altero cornu, tantò longiùs abiuncto, ad oculum noſtrum radius redibat. Itaque hoc magis cenſeo: Radium qui colorat nubem, primarium reflexum eſſe, qui à corpore illuminante actione reflexà producit, reſilitq; angulo pari, aut circiter, angulo incidentiæ. Et hinc eſt, vt variatà Solis altitudine, & conſequenter radio directo per aliud ſuperficiæ punctum in profunditatem guttarum ſe mergente, varietur quoque angulus reflexionis & Iridis altitudo. Cùm enim Sol demiſſus eſt, per ſuperficiem pænè inferiorem quàm terram gurta deſpicit, radius intrare debet, vt radij primarij reflexio tangere oculum poſſit. vnde non niſi ab altiſſimis, & vertici noſtro viciniſſimis guttis, talis reflexio eſſe valet: id eſt, ſumma curuatura Iridis, maximè ſupra terræ ſuperficiem eleuari debet. Meridiano autem, aut ſaltem excelſo ſupra horizontem Sole, radius guttis ſupernè quodam modò ſuperuenit, & proinde non niſi à valdè humilibus & horizonti propinquis radius repercuti ad nos poteſt. & inde minima illa arcuum ſegmenta, quæ apparent aduſto, ſiue dudum ante occaſum, aut dudum poſt ortum, dic.

Quod autem de primario reflexionis radio dixi, faciam te, ſpero, vt intelligas.

Cùm in ſuperficiem ſpeculi, vel lacùs v.g. radius Solis oblique cadit, ſi à Sole auerſus in lacum proſpicias, ita ſcilicet vt oculus inter Solem & lacum medius ſit, imaginem ſideris in illo ſpeculo non vides; & tamen lumen aliquod ſecundarium à luce per totam lacùs ſuperficiem diſperſa in oculum recipis: ſed non radium Solis primarium, qui verſus oppoſitam lacùs ripam reſſectitur ad angulum angulo incidentiæ parem. hic autem primarius eſt, quia à Sole ipſo (non ſolùm à lumine per lacùs ſuperficiem diſſeminato, & vndi-

vndique etiam tenuiter & subobscure radiante, vt secundarius) sursum reproduciuntur. ideoque vberior est, & visum deducit (quod alius non facit) in Solis visionem.

Igitur rem totam in clausulam istam colligo. Iridem in vapore isto cernimus, vnde reperiuntur ad oculum radius Solis primarius potest. ille vero certo aspectu sideri opponi debet. A guttis quæ extra gyrum arcus & vertici propinquiore sunt, radij primarij post tergum nostrum reiciuntur, à guttis intra arcus ambitum conclusis, ante pedes nostros recidunt in terræ superficiem. Ab vniuersis tamen, intra extra arcum stillicidijs, radium aliquem secundarium excipimus, sed iste debilis, & à primâ solum vaporis superficie, non ex valde profundo venit, ac proinde sine coloratione. Cetera quæ tibi hic occurrere & impedire possunt, sequentes Articuli, nisi saltem, expedient.

#### ARTICVLVS IV.

*An centrum Solis, oculi, Iridis, oporteat semper in eandem lineam rectam incidere.*

Vitello, Maurolycus, Cardanus, Vicomercatus, Thimon, & plerique omnes facti agmine in eam sententiam currunt. Infelix etiam ille Spalatensis, M. Antonius de Dominis, etsi non sum-  
M. Ant.  
mus, melior tamen non paullo Opticus quam Theologus, in libello de Radijs visus & lucis, ante apostasiam edito, *Immerisò*, ait, *Cardanum reprehendit Scaliger, quod lineam unam esse dixerit, in qua sit Sol, oculus, & centrum Iridis. Hoc enim & Aristoteles, & grauissimi alij Philosophi admittunt, & ratio suadet, & experientia manifestissime conuincit. Nam quod ipse assert se vidisse propiore sibi alteram coronidem Iridis, deceptum puto. non enim spatium illud mensurauit: aut illa non fuit Iris sed alia quacumque impressio.*

Verum ex verissimis Articuli primi historiis protegi fortasse potest Scaliger. Sed ante omnia video, opus esse aliquâ Iridum distinctione, quas Auctores passim in vnam confundunt, cum naturâ & modo generationis, toto cælo dissideant. Elicio vero hanc differentiam ex duplici genere Iridum artificialium.

Primæ oriuntur per *διπλασιν* reflexionem, præeunte tamen, vt Articulo secundo diximus, aliquâ *διαλασει* refractione, quâ radius intra humorem cumuletur & densius inculcet. Tales apparent, inquit Aristoteles, in aquâ remis in guttas dispersâ. item si quis oc-  
Aristot.

Seneca. *accidere, inquit lib. 2. cap. 3. Nat. Seneca, si quando volueris obseruare fullonem. cum os aqua impleuit, & vestimenta ridiculis (palis fissilibus) diducta leniter aspergis, apparet varios edī colores in illo aëre*  
 Vitell. *asperso, quales in arcu fulgere solent. Vitello etiam in præcipitio quodam aquarum iuxta Viterbium in Hetruriā, perpetuam Iridem certo ad Solem aspectu, in aspergine aquæ in altum salientis, videri dicit, seque in eā multa quæ ad Iridem fuisse meditatū. & Iouianus de quādam aliā simili:*

Iouian. *Ac memini, dum castra sequor, Mæortiaq; arma,  
 Quā præcepit sese Tyburnā rupe volutus  
 Fert Anio, multaq; cadens aspergine sudas;  
 Fumosa fulgere super conspergine claram  
 Irim, & aurato iacentem spicula cornu.*

Huiusmodi Irides, famosæ & solemnīs istius quā nubilo Sol depingit nubes, germanæ & sorores sunt.

Sed alterum Iridis artificialis genus est, merx *διαλάνος refractionis* filia. Talem prismata, & vitra triangularia efficiunt. item vrinale, aut vitrū etiam vulgare vinarium, similem in subiecto pavimento affabrè suis coloribus deformabunt, si obscurato nonnihil cubiculo, radium Solis per foramen, aut sub apertam fenestræ rimam admissum, vitreo humore ita excipias, ut non per totam eius profunditatem, sed tenuem & summam eius partem se traiciat. Ita enim radius nimīa opacitate humoris victus non obtenebrescet, sed aureo, viridi, purpureo colore hilarescet. Radius, qui tenuissimam & supremam humoris portionem transcurrit, minimum nigri & opaci secum defert, apparetque in puniceum aut flauum digestus. qui verò longius per humorem eunt, densitatem illam ægrè pertrumpunt, & maiori opacitate in virorem aut purpuram adstringuntur.

Hæ autem Irides purā putā radij intra humorem refractione sunt, pingunturque ad modum veri coloris in superficie quam post vitrum incidunt. vnde etiam ex quolibet situ & distantia eodem modo oculis se ingerunt. Hanc posteriorem Iridem, ut discrimen aliquod contra confusionem interiiciamus, refractam, priorem reflexam appellabimus. Exemplo refractæ multi viri docti vtuntur, inter quos doctissimus VVendelinus noster, & Keplerus cap. 4. Paralip. in Vitellonem. *Materia aquea, inquit, quæ inter speculatorem & Solem est, seu pluvia sit, seu pellucida nubes, seu nebula*  
*di*

VVendel.  
 Keplerus.



*di enim Irides (et in nebulâ) format & figurat refractiones radiorum Solis. quæ verò post spectatorem est, ea excipit hos radios Solis refractos. Nubes autem superflans obumbrat locum, & radios directos auertit, ut colorati radij cerni queant. Itaque non est verum, radios seu Solis seu visus reperi in ipso loco nubis, ubi apparet Iris. Afferit tamen, centra Solis, visus, & Iridis in eadem lineâ rectâ extendi. Quod non esse consequenter dictum, parebit statim.*

Dico Primò: In Iride reflexâ, quales solemnes illæ pleræque nubigenæ sunt, centra Solis, visus, & arcus, in eamdem ferè semper omnino, aut pæne lineam rectam cadunt: quæ Iridis axis appellatur. Infinitæ experientiæ, & Aristoteles id satis probant. Estque Aristot. eadem huius ratio, quæ figuræ illius circularis, resultantis ex æqualibus angulis reflexionum. Si enim oculus directè medius non esset inter Solis & Iridis centrum, sed propior alteri brachio, imparibus angulis reflecterentur ad eum radij. acutiori enim angulo repelluntur à brachij vicini, & quod propè ad latus spectatur, vapore, quàm ab altero, longo se inde intervallo diuaricante. vnde necesse esset circulum deprauari, & in aliam propinquam figuram detorqueri. Quod tamen aliquando etiam euenire docet Iris illa Vasconica Scalgeri, & nostra Louanienfis: nec vmquam à me Vitello, Maurolycus, M. Antonius impetrabit, ut non viderim, quod sub tam magnis testibus, & tam compertè ac palàm vidi. Radij igitur, qui mihi spectanti sinistrum latus ferè radebant, & in mediam fermè Iridis aream cadebant inuisibiles cum vtrumque cornu aberat procul, multiplicatis in vicino pluuiæ stillicidiis, manifestè iam inde in oculos repellebantur, colorati umbris & guttarum per quas transibant & refringebantur opacitate. Vbi verò sine pluuiâ aër ille est, liberè traiciuntur sine sensibili reflexione radij: aut si rarè tantum & dispersè guttæ, per interuallorum laxitatem se satis expediunt. Reflexio etiam ista, ad angulum angulo incidentiæ parem fieri potest: quod in Iride quoque artificiali vsu venit, quæ tantò tamen oculo adspicietis est propinquior. colores autem eius non sunt tam ardentes & insigniti, quàm aliarum Iridum, etiam si hæ longioquiores sint, quia à paucis guttis ore sparsis radij retroaguntur, ubi in maiori Iride è magnâ vaporis profunditate, & per multos guttarum ordines retunduntur versus adspicientem. Hoc etiam non insuper habendum: Non paucos esse radios, qui ad oculos non redirent, quia non illo quo oportet angulo primum reflectuntur; postea tamen in aliarum guttarum superficiem sic incidunt,

ut inde iam aliis radiis mixti & confusanei ad nos resiliant.

Ex dictis colligi etiam potest, Iridem reflexam, figurâ eclipticâ & ovali posse quandoque depingi. Probatur, quia nostra illa Louanienſis fuiſſet talis, ſi interlucentibus Solis radiis imber ſimilis inter ſiniſtrum cornu & oculum noſtrum decidifſet, qualis ſe obiecit dextro. Pari enim ratione ab eâ parte ſtillicidia radios interceptiſſent, adſtrinxifſent in colorem, & denique adduxifſent ad ſpectantem. Cur enim quod in vno cornu factum, non valuit etiam in altero? ſuprema tamen arcûs curuatura in eâdem nube & ſtillicidiorum altitudine potuit intereâ permanere, ſicuti reverâ permaſit ad noto altero tantum cornu. compreſſis autem duobus brachiis, nec deſcendente ſuperiori gyro, neceſſe non circuli, ſed eclipſis aut figuræ qualis ſegmentum videri. Rariſſimæ tamen ſunt tales Irides, & citò ſe recipiunt ad figuram circularem, vapore deciduo, nec altero paris denſitatis in locum eius ſuperueniente. Deinde, quod caput eſt, cælo ſatis denſè pluente, inuſitatum eſt, Solem tam vberes radiorum faſces per longam ſtillicidiorum aciem tranſuerberare, qui ſufficiant ad colorandam tam propinquam oculo ſpectatoris Iridem. Idem enim hîc, quod in nebulâ ambulantiſſimis ferè euenit. Spatium circâ decem aut quindecim paſſuum, quaſi ſereno pellucet, ſed paullum vltrâ omnia caligo ſepelit. id eſt, etſi tanta in vicino caligo ſit, oculus tamen id non ſentit; quia opacitas quæ ſuſtineat & terminet viſum non ſtatim ex minimâ diſtantiâ occurrit, cum lumen à proximâ caliginis exhalatione in oculos reſuſum, ſic diluat quæ vnâ refleſtuntur vmbras, ut non valeant diſtinguè, & quantum neceſſe eſt ad ſenſum, in fundo oculi depingi. ex diſſico verò, malignè & tenuiter lux redit, & tenebrarum ſiue opacitatis claram mixturam in oculos perfert. Ita ergo ſimiliter, in valdè propinquo non ſatis ſæpenumero opacitatis & ſimul luminis eſt, ut ibi incendatur Iris. Nam (quod frequentius, & ferè ſolet) aut radius ſufficientem illicò ante oculos noſtros opacitatem non inuenit, aut ſi eſt, ipſa lumen ſuffocat & extinguit, ut iam vires ad inaurandum arcum non habeat. Rem ita habere, mentior, niſi Iris artificialis manifeſtè adſirmit. Non enim dicitur artificialis, quaſi non à cauſſâ naturali, & Sole generetur, ſed quia vomitu & roratione oris, aut alio artificio humor Soli Iride depingendus exponitur. Hæc autem Iris, quia in ardentibus Solis radios opacus humor guttatim diſpergitur, ob oculos noſtros, vnus aut alterius pedis intervallo naſcitur. Id autem etiam poſſet, etiamſi è nubibus in radios

dios destillarent, non ore guttæ vomerentur. Quid enim in illum effectum refert, vnde veniant?

Dico Secundò: In Iride refractâ nulla omnino necessitas statuendi centrum Solis, oculi, Iridis, in eodem axē, siue lineā rectā. Id veritatis in Iridibus refractis artificialibus compertissimum est. ex omni enim situ, supero, infero, opposito, transuersali, & ab oculo extra vtrumque cornu constituto cernuntur. nec mirum, quia visio talis catoptrica & specularis non est, sed directâ, quali spectantur imagines in tabulâ depictæ. Omnes igitur illæ Irides Artic. primo memoratæ, quæ ad latus Solis, aut alibi ab oculo longè extra lineā à centro Solis in centrum arcûseductam collocato, aut cornibus sursum inuerfis, visæ sunt, refractæ planissimè, non ordinariæ, reflexæ, & Aristotelicæ fuerunt. Ad harum autem generationem duæ nubes necessariæ sunt: vna prior, in cuius vapore continuo, aut guttatim sparso (vtrolibet enim modo contexta sit, est indifferens) radij incidētes refringantur, & colorē arripiant, altera posterior, & nigrior, quæ sit veluti paries, in quo radij priori nube elapsi pingantur. Vtilis etiam fuerit tertia nubes, quæ parietem illum inumbreret, quod monuit Keplerus: nam nimius circumcircâ Solis splendor picturam, consumptâ omni vmbra nigrædine, facillè digereret in sincerum candorem. Prima deinde nubes, altior, aut ad latus esse debet, siue non interponi inter picturam & adspectum nostrum, sic enim interpelleret oculi aciem. Rotundam denique, aut propè, esse oportet. quia aliàs radius per eam traiectus, in pariete posteriori non circularetur, sed tenderetur rectus, aut (quod solemnius est) in alia quædam maculosa schemata torqueretur. Sæpè etiam quod hic aut ibi circulo exerrat, è longinquo tamen apparet circulare, spatio errores corrigente. Hoc denique adiciendum, Irides refractas aliquando integrum circulum supra horizontem ostendere. Patet id ex Iridibus Cardani & Vitellonis, Articulo primo narratis.

## ARTICVLVS V.

*An Iris videri possit maior semicirculari.*

**D**E Iride reflexâ & vulgari, quæ per antonomasiam Iris, est hæc Aristot. dubitatio. Aristoteles & Optici consensu demonstrant, Iridem talem maximam formari Sole Finitorem ortuum aut occiduum contingente. tunc etiam esse semicircularem: quia axis Iri-

Z z dis,

Vitell.  
l. 10. th. 74.

dis, siue linea recta à centro Solis per centrum Iridis ducta, in plano horizontis iacet, & tam Iridis quàm Solis illa centra supra horizontem conspicua sunt. apparente verò circuli centro, & Finitorem tangente, necesse est totum semicirculum vnum, eminere, altero suppresso infra Finitorem. *Tunc igitur semicirculus Iridis videtur,* inquit Vitello: *nisi forte tantò minus, quantum est differentia propter hoc, quòd centrum visus non est verum centrum vniuersi. In hoc autem non est sensibilis differentia. & si sit, non est in generatione Iridis, sed in visione ipsius.* Quæ mihi non videntur satis circumspectè asserta. Nam & oculus circumferentiam Iridis & altitudinem finit ac determinat (à vapore enim superiori, Iridis ablati circumfuso, & altiori quàm sit semidiameter arcus, sit etiam, sed quæ post spectatorem cadat, reflexio) & si Iridis, quam semicircularem adspiciamus, circulus infernè clauderetur, longè abest vt interciperet in mediâ suâ arcâ, terræ & vniuersi centrum. Semidiameter enim, quam infra terræ superficiem demersam imaginamur, nequit esse maior alterâ nobis conspicuâ. hæc tamen ultra nubes non tenditur, imò in aëterimis illis & humore multo grauidis, quæ vix ultra 500. passus à terrâ distant, plerumque finitur. Totidem ergo solùm passibus occulta altera semidiameter in terram condetur; cum hinc tamen ad vniuersi centrum non sit breuius quàm 860. milliarium German. interuallum.

Vnde iam facilè intelliguntur extra oleas nimis longè abire, qui docent, Iridem cuius semicirculum videmus, perfectè circulan-  
dam esse, si apud Antipodas nubes rorida contra eam quam Iride fulgentem cernimus, disponatur. Supponunt enim in imaginationis suæ fundo, centrum Iridis terræ centro respondere, ac totum terrestrem globum Iride sic circumligari, vt ille traici valeat per huius aream & circulum. In quâ tamen etiam allucinatione, Opticorum non pauci esse videntur. Sed errorem deprehendes, si cogitas tantò maiorem esse globi terreni quàm Iridis diametrum; faciliusque fore, camelum per foramen acûs extrahere, quàm terram per Iridis vnus, etiam amplissimæ, circulum.

Verum tamen est, cetro Solis ad Finitoris limbum depresso, Iridem semicircularem apparere (nisi montes, aut alia in superficie telluris protuberantia imis cornibus aliquid demordeant;) sed non medium vmquam est circuli maioris, qui terræ globum secet in duo hemisphæria æqualia. Ratio autem cur semicirculum totum adspiciamus, optima ab Aristotele assertur: quia axis qui per cœtra

Solis

Solis & Iridis transit, vtrumque incumbit horizonti. ergo etiam centrum Iridis est in ipso horizonte, ac consequenter horizon semicirculum abscindit à circulo per eius centrum.

Sed potestne quandoque semicirculus maior apparere? Affirmat Cardanus. Scaliger os ei baruit, suo more; sed iniuriā, vt sapè. Cardan.  
Scalig.  
Aucir. Aueroës enim lib. 3. Meteor. audiuisse se à fido teste, Iridem pene circularē aliquando visam, narrat: nisi tamen refracta illa, non vulgaris & reflexa fuit. Ex monte tamen altissimo talem apparituram, Thimon (quo nullus inter veteres illos & siccos Parisienses Thimon. Nominales in re naturæ consultior) Maurolycus, aliiq̃e præter Maurolyc. Cardanum asseuerant. *Possibile est, ait Maurolycus, Iridem integram apparere, si quis supra horizontem tantum exaltaretur, vt alter semicirculus supra horizontem existeret. Si quis ergo in cacumine montis, aut turris excelsæ, aut arboris existeret, ex Iride plusquam semicirculum videret.* Mons tamen maioris crassitudinis esse non debet, quàm sit Iridis diameter, siue linea intensa ab vno cornu ad alterum: nam aliàs obstatet radiis circulantibus Iridis gyrum. Turris igitur, aut scopulus altus, cuius basis, Iridis brachia non impleat, ad id experimentum maximè idoneus. Bellè Thimon: *Si oculi* Thimon  
lib. 3. Meteor. q. 19. *hominum possent eleuari, sicuti oculi auium* (vt gruum, ardearum, aut alaudarum) *viderent secundum circumferentiam Iridem completam & rotundam.* Id ergo fiet, si auis volatu superet Iridis semidiameter, & aliquis superior in mediâ regione nubium ordo sit, qui exipiat supremum Iridis semicirculum. inferior enim in infimâ regione, & in toto spatio vbi è plano nostras Irides cernimus, inuerso tamen situ, & gibbo terræ innitente, depingetur. Cur enim non fiat? Nam tota vaporum sphaera, quæ hinc, vt Libro primo finiuimus, ad quartum à terrâ milliare Italic. sursum tenditur, æquat aut superat profunditate integram Iridis diametrum. Statue igitur medio hoc interuallo defixum oculum, in centro Iridis esse poterit, cuius vna semidiameter ad duo sursum milliaria, & altera totidem deorsum poterit extendi. sed nulla credo ferè vique semidiameter Iridis tam alta à quoquam est conspecta. Igitur Iris illa circulus in aëre pendulus erit, terræ nondum contiguo infimo arcu.

Tota autem in hoc consumi videtur difficultas, Aut à vapore inferiori, radij ad oculum & centrum circuli perinde & æqualibus angulis, ac à superiori, reflecti valeant. Quod possunt. Nam id Iride artificiali egregie probatur, quæ toto circulo se circumducit, nisi corporis vmbra alicubi frangat eius ambitum. Tota enim ratio,

cur Irides illæ nubium gyrum non impleant, videtur in magnitudine esse. Nam quia conus sub quo videtur, ingens est, & circumferentia spatiosissimè se decircinat, non potest tota supra horizontem eminere, sed superficies terræ occurrens partem necessariò defringit, aut (vti magis concipere solemus) haurit & absorbet. Ex certa quippe altitudine vaporis, & pari ferè in orbem angulo, reflecti ad oculum in centro circuli adspicientem radius debet: vnde ad cernendum plenum circulum, tantum vaporis infra oculum esse oporteat, quanta est Iridis superior illa, & in superficie terræ erecta semidiameter. Vnde, quia Iris artificialis modicæ diametri est, sat infra oculum humoris apprehendere potest, vt in eo pro altero semicirculo spatium inueniat.

Sed ecce, quid iam etiam in mentem venit: Iridem aliquam propinquā etiam è plano posse segmentū semicirculo maius ostēdere. Id intelliges, si imagineris Iridem artificialem perpetuò ampliari & ab oculo tuo recedere. Post aliquā tulam enim distantiam, inferioris arcus gibbus ad terræ contactum descendet: vbi scilicet semidiameter altitudinem eleuationis oculi à superficie terræ adæquauerit. postea verò si vndique laxare circulum, & longius aufugere pergat, particulam circuli infimam terra deteret, exstabitque interrim supra horizontem ambitus circularis paullominus integer. Sed insolentes sunt eiusmodi Irides tam vicinæ, quæ insigni coloratione conuertant visum. Nam & dēssimam guttarum adspersionem, & fortissimā vnā (quæ rarò concurrunt) Solis requirunt irradiationē.

Aristot.

Cū igitur Aristoteles negat Iridem adspici ampliorem semicirculari, ad minutias istas non circumspexit: sed Iridem dumtaxat, quæ è plano, & plenā ac vulgari distantia conspicitur, habuit in oculis. Hanc etiam excusationem Vitello recipere potest. Quamquam, vt de Aristotele suspicionem meam nudem, nescio an eius sint, quæ tam profusè & mathematicè nobis admetitur de Iride. Peolixitas enim illa, præsertim in figuris illis mathematicis, non ei solemnis: & inclino, imò pænè (nec solus) labor, vt è Mathematico aliquo veteri, verbatim etiam fortè, huc transcripta existimem. & cumulat suspicionem, quòd difficillimam & impeditissimam viam ingressus, omnia per radios ab oculis in nubem emicantes, & sæpe frustra, conatur expedire: cū sententia eius de radiis lucis & colorum, quæ etiam tunc plurium aliorum erat, per planiora & proclius potuerit eum ducere. Scio tamen quid reponi possit & soleat, sed me non implet.

## ARTICVLVS VI.

*De Iridis altitudine.*

**C**Arđanus lib. 4 Subtil. docet, Irides, virgas, parelios, intra 772. passuum millia à terrâ posse generari: hac ratione, quòd summi vapores tam altè in cælum subeant. imbres tamen affirmat è propinquiore decidere. Sed neque hypothesis vera est (nam supremi terræ fumi vix, nisi fortasse raro aliquo euentu, vltra 52. passuum millia scandunt; & Nonius etiam ad 43. minuit;) & ex eâ mendosè Iridis altitudinem colligit. Nam excelssissimi illi vapores, qui crepusculo primi manè, vltimò vesperti purpurantur, aquei non sunt, nec guttati, in quibus tinctura Iridum possit hære, sed terrestres quædam & retorridæ exhalationes. Itaque summa flexura arcus non vltra proximas & imbrium fecundas nubes,

*Quâ parte debacchantur ignes,*

*Quâ nebula, pluujiq; rores,*

Horat. l. 3.  
Od. 3.

exit. in torido enim, non arido, vult depingi. Itaque maximæ Iridis, quales ortiuo aut occiduo Solis radio deformantur, semidiameter, veteri Opticorum sententiâ, est 42. graduum, id est, totidem cæli gradibus videtur subtendi. Keplerus tamen & Maurolycus Keplerus.  
Maurolyc. ad 45. paullo minus extendunt. vt scilicet reflexio sit anguli semirecti, & ex medio inter horizontem & Meridianum interuallo. quarta enim pars cæli, quæ à culmine ad horizontem decurrit, amplectitur 90. gradus. igitur octaua, quæ est altitudo semidiametri Iridis, capiet 45. gradus, aut aliquantò minus, vt instrumentis reptum asserit Maurolycus: quem defectum longitudini guttarum imputat. aliàs si circumcisè orbiculares forent, non dubitat quin angulus reflexionis, semirectus omnino esset; & Iridis semidiameter ad quintum & quadagesimum altitudinis gradum perueniret. Hæc verò de primariâ Iride, quæ proximè radius Solis è fundo nubis reciprocantibus efflorescit, non de secundariâ, quæ reflexione primæ, in uersis coloribus, in vapore superiori resultat, accipienda. hæc enim, cum inferiorem concentricam, nec minimo interuallo, ambiat, semidiametrum longiorem necessariò habet.

Sed quid est, quod Aristoteles inculcat, Iridem semicircularem, Aristot. partem & segmentum esse circuli minoris, minore verò semicirculari, segmentum maioris circuli? Nempe quod Vitello lib. 10. Vitell. tit. 78. affirmat: Si Iridis, quam semicircularem humili ad horizon-



tem Sole videmus, arcus ille maximus, in circulum totum circumscribatur, hic minor est futurus, quàm circulus ex segmento parum & summissæ Iridis, quæ apparet alto supra horizontem Sole, circumductus. Ratio est, quia manè exoriente, aut vesperi cadente Sole, sit Iris illa amplissima & semicircularis, cum scilicet aër & vapores nocturno frigore adhuc densari, vel relabente primo sub nocte rore, quos dies laxauerat, comprimi de nouo & redire ad coagulum incipiunt. Igitur tunc pyramis illuminationis est breuior, siue radij à Sole in aërem & vaporem ultra visum nostrum coniecti, citius densitate medijs hebetari deficiunt, & è viciniore ad oculum reflectuntur. eleuato autem supra horizontem Sole, fufis calore vaporibus, & extenuato aëre, pyramis illuminationis est longior, sensusque in aëre & humore rariore offendunt radij, & à magis diffuso vapore recurrunt ad spectantem. Quæ doctrina Vitellonis impressè adfirmat, quæ Articulo proximo differebamus de Iridis magnitudine. Frustraque Thimion brachia contra suum Vitulonem (ita enim passim barbari illius æui Scriptores appellant Vitellonem) iactat, contendens in medio densiori diduci & latius diffundi Iridis circulum. Sed fallitur. nam quantò in propinquiori hærent colores, tantò ambitus cernitur angustior. ideo enim Irides artificiales tam breues diametros habent.

Th. moa  
l. j. q. 14.

Hinc etiam facillè colligis, Sole etiam ex eadem altitudine aut humilitate vaporem irradiante, non omnes necessariò Irides esse portiones æqualis circuli. Nam plurimæ causæ sunt, quæ vapores densare aut relaxare valent, Iridisque ab oculo distantiam variare, euidenti Iridis illius nostræ Louanienfis argumento. Isto etiam, quòd aliquando duæ simul, non permutato colorum ordine, Irides visæ, vt infra referemus ex Vitellone. Igitur vtraque primaria fuit: ac ita superior esse sola potuit, & contrà, inferior sine comite superiore. Non ergo vna semper & constans est amplitudo Iridis, Sole eundem caligradum transuolante.

Hoc deinde non negligendum: Irides minores & ad horizontem depressas, aliquantulà refractione per vapores densiores & superficie terræ circumfusus dilatari, ideoque segmentum circuli maioris apparere. sic enim duo sidera, v.g. Geminos, cum primum supra horizontem emergerent, sextuplo longius à se distita, quàm vbi Meridianum attigisset, sæpè adspexi. Verùm, paruum inter Iridem & oculum nostrum aëris rorulenti interuallum, vix, opinor, refractionem efficit sensibilem. Aliam etiam causam muginatus nobis

nobis est Cardanus lib. 4. Subtil. *Cur*, inquit, *dum Iris modica est, & Catda.*  
*parum à Finitore eleuatur, eò maioris circuli pars esse videtur? Causa*  
*est, quòd oculus magis distare Iridem, quòd humilior est, indicat, quo-*  
*niam distantiam intelligit. vnde latiore etiam existimas; velut et-*  
*iam dixi de Sole & Luna orientibus.* Sed non hæc princeps causa,  
 cur Sol & Luna discos suos ita diffundant in ortu: sed quia reuerà  
 sub angulo maiori refractè adspiciuntur. Fieri tamen potest, vt in-  
 tellectus imaginatus supremum Iridis gibbum longius abesse,  
 quando humilis est, & pæne terram tangit, arguat per mentis dis-  
 cursum, maiorem, & latius crura diuicicare, etiamsi fortè oculus  
 non cernat angulo ampliori. Quod enim æquale alteri apparet, si  
 tamen distare magis exultimetur, intellectus statim illo maius esse  
 facile coniectabit. Curuaturam autem arcus longinquiore esse  
 iuxta horizontem oculus diiudicat; quia plura in superficie terræ,  
 inter se & supremum illum flexum ad terram ferè depressum, in-  
 teriecta videt, quàm vbi arduus valdè est, & altè eleuatus supra  
 horizontem. Cum enim aër totus inter ipsum & oculum medijs  
 pelluceat, nihil per integrum illud spatium visus cernit, vnde meti-  
 ri distantiam intellectus possit.

Sed hic etiam scrupulus, ante abitum, debet eximi. Diximus ini-  
 tio, semidiametrum & altitudinem semicircularis & laxissimæ Iri-  
 dis, in primis illis & imbre tumentibus nubibus plerumque finiri.  
 Sed ecce diameter, quæ inter vtrumque cornu in superficie terræ  
 intenditur, id procul refellit. distant enim sæpè cornua toto mil-  
 liari Belgico, siue trecentis passuum Geometricorum millibus. er-  
 go semidiameter 1500. passuum est: & tamen spatium huic ad pro-  
 ximam nubium stationem Libro primo quingentis passibus defi-  
 niuimus.

Respondeo, diametrum Iridis rarè videri Belgici horarij millia-  
 ris. Par enim circiter plerumque, aut paulld maior est, quàm oculi  
 & Iridis interuallum: hoc autem, plurimum, non longè excurrit  
 vltra dimidium milliare Belgicum. imò Thimoni, *parui medij mil-* Thimon.  
*liaris*, asserere satis fuit. & Gallicum, credo (scripsit enim Parisiis,) *Thimon.*  
 quod aliquantò Belgico breuius, intelligit. Cur autem distantiam  
 ab oculo, & diametrum Iridis, seu spatium cui crura eius varicibus  
 insistent, congruere ferè putem, facile capies, imaginando Iridem  
 artificialem continuo recessu cornua sua, seu crura vocare mauis,  
 diducere, & in naturalem (sic iam appello vulgarem & famofam,  
 quam distinguimus ab artificiali) abire. Nam pro modo elonga-  
 tionis

tionis ab oculo, diameter & crurum varicatio crescet. Igitur Iridis amplissima & semicircularis semidiameter in nubes surrecta, quadrantem milliaria, id est 750. passus implebit. unde si tantus arcus perpendiculari statu horizontis plano insideat, caput intra primam nubem (si 500. solum passibus à terrâ dispertitur) ad 250. passus abscondet. Et sine dubio potest, quia media regio, in quâ totâ coalescunt, & in pluuios rores densantur vapores, vix finitur intra 4000. passuum altitudinis. Verum necesse non est, Iridem atq; in mediam regionem penetrare: quia semidiameter eius non est plerumque directè, & lineâ ad centrum terræ perpendiculari, erecta in cælum; sed summa eius pars oculo annuit, & in spectatorem inclinat, ne summus arcus multò longiùs à nobis recedat, quàm infima crura: quod haud dubiè eueniret, si recto angulo semidiameter staret in plano horizontis: veluti apex turris, quæ ante nos est, longiùs se ab oculo nostro, quàm infima eius basis, auertit. Itaque Iridis culmen in aërem etiã infimæ regionis sæpè se summittit, & atra illa nubes, in quâ hæere putamus, retrò est. pars enim illa Iridis ram ibi sustineri ab aëre rorifluo, quàm brachia quæ ad terram ipsam per infimam regionem demittuntur, potest.

## ARTICVLVS VII.

*Causa maculose colorationis Iridis. Aduersus Albertum, Scaligerum, Cardanum, Maurolycum, Vicomercatum, & alios.*

**T**Res, aut summum quatuor, principales colores videri solemne est in Iride. & hyperbole vsus hic Poëta:

Virgil.

Aristot.

*Mille trahit varios aduerso Sole colores.*

Primus in supremâ abside arcus Aristoteli est *πορφυρεὺς* & *punicus*, secundus in mediâ *αἰσχροὺς* *porraceus* seu *viridis*, tertius *ἀλκυονίδες* *purpureus*. Inter puniceum tamen & viridem *ξανθοὺς* *flauus*, quasi vtriusque commissura, intercurrit.

Albert.  
Laurent.  
Scalig.

Albertus, & antiqui Laurentiani Colonienfes, Albertistæ, lib. 3. Met. Scaliger Exercit. 80. num. 4. varietatem colorum discrimini vaporum tribuunt, in quibus pinguntur diuersi arcus Iridis. *Non ab oculo*, inquit Scaliger, *sed à luce ac materiâ fiunt in Iride colores. Primus ex luce & terrestri, idcirco caruleus* (aut purpureus) *nigritia propior: secundus leuiore materiâ, quippe aqueâ, atque ideo viridis: tertius flauus, aëris lucidi refert similitudinem; ignem quartus, rutilantior.* Hoc igitur vult: vaporem, quod humilior & propiùs ter-

ram

ram dependet, hoc terrestrem magis & fœculentiorem esse, ideo-  
que radium malignius in eo, vt crasso & turbido, lucere. Num-  
quam aliàs vidi clariùs, quàm in præcipiti & prope lapsum Physica  
sit, nisi rudi saltem aliquà Mathematicarum cognitione sustentetur.  
Non enim valdè ludandum, vt resellantur.

Primò: quia brachia terræ attigua, nullà colorum diuersitate  
maculosa, sed vnitate purpureà apparent. vapor enim in quo pu-  
niceus arcus figuratur, non est clatior à terrâ, quàm interior qui bi-  
bit purpuram.

Secundò: Incredibile est, tam angusto interuallo, in tantum sem-  
per vaporis crassamentum & opacitatem variari: & quidem æqua-  
li, in omni ferè Iride, spatio. Cùm enim humor, nunc ad 20. nunc  
ad 30. aut 50. passus, parem crassitudinem habeat, quare in totâ hac  
intercapedine coloris similitudinem toties euariat? dispositio enim  
materiæ eadem, tincturæ etiam efficere debet vnitatem.

Tertiò: In Iride etiam artificiali, quæ remorum aut oris adspergi-  
ne nascitur, varietas colorum perinde visitur: vapore tamen toto  
aqueo, & vniuersum quaquaersum densitate.

Cardanus lib. 4. Subtil. Thimon lib. 3. q. 15. Meteor. putant, pu-  
niceum à radio solari fortissimo, quia pars illa nubis altissima & vi-  
cinissima cælo est, colorari. deinde paulatim per virident, in pur-  
pureum languescere. Sed non difficili iterum refutatione. Nam  
cùm Sol ad limitem horizontis est, non est propinquior vni parti  
arcus quàm alteri. Deinde, solus Iridis gibbus, qui cælo magis ad-  
motus, puniceo tingetur, cornibus purpurascentibus, aut nigrore  
tantum infectis. Hi tamen, Auctores in veram sententiam deduci  
possunt, si ex diuersâ nubis profunditate radios censeant redire in  
superficiem; quod parebit in fine.

Tertio loco exeat doctissimus Mathematicus, Franciscus Mau-  
rolycus, in erudito Libello de Lumine & vmbra, theor. 29. qui in-  
geniosè fingit, radios à parte inferiori Solis emicantes, in nubem  
superiorem, à parte verò superiori, in inferiorem impingere. ita vi-  
delicet, vt ante nubis superficiem radij illi se decussent, & vni in ar-  
ctu superiori, alij in inferiori depingantur. Sic hominis foris stan-  
tis, si per angustum foramen, in cubiculum obscuratum species ad-  
mittatur, imagines capitis & pedis in foramine decussatæ, diuersæ,  
caput deorsum, pes sursum abibunt, & tali situ inuerso, opposito  
parieti se allinent. Radij autem qui à centro Solis & circà, inquit  
Maurolycus, exeunt, in mediam nubis superficiem cuibrantur. Ex

quo deducit, plures in superiorem & inferiorem Iridis arcum à Sole radios iaci, quàm in medium. Nam à mediâ & centrali parte Solis radij quidam in arcus etiam illos extremos diriguntur ( puncta enim omnia faciei Solis vndique lineis rectis in orbem, vbi non offendent in opacum, radiant,) & in super, quia superficies Solis rotunda est & protuberat, aliqui à summo & imo gibbo globi in nubem inferiorem, vbi purpureus est arcus, & in superiorem, vbi puniceus, promicant, qui tamen ad medium arcum peruenire nequeunt, tumore sphaerica illius faciei prohibiti, & inde auersi. Hinc igitur, inquit, supremus arcus puniceo fulget, quia plures radij partem illam vaporis incidunt, & inde ad oculum reflectuntur. medius magis sobriè lucem bibit, ideoque declinat in virorem. infimus, etsi tot radios quor supremus absorbeat, tamen quia angustior est, arctius eos densat, & adstringit in quamdam nigredinem. & hinc purpurascit, non punicat limbus iste inferior.

Verum, etiam si priores duo colores rolerari vrcumque fortasse possint, vltimus tamen à me non potest. Si enim tam densus radiorum fascis in infimum arcum, atque in supremum iacitur, nulla est causa, cur non parem etiam lucis ardorem ostendant. Nec refert, inferiorem, angustiozem gyrum habere. quin imò hoc potius asseret, vt puniceus magis & miniatior appareat. In angustius namque ardentius flagrant, & se inuicem incendunt radij.

Quartus in proscenium veniat Franciscus Vicomercatus, quem libenter Louanienfes plerique, cum Eruditissimo suo Beuero sectantur. Is radios solares quadruplici ordine disponit. Aliqui perpendicularem, qui centro Solis in centrum nubis directè exit, proximè circumstant. Hi validissimi sunt, & nubem sine reflexione penetrant. Alter ordo, & corona radiorum, longius paulò recessit à perpendiculari, ideoque viribus infra priores est, suppar tamen, & licet redeat ad oculum, altè tamen nubem antè penetrat: vnde purpureus reuertitur, & onustus multitudine umbrarum. Hic ergo vides infimum Iridis arcum. Tertius ordo, secundo iterum debilior, quia minùs profundè se insinuat, viridis reflectitur. hic etenim color, parcius nigro, & mixturâ tenebrarum, quàm purpureus, se infuscat. Quartus ordo in supremam & puniceam absidem cadit, omnium inualidissimus, quia longissimè à perpendiculari & axe illuminationis se auertit. & hinc in summâ quodammodo vaporis cute deficit, ibique hæret, & eam allambit, ac faciem tantum, non penetralia illustrat. Sed id semper mihi creditu difficile visum.

Pri-

Primò: Quia in tantulâ distantîâ purpurei coloris à puniceo, non video, quid ita statim ordines illos radiorum debilitet.

Secundò: Singulæ guttæ in totâ areâ nubis, quia toridem specula à se diuisa sunt, radium suum perpendicularem, non integra nubes vnicum, habent.

Tertiò: Totum spatium inter brachia Iridis, vbi nullum cernis colorem, omnibus tamen arcuum coloribus est plenum. Si enim ad alterum brachium accedas, alterum per mediam illam aream te sequetur à tergo. id est, nouum perpetuò brachium adspicies in aliâ & aliâ spatij illius parte, quod antea videbatur tibi coloribus vacuum. Signa igitur quodcumque voles in nube mihi punctum, quâ penetrat radius ille quem vocas perpendicularem, negasque reperi ad oculum, ostendam ibi ab aliquo, qui totâ semidiametro Iridis à latere meo aberit (id est, qui directè contra brachium Iridis adspiciet) in illo medio & centrali interuallo vniuersos colores videri. Iris enim eius meam interfecabit, brachiumque alterum per mediam aream & centrum meâ dependebit. Aut nihil hîc intelligo, aut hæc experientia sententiam istam Vicomercati funditus euertit.

Itaque omnino, vel propius verum est; Colores omnes ab eodem radiorum ordine, sed ex diuersâ nubis profunditate redeuntium, generari. Vbi ergo radij nubem primam ingrediuntur, color ardentissimus & puniceus est: & simili tincturâ tota nubis & vaporis superficies, quod radij pyramidis illuminationis (siue longius siue propius absint à perpendiculari) veniunt, perfunditur. sed non ex quauis distantîâ, vt satis antè inculcatum, reflexio peruenire potest ad spectantis oculum. Vbi radius idem paullo altius penetrauit, debilitatur, & per inferiorem (sic enim angulus reflexionis flagitat) nubis superficiem, multâ opacitate & vmbreis guttarum implicatus redit versus oculum. Tertiò, longius iterum adactus in vaporis profundum, tenuiori adhuc & fuscâ luce, purpureus siue violaceus emergit, per interiorem & infimam arcus curuaturam. A longinquiori vaporis parte fit etiam reflexio (imò, quod mireris, si accedas, puniceum ibi videre poteris colorem:) sed ante pedes nostros in terræ superficiem cadit, non attollitur vsque in oculum. Si tamen progrediare, radium illum iam excipies, & inde spectabis nouam Iridem. Et hæc videtur etiam fuisse sententia Vitellonis lib. 10. th 67. (et si sæpè euariet, & hanc aut illam viam pro vsu demonstrationis ineat:) quâ per longas meditationes se formasse ait.

Hinc etiam concludetur, non solum primam nubis superficiem & vaporis, à summo vsq; ad terram, sed totam etiam profunditatem, vniuersus omnium arcuum Iridis colores habere. Nam aut incedendo, aut recedendo, aut in latus abscedendo, omnes in qualibet vaporis parte ac guttâ cernere ex certâ distantia valebis. Si vniuersum vbique consuli sint, inquires, quomodo tam distinctè videmus? Quia, inquam, quidam è viciniore reflectuntur, & per minus opaci incidentes, rubicundi solum & puniâtes reuertuntur ad spectantem. alij in longius penetrantes, vt antè à nobis explicatum, magis impediti & vmbis adstricti, virides aut purpurei regrediuntur. Colores enim omnes illi non veri (quod credidit Albertus,) sed apparentes solum (si vulgares & fixos colores specie à luce distinguimus, quod in Libros de Anima referuamus,) luminis & vmbiarum miscelâ progeniti. Non insuper hîc habebô tamen Eruditissimi VVendelini nostri suspitionem: Colores scilicet Iridis, esse tales in ipso Sole. Verum, Lunam, facies, & candelas simili colore maculas esse oporteret, quarum aliquando Irides ad modum Solarium colorantur. Astra etiam Botbonia subeuntia Solem, Iridum colores perturbarent.

Albert.

## ARTICVLVS VIII.

*Quis numerus colorum in Irîde.*

Mauro.

**M**Aurolycus quatuor principales appingit: Croceum siue puniceum, viridem, caruleum, & purpureum. tres deinde alios secundarios, qui veluti ferrurinant & committunt inter se principales. Omnes enim quâ se proximè contingunt, limbo quodam magis florido, saltem ab oculatissimis, cernuntur.

*Transitus ipse etenim spectantia lumina fallit.**Vsq; adeo quod tangit idem est, tamen vltima distat:*

ait Poëta vetus. Sic Olympiodorus refert à Ptolemæo septem colorum Irîdem aliquando visam. Verum limbi illi & commissuræ, præter flauam, tamquam angustæ nec valdè insignes ab Aristotele neglectæ fuerunt: facitque Irîdem, & cum ipso alij passim, quadricoloram tantum; præter puniceum, viridem, & purpureum, immisso inter puniceum & viridem flauo. Putant verò puniceum comparatione vicini viridis, tamquam nigrioris, in flauum, quâ parte eum contingit, expallescere. id est, flauum ibi reverà nullum esse, sed tantum apparere: eâ ratione, quâ vulgare axioma habet,

Op.



Opposita iuxta se posita magis elucescere. flauus autem vberior-  
rem aliquanto lucis mixturam, quàm puniceus, aut certè opaci mi-  
nus habet. Ex istâ etiam nigri compositione docet Aristoteles, Aristot.  
aterrimâ nube Iridem coloratissimam effulgere, Iridis Lunaris co-  
lores tenebris nocturnis candescere, Phrygiones qui gemmas in-  
texunt, splendifas, vt acrius radient, obscurioribus committere.  
Hæc non refuto: possunt tamen in rixam trahi. Nam si oculum  
ita cõponas, vt occultato viridi, solum puniceum adspicias, videbis  
tamen inferiorem eius limbum in flauum dissolui, nec tamẽ com-  
paratione nigrioris viridis, quem non vides. Igitur de aliâ causâ  
pauillisper muginatus, hoc tantum reperi: Radios puniceos viren-  
tibus in confinio commisceri; siue à puniceis illis, & multo veluti  
minio saturatis guttis, aliquid in proximam & radiis viridibus per-  
uiam viam aspergi. flauus enim color ex albo & viridi est mixtus,  
vt apud Agell. lib. 2. cap. 26. differunt Fronto & Phauorinus. Et Agell.  
difficulus, credo equidem, probabilius causâ afferetur, cur in Iri-  
dibus artificialibus vrinali vitro aquâ pleno refractis, viridem et-  
iam & puniceum intercurrat flauus, quàm quia, inquam, flammei  
illius vicinitas proximum virorem diluit. Nec tantum, quod sic  
appareat, sed quia reuerâ facit.

Hoc etiam notauit Aristoteles: totum aliquando puniceum, et-  
iam in summâ abside, laxante se nubis opacitate, & ræfcentibus  
in sublimi guttis, deciduo omni ferè imbre, in pallorem quemdam  
flauescere. opacitas enim dissoluta, aut diducta, nigrum quodam-  
modò euanesce sinit, quod adstringebat in puniceo. Quæ res, an  
colores, viridis & purpureus, reuerâ sint in aliquo gyro nubis infe-  
riori, & viciniore centro terræ, quàm puniceus. Existimo, princi-  
pium reflexionis virentium & purpurascantium radiorum (dixi  
Articulo præcedenti) non esse infra absidem puniceam, sed è pro-  
fundiori solum emergere. apparet tamen summissior, vt nubes cir-  
ca horizontem; quæ æquali tamen à terrâ spatio distant, cum iis  
quæ vertici nostro impendent. sic etiam longi tabulati extremum,  
propinquius pavemento videtur, etiamsi totum sit ei parallelum.  
Credo tamen, radios virides & purpureos non solum in remotissi-  
mo illo reflexionis loco adspici, sed etiam in toto spatio medio, quæ  
per obstantes guttarum umbras eluctantur, & directè in oculum  
veniunt: nam ibi præcipuè colorantur; & idèd plus nigri contrahi-  
tur à purpureo, quàm viridi, quia per longiores tenebras, & sæpius  
stillicidiis occurrentibus, hebetatus enititur.

Sed quare tres soli colores principales sunt? Quia res alibi maximè, numero ferè ternario clauduntur, inquit Aristoteles: Thimon, omnem aliam causam frustra queri, præter rei naturam. Cur, ait, equus equum generat, & non elephantem? Puniceus, inquam, aliquantà nigredine intemperatà statim transit in virorem, hic illic in purpuram.

## ARTICVLVS IX.

*Modus generationis secunde Iridis, Alberti, Scaligeri,  
Vicomercati rejicitur.*

Snell.

Bodin.

**I**RIS sæpè duplex, rarè triplex. Snellius tamen in Cometà anni 1618. *quinque, imò sex continuo ordine parallelas*, ait aliquando se vidisse. Bodinus septemPLICEM apparere, nec vltà posse, affirmat: quia reflecti idem radius, nisi à septem speculis, non valet; idq; arcano quodam numeri illius septenarij mysterio. Sed fundamentum imbecille est. & valde mirabor, nisi radius solaris benè satur & robustus, à decem etiam speculis resilire, antequam evanescat, sit satis validus. Fateor tamen, tam inusitatam esse tertiæ Iridis reflexionem, vt Aristoteles negasse videatur vmquam euenisse. Nubes enim instar speculi chalybei non est, quod à superficie statim radium integrum repercutit: sed lumen primò admittit & in profundum sorbet, ac deinde parte veluti extinctà, reliquum regerit; vt aqua etiam apud nos solet: in quā idèd Solem, quàm in se, aut alio duriori speculo, innocentius adspicimus.

Vitell.

Thimon.

Notandum præterea, duas (et si ratenter) Irides concentricas, siue quarum vna alteram vndique exambit pari intervallo & spatiosiori gyro, visas fuisse, non variato colorum ordine. Id enim Vitello & Thimon narrant. *Quòd quandoque plures Irides eiusdem sistus*, ait Vitello lib. 10. th. 71. *in coloribus videntur, vna sub alià, vt primò rubrum, deinde viride, & deinde alurum; & iterum rubrum, & iterum viride, & demum alurum; hoc accidit propter diuersitatem materia in diuersis superficiebus, quarum vna est ante aliam, & omnes accidit sub vno angulo videri. unde videntur quasi contiguae.* Addit tamen, intervallo quandoquē manifestum inter vtramque interiijci, si contingat eas sub diuerso angulo spectari. Restota breuiter ex principiis antè datis sic potest expediri.

Non omnis Iris formatur in vapore perinde alto, sed aliqua oculo propinquior & ambitus angustior est, alia longinquior, &  
bra-

brachia latius pandit. quidni ergo aliquando talis vaporis dispositio esse, vt & in humili ob maiorem densitatem aut opacitatem, & in excelso simul, repræsentari arcus, possit? Certè enim artificialem in adspersione, quando aliam in nubibus eodem colorum ordine, à diuerso radiorum ordine, sed eodem Sole depictam, videmus. Sed de secundâ illâ & satis solemni, superiori Iride, quæ inferioris concentricæ colores peruertit, grande inter Opticos aut Philosophos discidium.

Albertus pingui satis Mineruâ, rem hac imagine deformat. Summe, ait, tria vitra semicircularia, & ita inter se coniunge ac ferrumina, vt supremum puniceo, medium viridi, infimum purpureo tinctum sit. expone iam Soli: triplices radij simili tincturâ infecti, totidem arcus, sed dilutioribus coloribus, in opposito pariete depingent. Sic ipse existimat, radios per primariam Iridem transeuntes figurare secundariam in superficie postpositæ atræ nubis. creditque se hoc, vt ait, infallibili argumento conficere: quod secundus arcus subito quandoque euanescat, nullâ manifestâ, in nube illâ posticâ, mutatione, sed idèd solum, quia crassescente primæ Iridis vapore, comprimuntur radij, ne ad alteram nubem valeant effluere.

Sed non difficile est errorem nudare. Inprimis enim falsum ei supponit, Colores Iridis veros esse, & vitreis illis similes. Deinde, si id esset, secundariæ Iridis colores non forent inuersi: quod exemplum etiam vitrorum illorum ostendit. radij quippe multicoloria vitra penetrantes, simili serie parietem obuium depingunt. Denique, secundaria Iris, quia in profundiori & remotiori versus horizontem descripta, infra primariam apparebit. Contrà tamen est, & secunda laxiori ambitu primam claudit. Loquere iam Iuli Scaliger. *Iridem secundam in eadem nube minimè fieri arbitror, sed in loco superiore separatâ: quamquam id oculo dignosci nequit, tum ob longinquitatem, tum ob corporum similitudinem. Duas item vidimus Irides in nubibus diuersis, alteram alterâ maiorem, quo ex iudicio soluitur difficillima questio, quæ tam diu torset Alexandrum: cur media nubes, quæ inter utramque Iridem interiacet, non est punicea, sed nullius coloris inter puniceos circulos duos. ratio est, propterea quod aer ibi, non nubes est.* Sic ergo iste cum ceteris, quos sequenti Articulo examinabimus, Iridem secundam perinde ac primam, immediato radiorum solarium resoltu effici putat: ac ne continuentur, hiatus aliquem inter vtriusque Iridis nubes interfodit. Non fero iam qui tam altè supra Cardanum efferre solent Scaligerum. Plus eloquentiæ,

Albert.

Scalig.  
Exerc. 80.

Aristot.

tiæ, & variæ doctæque supelletilis, fateor, fortasse habuit: sed in Mathematicis & aliis quibusdam, quanto cum intervallo reliquit Cardanus: Sed ad diuerticulum. Superioris nubis guttæ, doctissime Scaliger, in inferiorem perpetuè depluentes utramque iungent. clamat enim non vno loco Aristoteles, ne quidem momento stillicidia suspendi sine lapsu posse in aëre aquâ leuiori. Non æqualis etiam vndique secundariæ Iridis à primariâ intercapedo esset: sed laxior hic, ibi cōpressior, pro latitudine & modo solis quæ utramque nubem intercurrit. Dum etiam in summam curuaturam oculum defixum tenet, cornua iuxta terram non adspicit. hic enim vapor utrâque Iride pictus, xquè propinquus est, & superficiem eius tangit. Et alia deinde in Scaligerum cadent, quæ statim ceteris obiciemus. Sed quomodo secundæ Iridis colores transponat, videamus. *Radij*, inquit, *Solis duas inter nubes enadunt validiores. quare propinquiores partes attenuantur. eâ de causâ proportio ibi est ignis; supra eam, aëris; inde aqua: omnia secundum rationem densitatis.* In hoc tamen suo, ut ipse vocat, figmento, non valdè sibi placet: nec mihi certè valdè potest. Simile tamen aliquid Ammonius & Olympiodorus olim confinxerunt. Radium, inquam, perpendicularem inter utramque nubem iaci, & intervallum istud idèd rarefcere ac tenuari, summumque colorem infimæ Iridis & infimum summx, tamquam ardentissimo radio proximos, maximè flagrare. Verùm, præteriam dicta in Scaligerum, quæ etiam hoc satis refellunt, loco non suo radium perpendicularem constituunt. is enim potius in vtriusque Iridis centro, quod ipsum Vicomercatus & alij passim deprimunt. Ac, ut semel dicam, Iris nostra Louanienſis Articulo primo narrata, omnia hæc frangit & disijcit figmenta. Secundaria enim pari cum primariâ passu ad nos incedebat, laterique se eius apprimebat, cum vicina esset; diducebatque deinde, laxato pedetentim intervallo, cum recederet à nobis. Continuis igitur inter utramque vapor, non puri aëris hiatus, fuit, qui accedentem aut abeuntem à principali, secundariam Iridem exciperet: resque tota ad specularem rationem, & variam inter oculum, speculum, & rem obiectam, distantiam & situm deduci debet.

Vicom.

Vicomercatus dubitat ferè tantum, ut sæpè solet, & in utramque partem Problemata solum & interrogationes iacit. Nisi quod hoc illi sedeat: Iridem secundam non generari reflexione primæ à superiori nube, sed reuerberatione radiorum solarium magis distantium à perpendiculari. Vtriusque igitur similis est ortus; nisi quod à lan-

à languidiori radio superior depingatur. Sed singulæ guttæ, etiam in altissimâ nube suos habent radios perpendiculares: nec tantulo inter vtramque nubem interuallo, tam manifestè radiorum illa vi-  
uax in inferiori nube acrimonia, & plenitudo colorum decrefcere  
valet. Deinde cur puniceus in imo secundæ Iridis arcu, qui sum-  
mum primæ gyrum obtinet? Numquam hanc profectò colorum  
permutationem sententia ista explicabit, vt iam ostendam paulò  
diffusiùs.

## ARTICVLVS X.

*Nec Maurolycus, aut M. Antonius, in secundariâ Iridis  
explicatione satis placent.*

**H**I etiam ex reflexione radiorum proximè ab excelsiori vapore  
secundam Iridem formari acriter defendunt; probantque,  
quàm alij, enixiùs.

Contentit in primis Maurolycus, reflexionem secundæ Iridis  
esse ad quinque partes octauas vnius anguli recti, id est, ad semire-  
ctum cum vnâ octauâ parte. vnde angulus reflexionis eius est  
octauâ parte obtusior angulo reflexionis Iridis primariæ. hic enim  
iuxta Maurolycum est anguli semirecti. Vnde colligit, cùm semi-  
diameter seu altitudo primæ Iridis erit graduum 45. altitudinem  
secundæ futuram graduum 56½ & hinc Sole tantam altitudinem  
adepto, nihil de secundariâ posse apparere. Elegit autem hanc re-  
flexionem circa angulum semirectum & octauam vnius recti par-  
tem: quia talis valida est, acceditque ad validissimam illam anguli  
semirecti, quæ primariam & coloratissimam Iridem nobis concin-  
nat. Aliud etiam est, inquit, quod secundariæ colores debilitat:  
magnitudo scilicet ipsius arcûs. Radij enim intra maiorem illum  
gyrum disperguntur, & maligniùs nubem saturant: in minori, ple-  
niores & magis constipati. Et hanc etiam putat causfam inuersio-  
nis colorum. Nam quia, ait, secundariæ Iridis inferior ambitus est  
arctior, lux ibi compressa puniceo eum colore inflammat, quæ per  
superiores in viridem & purpureum se discingit.

Ingeniosè hæc, vt multa, Maurolycus; sed nimio fortè acumine  
à veritate deerrat. In primis enim hac ratione, etiam in primariâ  
infimus ambitus, quia breuissimus, deberet esse puniceus. Et re-  
sponderet, talem futurum, nisi multitudo stillicidiorum quæ ibi con-  
glomerantur, eum in purpuram declinarent. Sed ecce iam, secun-

dæ etiam Iridi idem eueniet. Cùm enim guttæ cadentes quò magis centro terræ propinquant, propius inuicem accedant, & compellantur in arctius (nam perpèdiculo ad centrum ruunt, nisi ventus, aut alia vis interpellat) etiam in imo superioris Iridis arcu plures erunt & densiores, quàm in viridi & purpureo qui sunt altiores, & longius secundùm Maurolycum distantes à terræ centro. Quòd tamen frequentia maior guttarum non ita colores euariet (licet adinouere arcum oculo insigniter, vt de nostrâ Iride Louaniensi patet, valeat) ex cornibus intelligi potest: ad quæ pauci respicere mihi videntur, dum summæ tantùm curuaturæ toti inhærent. In illis enim etiam si trium colorum vapor, terræ ad quæ propinqui sint, & eam attingant, tanta atque in summo Iridis gibbo colorum diuersitas est.

Quod etiam opere tanto & scrupulosè, de secundariæ Iridis reflexione ad angulum semirectum cum vnâ octauâ recti parte, vno hoc argumento satis videtur vanescere: quòd secundaria distantiam à primariâ non semper vnâ habeat. igitur angulum reflexionis maiorem aut minorem obtinere potest. In nostrâ etiam Louaniensi, à proximo cornu secundariæ, quæ vnâ cum primariâ ad oculum nostrum pænè accessit, acutionis anguli reflexio fuit, quàm ab altero longissimè abstante à nobis.

M. Anton.

Quid tandem M. Antonius? Aliquid hic propius veri speciem, quàm in suis de Repub. Christianâ libris dixit; sed tamen ipsum non tetigit. Ex concauâ superficie cuiusque guttæ tres radios ad oculum redire sibi fingit. qui per globuli centrum aut vicinas centro partes transfit, superior est, & in secundariâ Iride ideo purpureus, quia per maiorem guttæ profunditatem traiecit, magisque se opaco eius permiscet. alter radius demissior est, nec, vt prior, per diametrum & centrum guttam transfodit, sed ita eam quasi diuidit, vt pars maior sursum, minor deorsum sit; & hic, quia per minus opaci penetrat, est viridis. tertius, qui infimus, minimam à parte imâ guttæ particulam abscondit; & hinc puniceus est, ac parcissimè omnium, nigredine aut opacitate tinctus. Faterur autem se maximè sudauisse in hac colorum secundariæ Iridis inuersione M. Antonius. sed parcere labori potuit: reuerà enim si quid video, ne hilum profecit. Nam vt totum ei, quod obtinere pugnat, demus, numquam efficiet, quin etiam, eâdem de causâ, in primariâ Iride similis colorum ordo sit. Infimus, inquam, puniceus, viridis deinde, & postremò purpureus. Adde, quòd omnia sic explicet,

quali

quasi ex vnico guttarum ordine tota Iridis reflexio fiat. Nam aliàs, radius qui per minimum opaci ex guttà aliquâ, quæ in profundo nubis est, exit, in aliam, & infinitas ferè, antequàm totum vaporem euaserit, impinger, quas medias & per centrum penetrare oportebit. Vnde perinde atque ceteri tinctus, & confusa vmbreis guttarum luce, in oculos redibit.

## ARTICVLVS XI.

*Secundariam Iridem reflexione primariæ conformari.*

**I**Ta sententiæ huic replaudo, quam non vt falsam, sed falsissimam, tanto clamore Maurolycus explosit. Imò assero hanc esse Aristotelis, quidquid repugnent Alexander & Vicomercatus. Aristot. Nam ideo probat tertiam Iridem non solere cerni, quia tertia reflexio nimis imbecilla est, & insensibilis: satis innuens, tertiam Iridem pingendam ex reflexione secundæ, vt hanc reflexu primæ. Probat autem hac ratione. Quia sententia illa probabilior est, cui experientia fauentior, faciliusque vniuersis se difficultatibus expedit. talem verò hanc, aut fallor, ostendemus.

Primò enim, numquam Iris secundaria, quæ in uersos colores, & puniceum in imo, purpureum in summo arcu habet, sine primariâ visa fuit: igitur ab eâ dependet. imò curiosè quandoque notavi, numquam segmentum primariæ deficere, quin pars proxima secundariæ vnà euanescat. Si autem coniectu & reflexu immediatò radorum Solis, vt primaria, enascatur, cur non aliquando sola etiam apparet? Reponit Maurolycus: quia Iridis secundariæ numquam, aut rarissimè (ita scilicet, vt nemo hætenus aduerterit) causæ concurrunt, nisi cum primariæ causis: etsi retrò sæpè euenire possit. Et sic demonstro. Statim atque guttæ rorantes in secundariæ siue superioris Iridis spatio concreuerint, momento quasi in inferiorem aëra, & locum primariæ deformandæ defluunt. Vnde illicò pro utrâque habes paratam materiam. Contrà tamen, humilis sæpè numero vapor pro primariâ siue inferiori disponi potest, nullo altero suprâ impendente, qui secundariam excipiat. Sed hoc etsi primâ fronte speciosum, inspectum tamen è proximo, reuilescit. Quid enim si (quod non rarò potest) nubecula Solem & nubem inferiorem interiecta, ab Irìde primariâ radios defendat, superiori interim radorum ordine illustri, & summam nubem directè feriente? Certè enim tum superior sine inferiori Iris apparebit.



Quod tamen à vero tam abest, vt si id eueniat, illicò cum inferiori superior se exstinguat. Quid si deinde nullum opacum post inferiorem & primariæ Iridis nubem positum sit ( opacitatem enim à tergo esse oportet, vt nubes colores arcûs rapiat, ) superior verò, quæ secundariæ est sedes, retrò opacata sit? ecce iterum Iris illa altior solitariâ, & sine alterâ humiliori erit. Tertiò, numquam ferè Iridis primariæ segmentum semicirculo minus iuxta terram, quale Sole cleuato solet, absque secundariâ apparebit. Vtriusque enim tûc Iridis vapor demississimus est, & in infimâ aëris regione totus. Denique, nullam vmquam pænè primariam sine cornibus saltem secundariæ terræ contiguis videbimus. Nam infimus aër extra primariæ cornua totus aliquousque est rorulentus. quod inde liquet: quia si ad alterum primariæ cornu inambulabis, ipsum in aërem vltiorem ante te propelles.

Secundò: Nulla solida caussa debilitatis colorum secundæ Iridis, præter reflexionem à primâ, asferri potest. Quòd enim vulgò maiorem ab oculo distantiam accusant, ne æstimes. tantum quippe inter vtramque interuallum non est, vt superior longè sic semper dilutior appareat. Deinde, cornu Iridis illius Louanienfis secundarium tam propinquum fermè oculo nostro ac primarium fuit: triplo tamen languidiùs fulgebat.

Tertiò: Inuersionem colorum altera sententia nullâ viâ vmquam expediet. ego verò sic: Radij qui circa perpendicularem, oblique in singulas primariæ Iridis guttas cadunt, refracti prius, certo angulo rebulliunt & resiliunt in orbem. eorum aliqui ad oculum Iridem illam spectantis veniunt, alij sursum, aut in latera diffunduntur. Qui sursum à supremo primariæ gibbo sparguntur, tam altè per vaporem nituntur, donec angulum idoneum reperiant (quem Maurolycus quinque octauas partes recti habere; ego incertum, & pro vicinitate aut distantia primariæ ab oculo, variari existimo) quo ad spectatorem redire possit: radij etiam brachiorum refusi extra complexum Iridis in latus, eousque penetrant, donec angulum parem inueniant, vnde vnà cum superioribus ad oculum reuertantur. Id enim planè me arcus ille noster anni 1625. Louanienfis docuit. Nam vbi propinquior esset principalis, comprimebat se secundarius, & ex viciniore vapore in oculum resiliabat: in recessu autem primarij, abibat ipse etiam vnà cessum, laxando perpetuò distantiam, id est, à vapore magis ab arcu principali distito reflexio ad nos erat. Non quòd etiam tunc radij nulli à guttis

guttis coloris summo & puniceo arcûs inferioris proximè circumfuso, & à toto inter vtramque Iridem spatio, reflecterentur: sed illi ad oculum nostrum non perueniebant; quia ante faciem obliquè versusalterum cornu traieciabantur.

Hinc pulchra ratio se mihi obijcit, cur interuallum illud vtriusque Iridis rinctum non appareat: quod Alexandrum & alios tantoperè torfit. Quia, inquam, etsi inde etiam radij à primariâ Iride sparsi reflectantur, angulum tamen ibi non habent talem, quo repellantur ad oculum. aliàs, si mutes locum, inde accipere eos iam poteris, sed primaria Iris etiam translata erit in alium situm.

His præstructim positis, aio colores inuerti: quia puniceus qui in primâ Iride est summus, ceterique iunctis viribus robustiores illi vicinum vaporem radios, quàm in remotum, iaculantur. hinc ergo in imo secundariæ arcu puniceus, siue plenior quàm ceterorum, color est, licet non tam splendide puniceus, vt aliquando notauimus, quàm languide ardeat atrâ quadam rubedine. Hoc iam me etiam incidit: Colores viridem & purpureum secundæ Iridis, longius puniceo eiusdem, ab oculo recedere. ita enim etiam in Iride primâ accidit. Addo, totam secundariam in profundiori parte vaporis, quàm primariam depingi. Radij ergo è circumferentiâ primariæ emicantes, profunditatem nubis obliquè penetrant, quousque primum occurrat angulus quo reflexi recidunt in oculum. hæc reflexio punicea est. Pergendo deinde lineâ rectâ per profundum nubis, & recedendo vndique sursum à puniceo gibbo inferioris Iridis, in virorem, ac denique in purpuram deficiunt iidem illi radij. Igitur superior illa nubes, primariæ Iridis speculum non est, inquit. Non magis dico, quàm inferior nubes, est Solis: Si ergo Solem in primariâ Iride, non lumen tantum vaporis inhaerens vides; in secundariâ etiam primariam, imò ipsum Solem, vt in secundo speculo videbis. Verum iam antè docui, magis esse, vt radium sideris nubi intricatum, quàm ipsum sidus in primariâ cernamus. vnde & in secundâ, non Solem, aut Iridem inferiorem, sed lumen nouum ab hac vndique in arcum superiorem effusum, ibique adhærens videre nos existimabimus.

Ex his etiam manifestum est, cur extra primæ consortium secunda numquam se ostendat. Nam sine causâ necessariâ, effectus esse non potest.

Sed cur non magis frequentatur secundaria Iris? Difficulus alij huic nodo cuneum reperient; ego istum: Quia primaria medio

milliari Belgico, aut vltra, plerumque abest ab oculo. itaque vt alteram Iridem gignat, quæ ad adspicientem ex tanto intervallo reflectatur, per multum vaporis, & quadrantem faciliè milliariis, radius à circumferentiâ primariæ emicans transire debet, donec iustè magnitudinis angulum reperiat. Antequam verò huc eluctando perueniat, exstinguitur sæpè, aut extenuatur prænimis, nisi Iris principalis egregiè saturata sit, & plenissimis coloribus. Tunc enim secundaria numquam deficit, modò sat vaporis circumstet, nec ita densè vt radius, aliàs à se satis debilem, contumaciter respuat. Vnde si contingat primariam tam vberem & propinquam esse, quàm cornu illud nostræ Louanienſis, semper geminabit, nisi circumfusus vapor, qui alteram excipiat, deficit. Quia verò àër inferior tempore Iridis, infinitis supernè destillantibus guttulis totus est rorulentus, nec faciliè ibi deficit materia secundæ Iridis; ideo brachia, vt sæpè notauimus, frequentius geminantur, quàm summa curuatura arcûs.

Maurolyc.  
Vicom.

Non magno etiam opere nos premunt, etsi maximè putent, Maurolycus & Vicomercatus, cum inculcant, secundariam Iridem cornibus in cælum conuersis apparituram, si fiat reflexione radiorum primariæ à nube altiori. Nam id euenire, non magis necesse, quàm capite prono & pedibus in cælum erectis me cernere, cum versor ante speculum. Supponere igitur falsum hoc debent: supra solum primariæ gibbum, non circa etiam brachia, dependere illud speculum. vt scilicet gibbus ille, quia superficiei speculi proximus, vicinissimus nobis, cornua verò, tamquam ab eâ superficiei remotissima, maximè etiam ab oculo discessisse, appareant, ideoque esse sursum. Sed non ita res habet. brachia enim non supra mediæ curuaturæ gibbum, sed iuxta se ad latus speculum suum habent. Denique (& hoc caput est) quod in secundo arcu cernimus, non sunt colores ipsi primi & principalis; sed alij quidam, vt iam antè docui, in orbem & vicinam vndique nubem ab ipsis sparsi. Vnde visio ista nō est absolutè specularis & reflexa, sed directâ luminis illius superiori vaporis inculcati, ex loco tamen, in quem certo angulo, & radio vberiori, ac in oculi tunicis se manifestè pingente, repercutitur.

Verùm ex hac doctrinâ difficultatem prouideo in ordinandis coloribus tertie Iridis. putant enim in hanc redituros colores primæ, futurumque puniceum in summâ, purpureum in imâ abscondere. Sed res ista in altiozem indaginem & longiorem paulò mitti debet.

## ARTICVLVS XII.

*An Iris ultra geminam: & quo colorum ordine  
apparere possit.*

**N**Egat impressè Aristoteles: Οὐδὲ, inquit, *δύοις πλείους ἰριδὲς* Aristot.  
*γίνονται* ἀμα. Neque plures duabus Irides sunt simul. & causam  
deinde iungit: Διὰ τὸ ὅτι ἡ δὲ πρώτη γίνουσα ἀμαυροτέρα, ὥστε  
ἔστιν ἡ τρίτη ἀνάλυσιν πάντων ἀδυνάτη γίνουσα. Quia secunda hebetior  
est, ita ut tertia reflexio planè reddatur imbecillius. Accessit Carda- Cardan.  
nus lib. 4. Subt. l. & ( mirum in illà eius de secundæ Iridis genera-  
tione sententiâ) vbique id affirmat aut supponit Maurolycus. Vi- Maurol.  
comercatus tamen à quibusdam tres, Snellius sex à se, simul visas Vicom.  
narrat. Vitello etiam lib. 10. th. 69. quatuor se Paduæ quondam Snell.  
spectasse dicit. sed merà refractione concinnatas, ut in vrinalibus Vitell.  
aquâ plenis solent, fuisse existimo. nam & perfectè circulares, &  
ad latus Solis, non ex aduerso erant.

Dico Primò: Duæ, tresve, aut plures, primariæ Irides concentricæ, ex diuersâ radiorum reflexione immediatè, & eâdem colorum serie, apparere, etiam si rarenter, simul possunt. Id enim Articulo 9. ex Vitellone & Thimone à nobis probatum. Fiet autem eo euentu, quo vapor circa terram longè, quàm in superiori nubis circumferentiâ, densior ac compressior, radijque tamen per eum terebrantes, satis validi erunt ad colorationem. Tunc namque cum superiori Iride iuxta ac solemnis altitudinis, inferior in densiori & opaciori figurari poterit. Rarum tamen hoc est: quia vapor totus à nube ad terram vniusmodi ferè densitatis & opacitatis est, & proinde vnicam sensibilem, & speculi singularis, reflexionem habet. Vbi verò vltra solitum infimus vapor se comprimit, plerumque opacitate suâ radium respuit, aut non satis vbertim ad arcus colorationem admittit.

Dico Secundò: Non acutè video, cur altera secundaria Iris, eodem colorum, quo primaria, ordine, infra eam & ab ipsâ de formari nequeat. Sic enim ostendi potest. Aliqui radij è primariæ guttis in subiectum vaporem, non tantùm sursum & in latera, iaciuntur: quidni igitur, ob insignem vaporis inter primariæ cornua aggregationem, reflecti inde & redire ad oculum nostrum illi possint? Difficilis tamen est euentus: quia ferè semper sat procul ante pedes nostros in terram cadunt. Deinde, puniceus, in quo maxima vis ge-  
minan-

minandi Iridem, longissimè à vapore illo brachiis comprehenso abest.

Dico Tertiò: Possunt absolutè etiam quatuor, quinque, & plures Irides apparere, quæ perpetuâ serie colores inuertant. Id est, vt prima puniceum in summo, secunda in imo, tertia iterum in summo habeat: & ita deinceps alternando puniceum cum purpureo, viridi semper in medio & vtrumque diuidente. Hoc autem eueniet, si omnes quæ supremum arcum puniceum habet, à Sole proximè formentur, singulæque aliam secundariam supra se generent, quæ in proximo limbo puniet, purpurascens remotissimo. Sic enim inter duas quasque primarias secundaria, permutatis extremis coloribus, interijcietur. quod fieri posse, dicet qui superiora vtrumque intellexit. Sed id iam notandum: Tertian, quæ puniceum in supremum gyrum restituit, non futura plerumque remissiore secundâ. hæc enim à primariâ inferiori, & causâ debili, illa à radiis immediatè Sole emicantibus, & satis validis, figurata fuit. Propter distantiam tamen, aut quia ex profundiori vel malè temperatâ nube reflexio venit, aliquando maligniùs quàm secundâ fulgere poterit.

Dico Quartò: Secundaria Iris quæ puniceum in imâ abside habet, vix vquam tertiam, quæ superiorem limbum punicantem ostendat, generare valet. Probat: quia si primæ radius in colorem purpureum supremi arcus secundæ Iridis deficiat, quomodo vltra sic propagari potest, vt post aliquod interuallum, tertiam Iridem, & quidem à colore purpureo paullatim ad puniceum, vberimum in distanti, adscendendo, conformet? Hoc planè est, quod Aristoteles vquam euenisse negat. Rarissimo tamen casu id fortasse accidet, si supra secundam Iridem vaporita rareseat, vt imbecilli eius radio colorari, & supremus arcus, quia humor ibi fortè tenuissimus, pallore tantum quodam punicante adspersi possit.

Ceterum, secundariæ Iridis colores non solum languidiores, sed zonæ etiam ipsæ angustiores sunt, quàm in primariâ: quia à causâ debiliore, & radio iam antè in conformationem primariæ fracto, nec longè penetrante, progengerantur. Latissimus, etiam primariæ, limbus, puniceus, restrictissimus, purpureus est. Maurolycus credit, latitudinem totius Iridis æqualem esse diametro apparenti disci solaris. Verum supponit, Irides concinnari ex radiis superioribus & inferioribus faciei solaris, inuicem se ante nubem decussantibus, eamque per diuersas superficies, quarum vna altior, altera humi-

lior,

Aristot.

Maurolyc.

lior, intransibis: quod nuper placere nobis negabamus. Hoc igitur magis iam allubescit: Radium tenui & angusto satis gyro vaporem illum puniceum ingredi, sed longius pari ferè robore, & rubore quo opacum discingit, penetrare, vnde partes puniceæ zonæ inferiores, & viridi admotas, ex profundiori, quàm superiores, spectari. Nec tamen necesse est, linearem solum radiorum coronam, statim ex ipso limine & initu primo nubis, ad nos reflecti. Ex aliquantulâ enim latitudine id fieri potest: quia aliquot radiorum vicini ordines, eodem angulo (nullo certè tamen discerniculo sensibili) ad oculum repelluntur. guttæ etiam sibi inuicem vtròq; citroque lucem reperiunt, & idoneo angulo in adspicientem reicientes, latitudinem zonæ fortassis augere, vti & colores incendere, valent.

## ARTICVLVS XIII.

*De variis Iridis motibus.*

**M**OTUS Iridis multi, sed solum apparentes sunt. Primus, quo Iris occidentalis, Sole manè adscendente, perpetuò videtur deprimi: quia minor minorque circuli portio se ostendit, crescente Solis altitudine.

Secundus, quo Iris orientalis magis magisque assurgit, Sole delabente in Occasum. amplissimæ enim à sidere horizonti contiguo figurantur. Nequit tamen vllus arcus vsque ad zenith nostrum, gibbum attollere: quia sic semidiametrum oporteret esse 90. graduum; cum hæcenus altissima non exceßerit 45. Igitur medio inter zenith & horizontem interuallo stabit eius incrementum.

Tertius est circa horizontem. vt v. g. in Zonis frigidis, Sole 24. horarum horizontem circulante, Iris ex aduerso, pari ferè altitudine apparere potest circuire: nobis etiam ferè semicirculum horizontis exambire. vt si hieme, cum Sol in Capricorno, manè occidentalis appareat, paulatimq; leuante se in Meridiem Sole, in Septentrionem, & deinde versus Ortum se gyret. Omni enim, vt statim dicam, horâ diurnâ videri tunc à nobis potest Iris.

Quartus, accessus aut recessus est, per condensationem aut rarefactionem vaporis. vt patet ex historiâ Iridis Louaniensis: quam è primo Articulo, si lubet, petes. Rarefcente etiam vapore brachia diducit, fitque segmentum circuli maioris, inquit Vitello: recla-  
Vitell.  
 mante Thimone, qui in denso dilatari potius contendit; sed ne-  
Thimon.  
 quidquam.

Quintus est fuga, vel sequela, per oculi propinquationem, aut recessum. eodem enim fernè modo, quo nebula, ante sequentem fugere, & sequi fugientem videtur. In causâ est, radij reflexio, qui ex determinato spatio, & certo angulo reuerti debet ad oculum. Si ergo accedas, apparet effugere: non quòd eadem locum mutet; sed quia aliam perpetuò & aliam vides è profundiori reflexam & remotiori vaporis parte. Nam radij qui priùs in oculos incurrebant, iam retrò sunt, & alios excipis qui ante te, iactu ad oculum nò perueniente, terram impingebant. Sic etiam, cùm fugis, affectari videtur. quia cùm pari semper intervallo ab oculo distet, vbi pedem refers, attrahis eam vnà tecum: id est, in vapore citiore nouam adspicis, vbi antè ob propinquitatem videbas nihil. Hinc liquet, oculum priorem & posteriorem, etiamsi in eodem Iridis axe sint, non cernere vnā eandemque Iridem. item, non oppidò longè distitus aliquis videre puniceam zonam, vbi alius purpuream, potest.

Sextus motus, est iterum circa horizontem, si ab vno brachio incedas versus alterum. sic enim arcum circumferes, dum vnum brachium te fugitat, alio à tergo sequente. Vnde, si quis alteri tuæ Iridis brachio propior est, aliam videt, tuam interfecantem. Hinc nec duobus eiusdem hominis oculis suspicari potes, nò cerni eundem omnino arcum. id enim multi credunt; sed nescio, an velim accredere. Vtar hoc discrimine. Si vera est sententia Maurolyci & plurium, Solem, non lumen aliquod impressum vaporì, cerni in Iride, omnes vbique in toto terrarum Orbe oculi eandem semper vident Iridem. Nam veluti eundem in ceteris speculis, ita in isto, Solem adspiciunt. Iris autem nil apud ipsos aliud est, quàm Sol sic in vapore reflexè conspectus. Si verò Iris lumen est nubi implicitur, & ipsum ibi, non Sol in cælo cernatur, partim saltem eandem duo eiusdem hominis oculi vident Iridem. aliquæ enim lucis partes radiant in vtrumque oculum. Vbi tamen oculum in axe Iridis, & ex aduerso planè centri, esse oportet, aliqua luminis puncta ab vno conspiciuntur, quæ speciem vibrare nequeunt in alterum. Quia enim duo oculi, totidem etiam axes & Iridum centra sunt; etli inter vtrumque nullum appareat, ob oculorum propinquitatem, adspectabile discerniculum. Itaque non cernunt vnā eandemque adæquatè & circumcisè Iridem.

Similis contemplatio etiam in Halonem siue Coronam cadit. Oculus enim in axe circuli etiam est: geminosque axes, & centra,



& circulos esse, necesse est, vbi oculi gemelli ex aduerso constiterunt. Scilo etiam (etsi alieno loco) iam excipiam, ne forte excidat, quod extemplò cecidit mihi in mentem: Cur Iris tubo Belgico nostro illapsa amittat colorationem. Experire enim: confusancum tantum aliquod lumen inspicies, nullam colorum varietatem in aculosum. Existimo, priorem illam tubi crystallum & conuexam lentem, radios nimis diducere, & discingere colorantem illam umbrarum mixturam. & largiter etiam adiuuat clara & digesta crystalli aut vitri perspicuitas.

## ARTICVLVS XIV.

*Locus & tempus Iridis.*

**I**ridis vulgaris siue reflexæ locus in nube contra Solem est. oportet enim spectatorem oculum, inter Solem & nubilum, statutum esse, vt omnes experientiæ probant. Et hinc est, vt nullæ nobis ad Austrum pingantur Irides. quia, inquam, Sol numquam trans zenith nostrum in Septemtrionem digreditur, vt oculus Meridie adspiciens Solem à tergo habeat.

Sed rem non tantum post tergum, sed etiam inter me & speculum collocatam, in speculo, inquires, cernere possum: quidni & Solem in nube quæ ad Austrum & trans ipsum? Verum interrogatio venit à falsâ imaginatione: quod videre hinc nubes valeamus, quæ in Zonâ torridâ sunt. quod longissimè à vero abest. Alibi enim ex Cardano docuimus, vix vltra decem miliaria Belgica, nubes infimas & pluentes quæ horizontem tangunt, à nobis adspici. à Tropico autè Cancræ, siue initio Torridæ, Louanium gradibus 27½ paulominus abiunctum est: quorum quisque, secundum Ptolemæum, 20. circiter Belgicis leucis, siue 60. millibus passuum constat. Deinde, Iris nulla in vapore, qui ad limbum visibilis horizontis summotus est, vnumquam videtur. Nam maxima distantia Iridis ab oculo, trium miliarium est, vt inquiunt Conimbricenses, ex communi Opticorum sententiâ. imò aio ego, vix vllam vltra dimidium miliare Belgicum, siue 1500. passus, à nobis remoueri. Ex quo patet, nimis simpliciter à Vico mercato, & aliis quibusdam asseri: Iridem plerumque circulo integro claudi, sed alterum eius segmentum infra horizontem supprimi. Cornua enim quæ videmus, non infra horizontem (etiam visibilem, qui sex fermè Belgicis miliaribus oculo fortassis abest) dependent; sed prope nos in terram defixa

sunt. Irides verò refractæ, non solùm è regione, sed ad latus etiam vtrumlibet Solis, vt non vno Articuli primi experimento constat, formari possunt. Ad earum quippe generationem duas ordine nubes sic disponi sufficit, vt refractum in priori, & opacitate colorante maculosum radium, excipiat posterior.

Tempus quod maximè frequentat reflexam Iridem, autumnus est, aut ver. Vere tamen præcipuè, & Aprili ac Maio præsertim, cerni in Belgio, non vno anno notavi. Causa est, quòd & nebulosum vaporem, & vnà interlucentem satis acriter sideris radium Irides desiderent. hiems ergo nubilo, vt solet, grauis, & inualido Sole, æstas nimis valido, & sæpè innubis, minùs sunt idoneæ. Ver, quia serenius, raro interlabente imbri, aptius est autumnò. Ante etiam, aut post pluuiam sæpius arcuantur nubes: quia pluuij rores molli-ter, priusquam degrassetur totus & legitimus imber qui excludit Solem, defluentes, aut exoneratà iam nube, residui & destillantes, rapiunt hunc colorem. Hinc liquet, cur quibusdam in locis Iris vilitatur. *In Italiâ Locris*, ait Plinius, & *in lacu Vclino*, nullo non die apparet arcus. id est, quantum existimo, valdè frequenter. quo etiam simili moderamine accipio quod addit: *Rhodi & Syracusis numquam tanta nubila obduci, vt non aliquà horâ Sol cernatur.* Ibi ergo solentissimæ Irides, vbi facilis in adscensum rarus quidam & rorans vapor, qui totam non pellat serenitatem, sed accipiat, & reddat, non exstinguat Solis radium. Hinc fluminibus, aut vdis vallibus incumbentia Iridum brachia, sæpissimè videmus:

De terræ climatibus & Regionibus, certæ etiam quædam leges sunt.

Primò: Vbique in toto Orbe, manè & vesperi, apparere Iris potest. Manè, cùm Sol nondum secundum & quadragesimum, aut quadragesimum quintum (si tantam esse maximæ Iridis semidiametrum, Maurolyco credimus) gradum eleuationis attingit: vesperi, cùm ad illum etiam altitudinis limitem à culmine cæli defluxit. Causa est in promptu. quia altissimi arcûs semidiameter tot ferè cæli subtenditur gradibus. hæc autem ortiuo, aut occiduo tantùm Sole, tota supra horizontem est, deprimiturquæ paullatim, quò altius se in oppositâ cæli regione leuat sidus. vnde vbi altitudo ad æqualitatem semidiametri illius, id est, ad 45. gradum venit, totum arcum necesse est infra horizontem suppressum esse. Aut potius, semotà imaginatione hac mathematicâ, qua Aristoteles vtitur, tunc Iris nulla est, quia in tantâ Solis eleuatione radij à stillicidiis reflexi,

Plin. lib. 2.  
cap. 62.

Aristot.

reflexi,procul ante oculos nostros in terram reuerberantur. quò si subito transferremur,exciperemus iam quidem , Iridisq̃ue videmus aliquod segmentum; sed eo motu mutassemus etiam sine dubio sideris eleuationem , essetq̃ue 45.gradibus humilior . Hæc tamen de Iride primariâ , & iis quæ magnitudinis ordinariæ & magis solentis sunt, intelligenda esse , facîle coniectabit , qui legerit præcedentium Articulorum doctrinam.

Secundò: Sub polis,omni horâ longæ illius medij anni diei, cerni aliquod Iridis segmentum potest . Cùm enim Æquatorem pro horizonte habeant,maxima Solis eleuatio non est maior  $23\frac{1}{2}$  gradibus,quanta scilicet est distàtia Æquatoris ab altero Tropicorum.

Tertiò : Sub Æquatore degentibus , tribus ab ortu Solis & totidem ante occasum horis , cerni Iris valet . Ratio est , quia ternis ibi horis, gradus 45.pænè conficit. singulis enim horis ascendant 15.gradus Æquinoctialis . totidemq̃ue Sol percurrit;nisi quantillum abest,ob renisum proprij motûs.

Quartò: Nobis , qui in Zonâ temperatâ Louanij habitamus, omnibus diei hibernæ horis videri arcus potest,æliux non potest. Causa prioris est,quia Sol in circulo brumali circitans , non ultra 15.gradus & pauca minuta , etiam meridie nobis est eleuatus. æstate tamen,cùm in Cancro est solstitialis , 62.gradus & aliquot minuta habet eleuationis . Itaque Meridianam illo tempore Iridem nemo hæctenus hic adspexit. neque causam huius rei intimam lib.1.cap.8. Nat.Seneca: *Aristoteles ait, inquit, post autumnale æquinoctium, qualibet horâ diei arcum fieri, æstate non fieri , nisi aut incipiente, aut inclinato iam die. Cuius rei causa manifesta est: quia Sol medio die calidissimus nubes euincit; nec potest ab his imaginem suam recipere, quas scindit. At matutino tempore , & vergens ad occasum, minus virium habet: & ideo à nubibus & suscipi, & reperi potest.* Verùm ipso sæpè Solstitio meridianum cælum nubilo obduci, & imbres, resistente & intercedente nequidquam radio solari, cogi, & depluere videmus; nec tamen arcum tunc circa diei vmbilicum à quoquam conspectum fando quis acceperit. Aliam tamen præterpropter causam Seneca adducit, quæ reduci in veram potest. *Temporibus, ait, æstiuus supra nostrum verticem fertur . itaque medio die excelsissimus terras rectiore adspicit lineâ, quàm ut ullis nubibus possit occurrì: omnes enim tunc sub se habet .* Ratio vnica igitur est, quòd reflexio à nubibus quas sic ex alto despicit, nimis præceps sit, & ante nos in terram cadat, non ad oculos perueniat.

## ARTICVLVS XV.

*Effectus , & significatus Iridis.*

**I**N effectibus Iridis non memoro iam procreationem sui similis, de quâ antè circa figurationem secundi atcûs. Alij quidam ei passim tribuuntur: qui tamen non tam eius, quàm causarum quarumdam ipsi coherentium sunt. aliâs enim cûm Iris lumen arcuatum sit, nil nisi sibi simile, & calorem efficere valet.

Aristot.  
Plin.  
Platarch.

Aristoreles, Plinius, Plutarchus, & agricolæ nostri à caluo ad caluum omnes, aiunt siluas, arbores, frutices, plantas odoratiore reddi, quibus arcus incubuerit. *Tradunt*, inquit lib. 12. c. 24. Plin.

*in quocumque frutice curuetur arcus celestis, eandem que sit aspalatho, suauitatem odoris existere, sed in aspalatho inenarrabilem quamdam* Aspalathus verò est lignum aloës Rhodiorum, vt hodie Offi-

Amatus.  
Plut.

cinæ vocant, ait Amatus in Dioscoridem, ex quo Coronæ ad fundendas Deo & Virgini preculas concinnantur. Plutarchus lib. 4.

q. 2. Sympos. narrat, ligna, in quæ cornua deiecerit Itis, *ἱερὸς ἰσχυρὸς* à Græcis agricolis appellari: quasi in ea arcus celestis ceciderit.

Plin.

Terram etiam ipsam suauius halare docet Plinius. Hæc tamen, & id genus lib. 4. Subtil. ridet Cardanus. *Quis enim*, inquit, *umquam*

Cardan.

*Iridem vidit arbori incumbentem? cûm solâ visûs imaginatione consistat.* Ego vidi, Cardane. ac licet visus circumferentiæ limites quodammodò figat, & figuram illam circulet (ex certo enim intervallo, & angulo, vt appareat, reflecti ad oculum lumen debet:) color tamen ille nubilo permixtus, reuerà aliquid, & splendor quidam est, non de genere Chimærarum, aut ens rationis: vt proinde arboribus & plantis verè inniti valeat. Theophrastus tamen

Theoph.

l. 6. c. 25. de Causis plant. ait, loca adusta, Itide decumbente, odoratiore fieri. Ad odorem enim spargendum, media quædam fæci & humentis temperies exigitur. vnde c. vlt. eiusdem libri narrat, vestigia leporum ac ferarum medijs anni temporibus, vere scilicet & autumnno, magis odora esse, & isto maximè, quia ver florum & plantarum omnigenæ exhalationis suffitu, satis aliâs à se odorata hebetat. hiems autem nimio frigore odorifetos spiritus adstringit, æstas calore discingit. & hinc æstiuo meridie difficultet vestigant canes, prudensque venator nascentem, aut præcipientem in occasum diem præponit. Siccitas tamen præcipuè odores acuit, he-

bescunt.

bescuntque manifestè, aut supprimuntur affluentia humoris. unde in Ægypto, quia cælum pleroque anni caliginosum & roscidum, negantur vlli pænè esse odores.

Plantis tamen odorem suapte vi Iris non adspergit, sed nubes rorans in quâ fulget, deciduis in eas guttis, siccitatem ad fragrantiam iuuat & excitat. Vnde post longas siccitates, modico inpluente imbri, fragrantiora omnia, & violaria manè rorulenta, gratius & latius spirantia, etiam sine vllâ Iride, experimur.

Significatus Iridis, alij naturales sunt, alij ex Dei instituto. De prioribus, post Aristotelem omnes pluuiæ signum faciunt: aut Aristot. deciduæ, inquam, aut casuræ breuî. Nam sequi, aut anteire imbrem solet. Plin. tamen l. 18. c. 35. *Arcus, cum sunt duplices, pluuias* Plin. *nuntiant; à pluuijs serenitatem non perinde certam.* Nam vapor vnus alteri iam delapso succedaneus esse potest, quia Sol inter Iridem radians, aut humorem maturè resorbet, aut status aliunde adducunt, aut guttæ ipsæ in quibus post pluuiam splendicat arcus, sufficiunt instaurandis imbribus. Alibi idem: *Arcus frequentes, ne* Plin. l. 2. *pluuios quidem, aut serenos dies cum fide portendunt.* c. 59. Portendere tamen humorem, niuem, grandinem, fulmina, aliaque id genus, quæ cælum nubilo iacit missilia, graphicè enarrat Scriptura sacra Eccli. 43. *Imperio suo accelerauit niuem, & accelerat conuersiones* Eccli. 43. *emittere iudicij sui. & post multa: Pulchritudinem candoris eius admirabitur oculus, & super imbrem eius expauescet cor.* Olim ideo & hodie creditur vulgò Iris bibere aquas, & materiam pluuiarum in nubes attrahere.

— Et bibit ingens Arcus —

ut ait Virgilius noster, inquit Seneca, cum adueniat imber. sed non Virgil. easdem, nec eumque apparuit, minas affert. A Meridie ortus magnam Seneca l. 1. c. 6. vim aquarum vehet. Et ratione probabili firmat: *Vinci enim non posuerunt valentissimo Sole, tantum est illis virium. Si circa occasum refulsis, rorabit, & leniter impluet. Si ab ortu circæve surrexit, serena promittis.* Quia fortasse spes est, vincendum adulto iam & validiore Sole, tenuem istum vaporem, qui exoriente die destillare, & brachia arcus ad terram deducere incipit. Lepidè ad arcum, humorem pluuialem forbentem, allusit Palinurus apud Plautum, cum anuum quamdam incuruam, bibentem largiùs Plaut. cerneret:

— Ecce autem bibit arcus: pluet  
Credo, hæc ele, hodie. —

Eodém

Ouid. 1.  
Metam.

Eodém adspexit ille ingeniosus:

*Nuntia Iunonis varios induta colores,*

*Concipis Iris aquas, alimentaque nubibus affert.*

Nuntia Iunonis, id est medix illius & humentis aëris regionis, unde decidunt imbres. Hanc enim Poëtæ illi tenebriones in Iunone figurant, uti Iouem in æthere. Thaumantias etiam appellatur Iris, quia reuera ἑυφρανς admirabilis: in quâ tot ingenia stupore defixa adhærent, nec se hæctenus satis expediunt.

Gen. 9.

Diuina etiam Iridis hæc significatio est: Non futurum ampliùs generale totius Orbis diluuium. *Cùm obduxero nubibus calum, apparebis arcus meus in nubibus, & recordabor fœderis mei vobiscum, & cum omni animâ vinente quæ carnem vegetat, & non erunt ultra aqua diluuij ad delendam vniuersam carnem.* Alias quoque Iridis significationes mysticas in c. 4. Apoc. & 1. Ezechielis, Interpretes excogitant. ut in purpureo Christi carnem intelligi, in viridi animam, in puniceo Diuinitatem: & id genus plura pie commentantur. Falluntur deinde, qui ante diluuium Noë, negant visam in nubibus Iridem. Si enim nubes & Sol per 1656. à Mundi exordio annos fuerunt, necesse fuit aliquando Irides (nisi Deo auertere cura fuerit) generari. Fuerunt igitur ante diluuium arcus; sed nondum assumpti erant ad significationem pacti inter Deum & terram.

S. Thom.  
Coniubr.

Naturaliter tamen etiam signum id esse potest, non secuturæ mox ab aquis pluuiialibus magnæ eluuiionis: quia cælo vndique nubibus intento & graui, suppressoquæ Sole, fingi nequit Iris; ut ex S. Thomâ rectè demonstrant Conimbricenses.

## ARTICVLVS XVI.

### *De Iride Lunari.*

Aristot.

**P**Leraque huius Iridis cum Solari conueniunt. Figuratur enim à radio Lunæ aduersam nubem incidente, fiuntque cetera simillimis de causis. Altitudinem quoque semidiametri parem Solari, instrumentis repertam, Thimon asserit. In duobus tamen maximè hic arcus ab altero discedit. Primum, quia rarior, deinde, ferè unicolor. Raritatis causam Aristoteles in Lunam conijcit, quæ nisi plena, & lumine multo tumens, vires ad penetrandam paulisper, & colorandam nubem, non habet. Plenilunio autem, occidente Sole, Luna surgit. nec statim etiam, si quæ fortasse roscida,

Si opposita nubes sit, formare conspicuam in eâ Iridem potest, du-  
tantibus vnâ aut alterâ horâ, & lucem eius debilem infuscantibus  
crepusculis vespertinis. Albertus tamen narrat, Lunâ nondum Albert.  
impletâ, & meridianâ, à se multisq; visum Lunarem arcum in  
Septemtrione. *Nec erat Luna plena, inquit, sed amphitrios (ἀμφίτρος*  
*hoc est, satis plus quàm dimidia, aliquantulum de-*  
*ficiens à plenitudine. & erat Luna in Meridie ultra Zodiacum in*  
*signo Capricorni, in principio illius signi, Sol autem in fine Tauri,*  
*circa initium Geminorum.*

Americus autem Vespuccius, ille qui ingenti & inuidendâ felici-  
tate alteri Orbi nomen dedit, inter admiranda, Iridem Lunæ  
candicantem, in ipso noctis meridie, à se visam ponit. Aristoteles Arist. l. 3.  
tamen certè, quinquaginta & amplius annorum spatio, bis tantum Met. c. 2.  
in eam se incidisse scribit. Vbi obiter insignitum quorundam er-  
rorem noto, qui Aristotelem admodum adolescentem hæc scri-  
pisse asseuerant. Thimon nihilominus intra tertium annum bis, Thimon.  
& Snellius lib. de Cometâ 1618. biennio toties adspēctam narrat. Snell.

*Iridem, inquit, Lunarem hoc continuo biennio visam memini. An-*  
*no 1617. mense Decembri circa plenilunium: & 1618. propriè Cal.*  
*Ianuariâ à 5. ad 6. vespertinam, dum Hagam iter facerem, Iridem*  
*consimilem magnâ cum voluptate spectavi. Et Gemma noster lib. 2.* Gem.  
*c. 2. Cosmocr. ad annum 1569. Iris expressa noctu horâ 12. visa est,*  
*Alarsij 12. celo sereno ac temperato, spirantibus Cauris. Stabat hæc*  
*diu sua perfectè coloribus insignita.* Mirum tamen id, cum Ari-  
stoteles ei coloris lactescentis vnitatem tribuat. idq; & quia radij  
Lunaris languor non altè nubis opacitatem penetrat, sed in super-  
ficie solùm eius albente quadam & fractâ luce splendet; & quia  
color in eâ purpureus & viridis candere apparet adspēctui & cōpa-  
ratione tenebrarum. Minimæ enim luculæ cinctæ horrore noctis,  
acriter adspēctum feriunt, & candorem mentiuntur largiter supra  
verum. Mentior etiam ipse, nisi huc adspexit Poëta Hispanus, cum  
nigram sepulto tenebris die describens tempestatem, Iridem pænè Lucan. l. 4.  
unicolorem fuisse fingit.

*Hinc imperfecto completitur aëra gyro*

*Arcus, vix ullâ variatus luce colorem.*

*Oceanumque bibis, raptosq; ad nubila fluctus*

*Pertulit, & calo diffusum reddidit aquor.*

Densitatem tamen etiam & opacitatem nubium, radiorū respuen-  
tem, vnâ habuisse in mente, quæ in stilo non satis apparet, potuit.

D d d

Verum



Sennert in  
Epito.

Verùm ne Gemmam nostrum altero coloratæ Iridis exemplo destitutum existimetis, Daniel Sennertus, VVittembergenfis & famosus Medicus, anno 1599. mediâ ætate, post dira fulmina, & pluuias, descēdiente iam nocturnâ tempestate, inter Septemtrionē & Ortum, insignem omnibus coloribus & Solarī planē æmulâ, Lunæ Iridem vidisse, memorat. Credo: quin enim talis coloratio, etsi raro fortasse spectaculo, euenire possit, nihil equidem addubito.

Est igitur Lunaris Iris, vt semel finiam: Arcus plerumque vnicolor, ortus in tescido vapore Lunæ opposito, ex refractione radiorum, & deinde reflexione ad intermedium spectatoris oculum. Quæ omnia in Solarē cadent, si pro vnicolore, tricolore repones.

## CAPVT II.

### *De Halo, siue Coronâ.*

Apul.

Sen. lib. 1.  
c. 2. Nat.



PLENDOREM illum qui coronare aliquando sidera maiuscula cernitur, multi Halo aut Halysin, Apuleius Catenam, aliqui Armillam; alij Coronâ, aut Aream vocant: *quia ferè, inquit Seneca, screndis frugibus loca destinata, sunt rotunda.* Causa materialis in quâ, eadem quæ Iridis, nubes rorulenta. Ex quâ, lumen astri vaporī inculcatum, nisi, vt in speculo cerni astrum mauius. Formalis, figura illa circularis, quâ astrum cingit. Finis, decor Vniuersi, ventorum & imbrium significatio, laus Creatoris. Efficiens, luminare alterutrum, aut quandoque astrum aliud è grandiusculis. Apuleius de Mundo sic eam finit: *Halysis est catena quadam luminis clarioris, per sideris ambitum in se reueriens.* Sed modus generationis eius in rixâ grandi est, & pari cum eâ quâ Iridem iam statim disputauimus.

Apul.

## ARTICVLVS I.

*Quis modus generationis Corona. Seneca, Albertus,  
M. Antonius, reiecti.*

Sen. lib. 1.  
c. 2. Nat.

Seneca Philosophiâ nimis paullisper palpabili docet, vt lapis in stranguillum lacum iniectus circulos quosdam facit; ita Solis, Lunæ, aut alius sideris radium nubem incurere, eamque in orbem quosdam à centro in circumferentiam repellere. Sed hoc est, radium corpoream substantiam facere. ac deinde, primo radij con-

iectu,

iectu, angustior esset Corona, laxaretque se paulatim ille ambitus, vt in circulis aquarijs vsu venit.

Albertus miror tam propè à Senecà abesse. Putat, radium astri Albert. perpendicularem, qui omnium fortissimus, in medio tenuare & refundere circularitè in circumferentiam nubem; vbi accruata, in materià densiori plenius bibat & retineat lumen. Verùm, sic etiam paulatim diduci, rarefcente vapore, cerneremus Coronam. Secundò, radius Lunæ, quia imbecillus, tardè admodum vaporem sic aperire & dissoluere valet. Tertiò, Corona Solaris, Lunari semper longè amplior foret. Quartò, & fortissimè, quia alius aliquanto à te interuallo diffusus, Coronam circa idem sidus, quæ tuam intersecat, sæpè videt, ergo non vnum vtriusque centrum, non vnus est radius perpendicularis, qui ad vtrumque spectantem oculum venit: sed circa omnia aræ tuæ puncta infinitæ Coronæ circumferibi possunt pro diuersis spectatoribus. Vnde patet, totum circuli ambitum luce sideris perfusum esse, et si tu solum extremum eius limbum candicantem adspicias, prorsus, vt in Iride diximus, spatium quod brachia amplectuntur, colore etiam, et si eos te celet, non secùs ac ipsum arcus gyrum, rapuisse.

M. Antonius de Dominis de Radijs c. 18. contendit, Coronam M. Ant. per meram sideris à vapore ceu speculo reflexionem circinari: vnde non lumen nubi intritum, sed ipsum quod in cælo est sidus, in eà cerni existimatque à se Aristotelem esse, qui Halo suum non per *ἀνάκλασιν refractionem*, sed per *ἀνὰκλασιν reflexionem* maluit expedit. Admittit tamen aliquam in Iride refractionem, quod non oporteret, si constans esset: nam Aristoteles per vnā emissionem radij ab oculo in nubem, & deinde reflexionem ad sidus, vtramque *ἐμφασιν* explicat.

Probat M. Antonius, quia refraçtio non nisi parua admodum, ob vaporis tenuitatem, in Coronà esse potest, & radij ab oppositis circuli guttis refracti versus perpendicularem, in tantà fere post vaporem distantia, quanta est sideris à vapore, concurrent. Cùm igitur spatium astri & nubis interuallare infinitò pænè superet modicum illud quod inter nubem & oculum est; clarum est, radios ab extremis diametri Coronæ punctis, tam citò non posse in oculum concurrere. Itaque censet, radios à summâ tantùm interni lateris guttarum superficie reflecti, & inde angulo incidentiæ pari in oculos decidere.

Dico tamen Primò: Radius astri in vapore subiecto necessariò

ad perpendicularem refringitur. Ratio est manifesta, quia è medio rariori humorem densiorem incidit. Igitur prorsus, vt in Iride, oportet in singulis guttulis refractionem euenire. vnde sicuti in siccis illis exhalationum fumis non colorantur Irides, quia radios non frangunt, nec satis aggregant ad perpendicularem; ita etiam sidera nisi in circumfuso rorulento vapore, non coronantur. Refractionem verò istam ad oculum etiam peruenire, sic ostendi videtur: quia Coronæ, maximè Solares, non rarò Iridum coloribus maculose cernuntur, igitur refractione ibi aliqua, & confusio radij cum opaco nubis se miscet. si enim à summâ solùm guttarum cute, non è profundo, rediret ille radius, non esset vnde colorem istum duceret.

Dico ergo Secundò: Halo, quemadmodum Iris, fit per refractionem simul & reflexionem. vnde non tam sidus ipsum reflexè videmus, quàm lumen eius in vapore fractum ac multiplicatum, & deinde repercussum ad oculum. Id veri similitudinem, vel ex solâ quam cum Iride habet analogiâ, capere potest. Itaque pars vna radij, inprimis, à superficie extremâ guttarum statim reflectitur; altera verò quæ profunditatem earum intrat, post fractionem denum & aucto lumine reuertitur. Sic enim euenire solet, vbi radius in corpus partim opacum & partim diaphanum, qualis humor est, iacitur. aliquid, inquam, lucis à superficie resilit, aliquid in profundum conditur. Et licet fortasse pars illa, quæ per punctum superficie intrat, à quo altera ad oculum reflectitur, quia versus centrum guttæ ad perpendicularem se inclinât, non redeat cum ipsâ in eundem oculum; alij tamen radij per puncta superiora in guttas penetrantes, reuerti possunt. Deinde radij, qui non tam citò ad axem Coronæ ex quo oculus spectat, reflecterentur, sed ad partem longè remotiorem concurrerent, in alias guttas sæpè offensantes, tandem in aliquem angulum incidunt, quo cum alijs mixtim in oculum compelli valeant.

Quidquid sit, negandum sine dubio, solâ refractione, & aggregatione luminis, vt in Lunâ aut candenti aliquâ nube videmus, rem istam peragi; aliàs enim ex quolibet situ, nec figurâ necessariò orbiculari, & nubem totam, mediamque ipsam Coronæ aream, luce perfusam liceret cernere. Errauit ergo hîc, vt mihi videtur, Eruditus Thimon, qui reflexionem à Coronâ repellit, quam tamen non spernit ab Iride.

Thimon.

Rem igitur totam sic mihi in mente deformat. Radij per omnem  
Coro-

Coronæ aream, versus axem, siue lineam quæ à centro sideris per centrum Coronæ in oculum venit, in guttis antè molliter fracti, reflectuntur. hoc tamen discrimine: qui vicini centro Coronæ sunt, statim in axem concurtunt, ideoque eos non excipis, quia ibi non habes oculum; qui verò à centro longinquiores sunt, altius descendunt, & in punctum axis oculo tuo viciniorem, non tamen adhuc in ipsum cadunt. atque ita deinde dilatando perpetuò circumulum; donec ad cingulum illud radiorum venias, qui nec citrà nec vltrà, sed in te decidunt. Facilius tamen hanc refractionem & reflexionem ad axem Coronæ intelliges, si à guttis longiusculè satis à centro diffitis, & sideri quodammodò contrà positis fieri imaginæ: sic enim ad axem repellentur eadem ferè quàm in arcu ratione. Et ita planè iam censeo accidere. & mecum cogita, radium v. g. à centro sideris per profundum vaporis obliquè iactum, tandem eousque declinui illo descensu peruenire, vt guttas illas in latus feriat, à quibus angulo tali reperiatur, vt in oculum tam profundè nubi suppositum valeat resiliere.

## ARTICVLVS II.

*Coronæ proprietates.*

**P**Rima est, figura circularis: eò quòd æqualibus vndique angulis radij vaporis occurrentes reflectantur ad visum, vt diximus circa arcum. Integer verò circulus est; quia vaporem vndique sparsum, in quo ambitum totum impleat, habere potest: non ita Iris, cui obstat infernè terra. Hoc autem in valdè miris, & magno Naturæ arcano ponere soleo, Diametrum Coronæ æqualem esse Iridis semidiametro. Id enim Thimon experimento constare affirmat, asseritque Keplerus in Paralip. ad Vitellonem, cum ait, Thimon. sidus 22½ gradibus semper à circumferentiâ Coronæ abesse. ista enim est eius semidiameter. ergo solida diameter, erit graduum 45. quantam antè ex Maurolyco fecimus Iridis semidiametrum. Ego etiam anno 1624. die 24. Martij, Coronæ Lunaris, ex solâ cum vicinis fixis comparatione tantam diametrum inueni. crassities verò latitudinem circiter obtinebat 5. graduum. Causam qui proportionis istius redderet, nondum reperi. An, quia nubes in quâ pingitur Iris, longius à sidere, quàm altera distat in quâ circulatur halo? Quispiam id putet, quia vapor coronatus inter sidus est & oculum, cum alter Iride cinctus è regione sit, oculo interposito

inter ipsum & Solem aut Lunam. Videtur ergo Iris, quàm halo, longius remoueri à sidere: & proinde ab hac causa conus illuminationis Iridis maior & latior esse, quàm Coronæ. Sed hoc inde falsitatis potest argui, quòd in eadem nube Australes cernât quandoque Iridem, in quâ nos Coronam, qui post vaporem illum sumus, & habitamus ad Septemtrionem. Id enim aliquando fieri, lib. 10. th. 69. docet Vitello. ergo Iris talis & halo æquâ ad Solem propinquitate sunt, cùm in nube vnâ appareant.

Vitell.

Thimon.

Aduerto tamen inprimis, & mecum facit Thimon, non omnium Coronarum diametros, sicuti nec Iridum, esse pares. Nam quæ oculo viciniore, angustiores sunt. quod etiam intelligi potest è Coronis lucernarum, quæ quòd propinquiore spectanti, eò breuiori circello flammam circumligant. hunc igitur liquet, non omnium vnuerse Coronarum diametros, quarumcumque Iridum semidiametris esse æquales. In plerisque tamen iusta amplitudinis Iridibus, & Coronis, fortassis est prope verum: quia radij nubem penetrantes, citius posteam ad axem Coronæ concurrunt, quàm ij qui ex aduerso in Iride recipiuntur. ideò fortè solùm, quia Coronæ vapor, etsi satis excelsus per errorem videatur, submissior tamen longè sit, quàm sit distantia Iridis vulgaris ab oculo. Nam profectò demissimæ illæ nubium quæ Coronis cinguntur, 500. solùm passibus, & sæpe citrà à terris absunt: cùm tamen iusta Iridis distantia ad 1500. & vltrà passus tendatur. Confessum autem est, Coronam eam strictioris ambitus esse, cuius vapor propius impendit spectanti. Inde etiam colligi satis potest, Coronam sæpenumerò dependere in infimam aëris regionem, & satis altè infra nubium stationem; quòd Iris etiam ad terram brachia demittat, & eousque sat vaporis inueniat, à quo sustentetur: igitur & Corona succumbere satis profundè in aërem infimum valet, & vaporem cui inhæreat apprehendere. Deinde cùm sidus coronatum, horizonti admotum est, necesse infimum Coronæ arcum in aërem proximum altissimè demitti. Cur ergo, inquires, non ex propinquissimo, vt Coronæ lucernarum, apparent astra coronata? Quia, credo, ceteri astrarum radij directè per Coronæ centrum & aream in oculos deiecti, repellunt quodammodò & diffundunt Coronæ ambitum: id est, non patiuntur tam angustum circa se Coronæ circellum, sed diluunt ac infuscant, sinuntque tantùm ex longinquo adspici. Ita Coronas & Irides lucernarum, oculo proximas non cernimus.

Coronas

Coronas etiam quasdam non circumcise circulares esse, facile suggerunt quæ de Iride diximus. Vbi enim vapor non paris usquequaque densitatis est, non est necesse ex pari in orbem interuallo radios in oculum resilire.

Altera etiam Coronæ proprietas est, candor ille & vnitas coloris: quo, præter circuli incolumitatem, discernitur à Solari Iride. Causam huius candoris istam molitus est Vitello lib. 10. th. 68. *quodd lumen refractum, non sit umbrarum nigredini permixtum: quia radius deorsum refractus refugit umbram proiectam à corpore cui incidebat. quæ tamen est modica, quia ut plurimum Corona videtur in vapore raro, leniter condensato.* Irim autem colorari inquit, *quia sit per reflexionem radiorum, umbras proiectas penetrantium.* Vitell.

Verùm non dubium, quin per multarum guttarum umbras, Coronarum etiam radij transcant. nec solidum est, interiectum istud discrimen; quodd Irides reflexione, Coronæ refractione fiant. nam vrobique mixtam refractioni reflexionem ostendimus. Radius ergo coronarius à loco refractionis deorsum reflexus, in stillicidia plurima vaporum offendit, quorum umbras deorsum secum deducit.

Itaque existimo (& mecum lib. Paralip. in Vitell. affirmat Keplerus.) Coronas omnes discolores, vt Irides solent, esse. Lunares tamen & nocturnorum siderum candidæ apparent, quia & imbecilli radio factæ, & in tenebris tantum, vt de Iride Lunari antè dicebamus, se ostendunt. Solares verò seniper rubidæ, aut vniuersis Iridum coloribus (nisi quantum diurnâ & affluentiluce, de nigredine in pallorem diluitur) florere solent.

Talem se anno 1528. item cùm Carolus Cæsar coronatus, vidisse circa Solem narrat Cardanus lib. 14. c. 70. Variet. Et Plin. lib. 2. cap. 28. *Cernuntur, ait, plerumque circa Solis orbem, seu specie corona versicolores circuli: qualiter Augusto Cæsare in primâ inuentâ Urbem intrante post obitum patris, ad nomen ingens capiessendum.* De quo eodem Seneca lib. 1. c. 2. *Nat. Memoria proditum est, quo die diuus Augustus Urbem, ex Apolloniâ reuersus, intrauit, circa Solem visum coloris varij circumulum, qualis esse in arcu solet: hunc Græci Halo vocant, nos dicere Coronam aptissimè possumus.* Cardan. Plin. Seneca.

Ad hanc allusit Arcus triumphalis, Inaugurationi Srenissimorum Principum Alberti & Isabellæ à Louanienfibus nostris anno 1599. dicatus. De quo hæc Lud. Alcafar ad cap. 4. Apocal. *Inuat hic, inquit, obiter referre, quod in Ducem Brabantia Chroni-* Alcafar.

*colegitur, Alberto & Isabella Principibus Louanij ante portam Bruxellensem scriptum in hanc speciem:*

OCTAVIANI AVGVSTI IN VRBEM ADVENTV  
CORONA IRIDIS SPECIE CIRCA SOLEM APPARVIT,

NOVÆ POTENTIÆ AVSPICIUM.  
NOVÆ PACIS

HANC VOBIS O PRINCIPES NOSTRI

S. P. Q. LOVANIENSIS

IN IPSO INGRESSV DEDICAT

NOVÆ POTENTIÆ AVSPICIUM.  
NOVÆ PACIS

SOL VOBIS AB HESPERIA FVLST,  
CIRCVM EVM ET AB EO CORONA  
PROVINCIIIS VARIEGATA, IRIDIS SPECIE REFVLST.

O FAVSTA FIRMAQVE ISTA SINT!

ET TV ILLE VTRVMQVE ORBEM,

VOS ISTI NOSTRAM BELGICAM,

SALVTARI LVCE PERFVNDITE,

VITAM ET VIGOREM REDDITE,

HEV BELLIS CIVILIBVS AMISSVM.

DEVS ET SVPERI VOTA NOSTRA AVDITE,

VOS PRINCIPES OBSEQVIA ADMITTITE,

QVÆ FIDELITER ET ÆTERNVM DEFERT

S. P. Q. VESTER LOVANIENSIS.

In quo Lipsij nostri videor agnoscere ingenium & manum.

Coronæ etiam Lunares quandoque colorum varietate maculantur. & Collegam hîc in Philosophiâ nuper habuimus, qui sanctè adiurare paratus erat, visam à se talem. rarerer tamen id: veluti insolens etiam, Lunæ Iridem multicoloram esse. Hoc quoque. curiosum, & meretur attentionem: Coronas inuerso, nec eo quo primariæ Irides, ordine colorum depingi. Interior enim & altro viciniſſimus puniceus & ardentissimus est, fugitque deinde, & declinat per viridem in purpureum. Ratio tota est in radio, qui proximum vaporem robustior & vberior penetrat, languescitque paullatim, & pluribus intricatus vmbriſ, in virorem, & emoritur statim in purpuram. Quod vehementer affirmat, quæcumque nuper asseruimus circa Iridis generationem.

Geminat etiam quandoque Halo. Nam & nos duplicem Lunarem



rem vidimus:& Dion lib.45. narrat, ante Augusti, Antonij, Lepidi <sup>Dion.</sup> Triumviratum, Coronâ triplici circumcinctum apparuisse Solem. Vnde liquet, non omnium parem esse diametrum. Modus geminandi faciliè ex Iride intelligitur. nisi quod à sidere proximè verosimiliùs, certè tamen sæpiùs, veniat huius congeminatio. Cum enim exterior primæ Coronæ circulus, purpureus & maximè imbecillus sit, haud faciles in eo vires alterâ Coronâ vaporem magis dissitum adspargendi.

[ In Coronæ proprietatibus, motus etiam eius apparentes possunt recenseri.

Primum, ab Ortum ad Occasum incedere videtur, in comitatu ipsius astri. Non quia idem Coronæ lumen, locum migret, sed alia & alia catena, germana priori, in occidentaliori vaporis parte perpetuò concinnatur. Vero tamen etiam motu abire versus occasum potest, si nubes & oculus in illam quoque cum astro partem se promoueat proportionali passu. Quod etiam Iridi euenire potest, si ad adscensum v. g. Solis, opposita ad Occidentem nubes, paullatim succumbat & demittatur.

Motu deinde oculi, in Ortum, Austrum, & Septentrionem, Halo potest transferri. Aufugiet denique sursum, si attollat se oculus, sequeturque deorsum, si descendat ad humiliora.

### ARTICVLVS III.

*Tempus, & præfagia Coronarum.*

**C**orona Lunar, Iris Solaris frequentior est. Multum enim & cassatim luminis, in densâ & opacâ nube, Iridis generatio flagitat, modicum verò tenui vaporis inspersum, qui non statim dissipet, aut nimis diducat, magis pro Coronis est. Non omnium tamen siderum, etsi Seneca id affirmet, Coronæ sunt, sed Planetarum dumtaxat, & fixarum insignitæ magnitudinis, vt Vitello <sup>Seneca lib. 1. c. 20. Nat. Vitello Aristot.</sup> lib. 10. th. 68. post Aristotelem, conspectius. Sæpè etiam Halo Solaris est, quando non apparet. quia non oculo auerso, vt Iris, sed in flagrantissimum sidus intento, & idè in maiori luce, caligante, adspici debet. Vere autem & autumnò, vt Irides, & oppanso sideribus tenui, & quod radij faciliè terebrent, velo, solentiores Coronæ.

Imbrem aut humorem præfagiunt, infidâ tamen magis, quàm Iridum, fide. Insigniter, sed Aristoteli nostro consentienter, Seneca. <sup>Seneca. Aristot.</sup> cum ab unâ parte cesserunt, illinc ventus est, unde finduntur. si

Ecc

ruptæ

rupta pluribus locis sunt, tempestas fit. Nam si ab vnâ parte intercisâ est, apparet inde aëra incumbere, & ideo illa regio ventum dabis. cum vndique concepta & lacerata est, manifestum est, à pluribus partibus in illam impetum fieri, & inquietum aëra hinc atque illinc assilire. Si verò facies vniuersa subsedit, & aqualiter dilapsa sit, significatur aëris quies, otium, & tranquillitas. Et hinc etiam, non nisi tranquillo fere, integra aut diu apparet. Nube tamen vnâ transcurrente, altera paris fili & contextu vaporis succedanea, præcedentis Coronam aliquando rapit.

## ARTICVLVS IV.

*De lucernarum Coronis.*

Seneca.  
Aristot.

**C**ognatæ sideralium, aut tenue quoddam earum rudimentum sunt; ideoque, vt laciniâ, ceteris attexemus. In balneis autem maxime, inquit Seneca, & vapido aëre, Euro (id est, Vulturno humenti) spirante, ait Aristoteles, apparent lucernarum istarum Coronæ.

Thimon  
lib. 3. q. 25.  
Meteor.

Ambigunt tamen quidam, an reuerâ candelarum flammulas cingant, an oculos ludificent, & in ipsis tantum, non in aëre circumfuso sint. Nam Thimon in Iride oculi, siue extremo limbo foraminis vuae tunicæ hætere solùm, multis contendit.

Prob. primò: Quia lippi, & quisquis recens à somno, expressius eas vident. igitur nascuntur potius ex refractione luminis lucernarum in oculis lipporum vnctis & rorantibus, aut vigilantium statim à somno.

Secundò: Non pyramidales, qualis est flamma quæ coronatur, sed circulares apparent: id est, figuræ foraminis vuae.

Tertiò: Non fugiunt propinquantem, nec sequuntur abeuntem, vt Irides, & siderum Coronæ solent.

Quartò: In aëre etiam rarissimo quandoque fingi possunt.

Denique: Tales in Sole versicolores Coronæ videbuntur, si quis radium foramini obscurati conclauis illapsum, oculo excipiat.

Aristot.

Hæc tamen Aristotelem mihi non excutient, qui has corollas Iridibus & Coronis sideralibus pariat aut componit. Igitur vt istæ in nube, sic illæ in aëre circa lucernas vapido adhærent. Abhinc enim est, vt balineorum præcipuè, & Austro, siue alio humecto spirigu flante, aër quem flamma allambit, promptissimè se in ista coronamenta induat. Si verò aliqua, vel à flammæ fuligine, vel aliunde, veluti nebula lucem opacans accesserit, tum etiam colorati

.lux

Iux illa coronaria incipiet. Id enim experimenta, & Aristoteles ad <sup>Aristot.</sup> firmare. Et si purpurea, inquit, sæpius tota apparet: Viror tamen, addit Vicomercarus, quandoque etiam purpuram variat. Ex quo in <sup>Vicom.</sup> telligitur, leuiter lapsum Lud. Alcasar Apocal. cap. 4. vbi negat, ignea luce colores Iridis posse repræsentari.

Sed ab argumentis Thimonis, aliquid amplioris lucis huc affundemus.

De Primo, ad fateor, in humore lippientium oculorum, aut patientium statim à somno, fractionem radios aliquam subire; sed aliam tamen anrè ab aère candelam cingente, qui & fuligine flammæ, & aurâ humente, vt docet Aristoteles, non rarò in tantum pinguescit.

Secundum plus aliquanto molestiæ habet. hoc tamen me solatur, quodd eadem vnâ operâ conficias, Coronam Lunæ cæsx, aut corniculantis, non oportere videri orbicularem. Reperi hoc etiam potest: nullam Thimoni causam esse, cur Halo candelæ in summo fractus sit, vbi flamma se in fuligines erogar, si totus in oculi Iride, non in aère fulgear. Apparet ergo pænè circularis, quia flammæ utrimque venter in medio extuberat, & æquali hinc & hinc longitudine procurrit & radiat. Supremus verò flammæ conus & apex, in altum Coronam non protrudit & turbinat; quia multâ, quæ per verticem se exonerat, siccâ, opacâ, turbulentâ fuligine, cingulum potiùs ibi rumpit.

Ad Tertium. Verum est, non fugit, si accedas; sed euanescit. quia non ab aère longè vltra candelam, sed circà reflexio fit. deinde, ex propinquo directum flammæ lumen pupillam nimis inalbat, & Coronæ colorem & sensum diluit. Aliud in Iride & Coronâ siderum est, vbi tota profunditas nubis infinitas reflexiones habet, & innumeris, quarum aliquæ propiores, aliæ remotiores sunt, pingitur Coronis & Iridibus.

De Quarto, nego in aère tenuissimo posse apparere. non enim satis habet opacitatis. aliàs semper omnes omnino flammulas coronantes, aut cõmantes cernere mus.

Vltimò, do quandoque lumen Solis in oculorum tunicis & humoribus refractum, & vuez limbo, coronæ modo, circumfufum, apparere in aère. Vt fortasse cùm post adspèctum diu Solem, aciem ad locum obscurum vertis. circulum enim quemdam in tenebris illis fulgentem cernis: qui paullatim in virorem relanguescit, purpurescit dein vincentibus oculi tenebris, & denique euanescit, fu-

**Themist.** gitiuo omni lumine, vt lib. de Infomnijs egregiè docet Themistius. Non nego igitur lumen oculi aliquando videri. nam id etiam accidit, quoties pugno in oculum impacto, scintillæ quædam exsiliunt. Spiritus enim animales impetu dissilientes, tunicas & humores oculorum tenuiter saltem illustrent. Ita etiam Tiberius Cæsar, **Plinius.** **Sueton.** Plinio & Tranquillo teste, sine vlllo etiam oculorum frictu, cum primùm à somno patuissent, omnia, vt in luce, cernebat, hebescebantque deinde paulatim. Ac ne Tiberius putaretur in hoc miraculo singularis, sibi quoque iuueni id solenne fuisse, scribit lib. 8. cap. 43. **Cardan.** Variet. Cardanus: & in cerebri calorem, spirituumque tenuitatem refert. Id ipsum etiam de se Cælius Rhodiginus. & multis alijs euenisse scio, cum vespri benè madentes cubitum iuissent, præsertim largiori feruidi Hispanici pota.

## CAPVT III.

*De Pareljs, Paraselenis, & Virgis.*

**Plin.** lib. 2.  
cap. 32.

**PARELIUS**, siue, vt mauult Seneca, Parelum, tale dicitur, quia *ὡς ἂν ἵλιον iuxta Solem* apparet. Ridicula enim est, & ex ignorantia linguæ Græcæ nata etymologia Thimonis & Vitellonis. Parelus, inquit, quasi par, siue æqualis Soli. Die solum cernitur: noctu verò, Paraselene, iuxta Lunam. vocantque aliqui nocturnum Solem, Plinio teste. Iuxta cetera, quia minus illustria & breuis apparentis disci, sidera, nulla vniquam visuntur Parelia. Res enim parua è longinquo speculo videri non potest, spatio magnitudinem eius facile consumente: aut certè, si appareant quandoque, puncta tantum luminum sunt, ab alijs cæli luminibus, nisi à peritissimis, non distinguenda.

Parelum finiri potest, Imago Solis, iuxta eum in nube visa. Simili exemplo, Paraselene, imago Lunæ est, in nube iuxta ipsam apparens. Virgæ, siue bacilli, lumen Solis sunt per nubem sparsum, & radiorum diuisione figuram exprimens virgarum. Sed de singulis compressius aliquid & attentius cogitandum.

## ARTICVLVS I.

*An Parelum lumen Solis nubi impressum sit, an Sol ipse  
visus in speculo.*

Suppono, quod in Lib. de Animâ ostendemus verum, non idolum aliquod rei, speculo inhærens, sed ipsam, quæ extrâ est, adspici reflexè, cum quidpiam videmus in speculo.

Keplerus c. 4. Paralip. in Vitellonem, refractione radij Solis in vapore nubis conformari credit: colores etiam suos habere, etiam si non cernantur. Quod ergo cernimus, lumen erit Solis, nubi infusum, & velut in nodum ibi collectum. Id tamen nullâ demonstratione aut ratione probat. Videtur tamen his posse.

Primum: Diximus antè, Iridem & Coronam, lumen esse sideris nubi adhæsum, non ipsum, reflexè conspectum sidus. Cur ergo Parelia iam excipiamus? Hinc fortasse apud Senecam quidam non pessimè Parelum definierit, *Nubem rotundam, & splendidam, similemque Soli.* sicque eueniet planè, quod Guiducci cum suo Galilæo affirmat, eadem omnino Parelia à diuersis oculis per multa interiecta milliaria diuisis adspici.

Secundò: Parelum nihil habet ardoris, ait Seneca, sed hebes & languidum est. non ergo, Sol est, flagrantis & acerrimæ lucis, sed lumen eius fractum & eneruatum in profunditate nubis.

Tertiò: Speculum, præsertim magnum & continuum, nullum est in nubibus: cû hæc aëre nostro leuiore & rariores sint, vt Lib. 1. docuimus. Frustrâ igitur lib. 1. cap. 11. Nat. sic argutatur Seneca: *Numquid nostrum miratur, si Solis effigiem in aliquo fonte, aut placido lacu vidit? Non, vt puto. Atqui tam in sublimi facies eius potest, quàm inter nos, reddi: si modo idonea est materia, qua reddat.* Clausula salubriter & conspectè adiecta. Verum idoneam istam materiam, circumiectis in orbem oculis quærimus, neque dum reperimus. Nam densitas & læuor fontis aut placidi lacûs, à raritate & inæqualitate nubis longè abludit.

Quartò: Radius Solis nubis dorso illisus, in cælum, non in oculum infernè spectantem resiliat.

Vellem sententiam istam retinere possem. Sed multa sunt, quæ mihi ferè eam extorquere videntur.

In primis, non esse nubem rotundam, luce infusâ ceu colore proprio albicantem, quod putasse videtur Guiduccius, cognosci ex

motu, quo pari passu, ab Ortu ad Occasum, ad latus Solis incedit, potest. Nam nubes non solent sic certâ lege sidus aliquod comitari. Si dicâs, radios prius frangi, deinde reflecti, vt in Coronâ & Iride: figura ipsa Parelîj rotunda & planè Solariste, vt videtur, refellit. Non enim figura luminantis, in lumine sparso expressa apparere solet. figuram subiecti potius induit: vt floccos nubium eâ formâ colorari cernimus, quâ fortè materia ibi suspensâ fuit.

Cardan. Deinde, Cardanus lib. 4. Subtil. tres Soles à se visos, tam flammantes, narrat, vt verum à Parelîjs discernere non valeret. Denique hæc esse videtur sententia Aristotelis: quam vero propiorem existimare oportet, si vtrunque repellam, aut declinare possim ea quæ antè obieciimus.

Aristot.

Ad Primum. Longè aliud in Iride & Coronâ est, vbi figuram sideris non cernis, sed rotunditatem solùm, concinnatam ex radijs vndique in orbem pari angulo redeuntibus. Et verte oculos quocumque voles, numquam, aut valdè fallar, luminosum reperies, quod in vllâ materiâ tam graphicè, &, vt dicitur, ad viuum, imaginem suam depingat. sed cum ita videtur, semper est res ipsa, non simulachrum eius, quæ in speculo & alieno situ introspectitur: si vnicum exemplum excipias, vbi radius angusto foramine in locum tenebris infuscatum accipitur. Qui modus Parelîo tamen congruere non apparet: quia minui & circumsissimi orbis esse porteret, si saltem picturæ locus non longè à foramine distet (ita enim, cum Solem in conclauem admittimus, experimur, ) aut quacumque magnitudine sit, non iuxta Solem, tamquam latero & comes, incedet, sed in partem semper oppositam regredi parebit. Radius quippe in domum foramine aut fenestrâ illapsus, Sole à Meridiano v. g. descendente, ad partes pauimenti Orientales pedetentim recedit. Stipant tamen Solem Parelia, & Aristoteles in Bosphoro quondam visum eum ab Ortu ad Occasum inter duo incessisse, scribit. Causam igitur vides cur discrimen aliquod inter Irides & Parelia interponamus.

Pro Secundo, Cardanum iam audisti, cuius experientia Senecam confutat. Sed stilo proprio loquentem adhuc audire iuuat. *Vidi, inquit, anno 1532. die undecimâ April. horâ diei secundâ, tres Soles tam conspicuos ac splendidos Venetiis, vt intueri nequaquam possent. qui ad Solis laeuam habebatur, valdè lucidior maiorq; ac splendidior visus est, versus Austrum. qui verò ad dextram, boream versus spectabat, minor, nec tam splendens. hunc tamen in fine magis perserrantem*

Cardan.  
l. 14. c. 70.  
Variet.

*rantem auctumq; animaduertimus, sic tamen ut ambo simul desisse visi sint. Vterque maximos radios per calum & ad terram extendebat, colore omnium ad rubedinem declinante. Hac à me visa plusquam 2000. testibus spectantibus. nam Aedu B. Marci arcem complerant ciues. Credit autem ipse, hoc Triumviratus Caroli V. Imp. Henrici II. Gallorum Regis, & Solymanni Turcarum Sultani, præfagium fuisse. Ex hac igitur historiâ, præter alia, istud nacti sumus, Parelia non semper adeò esse infracta & hebeti luce.*

Tertium me præcipuè vrit. Nego tamen, vaporem nubium continuum (qualem huc Aristoteles exigit) non posse sic radios sustinere, vt instar magni speculi, imaginem Solis in oculos reijciat. Potest enim reuera (etli res ista primâ fronte incredibilis occurrat) si opacitas aliqua à tergo se speculo obiciat. quam etiam valdè speculi ab oculo distantia adiuuat: tenebræ enim maiores & atriores apparent è remoto. Sic sæpè manè aut vesperi, Louaniensia prata, continuâ veluti aquâ inundata, vt exundasse Dilia credi possit, adspicimus. vapor tamen tenuis & quem è proximo nihil cernas, in aère infimo pendulus est; qui, obtendente se tergo eius, terræ opacitate, lumen Solis, specie candentis marmoris molliter reflectit. In aère etiam vicino famosus ille Aristotelis Antipheron, vt speculo, imaginem perpetuò adspiciebat: etli melancholiæ eius & hypochondrijs id reddat Thimon. Vitello tamen certè lib. 10. th. 6. 1. de quodam familiari suo narrat, cum nocte quadam, post aliquot præcedentium vigilias, paludi adequicaret, vidisse alium quemdam, vti putabat, in aère illo vaporulento equitem, qui cum ipso, tamquam ad nutum omnem compositus, moueretur aut staret. euauisse verò statim, ac in aërem puriorem venit. Ego etiam profectò in vitris fenestrarum pellucidissimis, nocte, candelâ in cubiculo accensâ, faciliè me conspicio, quia prætenduntur solùm ab auersâ parte tenebræ externi & nocturni aëris.

Quartum etiam me satis intricatum tenet. Nam reflexio ista specularis, ad angulos incidentiæ pares fieri debet. Expedire me tamen vtcumque possum, si non à nube quam perforat perpendicularis, sed à summotâ aliquantum ad latus, vt Coronæ accidit, radius in oculum resulter. Et satis procul quandoque à legitimo Sole Parelum abesse, sumo è Dione, qui ante necem Vitellij Principis, duos simul Soles, vnum in Ortu clariorem, alterum in Occasu hebetiorem (id est, meo interpretamento, Parelum) conspectos scribit. Sed tamen, cum vero Soli assidet, quid facimus? hoc tamen fortasse

Aristot.

Aristot.  
Thimon.

Vitell.

Dion.



Roth. in  
Cometâ  
anni 1585

fortasse sæpius vſu venit. Nec me teneo, quin illuſtre experimen-  
tum Rothmanni huc protraham. Lucem enim huic rei, & tot  
Pareliorum materiæ aliquam infundet. Anno 1586. inquit, 2. Ian-  
uarij conſpeximus hic Caſſellis Parelia. Apparebat primùm, antequam  
Sol oriretur, in aurorâ (erat enim calum circa horizontem clarum)  
columna erecta ad amiſſim in circulo verticali, latitudine ubique tan-  
tâ, quanta apparebat diſmeter Solis. Incendium alicuius pagi ultra  
montes dixiſſes, ſi vidiſſes. erat enim prorſus ſpecie ignea, tamquam  
flamma: niſi quod & bique eiufdem eſſet ſpiſſitudinû. Paulo poſt orie-  
batur in eâ columnâ idolum Solis, non aliter, atque ſi eſſet Sol verus.  
Fix digitus de hoc idolo adhuc ſub horizonte latebat, cùm in eâdem co-  
lumnâ oriretur Sol verus: quem eodem modo ſubſequebatur aliud ido-  
lum. permanebatq; columna hæc, cum tribus ſuis continuè ſeſe conſin-  
gentibus Solibus, ſemper erecta in circulo verticali, vt quadrans oſten-  
debat. Erantq; Soles hi eiufdem formæ, niſi quod intermedius & ve-  
rus reliquos fulgore antecelleret: durabantq; cum eâ columnâ ad qua-  
drantem ſerè hora, donec nubes nigra à vertice ſuperueniens, eos ob-  
tegeret. Proximè igitur cingere valent Solis latus: & ex v. lde diſſito  
radius ad oculum reflexus rarè ſatis virium habet, ait Vitello, &  
Ariſtoteles, vt Solem perfectè in oculo imaginet. Propè iam abeſt,  
quin expungam & exculcem, quidquid iam iam antè de reflexione  
ſpeculari inculcaui. Certè tamen, quin aliâ longè ratione Parelia  
ſæpius deformari exiſtimem. Si enim lateribus veri Solis ita nullo  
manifeſto aut inſigni interuallo ſe apprimunt, à quâ nube radij ad  
nos redeunt? oportet proſecûdò, vt à proximâ centrali, & eâ quæ  
radio perpendiculari pænè confoditur. atqui id non poteſt, niſi  
quis fortasse naſo & oculo infernè contingeret ipſum vaporem.  
Cùm enim Sol ſit vapore illo ſuperior, nequit à tam propinquâ  
centro eius nube, tali angulo imago, vt ad oculum aliquanto inter-  
uallo diſſitum pertingat, reflecti. Huc ergo tandem, etſi trepidè,  
quia non video ducem, me abiicio.

Vitell.  
Ariſtot.

Parelia longiuſculè auulſa à vero Sole, vt quanta eſt ſemidiame-  
ter Coronæ, aut quæ in nube contrariâ, vt Irides, fulgent (quale  
fortaſſe illud, quod ſub extrema Vitellij Cæſaris illuſiſſe diximus)  
per reflexionem forſitan apparere poſſunt: tam propinqua verò,  
quàm illa Rothmanni, mentior iam, aut non poſſunt. Quo modo  
igitur? Per refractionem, inquam. & venit iam in mentem lenium,  
ſiue vitrorum conuexorum in Belgicis noſtris dioptris, quæ non  
tantum colorem, ſed figuras etiam rerum egregiè imaginant.

Itaque

Itaque veluti res quæ speciem sui per lentem conuexam, foramini obscurati conclauis insertam, in oppositâ papyro aut candido pariete imaginem suam coloribus vniuersis & figurâ expressam depingit: ita suspicor iam Solem, per conuexam fatis magnæ curaturæ nubem, radium in fundum tenebricosi vaporis deicere, ibique ob refractionem ad perpendicularem, quam & densitas continui humoris, & figuræ illa conuexitas efficit, idolum quoddam orbiculare sideris appingi. Dux igitur nubes, aut duæ eiusdem partes, necessariæ sunt ad hanc picturam. Superior, quæ sit vapor continuus (non, inquam, guttatiui diuisus, sic enim in singulis stillidij totius sideris heret refractione, nec in vnâ aliquâ amplâ imagine figuram suam explicaret) & ad iuuandam refractionem versus perpendicularem, incuruus. Deinde alia inferior, quæ instar parietis sit, qui imaginem excipiat. Infernè autem ex terrâ Parelia ista, per vaporem & aëra transparentem, vt imagines in cubiculo tenebrato, à tergo chartæ albæ & tralucentis, adspicimus. Columna ergo illa, in azimutho, siue circulo verticali qui ab horizonte per zenith nostrum transit, erecta, in quâ vnum, supra verum Solem, alterum infra, impressum Parelium vidit Rothmannus, velut illarum imaginum paries aut tabula fuit, in quam à priori vapore fracti radij, rotundo illo schemate impegerant. Incendium etiam columnæ, partim à vero Sole, partim à Parelijs erat. Non apparent autem tam angusti orbis, quàm Sol per lentem conuexam in cubiculum exceptus; quia & conuexitas vaporis est maior siue amplioris circuli portio, quàm lentis, & secunda nubes longius distat à loco fractionis, quàm paries cubiculi à principio foraminis. Non est deinde, vt Parelius ad ortum semper redire necessariò debeat: quod euenire radio antè diximus, qui per foramen in cubiculum incidit. Nam idem Parelius non diurnat, nec (nisi nubes ad Occasum, Solem comitetur) locum mutat; sed alius perpetuò generatur à radijs per diuersam subiecti vaporis partem ad nubem inferiorem & innumbratam penetrantibus. Vnde non est necesse, vt per angustias alicuius, circumcirca opaci, foraminis in profundum nubes se insinuent, veluti cum cubiculo illabuntur. quæ caussa est, cur in pavimento versus Ortum, & auersi à Sole, discedere videantur.

Ex toto hoc Articulo iam liquet, duplicis generis à nobis Parelios, vt Irides, reflexos scilicet, & refractos, aliter.

## ARTICVLVS II.

*Tempus, locus, numerus, proprietates Pareliorum.*

**T**Empus quo magis frequentantur, nubilo grauidum est, valido tamen, & perfringente Sole. vnde ver & autumnus magis idonei. Sole etiam ortiuo, aut occiduo plures, meridiano rarissimi. sub finem enim & initium noctis roscidus & humectus aër, reflexiones adiuuat & refractiones. Sed nullum frequentius, quàm orientem Solem comitantur.

In omni Climate videntur, sed in Zonis frigidis maximè, si credimus Olao. Causa est in aëre ibi vapore niuali torulento, & quia Sol non altè scandit, sed perpetuò ferè circumcurrit horizontem. Ad latus Solis Australe aut Septentrionale, & ferè in eodem cum Sole azimutho (vt illi vili à Rothmanno) dispositos adspici, magis est solenne: quia vaporem qui antè ad Occasum est, aduentu suo sidus sæpè dissipat, aut nimis ad speculum vel refractionem diducit; orientalem verò qui retrò est, statim deserit, inquit Aristoteles.

Parelij non raro Coronis cincti apparent. Numerus, ferè binarius est. vnde sæpè tres Soles visos legimus in prodigijs: id est, Solem, cum binis Parelijs. tot ante pugnam Philipensem, tot M. Antonij & Dolabellæ Consulatu, vt narrat lib. 2. c. 31. Plinius, & alia exempla ibidem habet. Tres itidem Cardanus, tres Rothmannus, tres nos Louanij anno 1619. mense Maio cum ipso Solis exortu vidimus. *Plures simul quàm tres visi*, ait Plinius, *ad hoc aui numquam*

*produntur.* Aliàs tamen, *quid impedit*, inquit Seneca, *quò minus tot sint, quos nubes fuerunt apta ad exhibendam effigiem Solis?* & sanè anno 1525. cum apud Papiam à Gallis malè pugnatum, & Franciscus Rex in manus venit Hispanorum, Poloniæ Regem sex vidisse Soles, Vicomercatus mihi auctor. & audite etiam nostrum

Gemmam. *Rex Polonia, inquit, vidit sex Soles. Is autem qui ad Occidentem stabat, atrâ fuligine squalidus apparebat. neque multò post Gallie Rex Franciscus in acie captus est.* Addit etiam præfagia & significationes. *Nec vspiam spectari solent eiusmodi, quin noua fœdera consuantur, aut conspirationes clandestina, vt quemquam fastigio suo deiciant, vel dolo, vel vi, & malis artibus comprehendant. Multum in illis præter numerum, & figuram, ipsa positio ad prædictionis certitudinem facit. an ad latus, an sub legitimo Sole locentur, an Orium, an Occasum versus, an Septentrionem, Austrum, &c.* Sed hæc vanitatis

Olau.

Aristot.

Plin.

Sen. lib. 1.  
c. 13. Nat.Gem. l. 1.  
c. 8. Col-  
mog.

tis suspecta, aut Deus quandoque effectuum naturalium occasione  
 vitur ad aliquem significatum. Potest etiam Genij boni an mali in  
 talibus manus interuenire. Certè tamen Parelj id non significant  
 naturaliter. magis tempestates, & pluuias, vt etiam Paraselene, ac  
 Virgæ. Magnæ enim nauigantibus formidini sunt: & eos Aratus, Arist.  
 Aristoteles, ceterique in signis satis euidentibus turbationum aëris Aristot.  
 habent. Australis autem certiore imbris, ait Aristoteles (quia nu-  
 bes ab eâ parte, humoris pleniores ac fecundiores) habet significa-  
 tionem. Szpè etiam rutili, aut ferruginei, pro opacitate, & qualita-  
 te vaporis refringentis, sunt.

## ARTICVLVS III.

## De Paraselene, &amp; Virgis.

P Paraselene figuratur iuxta Lunam, vt iuxta Solem Parelj. ideo- Plin. lib. 2.  
 que iam dicta huc non retraho. *Luna trina, Cn. Domitio, C. Fan-* C. 32.  
*nio Coss. apparere, inquit Plinius: quos plerique appellauerunt Soles*  
*nocturnos.* Vix extra Lunæ plenitudinem videntur: aliàs murdo, &  
 inualido ad imaginandum, sideris lumine. Pertinaciùs aliquantò,  
 quàm Parelj, durant: quia nubes languidiùs radio Lunari icta, non  
 tam citò dispergiunt. Perdere tamen & alio modo imaginem po-  
 test: si continuitatem discindat, & guttatim dissoluatur. In tali  
 enim iam vapore, nec reflexione, nec refractione, vt antè docui-  
 mus, imago incolumis & tota potest apparere. Sed quomodo hæ-  
 reret, inquires, humor ibi continuus, cum propensior sit infimo nostro  
 aëre? Non est fortasse; etsi sit paullo opacior. Nam Lib. 5. diximus,  
 nubes nondum deciduas, esse leuiiores infimâ aëris regione. Deinde,  
 ubi vapor incipit plus pensi & grauitatis habere, succumbit mol-  
 liter, Paraselenemque aut Pareljum aliquantum vnâ deducit, aut  
 alius è superiori loco vapor succedit, qui imaginem excipiat à præ-  
 cedenti destitutam.

De Virgis, M. Antonius de Dominis negat scire se quid sint. M. Anton.  
*Hanc profecto impressionem, inquit, si ego aliquando vidissem, eam*  
*aliquo pacto conarer explicare. Cum autem mihi ignotum sit, quod sint*  
*Virgæ, ipsarum Propter quid non possum indagare.* Afferit tamen,  
 per reflexionem non apparere: quia non possunt ad vnum punctum  
 in quo est oculus, coire plures radij reflexi, nisi circulariter dispositi. cu-  
 iusmodi figuram non habent Virgæ. sunt enim oblongæ, & linearis  
 formæ. Aristoteles tamen reflexionis filias esse docet, & figuram il- Aristot.

Sen. lib. 1.  
c. 9. Nat.

lam in speculorum longitudines & angustias confert. Et Seneca: *Virga nihil aliud quàm imperfecti arcus sunt. nam facies quidem illis est picta, sed nihil curvati habent in rectum iacent. Fiunt autem iuxta Solem ferè in nube humidâ, & iam se spargente. Itaque idem est in illis qui in arcu color, tantùm figura mutatur: quia nubium quoque, in quibus extenduntur, alia est.*

Igitur M. Antonio reponi potest, à partibus speculi propinquo-ribus & longinquis, nec in circulû compositis, reflexiones in eumdem oculum quandoque redire, vt in Iridis & Coronæ latitudine patet. Linea enim quædam recta est, quæ crassitudinem metitur totius arcûs. Deinde, duæ Irides concentricæ à diuerso radiorum Solarium ordine, & eâdem, vt ostendimus, colorum serie, formari possunt: nec arcus tamen superior cum inferiore in vnum circulum coalescit, licet vterque simul in oculum cadat.

Sen. lib. 1.  
c. 11. Nat.

Fateor tamen alium modum generationis Virgarum magis so-  
lentem esse. De hoc Senecâ: *Aliud quoque Virgarum genus apparet, cùm radij per angusta foramina nubium tennes, intensi distantesque inter se diriguntur: & ipsi signa imbrium sunt.* Tales sunt illæ Virgæ, quas sæpissime Sole surgente, aut succumbente, per rariora quædam nubium interualla in terram vsque trajici, & perpetuò dilata-ri ac dispergi cernimus: cùm agricolæ nostri aiunt, à Sole aquam & alimenta nubium trahi. Hæ etiam, nisi fallor, Virgæ siue bacilli sunt, quos Vitello lib. 10. th. 81. vulgò *funes tentory* appellari di-  
cit. Inæqualitas autem vaporis, cuius partes aliquæ rariores, aliz densiores sunt, eas laciniatim sic dispergit: veluti etiam à variâ opa-  
citate maximâ varietate & maculosissimè colorantur. Colores ve-  
rò isti gratius in aquâ & reflexè, quàm in cælo directè, inquit Ari-  
stoteles, spectantur. reflexio enim omnis debilitat radium, colores-  
que nimis aliàs incitatos paullisper comprimit, aut frangit in viro-  
rem vel purpuram. Hinc etiam nubes omnes in aquâ atiores  
apparent.

Vitell.

Aristot.

Hoc denique addo: Radios illos & *φάσματᾶ*, quæ Sole occaso, imò extinctâ omni crepusculorum luce, & altâ quandoque nocte, in hemisphærium reuibrantur, posse Virgis (et si plerique Trabes vocent) bellè accenseri. Imaginem enim reuerà potius virgarum, linearum diuisione, mentiuntur, videnturque esse radij in vapore circa horizontem fracti, & deinde in hemisphærium nostrum re-  
pulsi: licet in altissimo æthere, & inter ipsos Planetas eleuentur à Rothmanno.

## CAPVT IV.

## De Spectris &amp; Phasmatibus.



Multa præter iam dictas in nubibus tincturæ, tam interdiu quàm internoctu visuntur, quas Aristoteles Aristot. *φάσματα* seu spectra appellat. Ex variâ autem radij astrorum, Solis præsertim ac Lunæ, aut exhalationum etiam incensarum, cum opaco nubium mixturâ nascuntur. Vmbræ etenim, veluti nigredo quædam, candori luminis confusæ, medios infinitâ varietate colores repræsentant. Hinc etiam in ceruicibus columbarum, & pennis pauonum, ex irradiatione Solis, & miscelâ umbrarum quæ inflexione colli & certarum plumarum obiectu resultant, aurum, crocum, purpuram, smaragdum, & omnium colorum antecenitates est cernere. quod adspexit Nero Cæsar, versu illo quem disertissimum laudat Præceptor eius Seneca:

*Colla Cytheriaca splendent agitata columba.*

Sen. lib. 1.  
c. 5. Nat.

Hos tamen colores plumis infixos esse censer M. Antonius. *Ego, M. Anton.* inquit, *permanentes esse, & puto, & sum expertus. videntur tamen emphatisci, id est apparentes, quia non sunt in totâ plumâ, sed in eius particulis: quæ interdum apparent, interdum ex mutatione sitis & positione occultantur, exhibitâ versus oculum aliâ particulâ non coloratâ.* Sed frustra. Non enim sparsim tantum & guttatim per plumarum discreta quædam puncta, purpureæ, aut virides, sed totis etiam ceruicibus tales apparent. Unde etiam maris, nunc virent, nunc flauent, aut purpurascunt (nullo tamen haud dubiè vero colore inherente) prout Solem & à vicino fluctu umbram exceperint. Hinc Poëta vetus:

*Spiritus Eurorum virides cum purpurat undas.*

Favus.

Item alter:

*Verrunt extemplo placidè mare marmore flauo.*

Ennius.

*Carnuleum spumat sale confertâ rate pulsum.*

Vbi cum flauus color viridis & albo mixtus sit, pulcherrimè prorsus spumas *viridis maris, flauo marmore appellauit,* inquit Phauorinus apud Agellium.

Agell. l. 1.  
c. 16.

Hoc igitur lucis & opaci temperamento, *χάσματα* siue hiatus, puteos, sepulchra,

Lucret.  
lib. 6.

*Speluncasque velut saxa pendentibus structas  
Cernimus; ———*

varias etiam brutorum, aut hominum formas, in mediâ aëris regione. Pars nubis quæ plurimum nigri siue opaci habet, profundior & recessisse apparet, quæ verò abundiori lumine hilarescit, propinquior; nisi intellectus sensum corrigat. Si profunditas ingens cum longitudine apparuerit, vocabitur chasma siue hiatus: si rotunda profunditas, erit puteus; & ita in ceteris. Vnde omnia ad hanc imaginem definies: Puteus phantasticus, est meteorum in nube apparens, quod ob variam mixturam luminis cum vaporis opaco, veri putei habet similitudinem, &c.

Aguilon.  
l. 1. Prop.  
41.

Verum, ut iam primulùm animaduerto, Eruditissimus vir Franc. Aguilonius, in pulcherrimo iuxta ac doctissimo Optico opere, colores istos nubium non phantasticos, sed veros, & à lumine separatos affirmat, & probat: quia *proprio corpori insunt, nempe exhalationi qua permixta vaporì unâ cum lumine transparentes. In Iride tamen, Halone, Pareltis, similibusque luminis infractionibus*, inquit postea, *omnino phantasticos seu apparentes esse oportet, cum nulli proprio subiecto insint. neque enim nubi aut aëri connaturales sunt: sed penduli in medio diaphano oberrant, seu extemporanea quadam, uti verè sunt, lucis affectiones, ex certâ quadam radiorum infractione prognata.* Sed profectò rubedo illa aut purpura nubium, non est exhalationi naturalis: aliàs enim maculosissimam, & diuersissimis coloribus imbutam esse oporteret, cum innumeros valeat ostendere. Igitur lumen infusum exhalationum & vaporum mixtim opaco sunt: nec Soleos ostendit tantum, sed facit. Indes etiam vaporì reuerà inhærent, etiam si non à naturâ, sed agente externo, resulent.

Discerniculum tamen aliquod inter Indes, & crepusculorum phasmatumque lumen, antè à me etiam confessum. Nam Indes & Coronæ ex certo situ cerni postulant, phasmata ex quouis possunt. Ratio est, quòd illæ determinatæ ad oculum reflexione, hæc lumen sideris nubilo impluente, & totum instar legitimi & fixi coloris effundente, fiant. Vnde veteres quidam radium nubi sic confusum, non reflexum, aut refractum, sed incorporatum appellant. Talis etiam est radius exceptus Lunâ. Ut autem lux aëstri, aut color in corpore suo defixus, quaquaersum, ubi non se obijcit opacum, radiat: ita eiusmodi lumen cum vapore mixtum, & quasi maceratum. Quomodo verò id accadat, an quia partes mutuâ reflexione se roborent & adiuuent, an quia lux simpliciter



pliciter infusa vim fufficientem habet ad fpargendum radios vndique in orbem, in Libris de Animâ erit enarrandum. Vbi etiam ambigemus, an colores, qui vulgò veri, reuerâ à luce diftinguantur: quod proximi iam fumus ad negandum, cum Platone.

Non placet etiam in Aguilonio, quod iam ftatim difplicebat in M. Antonio: colores illos ceruicum columbinarum, genitiuos effe & naturales iftarum plumarum. Vti nec, aërem naturâ effe ceruleum. nam quod in fublimi & innubi æthere cernimus, non natius aëris color, fed lumen molle fubluftri & femidigefto permiftum opaco eft.

Aguilon.  
ibidem.

# ARTICVLVS I.

*An equites difcurrere, & acies in nubibus belli fimulachra  
ciere naturaliter valeant.*

**I**Nter aëria phafmata recenferi folet Eques difcurrens. & in peculiari difficultate eft hoc meteorum, ob motum quo fæpè non vagè tantum hâc illâc palatur, fed composito paffu aggredi aut impetu videtur affilire hoftem. Interdum etiam acies totæ còcùrrunt,

*Vt fæpè ingenti bello cum longa cohortes  
Explicuit legio, & campo ftetit agmen aperto,  
Directæq; acies, ac latè fluctuant omnis  
Aere remidenti tellus.*

Virgil.  
Georg. 2.

Nec rarò etiam adduntur clamores, ac morantes

*Martius ille aris ranci canor increpat, & vox  
Auditur fractos fonitus imitata tubarum.*

Georg. 4.

Innumera talium fpectrorum exempla funt. vt ante bellum ciuile Marij & Syllæ, ante excidium Ierofolymorum: fed plurima in Germaniâ ab 1524. ad 1548. vifa funt, inquit Philippus Melancthon lib. 2. Meteor.

Melanct.

Sed audi ex Snellio, quid non ita pridem viderint Hollandi. *Tormenta, tubas, fclopetorum difpofitiones, caftorum metationes, atq; alia id genus quàm plurima. Id Amortsfortij, inquit, & alibi vifum: & quidem hand altè fuprà ipfa culmina fectorum. Quin adeò, addit, priusquam claffis Hispanica noftro & Britannico Oceano, inftar Xerxis cuiufdam, vincla & virgas iniectura videretur, anno 1588. memini me admodum puerum à notis & familiaribus, qui etiamnum in viuis funt, audiuiffe, vifas Amftelodami in ipfo aëre, paullo ante Solis occafum, nauium confictus maritimos, impreffiones hoftiles, hos victos, illos*

Snell. de  
Cometâ  
anni 1618.

Macha-  
bæorum.

los victores abire tamquam in puerili nanmachia. idq. vnius aut alse-  
rius hora spatio, multis hominum millibus inspectantibus. Denique  
Sacra Historia lib. 2. cap. 5. Machabæorum, *Consigit, inquit, per  
vniuersam Ierosolymorum ciuitatem videri diebus quadraginta, per  
aëra, equites discurrentes, auratas stolae habentes, & hastas, quasi co-  
hortes armatas, & cursus equorum per ordines digestos, & congregio-  
nes fieri cominus, & scutorum motus, & galeatorum multitudinem  
gladius districtus, & telorum iactus, & aureorum armorum splendorem,  
omnisq. generis loricatorum.* Historiæ veritate sic constitutâ,

Dico, Nubes in formas equorum aut hominum naturali casu  
posse componi; ventis etiam aduersis & reflantibus, speciem con-  
currentium acierum præbere; vel intermicantibus fulgetris & ful-  
minibus, tormentorum nostrorum coruscationes & tonitrua imi-  
tari: multa tamen in historiis illis iam narrata sunt, quæ nullus, nisi  
cerebri & mentis egens, casui tribuat; cum Intelligentiæ alicuius di-  
rectionem & manum nemo homo sanus non videat. Quod etiam  
significatio ipsa satis assent. Nam prælia & cædes certo & respon-  
dente semper præniè euentu præsagiunt. Igitur ex destinato, & à cle-  
mentissimo Patre nostro veniunt, qui pericula ad terrorem, & cæli  
respectum, ostentat, antequam nos inuoluant.

Sed videte, quæso, Atheorum nostrorum hic ingenium, quibus  
vna Philosophia & cura est, Deum & omnem creatam Intelligenti-  
am iugulare. Viderunt, acies illas aërias, compositos & repetitos  
assultus, telorum iactus, & id genus sexcenta, non posse sine stupore  
in casum referri. quid ergo faciant? homines pennatorum Pegaso-  
rum equitatu ibi pendulos & certantes adstruant? Hoc Poëticum  
nimis est. Tamen, negare Deum & Genios qui hos lusus exerceant,  
iam ipsis olim certum & fixum est. Voluptatis enim & scelerum  
interest, non esse, quod vindicet, Numen.

Lucr. l. 3.

*Et metus ille foras præceps Acherontis agendus  
Funditus humanam qui vitam turbat ab imo,  
Omnia suffundens mortis nigrore: neque ullam  
Esse voluptatem liquidam, puramq. relinquit,*

aiunt cum illo Epicuro. Ergo nubilosas illas acies veras, & in su-  
perficie terræ alicubi allidi & assultare existimant, videri autem in  
vapore nubium ceu speculo. Quousque humanam mentem à ra-  
tione alienat impietas!

Virgil.  
Aeneid. 3.

Primò: Militem, nisi planè Polyphemum, & quales illi  
*Aetnai fratres calco capita alta ferentes,*

in

in nube directè hinc, nemo tam Lynceus est, vt adspicere valeat; quantò minùs reflexè, & debilitatà specie tanto speculi intervallo?

Secundò: Vento, vt solet cùm acies illæ concurrunt, spirante, nubes turbant & confundunt suas superficies, ne speculi officium valeant obire.

Tertiò: Non imagines aliquæ, sed ipsæ nubes manifestò in se arietant & mutant locum.

Quartò: Sæpè hæc simulachra visuntur, nullo centenis aliquot circum milliaribus, quòd inaudierimus, commissio prælio. nam futuri, non præsentis, significationem habent. Vt tamen species è terrâ in nubes rosidas illas & speculares iactæ ad nos redirent, obiectum non longè vltra vigesimum milliare Belgicum, oporteret in superficie telluris à nobis distare. Nam vt alibi è Cardano retulimus, in finæ ad horizontem nubes, non multò longiùs decem horariis leucis ab oculo distat sunt. Fac ergo species in eas iaci, & totidem milliaribus in alterum proximum horizontem inde reflecti, si possunt: intra viginti igitur milliana horaria & nostrata stabit tota reflexio. Et licet (quod fortasse verum) nubes horizonti attigux aliquantò longinquiores sint, certissimum tamen est, intra centesimum abhinc milliare conflictus omnes tam insignes, nuntiis differentiibus, statim spargi: & tamen longè citra hoc spatium, conflictum iniri necesse esset, vt imago eius à nubibus resiliiret ad nostrum oculum. Si à vapore etiam horizonti proximo referiretur pugnx species, numquam circa verticem nostrum, phantastica illæ acies præliarentur: apparerent enim vbi est speculum. Sed quid in affaniis istis expungendis, quasi in re seriâ, consumo stilum?

## ARTICVLVS II.

### *De Aurorâ, & Crepusculo.*

**P**hasmatibus nubium adnumerari & crepuscula debent. Crepusculum aut generaliter est lux illa crepera seu dubia (inde enim crepusculo nomen) quæ manè ante Solis ortum nubes circa horizontem colorat, & vespèri post occasum. Crepusculum tamen matutinum nomen proprium Auroræ inuenit, generale crepusculi relictum est vespertino. De quo eleganter Poëta Metamor. 4.

*Iamq; dies exactus erat, tempusq; subibat,*

*Quod tu nec tenebras, nec possis dicere lucem:*

*Sed cum luce tamen dubia confinia noctis.*

Ouid.

Ggg

Cre-

*Creperum* verò valuisse Antiquis, quod *dubium*, patet vel de isto Lucretij versu:

Lucret. l. 3.

*Exaquatq; sunt creperi certamina belli.*

Porro subiectum Auroræ & crepusculi, non solæ nubes, sed omnes etiam halitus supremæ regionis, paullo opaciores, sunt. imò altissimi illi halitus, primi manè induunt Auroram, & vltimi vesperi exuunt crepusculum. Quod enim altius à terrâ eleuantur, eò citius manè radius terræ limbum distringens, eos attingit, & sub noctem tardius, quàm nubes inferiores, deserit. Et hinc Optici è crepusculis, excelsissimorum qui terrâ exhalantur spirituum altitudinem mensurant. Huic autem fini describunt circulum quemdam, infra horizontem, ei parallelum siue vndique æquidistantem, quem crepuscularem vocant: quia, cum manè Sol ad ipsum peruenit, prima Aurora inalbescere incipit; cum vesperi eousque decubuit, nouissima crepusculi lampas, & vniuersæ diei antecedentis reliquæ exstinguuntur. Ptolemæus, Gemma noster, & plures, 18. gradibus, Alhazen 19. Tycho 17. Rothmannus 24. infra horizontem, circulum istum deprimunt. Diuersitas ex eo venit, quod aliqui citius defecisse crepuscula, alij pertinacius mansisse quandoque animaduertentibus, & radios, serà etiam aliquando nocte, in hemisphærium nostrum refringentibus potest, aut halitibus in insolentem ætheris excellentiam, non omni exutâ opacitate, scandentibus, vt Lib. 3. diximus circa materiam Cometarum. Vnde variant etiam paulisper in finiendâ maximâ Auroræ & crepusculorum altitudine Auctores. Posidonius 50. miliaribus, Alhazen, Vitello, & serè passim, 52. Nonius, quem Clavius sequitur, 43. Steuinius noster 41. Bodinus, nimis deparcè, 3. Cardanus prodigè 772. à terræ superficie eleuant. Qui excesserunt, circulum in terrâ maximum, siue terræ ambitum, nimis amplum, in suam demonstrationem assumpserunt: quod Alhazenum & Vitellonem fecisse, notat Gloriosus lib. 2. cap. 2. de Cometis, ideoque potiùs se applicat Steuinio. Gemma autem noster in Supplemento Astrolabij patris, sic terminos ponit Auroræ & crepusculi Louanienfis: Solstitio æstiuo, horâ primâ noctis & 36. minuto Aurora emergere incipit, horâ decimâ vespertinâ & 24. minut. crepusculum se componit. Solstitium Brumale horâ 6. manè & 4. minut. primam lucem fundit, horâ 3. vesperi & 56. minut. nouissimam supprimit. Vtroque æquinoctio horâ 4. & totidem minut. Aurora fores pandit, vespert horâ 7. & minut.

Ptolem.  
Gemma.  
Alhaz.  
Tycho.  
Rothman.

nut. 56. crepusculum claudit. Auroræ & crepusculorum varius & amœnissimus color, sed mirabilior & iucundior Auroræ: tum comparatione noctis iam fugientis, tum quia plures vapores nocte coacti, horizontem & infimum aëra obsident: qui radio Solis primum icti, fluctuare, laxari, & dispergi incipiunt; & nunc purpureos, nunc virides, puniceos, aut croceos colores, prout opacitas compressior fuerit, aut solutior, repræsentant. Hinc Auroram alij purpuream nominant.

— ecce vigil nitido patefecit ab Ortu

*Purpureas Aurora fores, & plena rosarum*

*Atria. — alij croceam.*

*Tithoni croceum linquens Aurora cubile.*

Ouid. 1.  
Metam.

A similitudine etiam flagrantium & punicantium in pudore genarum, Næuius *pudicorem* dixit.

Virgilius.

Sed quare vapores & halitus nubium, inquires, non ita interdicti & meridiano Sole, ut Auroræ & crepusculo, colorantur? Causa una est, quod Sol hemisphærio nostro iam illatus, pluribus radiis & ampliori lumine, nubium opacitatem dissoluat: unde albæ magis apparent, quàm purpuræ. Altera, quod, etsi radius nubes totas non perterebret, reliquam tamen diei circumfusi lumen, tenuem vaporis purpuram suppressit & offuscat. sic enim etiam tincturas siderum in candorem, & reliquam cæli faciem, digerit.

*Et iam Pleias hebet, flexi iam plaustra Bootæ*

*In faciem puri redeunt languentia cæli.*

Lucan. 1. 1.

Quod inde potest probari: quia ubi Sol iam primum supra horizontem totus emerit, Aurora statim purpuram & pudorem abijcit: & si nubilo purgata sit dies, omnia candent ab horizonte ad Meridianum. & tamen Occidentalibus, v. g. Gandensibus aut Brugenibus, adhuc Aurora est, & vapores aliquantum eleuatos, quos nos albentes, ipsi purpureos vident: quia radij, quibus Sol cælum anticipat, ut cum Lucretio loquar, suppresso adhuc ipsis infra horizontem sidere, non tam vbertim oculos perstringunt, ut vmbra eluant, cum quibus lumen Auroræ ad eos venit.

Lucret. 1. 5.

Tertia causa est, quia lux Auroræ per maiorem longitudinem vaporum rorulentorum circa terram hæsitantium, ab horizonte ad nos traicitur. unde magnam colorationis partem à medio rapit. Hæc etiam ratio est, cur Sol in ortu suo rubicundior, quàm Meridie appareat, etsi hic per mediam nubem adspiciatur. quia, inquam, radius terræ superficiem deradens, longam rorantium guttularum

Ggg 2 aciem

aciem pererrat, in quibus sæpieulè offensus & refractus, umbris etiam innumeris implicitus, tandem coloratus emicat ad oculum. E Meridie autem, nec per tot aut tam densos vapores in nos deiicitur; ut proinde pauciores umbras colligat, nec tam sæpè refringatur. quæ verò reliquæ, & pertinaciùs in hæserunt, plenâ illâ & abundante diei luce consumuntur. Et hîc etiam Libelli nostri labor.

In quo, si quid à recto abiuit, à me detortum; vera & concinna ab eo sunt, *qui docet hominem scientiam*. Totum igitur istud ei redde; mihi, ne hilum. Non durâ autem solûm & morosâ viâ, per istas etiam scientiarum naturalium amœnitates, ceu flores quosdam, & semitas virentes, ad Deum nostrum ire possumus; imò debemus: aliàs tempus & vitam, inter meliora & celestibus ac æternis propiora ducendam, perdidimus. Quid enim putatis? Angelos, & beatas illas mentes, in bonis tantûm supernaturalibus, & summis, laudare Creatorem? etiam in naturalibus istis, & infimis faciunt. Imitemur. Vbique enim Magnus & Sapientissimus Opifex sui posuit admirationem; & retia tetendit, quibus nos ad se rapiat, & in cælum. *Per istos etiam oculos, clamat D. Eucherus, in futurum cupiditate magnâ, ex parte raptamur, si admirationem quam ex Mundi contemplatione capimus, retorquamus in ipsum tanta machina Auctorem: aut si cogitemus quantus in posterum splendor lucis possit luminibus occurrere, cum se nunc tantus insinuet; quàm magnifica fulgebis perpetuis forma rebus, cum sis nunc tam speciosa perituris.*

D. Euch.  
Epist. ad  
Valer.



# INDEX CAPITVM

ET

## ARTICVLORVM

### LIBRI I.

De Meteoris in genere.

- CAP. I. *Quid, & quosuplex meteorum.* Pag. 1.  
 CAP. II. *De loco generationis meteororum.* 3.  
 ART. I. *De suprema regionis aëris quantitate.* ibid.  
 ART. II. *De quantitate media, & infima regionis.* 7.  
 ART. III. *De figurâ regionum aëris.* 9.  
 ART. IV. *Qualitates regionū aëris.* 11.  
 ART. V. *Quomodo radius Solis directus non impediatur nubium in mediâ regione concretionem.* 13.  
 ART. VI. *An superior aëris regio raptim calis circumducatur.* 16.  
 CAP. III. *De causâ materiali meteororum.* 19.  
 ART. I. *An ex terra substantiâ etiam resolui possint exhalationes.* ibid.  
 ART. II. *An vapor & exhalatio speciei differant ab elementis grauibz, quibus extrahuntur.* 22.  
 CAP. IV. *De causâ efficiente meteororum.* 24.  
 ART. I. *Georgius Agricola & Lydianus nuntiant ignem subterraneum facere principem auctorem vaporum & exhalationum.* ibid.  
 ART. II. *Defenditur Aristoteles. Agricola & Lydianus reijciuntur.* 26.

### LIBRI II.

De Meteoris ignitis.

- CAP. I. *Materia & forma ignitorum.* 34.  
 CAP. II. *De meteoris ignitis infima regionis.* 35.  
 ART. I. *De Igne fatuo.* ibid.  
 ART. II. *De Castore, Polluce, Helenâ.* 38.  
 ART. III. *De Igne lambente.* 39.  
 CAP. III. *De meteoris ignitis media regionis.* 41.  
 ART. I. *De Dracone, & Stellâ cadente.* ibid.  
 ART. II. *Quis modus generationis fulminis.* 45.  
 ART. III. *Damones non esse, ut plurimum causas fulminum: aduersus Io. Bodinium.* 47.  
 ART. IV. *De fulgure & coruscatione.* 51.  
 ART. V. *Fulminum diuisio.* 52.  
 ART. VI. *De admirandis effectibus fulminum.* ibid.  
 ART. VII. *De lapide fulmineo.* 56.  
 ART. VIII. *Quæ res fulminis obnoxie aut ab eo tute.* ibid.  
 ART. IX. *Causâ tonitruum, Anaxagoras, Seneca, Paracelsi, Bodini, rescilia.* 59.  
 ART. X. *Peripatetica & vera causa efficiens tonitruum.* 65.

Ggg 3

ART.



# INDEX CAPITVM

ART. XI. Cur demum post cornuscationem fulminis, tonitru audiamus. 63.

ART. XII. De effectibus tonitru. 64.

ART. XIII. Tempus, & signa fulminum, ac tonitru. 66.

ART. XIV. Tormentorum nostrorum, & fulminum comparatio. 68.

CAP. IV. De Procellis. 73.

ART. I. Quae causae procellarum. ibid.

ART. II. Procellarum effectus. 74.

ART. III. Praesagia procellarum, & tempestuum. ibid.

CAP. V. De meteoris Supremae regionis aëris. 78.

ART. I. De Caprâ, Trabe, Pyramide, &c. ibid.

ART. II. De Galaxiâ. 81.

## LIBRI III.

### De Cometis.

CAP. I. De loco generationis Cometarum. 88.

ART. I. Cometa quidam caelestes sunt, ex minimâ quorundam parallaxi. ibid.

ART. II. Argumentum parallaxeos frustra elidunt Scaliger, Clavemontius, Galilaeus. 90.

ART. III. Cometa quidam caelestes etiam esse colliguntur, ex motu proprio sub eodem circulo maximo. 93.

ART. IV. Ex ortu & occasu Cometarum colligi, quosdam saltem supremam aëris regionem longe excedere. 96.

ART. V. An Aristoteles Cometâs caelestes, & nonnisi in calo astra quandoque gigni existimauerit. 97.

ART. VI. Cometâs aliquos, sublimares esse. 100.

CAP. II. De materiâ Cometarum. 103.

ART. I. Materiam sublimariam, Cometarum esse terrâ & aqua halitus. ibid.

ART. II. Cometa caelestes, sidera non sunt ex illis mundi coanis. Adversus Chaldaeos, Senecam, Cardanum, Fracastorium. 107.

ART. III. Nec Cometae esse plurimum stellarum se in unam conglomerantium caetus. 109.

ART. IV. Non omnium caelestium, Cometarum materiam esse terrestres halitus. 113.

ART. V. Neque caelestium Cometarum materiam, esse partem fluidi aetheris in nodum contractam & adensatam. 116.

ART. VI. Cometarum caelestium materiam è sideribus foris exhalari. 118.

ART. VII. Quomodo è halitibus caelestibus concinnandi aetherici Cometae. 123.

CAP. III. De causâ formali, efficiente, finali Cometarum. 125.

ART. I. An Cometa aliquid praesigant, & quomodo. ibid.

CAP. IV. De proprietatibus Cometarum. 129.

ART. I. Causa barbarum & villorum in Cometis. 130.

ART. II. In quâ materiâ lux illa cauda Cometarum sustentetur. 133.

ART. III. Causa curvata cauda in Cometis. 136.

ART. IV. De motu Cometarum. 138.

ART. V. De magnitudine, & duratione Cometarum. 142.

ART. VI. Quo tempore anni plures Cometae. 143.

LIBRI IV.

De Ventis.

- CAP. I. De causa materiali Ventorum. 147.  
 ART. I. Materiam venti non esse aerem. ibid.  
 ART. II. Halitum, venti materiam esse. 148.  
 CAP. II. De causa efficiente Ventorum. 149.  
 ART. I. Rarefactionem, aut condensationem, causam efficientem ventorum omnium non esse. Adversus Vitruvium, & Jo. Bapt. Benedictum. ibid.  
 ART. II. Motum venti non proprie fieri repulsi exhalationis à nubibus, ut plerique existimant. 152.  
 ART. III. Angeli non sunt ventorum ordinarios Eoli. Adversus Bodinum, & quosdam alios. 154.  
 ART. IV. Causam efficientem motus ventorum, non esse terræ pulmonem. Adversus Keplerum. 158.  
 ART. V. Ventos gravitate sua in terram desinere, ut torrentes & flumina per alueos. ibid.  
 CAP. III. De causa formali Ventorum. 163.  
 CAP. IV. De causa finali Ventorum. 164.  
 CAP. V. De numero Ventorum. 165.  
 ART. I. Quot, & quibus nominibus recensiti venti. ibid.  
 ART. II. Quomodo Indices ventorum describendi. 167.  
 ART. III. A quo horizonte sumendum initium ventorum. 168.  
 ART. IV. An eodem vento navis totum Orbem circumnavigare possit. 171.

CAP. VI. De Ventis anniner-  
 sarijs. 173.

ART. I. Tempus Etesiarum. 174.

ART. II. Causa efficiens Etesiarum. 178.

CAP. VII. De Ventis Provin-  
 cialibus, Apogeis, & Auris. 180.

CAP. VIII. De proprietatibus Ventorum. 181.

ART. I. Ventorum Septentrionalium qualitates. 182.

ART. II. Ventorum Meridionalium qualitates. 186.

ART. III. Ventorum Orientalium qualitates. 191.

ART. IV. Ventorum Occidentalium proprietates. 194.

CAP. IX. De terra motu. 196.

ART. I. Quæ causa efficiens terræ motus. ibid.

ART. II. Species terræ motus. 201.

ART. III. Quæ loca obnoxia terræ motibus. 202.

ART. IV. De magnitudine, & dura-  
 tione terræ motus. 205.

ART. V. Quæ anni tempora maximè  
 sentiunt terræ motus. 207.

ART. VI. Quæ signa antecedentia  
 terræ motus. 210.

ART. VII. Efficitur terræ motus. 211.

ART. VIII. Timor Numinus causa  
 finalis terræ motus. 216.

ART. IX. Comparatio Cuniculorum  
 nostrorum mulcarum cum terræ mo-  
 tu. 217.

LIBRI V.

De Meteoris aqueis.

CAP. I. De Mari. 223.

ART. I. Quæ origo, & quantitas magni-  
 tudo maris. 224.

ART. II. An terra & mari idem sit  
 centrum. 226.

ART.

# INDEX CAPITVM

- ART. III. De Salsedine maris. 231.  
 ART. IV. Cetera aquae marinae qualitates, & effectus. 237.  
 ART. V. De motu aquationis maris. 241.  
 ART. VI. De libratione, & rapin maris. 243.  
 ART. VII. Historia marini aestus. 247.  
 ART. VIII. Sententiae aliquot beliores, de causâ efficiente marini aestus, reiecta. 253.  
 ART. IX. Luna, princeps causâ marini aestus. Sol tamen etiam in partem aliquam venit. 259.  
 ART. X. Quâ virtute Luna aestum moueat. 263.  
 ART. XI. Quae virtus occidente Lunâ aestum apud nos faciat. 267.  
 CAP. II. De Fontibus. 272.  
 ART. I. De materiâ fontium. 273.  
 ART. II. Quae causâ aquam fontium in scaturigines pellit. Male à Bodino, Comubricensibus, Scaligero, Valesio assignatum. 275.  
 ART. III. Vera causâ quae aquam fontanam deducit ad scaturiginem. 280.  
 ART. IV. Vnde calidi fontes qualitates illam habent? 283.  
 CAP. III. De Fluminibus. 288.  
 ART. I. De fluminum aluuiis. ibid.  
 ART. II. Quâ de causâ Nilus, Niger, Melus, Argenteus, alique flumines sic exundant? 291.  
 ART. III. Quanam aquarum in usu laudatissime. 295.  
 ART. IV. Quid censemus de variis mirabilis aquarum, quae à Scriptoris passim aut sparsim iactantur. 298.  
 CAP. IV. De Rore, Pruinâ, Melle, Mannâ. 302.  
 ART. I. Quae causâ Roris. 303.  
 ART. II. Effectus Roris. 305.  
 ART. III. Pruinâ causâ, & effectus. 307.  
 ART. IV. De filu illius quae D. Virginis appellantur. ibid.  
 ART. V. De Melle. 308.  
 ART. VI. De Mannâ. 310.  
 ART. VII. De Saccharo. 314.  
 CAP. V. De Nube, & Nive. 315.  
 ART. I. Quae causâ nubes in mediâ aeris regione suspendit. ibid.  
 ART. II. Figura nubium circularis est. Aduersus Cardanum. 318.  
 ART. III. De nive, & causis eius. 321.  
 ART. IV. Effectus nivis. 323.  
 CAP. VI. De Pluviâ. 326.  
 ART. I. Quid pluvia, & quomplex. ibid.  
 ART. II. Quam altè aqua pluvia penetrat in terram. 328.  
 ART. III. De pluuio prodigiosis. 331.  
 ART. IV. De uarietate pluuia. 334.  
 ART. V. De Diluuio. 335.  
 CAP. VII. De Nebulâ. 338.  
 ART. I. Quid nebula. ibid.  
 ART. II. Proprietates quadam nebula. 339.  
 CAP. VIII. De Grandine. 341.  
 ART. I. Quid grando, & eius causâ. ibid.  
 LIBRI VI.  
 De Meteoris apparentibus.  
 CAP. I. De Iride Solari. 346.  
 ART. I. Varia Iridum historiae. ibid.  
 ART. II. An Iris reflexione radiorum Solis, an refractione fiat. 348.  
 ART. III. An Iris circularis. aduersus Posidonium, Senecam, Plinium, Bodinum, & alios. 352.  
 ART. IV. An centrum Solis, oculi, Iridis, oporteat semper in eandem lineam rectam incidere. 357.  
 ART.

ET ARTICVLORVM.

- ART. V. *An Iris videri possit maior semicirculari.* 361.  
 ART. VI. *De Iridis altitudine.* 365.  
 ART. VII. *Causa maculosa colorationis Iridis. Aduersus Albertum, Scaligerum, Cardanum, Manrolycum, Vico mercatum, & alios.* 368.  
 ART. VIII. *Quis numerus colorum in Iride.* 372.  
 ART. IX. *Modus generationis secunda Iridis, Alberti, Scaligeri, Vico mercati reuocatur.* 374.  
 ART. X. *Nec Manrolycus, aut M. Antonius, in secundaria Iridis explicatione satis placent.* 377.  
 ART. XI. *Secundariam Iridem reflexione primaria conformari.* 379.  
 ART. XII. *An Iris ultra geminam, & quo colorum ordine apparere possit.* 383.  
 ART. XIII. *De variis Iridis motibus.* 385.  
 ART. XIV. *Locus & tempus Iridis.* 387.  
 ART. XV. *Effectus & significatio Iridis.* 390.  
 ART. XVI. *De Iride Lunari.* 392.  
 CAP. II. *De Halo, siue Corona.* 394.  
 ART. I. *Quis modus generationis Corona. Seneca, Albertus, M. Antonius, reiecti.* 394.  
 ART. II. *Corona proprietates.* 397.  
 ART. III. *Tempus, & praesagia Coronarum.* 401.  
 ART. IV. *De lucernarum Coronis.* 401.  
 CAP. III. *De Parelis, Paraselenis, & Virgis.* 404.  
 ART. I. *An Parelinum lumen Solis nubi impressum sit, an Sol ipse visus in speculo.* 405.  
 ART. II. *Tempus, locus, numerus, proprietates Parelis.* 410.  
 ART. III. *De Paraselene, & Virgis.* 411.  
 CAP. IV. *De Spectris & Phasmatibus.* 413.  
 ART. I. *An equites discurrere, & acies in nubibus belli simulachra cedere naturaliter valeant.* 415.  
 ART. II. *De Aurora, & Crepusculo.* 417.



# INDEX RERVM MEMORABILIVM.



Aër.

**A**ERIS *suprema regio usque ad firmamentum extenditur.* Fol. 6.7

*Mediæ regio, quousque* 7.8

*Cuius figura, secundum vitamque superficiem.* 10

*Infima regio quatenus à terrâ sursum excurreat.* 8.9

*Cuius figura sit.* 9.10

*Aëris qualitates naturales incerta.* 11

*Suprema regio ab Ortum Occasum ducitur, & à quâ causâ.* 17.18

*Mediæ regio non semper frigida & humida.* 11

*Frigoris eius causâ.* 13.14

*Cum in eâ Sol nubium concretionem non impedit.* 13 & seq.

*Infima regio unde præcipue caleat.* 16

*Omnes qualitates primæ vicissim recipi.* 12

*Aër an naturaliter caruleus.* 415

*Inumbratur, unde refrigeretur.* 304

*Aër inter Planetas mæris vocatur ignis.* 3.4

Africus.

*Africi effectus, & violentiæ in Belgium.* 195

Anglia.

*Rarò fulmina sentit.* 67

Antipheton.

*Quomodo in aère, ut speculo, se videtur.* 407

Aqua.

*Aquarum miracula.* 298. & seq.

*Quanam saluberrima.* 295. 296

*Nivalis & glaciæ, in salubris.* 295

*Raritas eius unde exploretur.* 296. 297

*Aquarum abyssus in terrâ quantâ.* 3. 36.

337

*Aqua Gratia comparatur.* 301. 302

Aquilo.

*Non ubique serenus & siccus.* 183

*In cade lignorum observatur.* 182. 183

*Quâ viritate congelat.* 185. 186

*Salubritas eius probatur.* 184

*Noxas tamen etiam habet.* 185

*Nocturnus minus pertinax est, quàm*

*Auster.*

191

Aristoteles.

*An Alexandrum veneno sustulerit.*

299. 300

Arteria.

*Sani hominis quoties horâ singulari micet.* 63

Auster.

*Noxa eius probatur.* 189

*Flante eo, facilius venatio.* 190

*Temperem eius aër occyssiimè sentit.* ibid.

*Spiritus Deorum vocetur.* 188

B.

Bacilli.

*Quomodo fiant.* 404. 411. 412

Belgium.

*Halinitro & materiâ fulminum non caret.* 31. 32

*Temperies eius defenditur contra Cardinum.* 238. 239

*Terræ motum cum rarò sentiat.* 203.

204

*Cum Fæderlandt dicatur.* 230

Bombardæ.

*Quando, & à quo reperta.* 68

Bulimia.

*Cum duntaxat in nunc ambulantes innu-*

*das.* 325

Callor

# INDEX RERVM MEMORABIL.

C.

Castor & Pollux.

Picti aliquando in narium puppi.

38.39

Causse eorum, ac effectus.

38

Color.

Circuleus appareat in fornice celi.

135

An vernus in pennis pamonum, & col-  
lumarum cernicibus.

413

Cometæ.

Quidam celestes.

88.89

An Aristoteli cogniti.

97. & seq.

Quidam etiam sublunares. 100. & seq.

Celestes solo fere parallaxeos argumen-  
to firmiter asseruntur.

95

Probanitur tamen etiam ex morâ supra  
horizontem.

96 97

Sublunares ex halitu terra & aqua.

103.104

Quidam flammari, quidam Sole im-  
mum persusilucet.

104 105

Celestes ex quâ materia, varie senten-  
tiæ.

107. & seq.

Ex sideribus exhalati.

118. & seq.

Non sunt causa turbationum sublu-  
narium, per naturalem sympathiam.

128

Color unde, & figura.

129

Barba, vel canda unde.

130

Cur à Sole aversa.

131

Cur quandoque discissa in plures ra-  
mos.

132

Unde curvetur.

136.137

Canda materia.

133. & seq.

Cur animmo potissimum visantur.

143.144

Qualis eorum motus.

138.139

Magnitudo, & duratio quantæ.

142.143

Motus cur in fine detortus instar coch-  
leæ.

145

Quomodo species una Cometa in aliam  
transseat.

132.133

Corona.

Quanta diametri.

394.395

Quot simul apparere possint

400.401

Corona motus.

401

Quorum siderum, & temporum sint.

401.402.

Coronarum lucernarum cum sidera-  
libus comparatio.

402.403

Coturnices.

Vnde anno 1619. in Belgio rarissime.

177

Crepusculum.

Quomodo ab aurora differat.

417

Subiectum eius.

418

Cur etiam interdum coloratum appareat.

419.420

Circulus crepuscularis ubi descriptus.

418

Cuniculi.

Militares quomodo cõsistendi.

218.219

Comparantur cum terra motu.

219.220

Item cum granatis.

221.222

Usus eorum in mari.

222

Cuniculorum quis inuentor.

218

D.

Diluvia.

Famosa tria.

335

Diluvia generali unde illa aquarum  
copia.

335. & seq.

Dioptricus tubus.

A quo, & quando inuenitur.

112

Draco volans.

Non animal, ut vult Paracelsus, sed ex-  
halatio ignea.

41

Eius motus, & figura.

42

Pestilentia signum.

42 43

Dracones veri, quidam alati, nulli cri-  
stati.

42

E.

Etelæ.

A quâ causâ efficiantur.

178

Cur somnulosi.

ibid.

Interdum cur precipue spirent.

179

Tabella eorum ætнологica.

174.175

Hbb 2

Austra-

# INDEX RERVM

<i>Austales quando flare incipiunt.</i>	177	<i>Diversus color unde.</i>	ibid.
<i>Eucharistia.</i>		<i>Fontis Spadani laus.</i>	186
<i>Eius cum manna comparatio: &amp; Christi specie humana in ea apparentis recens historia.</i>	312.313	<i>Fulmina.</i>	
<i>Eutipus.</i>		<i>Ex qua materiâ.</i>	45
<i>Quoties astuet.</i>	251.252	<i>Motus &amp; generatio.</i>	47
<i>An in eum semiserit Aristoteles.</i>	252	<i>Vnde accendantur in nube.</i>	46.47
<i>Exhalatio.</i>		<i>An fiant vi plurimum per demones.</i>	47. & seq.
<i>Quomodo è terra superficie educlta, ventus &amp; ignis meteoris sufficiat.</i>	29	<i>Cur tanto impetu è nube erupant.</i>	48.49
<i>Ex mari etiam, &amp; terra innumbrata ex- trahitur.</i>	30.31	<i>Cur deorsum, &amp; non sursum ferantur.</i>	49
<i>F.</i>		<i>Vix unquam sine pluvia.</i>	49.50
<i>Fila D. Virginis.</i>		<i>Eorum divisio.</i>	51
<i>Quid &amp; unde.</i>	307.308	<i>Miri &amp; varij effectus.</i>	52. & seq.
<i>Flumina.</i>		<i>Altiora cur magis feriant.</i>	57
<i>Quae astuent è in marino.</i>	250	<i>An laurum &amp; alia à quibusdam ex- empta feriant.</i>	58
<i>Quadam alia exundanti instar Nili.</i>	293.295	<i>Dormientes quomodo minus quam vi- gilantes feriant.</i>	55.56
<i>Eorum materia.</i>	273	<i>E fulmine vanum est augurari.</i>	67
<i>Rapiditas unde.</i>	289. & seq.	<i>In fulmine &amp; tempestate cur campana apud Christianos pulsentur.</i>	77
<i>Alvei quâdo &amp; à quo excavati.</i>	288.289	<i>Fulminis &amp; nostrorum tormentorum comparatio.</i>	68. & seq.
<i>Qua maxima.</i>	289	<i>A fulgure quomodo differant.</i>	51
<i>Fontes.</i>		<i>A nube fulminante distantia terra vn- de mensuretur.</i>	63.64
<i>De fontium materiâ varie sententiae.</i>	273	<i>Fulmineus lapis qualis &amp; unde.</i>	56
<i>Verior Aulioris.</i>	274.275	<i>G.</i>	
<i>Quousque possint emicare.</i>	275.276	<i>Galaxia.</i>	
<i>Qua cause in scatirigines pellant, va- riae opiniones.</i>	275. & seq.	<i>Variae opiniones resellae.</i>	281. & seq.
<i>Vera causa.</i>	280. & seq.	<i>Non est pars Firmamenti perpetua &amp; densior, sed ex innumerabilibus stel- lulis zona intertexta.</i>	84
<i>Aqua eorum vnde non falsa.</i>	281	<i>Candor in quo praeclis subiecto.</i>	85
<i>Vena sublaentis signa.</i>	280	<i>Figura, &amp; cur extra Tropicos amplior, quàm intra.</i>	85.86
<i>Vnde aliquando exarescant.</i>	281	<i>Quadam segmenta etiam alyscali par- tibus extra famosum illum circulum dispersa.</i>	86
<i>De eorum origine quid senserit Aristot- eles.</i>	282	<i>Ei quid simile in capite Orionis &amp; Prae- sepy, non in Pleiadibus, &amp; cur.</i>	85
<i>Quidam puri &amp; sine sapore, quidam sapore medicati.</i>	283	<i>Globus.</i>	
<i>Quidam vnde caleant, varia opiniones.</i>	283.284.	<i>E tormento reliâ excussus quomodo tem- pore</i>	
<i>Verior.</i>	284. & seq.		
<i>Frigidi medicati qualitatem illam vnde trahant.</i>	286.287		
<i>An transferant, &amp; unde.</i>	287		



MEMORABILIVM.

pore ad Firmamenti fornecem per- tingeret.	144	Itis.	
Grando.		Eius cognitio difficilis.	345
Quid, & eius causa.	341. 342	Pris duplex.	ibid.
Magnitudo & figura.	242	Eius varia & pulchra hystoria.	346.
Noxa, & remedia superstitiosa.	343.	& seq.	
344.		Cur circularis, aliorum explicatio.	
Cur facilis liquefeat quàm mix.	343.	352. 353.	
H.		Auctoris sententia.	353. & seq.
Horizon.		Tota arcu, & tota nubes torrida cur non fulgeat simili luce cum Iride.	354.
Visibilis quantà diametro.	168. 310	& seq.	
Hortus.		Alia reflexa, alia refracta.	357. 358
Possibile, qui tota etiam hieme olera & fructus ferat.	12. 13	Artificialis qua.	360
I.		Eius centrum an semper idem cum cen- tro Solis & oculis eadem rectâ lineâ.	
Ignita meteoia.		357. & seq.	
Quà materia & formâ.	34	Refracta Iridi quomodo nubes dispo- nenda.	361
Quadam non vera, sed tantum ap- parentia.	34. 35	Semicircularis apparet.	361. 362
Ignis fatuus.		An quandoque maior semicirculo.	
Nomina & causa.	35	363. 364.	
Cur diu non videantur.	35. 36	Altitudo qua.	365. & seq.
Vnde saliat.	36	Colores qui, & vnde, variorum opinio- nes:	368. & seq.
Vbi, & quando conspicitur soleas.	ibid.	Mens Auctoris.	371. 372
Vnde fugiat, vel sequatur, vel ad preci- pitia ducat.	36. 37	Eius colores quos.	372. 373
Vnde sibilat.	37	Irides quos simul apparere possint	374
Ignis subterraneus.		Iris secunda quomodo generetur, varia sententia:	374. & seq.
Esse probatur.	24. & seq.	Mens Auctoris.	379. & seq.
Quam frequens & quàm aliis subter- rà.	28	Iris secunda cur tam rara.	381. 382
An potissima causa vaporum & exha- lationum.	27. & seq.	An plures duabus, & quo colorum or- dine apparere possint.	383. 384
Ignis lambens.		Varymorus.	385. 386
Quis & cuius omnis.	39	Tubo visa cur amittat coloratione	387
Noctu, & quandoque diu etiam appa- ret.	39. 40	Eius locus & tempus.	ibid. & seq.
Iraos & vinolentos facile allambit.		Effectus & significationes.	390. & seq.
40		Iris ex refractione & reflexione rady fit.	349. & seq.
Quandoque apparet sine flammâ & vero igne, & quomodo.	40. 41	Iridis Lunnaris cum Solari conuenientia & disconuenientia.	392. & seq.
Intellectus.		Lunnaris cur variior Solari.	392. 393
Humani in omnibus ferè caligat, non tamen idè mortali.	137. 138	Lunnaris unicolor, non tamen semper.	
		393. 394.	

# INDEX R E R V M

- L.**  
*Limburchi Ducatus.*  
*Totius Belgij locus eminentissimus.* 339  
**Lamen.**  
*Oculi quando & quomodo videantur.* 403.404  
**M.**  
*Magnes.*  
*Aliquis ferri inimicus aneo vasi sup-  
 positus, ramenta ferri in furorem &  
 aestum agit.* 270  
*Manna.*  
*Quid, & an adstringat vellaxes.* 310.  
 311  
*Meteorologica an eiusdem speciei cum  
 manna Hebraeorum.* 311.312  
*Eius cum S. Eucharistia comparatio.*  
 312  
**Mare.**  
*Eius & freti definitio.* 223.224  
*Quando, & quomodo creatum.* 224  
*Eius & terrae superficies in magnitudi-  
 ne quomodo comparentur.* 224.  
 225  
*Profunditas minor terrarum.* 225.  
 226  
*Eius & terrae an idem centrum.* 226.  
 & seq.  
*Mare salsum, non omne tamen aquae  
 salsum.* 231  
*Fundus an dulcor superfacie.* 232  
*Salsedo eius unde: iuxta Aristotelem.*  
 ibid.  
*Vera causa.* 234  
*Salsedo unde tam constanter conseruetur.* 234. & seq.  
*Diversus color unde.* 236  
*Salsedo an in aqua, an halim aquis  
 confuso.* 236  
*Mare aestate, & sub Torrida cur sal-  
 suum.* 236.237  
*Marina aquae variae qualitates &  
 effectus.* 237. & seq.
- Marinam aquam quomodo sibi possis  
 facere.* 240  
*Quomodo cadauera & alia expellat.*  
 240.241.  
*Morui aequationis quis, & à qua  
 causa.* 241. & seq.  
*Morui librationis quis & unde.* 243  
 244  
*Mare an ab Ortum in Occasum morui  
 rapius desinat.* 244 & seq.  
*Mare Balticum etiam quandoque  
 ab Austro in Septentrionem moveri,  
 & unde.* 243  
*Mediserranei morui quasi circularis  
 unde.* 244  
*Mare sub Zona torrida ab Ortum in  
 Occasum ferri, unde.* 245.246  
 Martinus aestus.  
 Cur eius non meminerit Aristoteles?  
 245  
*Maria in diversa morui quomodo  
 compossibiles.* 249  
*Mariae quae non aestuent.* ibid.  
 & quae aestuent. 249.250  
*Aestus quantum durent.* 251  
*Aestus insolentes unde.* 252  
*Aestus causa obscura.* 253  
*Variae opiniones allatae & reiectae.* 253  
 & seq.  
*Veram causam esse Lunam.* 259  
*Explicatur per puncta fluxus & re-  
 fluxus.* 260. & seq.  
*In aestu Lunam etiam adiuuat Sol.*  
 262  
*Aestum quā virtute Luna efficiat.*  
 263.264  
*Sententia Auctoris.* 265.266  
*Aestum quā virtute occidente Luna  
 apud nos faciat.* 267. & seq.  
*Mare vinum aut mortuum quando.*  
 260.  
*Maria cur residant Luna à culmine  
 cali per secundum quadrantem dela-  
 bente.* 270.271  
 Mel.

# MEMORABILIVM.

Mel.  
An ab apibus fiat. 308  
In imo cur optimum. 310  
Eius causa, effectus, species & differentia. 308. & seq.

Meteora..  
Eorum causa formalis & efficiens. 14  
Divisio. 2  
Locus. 3  
Etymon & definitio. 1  
Materia. 19  
Ascensum à terrâ quousque. 4  
Unde nocturnum, etiam in sphaerâ stantem appareant. 32  
Meteora apparentia quid. 345  
In supremâ regione unde fiant. 78  
Meteori supremæ regionis species explicata. 78. & seq.

Meridionales populi.  
Magis melancholici & iracundi Septentrionalibus. 184

Milites discurrentes.  
An naturaliter sic appareant, & contra Atheos. 416. 417  
Eorum historia. 415

Montes.  
Altissimi qui, & quousque ascendunt. 5. 6

Mures.  
Mures & ranas ex pulvere & aquâ calesti posse conformari. 339. 331

N.  
Nautis.  
An sponte ad Aequatorem, & dein semper sub coferantur. 94. 95

Nebula.  
Definitio & causa & species. 338. 339  
Proprietates. 339. 340  
Per nebulam res visa, an & cur remotior appareat. 340

Nix.  
Definitio & causa. 321. 315  
Cur mollior quam pruina. 322  
Tempus lapsum, & locus. 322. 323

Effectus. 313. & seq.  
Candor unde. 326  
Frigidando vino commodè estate servatur. 323. 324

Nivis esu an corni aut bestia candidentur. 324  
Cur nubes non semper prius in pluviâ, quam in niuem resoluantur. 321. 322  
Nilus.

Quâ lege exundet. 191. 192  
Exundationis causa obscura. 291  
Variorum causa, cum veriori opinione. 292. 193

Nubes.  
Eius causa. 315  
Unde in aëre suspendatur 315. & seq.  
Figura circularis. 318. 319  
Nubes unde videantur ascendere, etsi verè non ascendant. 319  
Qua videtur horisonti incumbere, quousque ultra sit. 319. 320

Nuces.  
Anellatarum copia cur signum fertilitatis arborum. 323  
Nuptiae.  
Quo vento spirante celebranda ex mente Aristotelis. 193

O.  
Oculus.  
Per planam superficiem quousque possit prospicere. 310  
Tiberij oculis unde in tenebris summantur. 40. 41

Opacitas.  
A densitate quomodo differat. 316

P.  
Paradisus  
Eius planities non supra mediam regionem aeris. 11

Parallaxis.  
Quid, & quomodo innuatur. 88. 89  
Eius doctrina an incerta. 92

Parafelene.  
Qua numero & duratione. 411  
Parelius.

# INDEX R E R V M

<i>Parelius.</i>		<i>Pulvis tormentarius.</i>	
<i>Etymon &amp; definitio.</i>	404	<i>Vnde, &amp; quis quibus tormentis conne-</i>	
<i>Tempus, locus, &amp; numerus.</i>	410	<i>mat.</i>	70
<i>Significatio.</i>	ibid.	<i>Pulvis autem quis, &amp; quomodo ful-</i>	
<i>Parelius, an lumen Solis nubi impres-</i>		<i>minet.</i>	71
<i>sus.</i>	405	<i>Pueri.</i>	
<i>Vel Solipse reflexione, ut in speculo, vi-</i>		<i>Cur eis ploratum permitti suadeat Ari-</i>	
<i>sus.</i>	406. & seq.	<i>stoteles.</i>	164
<i>Phasma.</i>		<i>R.</i>	
<i>Species, &amp; definitiones.</i>	413. 414	<i>Radij luminosi.</i>	
<i>Vnde appareat.</i>	413	<i>Tres species explicantur.</i>	348. 349
<i>Eius ab Iride differentia.</i>	414. 415	<i>Robigalia.</i>	
<i>Pleiades.</i>		<i>Robigalia &amp; Floralia qua sacra, &amp;</i>	
<i>An sex, an septem stella.</i>	89. 90	<i>quorsum.</i>	306
<i>Polares Regiones.</i>		<i>Ros.</i>	
<i>Malè à Valesio temperatiores circumpo-</i>		<i>Eius causa.</i>	303
<i>centibus statuntur.</i>	32. 33	<i>Ex quantâ altitudine decadat. ibid.</i>	
<i>Pluvia.</i>		<i>Quo tempore anni &amp; quo venio deci-</i>	
<i>Eius causa.</i>	326	<i>dat.</i>	303. & seq.
<i>Gusta quâ figurâ.</i>	327	<i>Definitio.</i>	305
<i>Species.</i>	ibid.	<i>Effectus varij.</i>	305. 306
<i>Aqua pluvia quàm aliè terram pene-</i>		<i>S.</i>	
<i>tres.</i>	328. 329	<i>Scaldis.</i>	
<i>Prodigiosa qua &amp; quales.</i>	331. & seq.	<i>Antuerpia an vno toto die fuerit sine</i>	
<i>Rubra vel lactea vnde.</i>	331. 332	<i>aëre, ut vult Keplerus.</i>	253
<i>Pluvia qua cruces rubrae vestibus inus-</i>		<i>Cum Oceano sapias exundantis.</i>	253
<i>sit.</i>	331		254
<i>Pluisse quandoque carnibus, lanâ, lapi-</i>		<i>Septentrionales populi.</i>	
<i>dis, non visula.</i>	332. 333	<i>Cur salubriori &amp; vinaciori corpore</i>	
<i>Potest etiam rari.</i>	333	<i>quam Australis.</i>	183
<i>Pluvia descensum in terram, radices</i>		<i>Sidera.</i>	
<i>arborum, &amp; vim calorificam Solis</i>		<i>Perinde ac calos materia sublimari com-</i>	
<i>ferè congruere, &amp; cur.</i>	329. 330	<i>flare.</i>	119
<i>Signa pluvie vel frigoris diuturni an fe-</i>		<i>Eorum exhalationes in pluvias aut</i>	
<i>sta S. Marini, Marci, &amp; Purifica-</i>		<i>ventos non abire.</i>	121
<i>tionis dies.</i>	328	<i>Eorum granitas qua.</i>	121. 122
<i>Procellæ.</i>		<i>Detrimentum &amp; mutilationem al-</i>	
<i>Earum causa.</i>	73	<i>quam patiuntur.</i>	110. 121
<i>Species explicantur.</i>	ibid.	<i>Nova in celo visa.</i>	89. 90
<i>Effectus.</i>	74	<i>Sol.</i>	
<i>Pruina.</i>		<i>Cur non ita balneis suis exspiret ut</i>	
<i>Eius definitio, causa &amp; effectus.</i>	307	<i>alia astra.</i>	123
<i>Filatum quomodo ex arboribus depen-</i>		<i>Stringens horizontem etiam aëre puris-</i>	
<i>deat.</i>	ibid.	<i>simo cur supra appareat.</i>	317
		<i>Stella</i>	

# MEMORABILIVM.

## Stella cadens.

*Quid significet.* 44

*Quomodo comparetur ad fulmen & nostros ignes pyrobolos.* ibid.

*Celo sereno, de die non nisi quandoque videtur.* ibid.

*Cadentis & discurrentis differentia, motus generationis modus, quantitas.* 80. 81

## Sonus.

*Soni species cum in tempore ad aures permeant.* 63

## Subsolanus.

*Unde semper spires in mari intra Torridan.* 246. & seq.

*Cur sub Auroram & mane spirare solent.* 247

## Sulphur.

*An in aquis ardeat.* 285

## T.

## Tertia motus.

*Causse efficientes variae.* 196. 197

*Verior sententia.* 197. & seq.

*Species quae & quot.* 201

*Magnitudo & duratio.* 205. & seq.

*Tempus.* 207. & seq.

*Signa futuri.* 210. 211

*Effectus varii cum historiis.* 211. & seq.

*Terra motus serè semper causa petitis, quomodo?* 215

*Effectus optimus & finis principalis est timor Numinis.* 216. 217

*An formices difficultius soluant.* 202

*Quae loca magis vel minus ei obnoxia.* 202. & seq.

*Atlantidis insula an eo verè absorpta.* 213. 214

## Tonitru.

*Varia causa refutata.* 59. 60

*Vera causa.* 61

*Diuisio & specierum explicatio.* 61. 62

*Cur serius percipiatnr quàm fulmẽ.* 63

*Effectus eius Physicus, sola eius species.* 64

*Effectus vulgò habitis plures numerantur & explicantur.* 69. & seq.

*Tonitru & fulminis tempus & signa.* 66. 67

## V.

## Vapor.

*Vnde sursum ascendat.* 33

*Etiã remissè sepe factus eleuari potest.* 31

*Vaporis & exhalationis descriptio explicatur.* 19

*Vapor humidus extrahitur.* ibid.

*Vapor & exhalatio ordinariè manent, eiusdem speciei cum corporibus ex quibus extrahuntur.* 22. 23

## Venti.

*Ventorum scientia obscura.* 146

*Causse iuxta Aristotelem.* ibid.

*Materia.* 147. & seq.

*Causa remotè efficiens.* 149

*Causa proxima, aliorum sententia.* 145 & seq.

*Quandoque Angeli causse ventorum, non tamen ordinariè.* 154. & seq.

*Motus deorsum causa.* 158. & seq.

*Forma.* 163

*Essentialiter moventur, non accidentaliter.* 163

*Vititates.* 164

*Noxe.* 165

*Venti quot, & unde spirent, & quomodo nominentur.* 165. 166

*Ventorum indices describendi modus.* 167

*Ventorum initium à quo horizonte sumendum.* 168. 169

*E quanto intervallo ad nos permeant.* 169. & seq.

*In remoto maiores plerumque quàm in propinquo, & cur.* 170

*Idem an nauem per totum orbem circumuehere possit.* 171. 172

*Annexsary quæ & unde spirent.* 173

# INDEX RERVM MEMORABIL.

<i>Pronunciales qui, &amp; ex quâ causâ.</i> 180	<i>quibusdam tractibus.</i> 195
<i>Apogai &amp; aura qui dicantur &amp; unde.</i> 181	<i>Venus.</i>
<i>Proprietates generales.</i> 181. 182	<i>Anno 1625. Solari &amp; puro meridie visaprimum ab Antagipiensibus.</i> 44
<i>Septentrionalium proprietates.</i> 182. & seq.	<i>Vrina.</i>
<i>Meridionales unde calidi &amp; humidi.</i> 187. 188	<i>Vrine quomodo quidam multò plus reddider, quàm in cibum potumque insumpsit.</i> 233
<i>Occidentalium proprietates.</i> 194. 195	<i>Z.</i>
<i>Orientalium qualitates &amp; effectus.</i> 191. & seq.	<i>Zephyrus.</i>
<i>Venus quâdam speciales proprietates in</i>	<i>Zephyri nomina &amp; proprietates.</i> 194
	<i>Zephyrina ona, &amp; eque an sine mare solo Zephyro generentur.</i> 194. 195.



## APPROBATIO CENSORIS.

**H**ÆC LIBERTI FROMONDI S. Th. L.  
& Philosophiæ Professoris primarij in  
Gymnasio Falconis Academiæ Louanienſis  
METEOROLOGICA, velut promulſis quæ-  
dam reliquæ Philoſophiæ quæ in eâdem Aca-  
demiâ cùm ab illo tum ab aliis prælegitur, ſtu-  
dioſo rerum ſublunarium indagatori propi-  
nata, ex quo vtilia dulcibus miſcent, & lon-  
gè quàm antehac exactiùs Argumentum il-  
lud ſublime aliàs, & ſuſpenſa detinens inge-  
nia, pertractant; omne punctum mihi ferre  
videntur, quæcum fructu & voluptate mul-  
torum prælo committantur, & luce donen-  
tur. Actum Antuerpiæ in Seminario Episco-  
pali XII. Maij, anni M. DC. XXVI.

LAVRENTIUS BEYERLINCK  
*Canonicus & Archipreſb. Eccleſiæ Ca-  
thedralis Antwerp. Librorum Cenſor.*



## S V M M A   P R I V I L E G I I.

**P**HILIPPVS IV. Hispaniarum Rex Catholicus, Potentissimus Belgarum Princeps, diplomate suo fanciuit, nequis intra sexennium *Liberti Fromondi S. Th. L. Collegij Falconis in Academia Louanicensi Philosophiæ Professoris primarij Meteorologicorum Libros sex* typis excudat, aut alibi terrarum excusos, in has Inferioris Germaniæ ditiones importet, venalésve habeat, citra Balthasaris Moreti (cui suam facultatem Auctor impertiuit) consensum. Qui secùs faxit, confiscatione librorum & aliâ graui pœnâ mulctabitur: vti latius patet in litteris datis Bruxellæ xx. Augusti M. DC. xxvi.

Signat.

| Steenhuyse.

ANTVERPIÆ,  
EX OFFICINA PLANTINIANA  
BALTHASARIS MORETI.

M. DC. XXVII.



